

Wali Sana, Tanaya, 1955, #124
Katalog

Katalog # : 124

Titel : Wali Sana

Versi : Tanaya

Tahun : 1955

Image : Wali Sana, Tanaya, 1955, #124

Tipe : Ketikan

Bentuk : Tembang

Bahasa : Jawa

Aksara : Latin

Ikhtisar : Islamisasi dan perkembangan Islam di Tanah Jawa oleh para wali. Dimulai dari cerita Seh Maulana Ibrahim, seorang ulama dari tanah Arab keturunan Rasulullah. Ia diangkat sebagai anak oleh Raja Kiyen di Campa, selanjutnya diangkat sebagai menantu, dinikahkan dengan putri raja bernama Retna Dyah Siti Asmara. Cerita pertemuan dan perbincangan Seh Malaya dengan Nabi Kilir. Dilanjutkan cerita Seh Walilanang yang berputra Raden Satmata. Cerita Seh Iskak datang ke Jawa dan memberikan ajaran kepada Raden Satmata, kisah Raden Patah, kisah Sunan Giri sampai berdirinya kerajaan Islam di Jawa yaitu Demak. Selain itu ada pula Suluk Malang Sumirang, dan nama-nama walisanga serta orang-orang yang berperan dalam penyebaran Islam di Jawa.

Kata kunci : jawa, jawi, ketik, sejarah, tembang, sekar

Data digital :

1. Wali Sana, Tanaya, 1955, #124 (Pupuh 01-11). Arsip dan Sejarah | Umum #1410.
2. Wali Sana, Tanaya, 1955, #124 (Pupuh 12-25) . Arsip dan Sejarah | Umum #1411.
3. Wali Sana, Tanaya, 1955, #124 (Pupuh 26-38) . Arsip dan Sejarah | Umum #1412.
4. Wali Sana, Tanaya, 1955, #124 (Pupuh 39-57) . Arsip dan Sejarah | Umum #1413.

Deskripsi

Judul

Luar : Wali Sana (Babadipun Parawali)

Dalam : -

Lain : -

Sub-judul : -

Bagian dari : -

Memuat : -

Series dari : -

Penyusun

Jumlah : 1 dari 2

Peran : Pengarang

Peran ref. : Sutrarja kang sumudyapti

Nama depan : Ki

Nama belakang : Patrapradjaka

Kedudukan : -

Lokasi : Gandhekan (Surakarta)

Tanggal : Buda Wage, 28 Djumadi'lawal, Jimakir, (kêmban warna ngèsthi janmi = 1842 A.J.) [Rabu, 15 Mei 1912 A.D.]

Sebelumnya 1 2 Berikutnya

Jilid

Jumlah : 1 dari 1

Jilid # : 1

Series ref. : -

Jilid titel : -

Penerbit : Sadubudi

Tempat : Solo

Tanggal : 1955

Edisi ref. : -

Print ref. : -

Halaman : 229

Gambar : -

Kosong : -

Sumber

Jumlah : 1 dari 1

Sumber : Yayasan Sastra Lestari
Katalog : 124
Tipe media : Fotocopy
Ukuran : 32.3 x 21.3 cm.
Ukuran teks : 17.1 x 11.5 cm.
Fisik : -
Kertas : -
Rusak : -
Tulisan : -
Penomoran : 229 + xv
Digitisasi
Transkripsi oleh : -
Digitisasi oleh : Yayasan Sastra Lestari
Tanggal : Jan 1999
Sumber : Yayasan Sastra Lestari #124 Fotocopy

Wali Sana, Tanaya, 1955, #124 (Pupuh 01-11)

Katalog : Wali Sana, Tanaya, 1955, #124

Sambung :

1. Wali Sana, Tanaya, 1955, #124 (Pupuh 01-11). Arsip dan Sejarah | Umum #1410.
 2. Wali Sana, Tanaya, 1955, #124 (Pupuh 12-25) . Arsip dan Sejarah | Umum #1411.
 3. Wali Sana, Tanaya, 1955, #124 (Pupuh 26-38) . Arsip dan Sejarah | Umum #1412.
 4. Wali Sana, Tanaya, 1955, #124 (Pupuh 39-57) . Arsip dan Sejarah | Umum #1413.
- R. Tanojo

WALI SANA (BABADIPUN PARAWALI)

Wali 8 bermusyawarat

--- [0] ---

...

--- [0] ---

WALISANA

Cariyos pangajawinipun para Wali saking tanah 'Arab, ngantos dumugi adêgipun Karajan Islam ing tanah Jawi.

Miturut babonipun lami seratan tangan

Katiti dening R. Tanojo

Penerbit & Toko Buku "SADUBUDI" Solo 1955

--- [0] ---

...

--- 1 ---

WALISANA

1. Sinom

1. manuhara roning kamal | lir winidyan mamarsudi | wuryaning ruwiya
tama | sanityasa analêsih | ngawêri wartèng nguni | karasikaning
kêkidung | mrih krêtarta ring gita | sutrarja kang sumudyapti | Ki
Patraprajaka ing kampung Gandèkan ||

2. rumêsêp ngingsêp carita | gancaring kang para wali | mêmarah
manatagama | mangka pandoming dumadi | nguni ingkang ngadani |
angrêngga yogyaning lagu | Jêng Sunan Giripura | kang jumênêng kaping
kalih | pan kinarya lantaraning pralampita ||

3. lumantasing kasunyatan | tumatar marta martani | rumahabing
pangastawa | saparasdya mamarsudi | ngalap mangulah ngèlmi |
sakadaring dadya tuduh | lamun kabul kabuka | kinarilan ing Hyang Widi |
sinung ilham kêni kinarya dêdamar ||

4. mangka lajêring carita | Sang Sèkh Molana Ibrahim | pandhita tanah ing
Arab | maksudi[1] agama suci | gêng ibadat ing Widi | prastawèng saliring

kawruh | ambêk santa santosa | parimarma ing kaswasih | mula mula
têtalêring Walu'Allah ||

5. kasêmbuh labêt kalabdan | kamin kamuman lèluri | saking Kangjêng
Rasulu'Allah | pati pastikaning bumi | panutaning dumadi | nartani titah
sadarum | sinuhyun puji puja | sesining rat mangastuti | pan kinarya baku
baboning bawaana ||

6. ri mangkana kacarita | Sang Sèkh Molana Ibrahim | duk lagya andon-
lêlana | sêmu amêmasuh budi | praptèng Cêmpa nagari | sarju arjaning
praja gung | angasokkên sarira | dadya kondhanging pawarti | lamun
wontên molana [mo...]

--- 2 ---

[...lana] trah Rasulu'Allah ||

7. sidik jatmika sambada | cahya dumilah nêlahi | mratandhani trahing
wiryas | tan antara kapiyarsi | pramudyaning nagari | nênggih Maha Prabu
Agung | jêjuluk Raja Kiyan | kanugrahan amarêngi | Sèkh Ibrahim
tinimbangan ing ngarsendra ||

8. kinarênan ing wardaya | samana ingambil siwi | mring Raja Kiyan ing
Cêmpa | datan sah ing sari ratri | saya tumanêm ing sih | wasana ingambil
mantu | dhaup lan putrinira | warnane ayu linuwih | apanêngran Rêtna
Dyah Siti Asmara ||

9. lêtari apalakrama | rakêt sih-sinihan kalih | tan ana sangsayanira | ing
antara lami-lami | apatutan kêkalih | priya samya bagus-bagus | cahya
nuksmèng sasangka | pan sampun sinung wêwangi | mring kang rama
Dyan Santri Ali wastanya ||

10. kang anèm Rahadyan Rahmat | wau ta satriya kalih | pinundhut putra
ing eyang | mangka asrining jro puri | kasêmbuh amarêngi | putranira
Sang Aprabu | Cêmpa Narpa Taruna | garwanira anggarbini | praptèng
masa mbabar putra mijil priya ||

11. nulya pinundhut ing eyang | sampun sinungan wêwangi | Dyan Alim
Abu Hurerah | kinadangkên wayah kalih | katri dinarmi-darmi | ugunganira

ingungung[2] | wusnya samya diwasa | sinrahkên ing Sèkh Ibrahim | katri
kinèn mêmulang agama mulya ||

12. ri sampuning kasambadan | maksuding agama suci | katam
sarahsaning kitab | wêgig widagdèng pambudi | alim mangulah ngèlmi |
santa kaninditan putus | rinaja rajaputra | karêm andon ing asêpi | duk
samana antuk warta bêbaratan ||

13. lamun pramèswarinira | sri narendra Majapait | punika kaprênah uwa |
kadanging ibu sayêkti | dadya satriya kalih | kait rêmbag

--- 3 ---

sabayantu | lan ari naking sanak | Dyan Alim Abu Rerahi | atêtinjo mring
uwa mangèstu pada ||

14. ri sampuning abipraya | budhalan saking nagari | entare tanpa
wêwarta | mring rama ibu dènnya nis | praptèng têtèmbing jaladri | sira
wong agung katêlu | mangu-mangu ing lampah | dening kalangan jaladri |
sanalika ruwêt kaworan sungkawa ||

15. pra samya mangenggar-enggar | sêsambèn mangudi-udi | raryan ing
têtèmbinging parang[3] | tandya waspadèng pangèksi | palwa layar lumaris
| punika nangkoda agung | amot barang dagangan | gramèn saking liyan
nagri | dhasar sêdya bêbara mring nagri Cêmpa ||

16. suka wong agung katiga | praptaning kang palwa grami | cipta sêdya
kasêmbadan | dènnya ngajap angajawi | tan antara wus prapti |
giyotaning nangkoda gung | mêrak radèn katiga | daut jangkar ngimbir-
imbir | wus antara budhal dèdaganganira ||

17. têlas sajroning baita | wus anêdhêng masa ratri | sira rahadèn têtiga |
samya manjing jroning kèci | kang tunggu langkung ajrih | ana ruweya
kang rawuh | kengis labêting wirya | radyan katiga ndhawuhi | hèn ta juru
palwa payo lakokêna ||

18. mring laladan tanah Jawa | ki juru umatur aris | dhuh anggèr radèn
katiga | pun patik kalangkung ajrih | sarèhning tiyang alit | yogi sumêne
rumuhun | dhatêngirèng juragan | kawula darmi nglampahi | jangji
sampun lêganing rêmbag sumangga ||

19. ngandika Rahadèn Rahmat | apa suwe anèng ngriki | ènggone bêbara dagang | juru palwa matur aris | prasasat amung mampir | pëndhak dintên nuntên laju | wangsul lampah baita | njajah liyan praja malih | abêbathon mangèsthi ing bathi kathah ||

20. wau ta Rahadyan Rahmat | matur ing Dyan

--- 4 ---

Santri Ali | paran sakecaning rêmbag | punapa inggih ngêntosi | kang raka ngandika ris | bêcik asarèh rumuhun | aja anganiaya | dêksura akarya nisthip | kudu nganggo têbah têmbung krana lila ||

21. marang kang darbe baita | supaya padha lêstari | nambung ngling Alim Bu Rerah | lêrês ing karsa sayêkti | nadyana lampah sandi | sampun akarya ru-biru | êruning sama-sama | suwawi ngingsêda dhingin | Radèn Rahmat jumurung rêmbaging kadang ||

22. katiga minta aksama | dènira angrêribêdi | dumunung dalêming palwa | Ki Juru suka ing kapti | dupi wus pëndhak ari | Ki Juragan prapta gupuh | ngirid barang dagangan | Ki Jurupalwa wêwarti | jroning palwa kanggènan satriya tiga ||

23. sêdya maring tanah Jawa | dèrèng dangu dènnya warti | kasaru radèn katiga | lajêng mijil amanggihi | samya satata linggih | Ki Juragan dahat ndhêku | wrin pasang sêmunira | lamun têdhaking linuwih | wus kacipta yèn Satriya di ing Cêmpa ||

24. Dyan Santri Alim ngandika | kyai praptaningsun iki | manawa padha karênan | ingsun arsa angribêdi | dhapur anumpal kèli | nunut lakuning parau | têkakna bumi Jawa | Ki Juragan duk miyarsi | sanalika kingkin kalingkungên ing tyas ||

2. Asmaradana

1. Ki Juragan matur aris | dhuh radèn nuwun aksama | pun patik atur pawartos | kawula botên katênta | mopo sarèh andika | kauningana pukulun | mênggah lampahing baita ||

2. badhe lajêng dhatêng Mêsir | yèn kamping tanah Jawa | punika dhapur
anyêngklèng | prasasat wangsul ing lampah | Dyan Santri Ali êngah |
ngrêrapu ing kadangipun | yayi karo narimaa ||

--- 5 ---

3. durung kaparênging Widi | katuju tanjaning sêdya | bêcik sarèh salintire
| lantaran karana Allah | matur Rahadèn Rahmat | ngayubagyèng kadang
sêpuh | myang Radèn Alim Bu Rèrah ||

4. ya ta Radyan Santri Ali | ngandika maring Juragan | Kaki yèn têtên
kalêke | sayêkti ingsun narima | mung jumurung pujyarja | lêstarining
lampah laut | nanging yèn nora sanyata ||

5. pêpajarira ing kami | yêkti Allah paring tandha | mêngko ana wahanane
| ri sampunira mangkana | sira Kyai Juragan | dagangan kamoting prau |
wusning samêktarsa mangkat ||

6. narik jangkar layar rakit | palwa tan sagêd lumampah | angin tan ana
kêndhate | wau ta Kyai Juragan | langkung prihatinira | kèndêle ponang
parau | wus acipta ing wardaya ||

7. yèn alate radèn katri | kinomandaka[4] ing warta | wasana sêdya
ngalap sor | mituruti ing sakarsa | nadyan tuna ing lampah | sêdya akarya
têtulung | supadya dadya kasidan ||

8. lampahe palwèng jaladri | ri sampunira mangkana | Ki Juragan mudhun
alon | marêk rahadèn katiga | dhepe-dhepe ndhêdhepa | anor-raga
nêmbah matur | dhuh dhuh sirahing-nastapa ||

9. sèwu nuwun pangaksami | lêpata ing ila-ila | tulah sarik kawulane |
kamipurun doracara | ngetung petang pituna | mburu untung badhe
buntung | baita tan sagêd kentar ||

10. baya badhe sothal-sathil | amèt badhe angalênthar | pan ababar
panimbale | yèn jênêk anèng satanah | daganganing sudagar | upami
gêthuk mathuthuk | kêmba ngabar tan kajambar ||

11. ing mangke anggèr pun patik | sumanggêm karsa-paduka | ulun sagah
ndhatêngake | dènniyarsa tindak ngajawa | suwawi manjing palwa | radèn
katiga jumurung | kanthi paring pangaksama ||

--- 6 ---

12. wus kêrid minggah ing kèci | mungging pajangan talundhag |
juragan dahat ajrihe | manggèn kapara ing ngandhap | matur
sumanggèng karsa | dagangan-amba sadarum | bilih wontên kang
kinarsan ||

13. ingkang pèni rajapèni | mas sêsotya nawarêtna | kawula dhatêng
sumaos | ngandika radèn katiga | bangêt ing panarima | eklasing sih
kadarmanmu | nanging dudu kang sun-sêdya ||

14. iya ingsun nora luwih | njurungi sakajatira | nggonira nggaota gêdhe |
Allah sipat kamurahan | asih ing samak basar | yèn têmên-têmên tinêmu |
kataman utamanira ||

15. tabêriya gawe bêcik | marang wong kang kasusahan | yêkti gêdhe
ganjarane | pujine nênarik bégja | nggampangakên pangarah |
sumujuding rèh rahayu | alêstari istingarah ||

16. Ki Juragan duk miyarsi | sabdanira dyan katiga | têka tumunjêm
driyane | sangsaya jrih sungkêmira | kê nèng jêmparing sabda | rumasuk
sarasanipun | rubêt rubeda kababad ||

17. dadya aturira aris | sira Kiyai Juragan | dhuh anggèr -anggèr rahadèn |
mugi ulun awignyaa | ngangge wasitot ma [5] katamana ing mangastu |
astuti santa santosa ||

18. botên langkung ulun mangkin | dêksura tadhah dêduka | mugi
sajarwaa jatos | sintên paduka punika | dene maksih taruna | mumpuni
ambêk dibya nung | sinung mangunah karamat ||

19. nabda Radèn Santri Ali | hêh kaki kawruhanira | ingsun iki satuhune |
wutah gêtih nagri Cêmpa | kawayah Raja Kiyani | iku talêr saking ibu |
sudarmèngsun saking Arab ||

20. apan Molana Ibrahim | têdhake Jêng Rasulullah | Dyan Rahmat
kadang-ngong anom | tunggal saibu sarama | dene Alim Bu Rerah |

--- 7 ---

iku iya ariningsun | prênah kadang nak-ing sanak ||

21. iya saking ibu-mami | padha wutah gêtih Cêmpa | wus manjing kadang
saêros | karana pinundhut putra | Jêng Eyang Rajêng Cêmpa | tutur-ngong
samono iku | aywa kabyawarêng kathah ||

22. awit lunganingsun iki | nilipakên wong sapraja | dadya laku anarojong |
marmane sira dèn bisa | amot wadi sinuksma | lawan aywa dangu-dangu |
palwa nuli angkatêna ||

23. Ki Juragan duk miyarsi | sabdane ri sang minulya | sidhakêp dangu
anjomblong | marêk sarya ngèstu pada | alon ing aturira | lamun makatên
pukulun | sang kalih Gusti-kawula ||

24. amba tiyang nagri Mêsir | wasta Juragan Du'ljatal | mangke kang
ingimanake | tiyang ing Mêsir sadaya | agami Rasulullah | mangka tuwan
têdhakipun | Gusti Panutaning Jagad ||

25. pantês lamun ngaji-aji | anêmbaha botên ical | labêt sawabe
pêpundhèn | awas tumêkèng akherat | pinunjung puji puja | radèn kalih
ngandika rum | wus aja kadawa-dawa ||

26. payo umangkat tumuli | Ki Juragan tur sandika | undang sakarèh-
rèhane | tanggap para juru palwa | wusnya samêkta mangkat | palwa
kêras lampahipun | antuk angin sawatara ||

27. ri mangkana palwa prapti | laladan tanah Kamboja | Ki Juragan sêdya
rèrèn | angèbèrakên dagangan | wus wantuning sudagar | lali mèlike
katungkul | tan ngelingi kabêcikan ||

28. Ki Juragan aturnya ris | dhuh Radèn Sirahing-tapa | alim-paduka
kêmawon | kawula badhe tumimbal | kèndêl tanah Kamboja | wit nggèning
juragan agung | pados barang sade barang ||

--- 8 ---

29. Radèn Santri anauri | jangji nora pati lawas | ingsun iya njurungake |
apa ing sakarêpira | sayêkti tan suwala | kadaringsun wong anunut |
anumpal-kèli kewala ||

30. Ki Juragan matur malih | dhuh anggèr dèrèng kantênan | pan sampun
pandamêlane | juragan asaba paran | ngalaya tanah-tanah | pan dèrèng
kenging katêmtu | enggal lamine ing lampah ||

31. yèn paduka drêng-ing galih | inggih paringa prabeya | ingkang dados
imbalane | supados tan kapitunan | dènira dagang layar | yèn tan
makatên saèstu | prêlu mêtêng kajêng-kula ||

32. pados kauntungan dhingin | sampun tuna bêtêrahan | sagêd cucuk
kangèlane | wau ta duk amiyarsa | sira radyan katiga | laju jumurung
sakayun | nanging ngêmu rêngating tyas ||

33. rumaos yèn dèn cidrani | pinakewuh puwa-puwa | karênanira pralente
| ri sampunira mangkana | baita lajêng mangkat | kinêraskên lampahipun |
sêdya mring tanah Kamboja ||

34. wau ta Rahadèn katri | tansah sungkawa ing driya | dènnya kacuwan
sêdyane | kalawun-lawun nêng paran | anut rêh-ing juragan | wontên
dhêndhaning Hyang Agung | dumunung mring Ki Nangkoda ||

35. palwa sinêrang ing angin | rêmuk kajêntus ing karang | kèrêm
sadagangan kabèh | Ki Juragan sarawangnya | sirna kalêban toya | sira
rahadyan katêlu | marmaning Allah raharja ||

36. rinaksa dèrènging pasthi | katiga wus munggèng dharat | nêng
luhuring parang sigrong | tan pègat maca istigfar | yayah kadi supêna |
para juragan gung-agung | ing Kamboja sami prapta ||

37. sêdyarsa amitulungi | mring kang kasrang

--- 9 ---

kasangsaran | nanging tan ana mapolèh | dangu awas pandulunya | yèn
saluhuring karang | wontèn wong anom katêlu | cipta kang darbe punika ||

38. baita kèrêm ing warih | nulya samya pinaranan | marang wong
Kamboja kabèh | sira rahadèn katiga | binakta maring wisma |
panganggêpe atêtulung | mupu papa kawlasarsa ||

39. tinanya purwaning nguni | dènnya nandhang kasangsaran | palwa
ngantos kabilahèn | saure radèn katiga | sinandi ing wacana | yêkti
tibaning bêtêndu | pan saking karsaning Allah ||

40. sang parasdya tanya malih | pundi asale ing tanah | andika dagang
anêmbe | wontèn ing tanah Kamboja | dèrèng sêpta kulina | sang
kaswasih lon sumaur | saking nagari ing Cêmpa ||

41. sêdya maring tanah Jawi | amartuwi prasanakan | inggih ngiras ngaro
gawe | angêmbara dagang layar | dhatêng ing tanah-tanah | ngêrês
kamiwlasên dulu | pra nangkoda ing Kamboja ||

42. tinanya namanirèki | katiga sajarwèng nama | ananging sandi trah
ngisor | rêmbaging para nangkoda | badhe asung pawarta | maring
pangagênganipun | karananing kasangsaran ||

43. sêdhêng arêrêp rumiyin | sang kawlasarsa katiga | mêmulya
sapakolèhe | wusnya saarjuning rêmbag | sanggyaning daniswara | rêrêm
rahadèn katêlu | tansah andandang wigêna ||

3. Dhandhanggula

1. enêngêna kang lagya kaswasih | sira wau wong agung katiga | pinupu
juragan gêdhe | kinarênan ing kayun | jinurungan sakapti-kapti | warnanên
nagri Cêmpa | ing samurcanipun |

--- 10 ---

nênggih rahadèn katiga | rama ibu myang eyang dahat rudatin |
katongton kararantan ||

2. dupi sampun ing antara ari | amiyarsa warta bêbaratan | saking
nangkoda liyane | yèn wontên palwa rêmuk | anarajang marang ing
têmbing | tanah nagri Kamboja | kang nunggang sadarum | myang
daganganira samya | kang arobah alus-alus bangsa pèni | sirna tanpa
kukupan ||

3. radèn katiga anumpal-kèli | anut palwane nangkoda dagang | kang
kênèng sangsara gêdhe | nanging maksih rahayu | anèng tanah Kamboja
nagri | samya tinawan karang | dene sêdyanipun | samyarsa mring tanah
Jawa | alêlana ngiras têtinjo martuwi | karaharjaning uwa ||

4. gupuh lajêng anduta sang aji | anglêlari ing wayah katiga | amawa
palwa ge-age | yèn kapanggih rahayu | para raja satriya katri | gya kinèn
anglayarna | lênging sêdyanipun | baita cundhaka mangkat | ing lautan
lêpas palwa antuk angin | ènggalirèng carita ||

5. radèn katri pan sampun kapanggih | anèng tanah laladan Kamboja |
samya sukèng sadayane | kasambadaning kayun | lajêng samya minggah
ing kèci | sagung para juragan | sumujud pudya yu | sidane lampah
samudra | sang parasdya katanêm kataman ing sih | sinaman panarima ||

6. wusing layar lêpas antuk angin | kang tinilar wong tanah Kamboja |
mangu tyas gègêtun kabèh | sêm kasêngsêm kadulu | ing suwarnanira
sang katri | lir koncatan sêsotya | saking dèrèng tutug | karêm karênaning
prana | kapugutan ing sih sah-e sang kaswasih | susah mangado ngêsah ||

7. kang alayar samana wus prapti | laladaning tanah ing Palembang |
wong agung katiga rèrèn | angrêrêmakên laku | lan miyarsa katuring
[katu...]

--- 11 ---

[...ring] warti | yèn pangagêng ing Plembang | maksih kadangipun |
gèndhèng cènèng saking uwa | nênggih Prabu Brawijaya kang mancêri |
anama Arya Damar ||

8. saking Ni Endhang Sasmitapuri | pangrêmbene Sang Sri Brawijaya |
marma mampir amartinjo | ing karaharjanipun | palwa kèndêl rahadèn
katri | têdhak saking baita | dharat lampahipun | warnanên Sang Arya
Damar | duk samana garwanira amarêngi | ambabar mijil priya ||

9. warnanira sakalangkung pêkik | pan andhatêngakên gara-gara |
pratandha gêng darajatê | gêtêr patêr gumuntur | orêg bumi agonjang-
ganjing | warsa drês salah masa | aprahara ribut | lindu ping pitu sadina |
brahalane wong Palembang bosah-basih | ajur sawalang-walang ||

10. tidhêm dhêdhêt tandhaning dumadi | kêkês tistis mar-mar ing
wardaya | dupa [6] tan antara suwe | gara-gara gora gung | surut sirêp
parêng barêsih | sumilak katon padhang | tan antara dangu | wontên
cahya diwangkara | cumalorot gumilang-gilang nêlahi | saking ing
antariksa ||

11. ngalad-alad gêngira sawukir | jabang bayi ingkang dinawuhan |
maratani sarirane | sirnaning cahya luhung | wus rumambah ing jabang
bayi | ramebu duk umulat | langkung suka ngungun | ya ta wau Arya
Damar | tyas karênan kasok lumunturing kang sih | kadya putra priyangga
||

12. jabang bayi wus sinung wêwangi | dening kang rama Sang Arya
Damar | Radèn Praba panêngrane | wong Palembang sadarum | agung alit
miwah jalwèstri | prapta asung bêbingah | ing sakadaripun | myang pêpuja
pangastawa | tan antara wontên wadya tur upèksi | kalamun katamiyan ||

13. janma katri warnanira pêkik | sêmunipun darahing [da...]

--- 12 ---

[...rahing] awarya[7] | alim-alim busanane | Sang Arya Damar gupuh |
mêthuk lajêng angacarani | mring wong agung katiga | gya satata lungguh
| wusnya rêrêm sawatara | Arya Damar sumungsung pambagya manis |
dhuh sang tigas kawuryan ||

14. katri sintên sinambat ing wangi | lan ing pundi asal sangkanira | paran
kang dadya sêdyane | kêsdu asih martamu | sang katiga sandi ing warti |

ngakên santri ngumbara | bêbara sapurug | sêsambèn adagang layar |
lênging sêdya samyarsa mring tanah Jawi | kawêntar karta arja ||

15. praptèng laladan Palembang ngriki | dumadakan kumêdsu parasdya |
amartamu têpang sae | kasêmbuh amirungu | mangkya mêngtas adarbe
siwi | tur pasihaning Allah | têngbe dadya baku | pêpanutaning agama |
Arya Damar suka dênira miyarsi | sabdaning tamunira ||

16. dene kawangwang kalamun sidik | sang katiga waskithèng wacana |
sangsaya agêng kurmate | Sang Arya Damar gupuh | animbali garwanirèki
| Sang Raja Putri Cina | tan adangu rawuh | sang arya alon ngandika |
anuwuna sabdonga tamu kang prapti | sêmuné auliya ||

17. Rêtna Subanci lajêng mangarsi | sung pambagya raharjaning lampah |
tanggap ingkang sinaruwe | tangkis wacana arum | sapraptane samya
basuki | kêsdu apawong mitra | sang rêtna anuwun | ya ta ri Sang Arya
Damar | anrahakên putra ingkang mêngtas lair | sinuyuna pudyarja ||

18. wong agung katiga anangapi[8] | gantya-gantya mangku Radèn Praba
| sinêbul-sêbul êmbune | karênan tyas andulu | ing warnane rahadèn bayi
| pan wong agung katiga | ngêmpèk ngambil sunu | ramebu kalangkung
suka | lan pra tamu manjing pawong mitra jati | dahat pangupajiwa ||

--- 13 ---

19. Arya Damar pan pinrih anunggil | anêtêpi ing agami Islam | datan
lênggana sapakèn | kalawan garwanipun | sampun anut tunggil agami |
têkwan sawadyabala | sadaya samya nut | pangrêhe ri sang dhatêngan |
pan inganggêp guru awal praptèng akhir | sumungku sungkêmira ||

20. ri sampuning Dyan Arya sarimbit | manjing Islam putra Radèn Praba |
winêwahan parabane | mring Radèn Rahmat wau | nênggih Radèn Patah
wêwangi | Dyan Santri Ali nulya | maringi jêjuluk | apêparab Radèn Kasan |
Radèn Alim Abu Hurerah maringi | Rahadèn Yusuf nama ||

21. Arya Damar sagarwa nahidi | ngayubagya yogyaning katiga |
dumadya pangastawane | wasiyat akarya yu | ri sampuning antara ari |
pamit ri sang katiga | andugyakkên kayun | dênnyarsa mring tanah Jawa |
Arya Damar sagarwa dahat bondhèti | rêhning dèrèng alama ||

22. dèrèng dugi gènnya karênan sih | sang katiga tan kêna ingampah |
dadya samya jumurunge | kaprasidaning laku | nulya budhal wong agung
katri | Arya Damar sawadya | nguntapkên ing guru | umiring maring
muhara | pan wong agung katri lajêng nitih kèci | minta mit para siswa ||

23. Arya Damar sawadya njurungi | ri sampuning samêkta umangkat |
palwa ambabar layare | kang kari kaping | yayah kadi kapugutan sih |
sahe lan gurunira | cipta dèrèng tutug | pangungsêding kawruh byakta |
kawarnaa lampahe wong agung katri | palwantuk angin kêras ||

24. sampun praptèng laladan jaladri | paminggire tanah pulo Jawa |
ingandhêgakên lakune | datan antara dangu | minggah dharat wong
agung katri | palwa wangsul alayar | rèhning wusing prêlu | warnanên
radèn

--- 14 ---

katiga | sapraptane nagari ing Majapait | njujug ing Kapatihan ||

25. amarêngi ing ari Rêspati | pinanggihan Patih Gajahmada | tinanya
sangkan prênahe | myang aran sêdyanipun | nêmbè prapta ing Majapait |
wau radèn katiga | prasaja ing atur | sêdya ran sangkaning prênah | Patih
Gajahmada suka duk miyarsi | sowan maring ing pura ||

26. praptèng byantarèndra matur aris | dhuh pukulun amba tur uninga |
wontên wong prapta anêmbè | katri taruna bagus | pangakêne ulun takèni
| saking nagari Cêmpa | têturutanipun | kawayah ing Raja Kiyan |
pulunannya Pramèsuari Dwarawati | talêring asal silah ||

27. kang satunggal Sri Mudha mancêri | apanêngran Alim Abu Rerah |
dene kang kalih putrane | Dyan Siti Asmarèku | kang asêpuh Dyan Santri
'Ali | kang anèm Radèn Rahmat | wau ta sang prabu | suka ing
pamiyarsanya | myang kang garwa Pramèsuari Dwarawati | praptaning
pra taruna ||

4. Sinom

1. sakala nuduh parêkan | lajêng kinèn animbali | para pulunan katiga |
duta tur sêmbah gya mijil | tan dangu sampun kerid | sira wong agung

katêlu | mring dalêm datulaya | prapta byantarèng narpati | asadhepok
dahat nganorakên raga ||

2. tandya mangsah ngaras pada | gantya-gantya angramuhi | Sang
Aprabu Brawijaya | myang garwa sang pramèsuari | tyas karênan
mangaksi | warnaning pulunanipun | nimbali para putra | samya kinèn
amanggihi | kadangira nak-ing sanak nêmbè prapta ||

3. para putra gurawalan | marêk ngarsaning rama ji | dupi sarèh sawatara
| sri narendra sung pambagi | kaharjane sang katri | miwah karahayonipun
| marsêpuh myang pra warga |

--- 15 ---

kang anèng Cêmpa nagari | turing putra katiga suka narima ||

4. kasêmbuh lunturing sabda | Pramèsuari Dwarawati | rumakêt narik
katrêsnan | myang kadang sêpuh jalwèstri | sêngsêm rumêsêp ing sih |
buja-kramane lumuntur | lumintu paramarta | kanohan amikênani | suka
rêna samya karênaning prana ||

5. sri narendra saha garwa | kasok kapasukan ing sih | maring pulunan
katiga | tan kêna sah siyang ratri | nanging cuwaning galih | dene atmaja
katêlu | sanès agaminira | ri mangkana antara ri | sri narendra karsa
langên paramèyan ||

6. anggêbyagakên badhaya | Sarimpi rinêpèn gêndhing | kidung
pangudang para dyah | layu-layu nganyut ati | karya sêngsêm pangaksi |
karsanira sang aprabu | minangka pasugatan | putra kang anêmbe prapti |
dumadiya pangenggar-enggaring driya ||

7. nanging wong agung katiga | tan dadya rênaning galih | ing lêlangên
kawibawan | miyat badhaya Sarimpi | tyas pêpêt manaputi | tan pêgat
sami tangawut | Sang Prabu Brawijaya | wrin sêmune sambang liring | yèn
kang putra katiga sêmu sungkawa ||

8. myat kang alêlangên taya | ri sampunira saari | bubaran para badaya[9]
| kukud lèngsèr kang sarimpi | lajêng kasaput wêngi | kang samya sewaka
murud | maring pakuwonira | warnanèn sri narapati | lan kang garwa
mungwing dalêm dhatulaya ||

9. tansah pulunan katiga | sang nata ngandika aris | maring atmaja katiga
| he kulup ingsun- tingali | tyas mangêmu rudatin | ing mêngko paran
karsamu | yèn ana kang pininta | sayêkti sun-pituruti | payo anggèr sira
tutura prasaja ||

10. ature putra katiga | dhuh jêng uwa sri bupati | bilih kaparêng ing karsa
| mangkya jêng

--- 16 ---

uwa sarimbit | anunggila agami | kalawan amba pukulun | mêmuri Islam
mulya | nabêt tabèk para nabi | apan suci karênan karana Allah ||

11. jroning kitab pira-pira | pan sampun tundhuk ing tafsir | agunging
darajatira | kamulyaning para nabi | labêt saking nglêluri | agêming
agama luhung | marma paduka uwa | karsa anênimbang budi | botên
langkung sampun kirang pangaksama ||

12. wau ta duk amiyarsa | narendra ing Majapait | aturing pulunanira |
mêtêk kapêtêk ing galih | pêpêt mêtêt naputi | ewuh-aya rêh ing kayun |
lamun lajêng anuta | lingsêm jênênging narpati | kurang mantêp kang wus
têtêp tinêtêpan ||

13. dadya atangkis wacana | maring pra pulunan katri | kulup bêtêr
aturira | nanging rasaning tyas-mami | mêngko ingsun tan apti | ngingkêdi
agamaningsun | ingkang wus kalampahan | linuri linuri-luri | pra lèluhur
linuhur kaananira ||

14. dene kaya agamanta | ingsun pan ora mancèni | pêpancènè sowang-
sawang | sêsarênganing aluwih | êmbuh ingkang patitis | têtêse dènnya
mrih putus | buntasing kanyatahan | tatapanitining pati | jêr mangkono
kang kinênan kuna-kuna ||

15. tandha wahanane ana | padha kocap jroning tulis | sida sidining
Kabudan | dènirandon ing kadadin | upama sun anampik | agamaning pra
lèluhur | ing mula-mulanira | kang wus padha dèn ranggoni | dadi mokal
bêbakal kaliru akal ||

16. jujul wuwul katariwal | asungsang buwana balik | anambuhi ingkang
ana | ingkang tan ana dèn incih | eman wus dèn têtêni | laku kang
kalakon iku | ilanga tan kawilang | sêsulang kang wus dèn liling | alimana
ywa dadya cugêting nala ||

--- 17 ---

17. para pulunan katiga | lêngêg kala amiyarsi | panggah puguhing kang
uwa | narendra ing Majapait | dadya ciptaning galih | pan wus karsaning
Hyang Agung | beda kabudayanta | bêtja bêtjane kang lali | luwih bêtja
kang eling lawan waspada ||

18. kèndêl ature mring uwa | angandhar-andhara ajrih | kapidahwèn
andêdawa | kadaut datanpa kardi | rubeda ngrêribêdi | sumendhe rêh ing
Hyang Agung | nging paduka kang uwa | Pramèswari Dwarawati | sinung
ilham anut agamaning putra ||

19. pan wus manjing Islam mulya | kawênangan imam suci | kang raka Sri
Brawijaya | jumurung ingkang sudyapti | malik melik agami | ya ta wong
agung katêlu | nahidi ingkang uwa | Pramèswari Dwarawati | dènya
kêdu anut ing agama Islam ||

20. ri mangkana sarêng enjang | para pèpulunan katri | samya sinung
pasanggrahan | acakêt lan dalêm puri | amung lêt sacapuri | rinaksa
dening wadya gung | dahat sinuba-suba | wau ta wong agung katri | tan
alami sami pamitan ing uwa ||

21. rumasa datan karasan | anèng nagri Majapait | karana tan sarawungan
| kang samya nunggil agami | supêk raosing galih | marma kêdah arsa
mantuk | maring nagari Cêmpa | kang uwa dahat mambêngi | taksih
onèng kawulangun onèngira ||

22. myang katuju ing pawarta | lamun ing Cêmpa nagari | mangkya
manggih karisakan | kasor prang lan Natèng Koci | dadya wong agung
katri | kèndêl ardayaning kayun | têtah ngêmu sungkawa | kang uwa
tansah ngrêrapih | ngaring-arang ingêngimur manuhara ||

23. salêjarirèng wardaya | ing siyang pantara ratri | sira wong agung
katiga | tan pègat mangun ngabêkti | dupi ing antara ri | karsanira sang
aprabu | pra pulunan katiga |

--- 18 ---

samyarsa winangun krami | rèhning sampun sami katingal diwasa ||

24. sampading panggustinira | sri narendra animbali | Sang Arya Teja ing
Tuban | atmajane katigèstri | lamun saarjèng kapti | katiga pindhah
kapundhut | sêdyarsa pinipanggya | antuk pèpulunan katri | ingkang
saking têtalêring nagri Cêmpa ||

25. sirarya Teja ing Tuban | sumanggèng karsa narpati | ri sampuning
abipraya | kaiting rêmbag sang kalih | marêngi sajuga ri | sri narendra
adhêdhawuh | mring Patih Gajahmada | sarèhning karsa winisik | sanalika
lajêng kabyawarèng kathah ||

26. undang samêkta ing karya | sanggyaning para bupati | gumyah samya
makajangan | saundha sabilik-bilik | rinarêngga sarwa sri | pradangga
manguyu-uyu | rinaras kêkidungan | layu-layu nganyut ati | ri mangkana
sawusnya ngidaki dina ||

27. pinanggihakên anulya | wau ta wong agung katri | kalawan putri
katiga | kinancuh-kancuh sarimbit | Rahadèn Santri Ali | antuk Dyah Rêtna
Maningung | dene Rahadèn Rahmat | kêkancuhaning apanggih | nênggih
lawan Rêtna Siti Dyan Manila ||

28. Rahadèn Alim Bu Rerah | panggih lan kadang wuragil | anama Rêtna
Sadasar | langkung gêng bawahanèki | ingkang uwa sarimbit | myang
para kadang sadarum | sumuyud suka rêna | panggihing pangantyan katri
| myang marsêpuh suka hyun-hyunên amulat ||

29. mring radèn mantu katiga | pantêse jajar sarimbit | lawan para
putrinira | saengga sêkar sarakit | prabanira nêlahi | sênêning samoha
kusud | jalwèstri kang tumingal | cêngêng lam-lam ing pangaksi | pitung
dina mangun langên karamayan ||

30. wus atut apalakrama | kapranan karênaning sih | sari ratri tan kêna
sah | dupi ing

--- 19 ---

antara ari | ri sang pangantèn katri | karsanira sang aprabu | among
sarèhing sêdya | mring putra pulunan sami | tinunggilkên kang samya
tunggil agama ||

31. sira dyan putra katiga | kinèn maringkên tumuli | maring Arya
Lêmbusura | anèng tanah Surawèsthi | matah duta kêkalih | mundhi
pustaka sang prabu | lajêng atata-tata | cundhaka anandhang wêling |
sawusira sampating rèh nulya budhal ||

32. datan winarna ing marga | lampahe caraka kalih | lawan wong agung
katiga | sagarwa myang wadya sami | prapta ing Surawèsthi | njujug
padalêmanipun | sirarya Lêmbusura | duta ngaturakên tulis | ingkang
saking Sang Aprabu Brawijaya ||

33. gupuh Arya Lêmbusura | ananggapi kang kintèki | binuka sinuksmèng
driya | sarahsaning dalêm tulis | Narendra Majapait | ngayumkên
pulunanipun | rèhning sampun kawayah | tur samya tunggil agami | tan
cinêgah singa kang asudi karsa ||

34. kèlu amalik agama | kèh kèdhik tan dèn wangêni | kang anut putra
katiga | jinurungan pudyastuti | sang arya sukèng galih | sandika ing
aturipun | maring utusan nata | dahat dènira ngurmati | lawan mantu
buyut rahadyan katiga ||

35. kalangkung sinungga-sungga | wusira antara ari | duta mit mantuk
mring praja | Ki Arya anayogyani | kanthi ngaturkên tulis | pan pinangka
angsul-angsul | punang duta umêsat | praptane ing Majapait | angsul-
angsul lajêng katur ing narendra ||

36. binuka kalangkung suka | têtêmbunge katuju kapti | sumanggêm
dènnya tumampa | sinrahan ing radèn katri | nêngna datan winarni |
nagari ing Majalangu | warnanên Surapringga | Arya Lêmbusura nguni |
dahat sihe mring mantu buyut katiga ||

--- 20 ---

37. tan lami sinungan prênah | adhêdhepoka pribadi | samya jinênêngkên
imam | nênggih Radèn Santri Ali | jumênêng ing Garêsik | nama raja

pandhita gung | juluk Ali Murtala | dene ta wau kang rayi | Radèn Rahmat
dadya imam Surapringga ||

38. sinung dalêm Ngampèldênta | anama Pangeran Katib | karan Sunan
Ngampèldênta | murwani jumênêng Wali | dene Rahadèn Alim | Abu
Hurerah dinunung | jumênêng dadya imam | anèng Majagung ngêbrêgi |
kathah janma kang kapencut mucung Islam ||

5. Pocung[10]

1. ya ta wau Dyan 'Alim Abu Rerahu | inguyun ing kathah | janma marsudi
agami | nama Sunan Alim kasuwuring kathah ||

2. dalêmipun nama Suhunan Majagung | Sang Raja Pandhita | Ali Murtala
Garêsik | duk samana lajêng krama ing Madura ||

3. pan adhaup lawan Rara Siti Taltum | nênggih putrinira | sira Sang Arya
Baribin | atut runtut tan ana sangsayanira ||

4. pan pinugut nihan gantya kang winuwus | Sang Molana Iskak | kaipe
Sang Sèkh Ibrahim | tédhakira Jêng Sayid Jungèb ing Arab ||

5. bangsa luhur samya trahing Kangjêng Rasul | maksuding agama | pan
sampun pêputra kalih | samya priya bagus awirotama kas ||

6. kang asêpuh Sayid Ès panêngranipun | dene kang taruna | Sang Sayid
Yakub wêwangi | duk samana samya sêdyarsa ngajawa ||

7. marmanipun apaksa adrênging kalbu | wit miyarsa warta | kadang nak-
ing sanak sami | angajawi katrima manggih kawiryan ||

8. Sayid Yakub lan Sayid Ès tyas kapencut | wusing abipraya | samêkta
mangkat tumuli | lampahira samya anitih giyota ||

9. tan winuwus dènira layar ing laut | enggalling carita | praptanirèng
tanah Jawi | sang

--- 21 ---

akalih pra samya arêbat karsa ||

10. kang asêpuh Sang Sayid Ès sêdyanipun | maring Majalêngka | dene ari kang taruni | pan anêdya maring nagri Balambangan ||

11. alêstantun asewang-sewangan kayun | Sayid Ès anulya | praptanira Majapait | gya suwita Sang Aprabu Brawijaya ||

12. pan kalangkung ing sihira Sang Aprabu | dahat kapracaya | wasana ingambil siwi | sinung aran Radèn Suta Maharaja ||

13. dangu-dangu anèng nagri Majalangu | tyas datan karasan | sêpên kang nunggil agami | awasana pamit maring Ngampèldênta ||

14. sêdyanipun pan arsa bela dhêdhukuh | lan ari nak-sanak | kang samya nunggil agami | dyan linilan maring Prabu Brawijaya ||

15. mentar gupuh tan alami nulya rawuh | anèng Ngampèldênta | tinanggapan rênèng galih | awit kadang nunggil bangsa myang agama ||

16. karsa nusul tyasira sangêt kapencut | ketang tyas kacintan | rumêsêp samya sudyapti | sakarongron yayah roroning atunggal ||

17. ya ta wau Sunan Ngampèl karsanipun | nênggih ingkang raka | Dyan Suta Mahraja mangkin | sinung prênah dadya imam anèng Dêmak ||

18. anèng ngriku kathah kang tumut dhêdhukuh | anunggil agama | mangkana ing lami-lami | lajêng karan Sang Sèkh Suta Maharaja ||

19. gantya wau warnanên Sang Sayid Yakub | praptèng Balambangan | dhêdhukuh muhara pinggir | winastanan padhêkahan Purwasaga ||

20. duk ing ngriku parèng wahyaning bagya gung | Natèng Balambangan | Prabu Sadmudha wêwangi | ri mangkana kataman sungkawa dahat ||

21. marma tyas duh margi saking putrinipun | nandhang gêrah barah |
madal sanggyaning usadi | apanêngrang Sang Rêtna Sabodi Rara ||

--- 22 ---

22. suwarna yu samana sang nata ngrungu | lamun ing muhara | wontên
janma nêmbè prapti | adhêdhukuh mênçil ahlu'l tapa-brata ||

23. pan wus kabul mumpuni salwiring kawruh | dadya tinimbangan | prapta
kinèn ngusadani | katarima waluya grahe sang rêtna ||

24. suka sukur ya ta wau Sang Aprabu | nênggih putranira | pinaringakên
tumuli | lajêng panggih lan Sayid Yakub samana ||

25. atut runtut tan ana sangsayanipun | pinaringan nama | maring
martuwanira ji | apanêngrang Pangran Radèn Wali Lanang ||

26. ya ta wau sawusing antara taun | dènnya palakrama | sang rêtna wus
anggarbini | langkung suka sira Pangran Wali Lanang ||

27. amikêsdu miluta marsêpuhipun | anunggila Islam | sampun
amangeran kapi | têtah bunêk panganaming kasampurnan ||

28. tanpa dunung sangêt dènira mrih anut | êninging kaanan | nabêt
tabèk para nabi | kang wus kabul mungguh mungging bale baka ||

29. sang aprabu tan dadya rênaning kayun | rinèh ing agama | cipta
lamun dèn wancèni | sanalika nir sihe mring mantunira ||

30. gya tinundhung saking sabêt-saponipun | prajèng Balambangan | Sèkh
Wali Lanang sah anis | tanpa rowang anggana kawêlasarsa ||

31. myang kang kantun sang rêtna kang wawrat sêpuh | kadya nganyut
jiwa | dènnya tinilar ing laki | marma tansah ngungun wulangun kalintang
||

32. pan kapuwung jrih dukaning ramanipun | wau ta kang kesah |
samarga-marga nrang wingit | Pangran Wali Lanang praptèng
Ngampèldênta ||

33. sarêng pangguh lan ari suka ing kalbu | dahat tinanggapan | kadangira
prapta malih | siyang dalu pan anggung sinuba-suba ||

34. anèng ngriku wusing antara dinunung | anèng Patukangan |
angimamana agami | kalampahan dhukuhe karta raharja ||

35. tan winuwus wau ta mangsuli catur | kang kantun awawrat | anèng
Balambangan nagri |

--- 23 ---

praptèng masa pan ambabar mijil priya ||

36. warna bagus karsaning Allah kang ibu | pan seda konduran | margane
ngidaki jangji | sasedane Raja Putri Balambangan ||

37. gya pagêblug ruharaning rat dahuru | karoban lêlara | sakit sontên
pêjah enjing | ingkang sakit sontên enjing praptèng pêjah ||

38. sang aprabu mêngêng sungkawaning kalbu | ciptaning panarka | yèn
mawaning jabang bayi | tan antara kinèn nglabuh ing samudra ||

39. yèn rahayu jabang bayi têmah lêbur | prajèng Balambangan | tumpês
pinarak gêgêring | para wadya jumurung mangayubagya ||

40. tan adangu jabang bayi gya sinambut | maring ingkang eyang |
dinunung sajroning pêthi | kang tumingal ngêrês angrês angrêsula ||

41. wlas andulu ajrih kapêksa ing ratu | sanalika mangkat | linabuh maring
jaladri | gilang- gilang lênglêng kapilêng kang mulat ||

42. warnanipun jabang bayi katon bagus | sumunar kang cahya | jalwèstri
manguyu tangis | sruning wêlas yayah kèlu belantaka ||

43. duta mantuk wontên parmaning Hyang Agung | akarya lantaran |
rinaksa dèrènging pasthi | amarêngi wontên juragan alayar ||

44. nuju langkung Ki Juragan Sambodyèku | Garêsik dunungnya | sêdya
mardagang mring Bali | praptèng ngriku Juragan awas tumingal ||

45. yèn ing laut têngah wontên pêthi karut | mawa teja muncar | kacaryan
gya dèn parpêki | dyan ingambil tutuping pêthi binuka ||

46. kagyat njumbul isi jabang bayi bagus | cahyane gumilang | narka
darahing wirya di | dadya bantên labêt rèh pakaryan jina ||

--- 24 ---

47. nanging kêsdu Ki Juragan nêdya mupu | karya kabêcikan | sêsama
samèng dumadi | bok jalari bêgya[11] anarik kamulyan ||

48. gya sinambut inginggahkên mring parau | dening Ki Juragan | suka
rêna aningali | ri sampuning mangkana baita mangkat ||

49. tan winuwus dènira alampah laut | Juragan Samboja | ri mangkana
sampun prapti | anèng Tandhês ginumatèn dadah dulang ||

50. semahipun asuka rêna ing kalbu | dhasar Ki Juragan | salami dèrèng
ngalami | darbe suta marma kasok sih trêsnanya ||

51. ya ta wau Radèn Bayi sakalangkung | ing kabêgyanira[12] | pan wus
karsaning Hyang Widhi | lamun têmbe linuhur darajatira ||

52. Radèn Bagus pan sampun umanjing sunu | yayah tan kêna sah | nulya
sinungan wêwangi | mring Juragan anama Radèn Satmata ||

53. sakalangkung pinuja pinunjung-punjung | sasêdya dèn uja | sinarjon
ingaji-aji | pinibudya maring Juragan Samboja ||

54. dèrèng dangu dènira angambil sunu | ya ta Ki Juragan | tinêkakakên
ing jangji | nandhang roga têkaning wasana pêjah ||

55. dadya wau kang putra Rahadèn Bagus | kamong Ni Juragan | sangsaya
tumancêp ing sih | panganggêpe lir suta dènira yoga ||

56. dumalundung enggal agêng wit ingugung | Rahadèn Satmata | anèng
laladan Garêsik | pan akarya brangtaning wong sabên dina ||

6. Asmaradana

1. nihan gantya kang winarni | sarênganing lèlampahan | anênggih
wontên kadange | Sang Sèkh Suta Maharaja | kang ngimami ing Dêmak |
dadya prênah arinipun | lawan Pangran Wali Lanang ||

2. samya Sèkh Iskak mancêri | nama Sèkh Waliu'l-islam | yêkti samya
têtalêre | dharahing Jêng Rasulullah | wutah gêtih ing

--- 25 ---

'Arab | ya ta samana winuwus | sira Sèkh Waliu'lislam ||

3. kasok karoban ing warti | dene para dagang layar | yèn kadange
sakarongron | samya anèng tanah Jawa | nêtêp manatagama | kèh janma
sayuk sumuyud | dadya Sèkh Waliulislam ||

4. kapencut arsa ngajawi | nunggil kadang- kadangira | sagêda oyod
arondon | lajêng samêktèng baita | alayar ing samudra | lêpas lampahing
parau | antuk angin karya gancang ||

5. wus prapta ing tanah Jawi | ri Sang Sèkh Waliu'l-islam | darat anggana
lampahe | anjujug ing Ngampeldênta | pan kadang nak -ing sanak | talêr
saking ibunipun | langkung dènnya kinurmatan ||

6. samya karênan ing galih | lir satu mungging rimbagan | ananggêni
agamane | sira Sèkh Waliu'lislam | jrih nungkêmirèng kadang | rumarah
ing rèh rahayu | ngayum mangayom kawiryan ||

7. duk samana tan alami | sira Sèkh Waliu'lislam | antuk sihe Sunan
Ngampèl | pinarnahkên dadya imam | nèng tanah Pasuruhan | anulya
ingambil mantu | mring Dipati Pasuruhan ||

8. pan antuk Rara Satiri | atut dènnya palakrama | datan ana sangsayane |
tan lami ngalih panggènan | dalêm ing Pandhanarang | kapiyarsèng Maha
Prabu | Brawijaya Majalêngka ||

9. yèn wargane putra katri | nguni ingkang saking Cêmpa | dadya
linastarèkake | mêngkoni ing Pandhanarang | ing rèh sabawahira |
nènggih minangka lèlungguh | sinung nama adipatya ||

10. pinardikakkên ngimami | kang samya kêsdu agama | pan asampun
ngèstokake | nihan gantya kang winarna | Sang Sèkh Molana Iskak |

--- 26 ---

nguni kang sampun kasêbut | têdhake Sèkh Jungèb Arab ||

11. karsanira angajawi | sêdya anusul kang putra | kawarti eca manahe |
angkatira saking Arab | mawa putra sajuga | Khalifah Kusèn ranipun |
sapraptaning tanah Jawa ||

12. jujuk anèng Ngampèlgadhing | Jêng Sunan kalangkung suka | rawuhe
kang uwa nêmbè | lan ambêkta kulawangsa | dahat ingupaboga | samya
karênan ing kayun | sang prapta sih anarima ||

13. wusnya rêrêm sawatawis | sira Sèkh Molana Iskak | lajêng anungsung
pawartos | padunungan pra kadang | Jêng Sunan Ngampèldênta |
matur ing uwa yèn sampun | sinung prênah sowang-sowang ||

14. angimami ing agami | ing Dêmak myang Patukangan | kang uwa
sapamyarsane | ature pulunanira | Jêng Sunan Ngampèldênta | dahat
sukanirèng kalbu | wau Sèkh Molana Iskak ||

15. pan lajêng aminta tuding | dununganing pêprênahan | kang putra Jêng
Sunan Ngampèl | nulya angaturi tédah | kinèn angimamana | Madura
saurutipun | maraha Agami Islam ||

16. sagêda nunggil agami | Sri Lêmbupêtêng Madura | pinuriha salintire |
supados bakuh akêkah | kang uwa tan lênggana | myang Sayid Kusèn
jumurung | ri wusing samêkta mangkat ||

17. sakalihan sampun prapti | anèng nagari Madura | abipraya
sakarongron | samyarsa suwitèng Nata | Lêmbupêtêng Madura | kanggêp
pangawulanipun | kapracaya kalih pisan ||

18. dahat rinêsêpan ing sih | gya ingambil paripeyan | dinaupkên
sakarongron | antuk têtilaranira | putranirèng martuwa | Arya Baribin ing
dangu | atut dènnya palakrama ||

19. ri wusing alami-lami | sira Sèkh Molana Iskak | kalawan Khalifah Kusèn
| samya mamardi agama | anuta rèh ing Islam | Sri Lêmbupêtêng lingipun
| panggah puguh datan

--- 27 ---

owah ||

20. natèng Madura ngèmuti | tédhaking Sri Brawijaya | anuta ing rèh pan
asor | Gusti angayum kawula | mendah ucaping janma | sang kalih tansah
umatur | ngaturakên pralampita ||

21. caritaning para nabi | kang atampi kanugrahan | ngugêmi agama kaot
| Sri Lêmbupêtêng Madura | dèrèng kabuka ing tyas | mandar dadya
dukanipun | kasor kasêsêr tan arsa ||

22. dadya tinundhung sang kalih | saking nagari Madura | kesah saparan-
parane | kinuya-kuya ing katah[13] | dahat kawêlasarsa | sêsewangan
lampahipun | entare saking Madura ||

23. mamèt sasukaning galih | sira Sèkh Molana Iskak | tan arsa wangsul
mring Ngampèl | lingsêm dènira acabar | angrèh natèng Madura | rêrêm
kèndêl adhêdhukuh | anèng tanah ing Malaka ||

24. nènuntumkên pangabêkti | tobat ing Allah ta'ala | dene ta Khalifah
Kusèn | wangsul maring Ngampèldhênta | warta cabaring karsa | Sunan
Ngampèl anglêlipur | pan dèrèng parènging masa ||

25. yèn sampun katuju kapti | saèstu ngasor piyambak | narima Khalifah
Kusèn | pangimuring parimarma | Jêng Sunan Ngampèldênta | anarima
tumulut ngayum | sumuyud pangrèhing karsa ||

26. kunêng kawarnaa malih | Sri Lêmbupêtêng Madura | kesahe Molana
karo | Khalifah Kusèn Sèkh Iskak | lajêng miyarsa warta | yèn tanah ing
Surèngkewuh | wontên Sang prapta datêngan ||[14]

27. pan kalêbêt bangsa alim | têka saking tanah Arab | praptanya
samyarsa ngêndèh[15] | agamanira kang rama | labêtaning Kabudyan |
korawa kadibyanipun | Sèkh Arab kang angajawa ||

28. mêmarah malik agami | karan Sunan Ngampèldênta |

--- 28 ---

pan wong Surabaya kabèh | kathah milya agamanya | sumungku
sungkêmira | wus akarya masjid agung | pinindha bangsal witana ||

29. tyas rêngat mawinga wêngis | sêdyarsa pinaracidra | paraning rêh
kadibyané | Sri Lêmbupêtêng Madura | wusnya samêkta mangkat | tanpa
wadya lampahipun | kengis labêtning prawira ||

30. sapraptaning Ngampèlgadhing | Sri Lêmbupêtêng Madura | namar
namur pangamore | para sa[...][16] kang rumêksa | marêngi wêktu 'isya |
Natèng Madura anjujug | têpining hèr kang kinulah ||

31. dumunung parêking masjid | tan ana janma uninga | samana Jêng
Sunan Ngampèl | têdhak sapinggiring kulah | api-api tan wikan | Prabu
Lêmbupêtêng gupuh | mire anarik curiga ||

32. dupi arsa anglarihi | mring Jêng Sunan Ngampèldênta | kèngsêr kasor
prabawane | alading Wali minulya | sumaput lajêng rêbah | kagêbyur
sajroning banyu | Jêng Sunan ing Ngampèldênta ||

33. api kagyat ing panggalih | animbali pra sakabat | dupi prapta ing
ngarsane | sakabat kinèn mariksa | janma kêlêm ing kolah | kang kinèn
datan adangu | mentar aniti pariksa ||

34. têrang dènira ningali | Jêng Sunan Ngampèl dhêdhawuh | nulya kinèn
ngêntasake | Sri Lêmbupêtêng Madura | nanging tan sagêd kêntas |
ingidèn ing Jêng Sinuhun | sanalika sagêd kêntas ||

35. saking salêbêting warih | Sri Lêmbupêtêng Madura | ingandikan Sunan
Ngampèl | kinèn ndugèkakên sêdya | rêhning sampun waluya | Natêng
Madura tumungkul | analangsa nuwun tobat ||

36. jêng sunan nulya ndawuhi | yèn satuhu sampun tobat | paran kang
dadya tandhane | Sri Lêmbupêtêng Madura | tumundhuk ngaras

--- 29 ---

pada | Jêng Sunan suka ing kalbu | alon dènira ngandika ||

37. kula sampun angalimi | mêtêt kalêpatanira | nanging dèrèng marêm
batos | yèn tan anunggil agama | muklise kurang eklas | Natêng Madura
jumurung | anut ing rêh karsa-tuwan ||

38. yêkti ulun ananggoni | angandika Jêng Suhunan | yèn makatên sokur
bage | ri sampunira mangkana | anulya sinahidan | Natêng Madura
mangkya wus | lajêng manjing Islam mulya ||

39. kasandhangan iman suci | sumanggêm nanggêmi gama | tan
kumêdhèp pangidhêpe | tobat nabêt manjing sabat | dupi ing wanci
enjang | Jêng Sunan Ngampèl adhawuh | maring Sri Natêng Madura ||

7. Sinom

1. Sri Lêmbugpêtêng samana | kinèn konduran tumuli | maring nagari
Madura | rèhning sampun mratandhani | sumanggêm ananggoni |
agêming agama luhung | kang kinèn tan lênggana | nulya samêkta minta
mit | tyas kalêgan sang guru mangayubagya ||

2. sri narendra lajêng mangkat | Khalifah Kisèn umiring | wus ahlul duk
angawula | ing marga datan winarni | praptèng Madura nagri | asewang-
sewangan laku | Sang nata ing Madura | kondur mring prajanirèki | Sang
Khalifah Kusèn tan kandhêg ing lampah ||

3. maring Sumênêp dinuta | ing Jêng Sunan Ngampèlgadhing | lan kinèn
maring Balega | ngradon angradin agami | kanthi amawa tulis | kait
rêmbag sabayantu | lawan Natèng Madura | nênggih tumut mratandhani |
Sang Khalifah Kusèn lampah lèlancaran ||

4. praptane Sumênêp praja | panggih Sri Jaranpanolih | wus samya atata
lênggah | sang

--- 30 ---

duta ngaturkên tulis | Prabu Jaranpanolih | nanggapi nawala sampun |
sinuksma ing wardaya | ginigit rahsaning tulis | tyas kabuka kabul kabelan
agama ||

5. tan lênggana manjing Islam | Khalifah Kusèn nulya mit | laju têrus ing
Balega | Natèng Sumênêp njurungi | nulya umentar malih | tan alami
nulya rawuh | ing nagari Balega | pangagêngipun tininggil | tan suwala
samya nut agama Islam ||

6. ri sampunira mangkana | Khalifah Kusèn nulya mit | wangsul marang
ing Madura | jinurungan pudyastuti | samana sampun prapti | prajèng
Madura apanguh | kalawan sri narendra | kinurmatan anglangkungi | tyas
karênan kèndêl anèng ing Madura ||

7. kunêng gantya kang kawarna | wontên Molana kêkalih | samya wutah
rah ing Arab | ingkang sêpuh awêwangi | Sang Molana Mahribi | alul[17]
ing subrata nungku | dene ingkang taruna | nama Molana Garibi | kalih
pisan samya putrane Sèkh Iskak ||

8. kaprênah kadang taruna | lawan Khalifah Kusèni | samana myarsa pawarta | yèn kadang sêpuh ngajawi | dadya Molana kalih | sayuk rêmbug sabiyantu | samya sêdya ngajawa | samêkta mangkat tumuli | lampahira numpal-kèli ing samudra ||

9. sapraptane tanah Jawa | wau ta Molana kalih | pan anjujug Ngampèldênta | langkung kinarênan ing sih | praptane wong kêkalih | buja kramane tan surud | Jêng Sunan Ngampèldênta | sangsaya santosèng galih | siyang dalu nêmen ngabêkti ing Suksma ||

10. tan lami wong sakalihnya | pinikramakakên sami | mèt suka rênaning driya | ri Sang Molana Mahribi | antuk Rêtna Marakis | nênggih kang adarbe sunu | Arya Teja ing Tuban | dene Molana Garibi | panggih lawan sutèng Gajahmaodara ||

--- 31 ---

11. anama Ni Kèn Sudara | atut sih-sinihan sami | tan ana sangsayanira | dupi ing antara lami | wau ta wong kêkalih | kaprênah sinungan dunung | mring Sunan Ngampèldênta | pinrih samya angimami | anèng Bantên ngradina agama Islam ||

12. kang paman datan lênggana | lajêng samya nglaksanani | praptèng Bantên kalih pisan | ngrakit padhepokanèki | sawusnya dèn dalêmi | kathah janma kang kayungyun | kèlu mèlu agama | ya ta Molana Mahribi | tan karasan kirang rêna ing wardaya ||

13. wit tan agêng ing agama | ya ta lajêng kesah anis | saking ing Bantên samana | dhatêng ing Cêmpa nagari | jênêk raosing galih | lajêng mangun adhêdhukuh | dene ta arinira | ri Sang Molana Garibi | taksih kasdu mandon ing Bantên kewala ||

14. wontên malih kang winarna | wontên Molana ngajawi | Sayid Jèn panêngranira | awit kalèban ing warti | yèn sudarmanirèki | Sayid Ès ingambil sunu | mring ratu tanah Jawa | dadya imaming agami | anèng Dêmak karan Sèkh Suta Mahraja ||

15. dèrèng trang cundhuking warta | marma nyidikkên nindaki | sapraptaning tanah Jawa | anjujug ing Ngampèlgadhing | tinanggapan ing

galih | rêrêm kinarênan kayun | lajêng sinungan prênah | kinèn ngimami
agami | ing Carêbon Barêbês lan Pajajaran ||

16. têkaning Karawang pisan | Sayid Jèn tan lêngganèng ling | nglaksanani
ing pitêdah | adhêdhepok pasang rakit | anèng ing gunung Jati | kathah
kang tumut dhêdhukuh | kasêngsêm ing agama | Sayid Jèn pinuji-puji |
mangka guru gêr-ugêre sanagara ||

17. samana karaning kathah | nama Sunan Gunungjati | dhepoke karta
raharja | ênêngna mangkya winarni | nênggih kang wus ngimami |
Samarang saurutipun | ri Sang Waliu'lislam |

--- 32 ---

putranira jalu krami | wus diwasa sinung prênah sowang-sowang ||

18. kang sêpuh nêng Pakalongan | angimami ing agami | Sèkh Kalkum
panêngrnira | arinira kang sumêndhi | Sèkh Abdu'llah wêwangi |
pêpandumaning dêdunung | dadya imam ing Kêndhal | arine pantara
malih | apêparab sira Sang Sèkh Abdu'rrahman ||

19. ing nguni pan sampun dadya | pandhita ing atas-angin | ing mangkya
kinarya imam | ulu-uluning agami | mardiyèng Islam suci | anèng tanah
Kaliwungu | wus samya kalampahan | wontên kang winarna malih |
bangsaning khas Molana saking ing Arab ||

20. kaprênah kadang nak-sanak | lawan Molana Mahribi | Sèkh Jamhur
Alim panêngran | samana prapta ngajawi | njujug ing Ngampèlgadhing |
tinanggapan praptanipun | karênaning wardaya | pan datan antara lami |
Sang Sèkh Jamhur Alim anèng Ngampèldênta ||

21. pinikramakakên nulya | antuk putraning dipati | kang mangrèh ing
Pajajaran | nama Rara Sampursari | atut sinihan kalih | sawusnya nulya
tinuduh | ngimami Pajajaran | lêstari mardèng agami | kathah janma
kajuman mangayum Islam ||

22. datan alami samana | sira Sang Sèkh Jamhur Alim | dênira apalakrama
| anulya akrama malih | antuk ing Kêbon Candhi | tan ana sangsayanipun |
nahan gantya winarna | Randha Samboja Garêsik | kang amupu kang
putra Radèn Satmata ||

23. ing mangkya kataman roga | wasana prapta ing jangji | puput dènira
nèng donya | sarèhning tan darbe siwi | raja- darbèkirèki | barang arta
mas sotya gung | kasrah Radyan Satmata | salêbête dèrèng wanci | Radèn
Putra sadaya kang rajabrana ||

24. pinitajêngakên ngrêksa | kawulawargane

--- 33 ---

sami | nênggih Juragan Samboja | kang tate tau aniti | suka karênan sami |
pangêmonge Radèn Sunu | rêsep rêksa rumêksa | kasokan rumangsuk ing
sih | datan pae duk gêsange Ki Juragan ||

25. mangkana sawiji dina | Radèn Satmata marêngi | amêng-amêng
ngenggar-enggar | mungging têtèping gêgisik | lèlingsèn tanpa dasih |
sêngsêm mangaksi parau | nuju wontên baita | nangkoda alampah gram |
mêntas midêr saking tanah liyan praja ||

26. sêdya mantuk maring Benang | kampir ing Tandhês rumiyin | praptèng
pinggiring samudra | Tandhês laladan Garêsik | Ki Juragan udani | wontên
rare tanpa batur | bagus suwarnanira | amêng-amêng nginggil gisik |
tandya pinarêkan maring Ki Juragan ||

27. tinanya ingkang sêsuta | dene ledhang tanpa kanthi | kadi kataman
dhuhkita | Radèn Satmata nauri | lamun atanya kami | ingsun tanpa bapa
babu | Ki Juragan duk myarsa | ketang wêlase tan sipi | sanalika tinari
ingambil suta ||

28. cipta karya kabêcikan | sêsama samèng dumadi | nulung kawulaning
Allah | kaananing anak yatim | bok sagêd anjalari | kamulyaning
badanipun | kang sinandhang riwayat | kadarmaning dhingin-dhing |
dadya ngamal wong akarya kabêcikan ||

29. wau ta Radèn Satmata | nalikanira miyarsi | pamilutaning nangkoda |
kadadak datanpa budi | saure anglakoni | miturut sakarsanipun | ri
sampung mangkana | Radèn Satmata anuli | inginggahkên maring
sadalêming palwa ||

30. binêkta mantuk mring Benang | praptanira nuju ratri | sira Rahadèn
Satmata | pan lagya sakeca guling | anèng sajroning panti | ing dalu
katingal murub | nangkoda duk uninga | ngungun pangangêning galih |

--- 34 ---

wus anarka yèn darahing kartiyasa ||

31. sangsaya sih trêsnanira | sangêt dipun kamulèni | ing siyang dalu
winulang | ngaji tan lami wus bangkit | Ki Juragan winarni | sakit praptèng
pêjahipun | têkyanirèng dêlahan | sinungan kamulyan jati | labêt saking
asabar rila ing dunya ||

32. sagung raja-darbèkira | sarèhning tan darbe siwi | kasrah mring Radèn
Satmata | wus diwasa sawatawis | tan ana dèn pasrahi | rumêksa
rajabrana gung | dadya osiking driya | ular-ular nambut kardi | asinau
ngawaki adagang layar ||

33. ri sampunira samêkta | dagangan winoding kèci | pênjalin kalawan
kajang | lajèng umangkat tumuli | sêdya marang ing Bali | lêpas
lampahing parau | samana sampun prapta | muharane nagri Bali |
ngudhunakèn pênjalin kalawan kajang ||

34. kathah kang samya atumbas | para nangkoda anggili | anêba kang
dédagangan | tigang baita wus ênting | kathah atampi picis | kèbak dadya
saparau | suka Radèn Satmata | sumlêngêrèn aningali | cipta tampi
kamirahaning Pangeran ||

35. samana kataman coba | kathah janma pêkir miskin | kang samya
aminta priman | jalwèstri prapta anggili | wantuning wutah ati | dhasar
karêm atêtulung | mring sêsaming titah | asih mring dasih kaswasih |
sing aprapta kang aminta pinaringan ||

36. maring Rahadèn Satmata | sarya ingandikan manis | he sanak dèn
padha-padha | aja na ingkang sak-sêrik | nampani sihing Widhi |
kamurahan kang dhumawuh | sayêkti ingsun darma | nglantari praptaning
kang sih | sira sanak kang darbya bêgja sarkara ||

8. Dhandhanggula

1. kaananing ngaurip puniki | yêkti kabèh kagunganing Suksma | amung
dèn abisa bae |

--- 35 ---

rumêksa badanipun | amburuwa talêring urip | tumitah 'alam dunya | yêkti
kudu-kudu | angêgungakên istiyar | anggota rupa sabarang pakolih |
supaya karya arja ||

2. lamun wong nêmbèn anambut kardi | iku dadi laku kang utama |
kataman ing panêmuné | tan ana bedanipun | lawan wong kang ahli
ngabêkti | jangji tan paracidra | pawitaning laku | Allah yêkti sipat murah |
sipat asih gumêlar alam sakalir | rumêksaning kawula ||

3. ri sampuning ngêndika aparing | arta lantaraning pêpawitan | kang
minta kawraton kabèh | pêkir kang anjêjaluk | gèdhèg-gèdhèg dènnya
ningali | kadarmanira radyan | mamartèng tumuwuh | lêngawa rila ing
dunya | pama kêmbang dèrèng wanci ganda wangi | wus arum ngambar-
ambar ||

4. dadya janma sadayèsmu ajrih | tumungkul nampani kang pangrila |
dahat agêng panuwune | sadaya mêmujaya yu | warna-warna dènnya sung
puji | sawênèh pujinira | dhuh Allah Kang Agung | mugi tèmbe aparinga |
kawiryawan karahayon amartani | wênèh pujining janma ||

5. wong abisa amadhangkên ati | yêkti tèmbe manggih kawaskithan |
dadya pandaming rat kabèh | sawênèh pujinipun | janma ingkang kapasuk
ing sih | gampang kang sinêdya | wong awèh rahayu | dumadiya
pangayoman | sira Radèn Satmata nanggapi ing sih | sinaman sama-sama
||

6. kang aminta sangsaya anggili | lunga têka tinêkan sakarsa | datanpa
sah pisungsunge | ardana saparau | têlas bebas tan ana kari | ya ta Radèn
Satmata | pan anêdya kondur | juru palwa lon turira | dhuh rahadèn karsa
tuwan kados pundi | dènira dagang layar ||

7. ngêntu-êntu bathi kang ingèsthi | angalênthar kinarya jêntara | pothar-
pathir wêkasane | têlas ardananipun | baya kantun ngêmut dariji |

--- 36 ---

ajaja jaja boja | yêkti kang parau | uyang-uyung tanpa karya | ngaya-aya
ngêlaya ngidêri bumi | kangèlan tanpa tuwas ||

8. Radèn Satmata alon nauri | hèn wong sanak dipun anarima | wahyaning
kang coba gêdhe | Allah sipat mukitun | sipat murah lan sipat asih | lan
sipat samak basar | juru palwa matur | lèrês ingkang pangandika |
nanging lamun dèrèng sagêd mratandhani | kalêbêt sêsongaran ||

9. Radèn Satmata ngandika malih | juru palwa payo nyatakêna | ingkang
dadi pratandhane | Pangeran Ingkang Agung | yèn sinêdya sayêkti dadi |
mara angupayaa | apa kang kadulu | sapinggire ing samudra | sanalika
padhas curi kang kalingling | dadi mas lan sêsotya ||

10. juru palwa ngungun duk ningali | sumlêngêrên tan bisa angucap |
konjêm tumungkul mukane | anut sakarsanipun | rèhning sampun
amratandhani | nabda Radèn Satmata | yèn sira wus manut | apa ing
sakarsaningwang | mêngko ing sun arsa amèt aling-aling | supaya ora
rungkak ||

11. payo amèta padhas karikil | lan kalaras padha bêtèlana | isthanên
ana isine | lèbokna ing parau | supayane katona isi | kang kinèn tan
lènggana | juru palwa gupuh | amèt karikil kalaras | osikira paran dadine
ing mangkin | pratingkah kaelokan ||

12. baya dadi géguyon ing benjing | mangkat dagang panjalin lan kajang |
mulih tan ana jêbule | bathine amung uwuh | kadadène padhas karikil | ri
sampung ing akathah | dadya saparahu | ngandika Radèn Satmata | aja
tanggun ingkang rong palwa puniki | dèn isènana pisan ||

13. juru palwa alon matur wêngis | kathah-kathah kadamêl punapa |
ngêsêlakên tanpa gawe | punapa kangge urug | Dyan Satmata ngandika
aris | watêke wong kangèlan | kapenak tinêmu | juru palwa lajêng
mangkat | kapangèston akangèlan wira-wiri | datan angrasa sayah ||

--- 37 ---

14. rowangira sadaya tan apti | rumasane kinarya sawiyah | mung sajuga
ngèstokake | wasta pun Barussyamsu | karana kang wus angyaktèni |
kadibyaning rahadyan | kang sinêdya rawuh | sinung mangunah karamat |
rong parau kêbêk ingisènan wêdhi | suka Radèn Satmata ||

15. wusing samêkta mangkat tumuli | sêdya kondur marang dhukuh
Benang | alayar kêras lampahé | datan antara rawuh | juru palwa mudhun
rumiyin | kang kantun tan kêna sah | amung Barussyamsu | asayah
sakeca nendra | Dyan Satmata maladi samadi êning | angênêngakên
prana ||

16. byar katingal dagangan mawarni | wêdhi sabaita dadya bêras | las-
lasan putih warnane | kang sabaita wau | wêdhi brasak pan dadya kopi |
kalaras pira-pira | dadya sinjang alus | bajulngosèk bêraswutah |
puspalembong cindhe limar lan palangi | dene kang sabaita ||

17. kang aisi padhas lan karikil | ingkang agêng dadya lantakan mas |
karikil kang alit dhewe | dadya sêsotya luhung | akik mirah nila widuri | ri
sampunging mangkana | sira Barussyamsu | tangi dènira anendra | lêngêr-
lêngêr amulat ing kanan kering | kêbêk barang dagangan ||

18. kang apèni-pèni rajapèni | Barussyamsu tan bisa angucap | kadya
ngimpi pandulune | dene ing nguni uwuh | mangke têka salin ing warni |
barang kang mahal-mahal | sarwa adi luhung | ngandika Radèn Satmata |
Barussyamsu iki sih marmaning Widhi | malês sih kabêcikan ||

19. apan sinung kamurahan mangkin | dadi barang ingkang asarwendah |
payo titikana kabèh | ya ta pun Barussyamsu | gurawalan lajêng ngabêkti
| maring Radèn Satmata | jrih sungkêm sumungku | cipta yèn ing tèmbe
dadya | wali mulya guru gêr-ugêring bumi |

--- 38 ---

kramate wus rumêma ||

20. juru palwa kang mudhun rumiyin | awêwarta kulawangsanira | yèn
Radèn Satmata mangke | dènnya dagang wus rawuh | tanpa tuwas mulih
barindhil | payuning dèdagangan | duk panggawanipun | panjalin kalawan
kajang | pan dèn pak-i sudagar aliru dhuwit | wang dadi sabaita ||

21. banjur pinintanan pêkir miskin | Dyan Satmata tansah danardana |
dhuwit saparau êntèk | ing mêngko ulhipun | mbuwang tilas lir wong
kalindhih | praune kinêbakan | klaras wêdhi watu | tan patut tinut ing
kathah | kang miyarsa samya maido wus kêrid | sampun praptèng muhara
||

22. lajêng anjujug sajroning kèci | juru palwa ingkang awêwarta | mlêngak
kagyat pandulune | lan kang winartan wau | sapandurat tan sagêd angling
| lir linglung kalanglangan | dene sajêgipun | dèrèng myat barang
mangkana | dhewe-dhewe samya sêdya mangênjali | maring Radèn
Satmata ||

23. praptèng ngarsa ngaras pada kalih | Radèn Satmata alon ngandika |
padha kawruhana kabèh | ing mêngko karsaningsun | apan sêdya lêlana
malih | pan aja wara-wara | panggawe puniku | iki barang dèdagangan |
ingsun bage sira kabênêr nampani | apa sapandum ingwang ||

24. kang aendah pèni rajapèni | wastra alus sotya nawarêtna | kalawan
kancana kabèh | darbèke Barussyamsu | karanèku kang anjalari |
panêbasing kangelan | patuwase agung | dene kopi lawan bêras | dèn
panduma sakancanira dèn wradin | dadiya ular-ular ||

25. kang sinihan wus samya nampèni | dahat dènnya sèwu anarima | ing
kadarmaning rahadèn | ya ta sasampunipun | Dyan Satmata anuwun amit
| mentar andon lêlana | anggèndhol sadarum | ngandika Radèn Satmata |
aja samar yêkti besuk tèmbe buri | sun bali

--- 39 ---

maring Benang ||

26. dadya samya jurung mangastuti | sakarsane Rahadèn Satmata |
mentar lêstari lampahé | denepun Barussyamsu | kasugihanira ngluwihi |
dadya lurah nangkoda | sadaya angayum | Barussyamsu babokira |
langkung mukti kaharjanira salami | tan ana sangsayanya ||

27. kunêng ingkang kawarnaa malih | wontên parênganing lèlampahan |
krabate jêng Sunan Ngampèl | paman misananipun | ajêjuluk Sèkh Suba
Bangip | pan samya pehak Arab | talêr tédhak rasul | samana prapta
ngajawa | pan anjujug anèng dhukuh Ngampèlgadhing | kinarênan ing
karsa ||

28. tan alami anulya tinuding | kinèn ngimami tanah têngahan | Pranaraga saurute | wus kalaksanan sampun | datan ana sangsayanèki | nihan malih winarna | kang dadya pangulu | ngimami tanah Samarang | linurugan saking nagari ing Pêngging | dadya yuda kanaka ||

9. Pangkur

1. marmanya pinukul ing prang | dene nyorok jajahan nagri Pêngging | kathah kang ingirup-irup | kelut malik agama | Prabu Dayaningrat samana anuduh | anggêmpura ing Samarang | senapatining ajurit ||

2. Radèn Jaka Sinumbaran | lawan Arya Dewata kang kinanthi | Arya Tala tiganipun | padha wong surèng yuda | mêngku wadya salêksa wong surèngkewuh | sangkêp sadandananing prang | sapraptanirèng Samawis ||

3. Molana Waliu'lislam | saputrane sawadya pasang rakit | amêthuk praptaning mungsuh | têtindhihing prawira | Sang Sèkh Suta Maharaja karya dhênggung | punika prênah kang raka | lawan Dipati Samawis ||

--- 40 ---

4. kanthi lawan para putra | Sang Sèkh Kalkum Sèkh Jatiswara tuwin | lan para kadang sadarum | tumut lajêng campuh prang | ing Samarang lan ing Pêngging sarêng kiwul | rukêt caruk liru papan | sami darahing winani ||[18]

5. wong Pêngging lir saradula | datan etang pati lir mbêbêntusi | wong Samarang panggah têguh | tan ana nêdya oncat | mawulinga wringutên lir angun-angun | datan wrin ing pringgabaya | karepotan wadyèng Pêngging ||

6. kathah kang amanggih pêjah | senapati katiga wus ngêmasi | wadyabala tanpa etung | kang sirna ing paprangan | sakarine kang pêjah bubarane larut | sasrangan angungsi gêsang | mantuk maring prajèng Pêngging ||

7. katur ing Sri Dayaningrat | lamun wadya kang mukul ing Samawis |
tiwas tumpês sirna larut | tan ana mangga pulya | sri narendra duk
miyarsa atur dunung | tiwase cundhakanira | kang andon prang ing
Samawis ||

8. jaja bang mawinga-winga | dhasar bantêr bèr wani wutah ati | sanalika
budhal gupuh | gugup pra wadyabala | abusêkan kuswa gêgaman prang
pupuh | balabar samarga-marga | kadya rob-ing jalanidi ||

9. datan winarna ing marga | sri narendra wus prapta ing Samawis | lajêng
mangsah sara amuk | lir banthèng tawan brana | wong Samarang gugup
karoban ing mungsuh | singa mangsah kasulayah | satêmah apothar-
pathir ||

10. pangagênge ing Samarang | samya mangsah katindhês ing ajurit |
wong Pêngging tatag atanguh | Sang Sèkh Waliu'lislam | pan kasambut
anèng madyaning prang pupuh | kasiwo seda ing rana | sadaya mangsah
pêpuli ||

11. Sang Sèkh Suta Maharaja | duk uninga yèn kang rayi ngêmasi | sirna
kaparwasèng mungsuh | ngamuk sura tan taha | wadyèng

--- 41 ---

Pêngging kang katrajang kawur-kawur | ananging karoban lawan | dangu-
dangu angendrani ||

12. Sang Sèkh Suta Maharaja | sawadyane linud ing wadya Pêngging | tan
kandhêg dènnya lumayu | prapta tanah ing Dêmak | kasayahan dadya
seda anèng ngriku | ingastana ing muhara | dene wadya kang mêmuri ||

13. para putra ing Samarang | sasedane kang rama giris miris | samya
bubar kapalayu | angungsi sowang-sowang | asasaran saparan amèt
rahayu | Sèkh Kalkum maring Bènggala | Sèkh Jatiswara angungsi ||

14. kèndêl anèng pêpataran | nênggih patarane Marbabu wukir | anèng
ngriku adhêdhukuh | dene Sèkh Abdu'rrahman | bingung dènnya angulari
kadangipun | wangsul mring atas-maruta | padununganira lami ||

15. ing Samarang sampun bêdhah | sri narendra kondur mring nagri
Pêngging | ing sawadyabalanipun | tyasira wus kalêgan | dene ingkang
angagu-agu wus gêmput | kagêmput kapapas ing prang | rêribêd tan
anglabêti ||

16. nihan mangkya kang winarna | putrinira Sèkh Waliu'lislami | nama Siti
Umi Kamsum | kalih lan putrinira | Sang Sèkh Suta Maharaja kapalayu |
kang anama Siti Jenap | langkung dènnya kawlasasih ||

17. kalih mangilèn parannya | murang marga andêdêr andêrpati | rèhing
pati tan kaetung | samarga sangu waspa | angrêrendhon mudhun
mundhèning pêpundhun | rumambah ing lêmbak-lêmbak | kèdêran dening
wana dri ||

18. kasiliran samirana | akarênan gandaning sari-sari | sarira mari marlêsu
| lêlah tan kapisara | rumasane sinungsungan ing pisungsung | ing sihe
Sang Amisesa | sanityasèng tyas malat sih ||

19. kudhasih munya angêsah | ngangsa-angsa angrês kadi nangisi |
wêlas mulat apilalu | kungkang ngungkung mangrêntang | lir mêmudya
kasidaning Sang Dyah Ayu | laku kalakon [ka...]

--- 42 ---

[...lakon] katêkan | bengkas pangikising kingkin ||

20. ron rura ruru ing dharat | mawa sari sumirat angêngirid | brêmara
mangrêh rum-arum | rumaras manuhara | ngarêm-arêm lêrêming sang
karon laku | kalara-lara nêng paran | marêmèng pangaring-arang ||

21. praptèng Carêbon sang rara | lajêng minggah marang ing Gunung Jati
| kang raka kagyat andulu | praptaning antên-ita | layu-layu lêlayangan
wayang-wuyung | kadi asawang wangkawa | lumantar atêr prihatin ||

22. mangsa ngêsah ngaras pada | masmu waspa was- wasing tyas
kaswasih | sumêdhot dhêdhêt mangadhuh | kumêdhap pangidhêpnya |
jêng Suhunan rumasa kasompok sêpuh | lir tan tahan nahênana | wigêna
kang angênani ||

23. wusing sarèh sawatara | sang dyah rara karongron matur aris | mring raka karananipun | mirong rèh karorogan | ing Samarang rinurah suraning mungsuh | sadaya sah kasusahan | têmah kang rama ngêmasi ||

24. kadang-kadang kaduhkitan | asasaran saparan ngungsi urip | tan wrin kaananing dunung | wau duk amiyarsa | Sunan Gunung Jati sarèntèsing tutur | ing ari sakaronira | nduduk kadadak rudatin ||

25. karanta karantan-rantan | ingkang paman kataman angêmasi | lipuring driya kapupus | pasthi pangèsthinira | anarima sumawur angimur-imur | pêpêr lipure sungkawa | kinèn sumendhe ing takdir ||

26. dèn santa santosa ing tyas | aywa lingkup rèh ing lèlakon iki | cubên cobaning Hyang Agung | gungna ing panarima | bok manawa dadi lawananing wahyu | ngrêrêpa mèt pangapura | kanthi mêsu masuh budi ||

10. Kinanthi

1. tan pêgat dènnya mardya yu | Jêng Sunan ing Gunung Jati | mring ari Dyah sakalihan |

--- 43 ---

lèlèh lilih ing panggali | mundhi sabdanirèng raka | mupus papasthèning takdir ||

2. rêm rêm sumurêm anungku | mungkul tawêkal mabikis | mahas ing wukir kewala | ngrakêt ing raka mangungkih | sumêngka maniddhikara | minta aksamaning Widhi ||

3. kunêng gantya kang winuwus | Karajan Palembang nagri | mangkya sira Arya Damar | putra kuwalonirèki | ingkang saking Putri Cina | talêr saking Majapait ||

4. Radyan Patah namanipun | mangkya wus diwasèng wanci | karsanira Arya Damar | lèngsèr kaprabonirèki | mring kang putra Radèn Patah | mêngkoni sagunging dasih ||

5. ya ta ri mangkana nuju | Sang Arya Damar tinangkil | dèning wadyabalanira | putra kalih mungging ngarsi | satunggal Rahadèn Patah | Radèn Kusèn kang wuragil ||

6. pan akadang tunggil ibu | Radèn Kusèn kang mancêri | nênggih saking Arya Damar | sami saking Dyah Subanci | nênggih Rajaputri Cina | wus kadya kadang sajati ||

7. mangkana sasampunipun | pêpak andhèr kang sumiwi | ngandika Sang Arya Damar | Rahadèn Patah tinari | dhuh babo anggèr bêndara | wus diwasa sira mangkin ||

8. gumantiya jênêngingsun | anèng Palembang nagari | sagung para wadyabala | arinta Kusèn puniki | iya dadiya papatya | bakuh dènya mong ing dasih ||

9. manira iki wus sêpuh | ambagawan mung mêmuji | kaharjaning prajanira | lamun manggih sangga-runggi | ing sun kang rêksa rumêksa | mayu ayuning nagari ||

10. Radyan Patah duk angrungu | pangandikaning sudarmi | tyasira ngêmu sungkawa | dangu datan amangsuli | rêrantamira ing driya | dèrèng widagdèng pambudi ||

11. etang maksih mudha punggung | lamun jumênêng narpati | dadya guyoning akathah | tan

--- 44 ---

wande dèn cêcawadi | wasana matur prasaja | dèrèng sagêd anglampahi ||

12. karana tangèh anggayuh | êmpa-papaning lèlungid | miwah ing cipta-sasmita | kèdhap-kilap sambang-liring | unggul yudanagara | myang sidi sidaning adil ||

13. gumantiya akaryewuh | susah tansah nglêlingsêmi | Arya Damar angandika | gampang yèn wus anglakoni | wantu wêwantoning nata | trape ing sun kang aniti ||

14. tataning wong dadi ratu | kartane marta martani | utama karatonira |
tumindak kalawan adil | dèdalane danardana | dasih tan kênâ kaswasih ||

15. idêrana rêh rahayu | karahayoning sêsami | samoha sinamadana |
dimèn dumadya usadi | ardaning pra wadyabala | tumindak dènnya
angabdi ||

16. wadakanên tandukipun | sambang-liring nayèng wadi | kang widagda
andêlêna | dadi pandaming praja di | kang sudama sinadpada | dèn bisa
ambeda budi ||

17. rubeda widaning ratu | yèn suda adating adil | para wadyane tan
nêdya | ngaras padèng sang wirya di | suda wêdining parasdya | mung
ngudi badan pribadi ||

18. sokur bisa tumalawung | mawang palawangan gaib | wrin sakêdhèp
kridhaningrat | tumonton katoning batin | bontos buntas tanpa kewran |
wiwiran warana gaib ||

19. Radèn Patah lon umatur | tumuntur amindhô kardi | dadya nata
mêngku wadya | pinitaya sari ratri | baya sèwu ewuh-aya | dèstun
cedaning dumadi ||

20. mirang merang karya saru | sarupa tan akarya sri | sarana rèwining
warah | pinarah pangarih-arîh | yayah sarah sumaruna | karana karoban
lari ||

21. melar nalare amulur | ratu wuta tan pangrêti | pakrêtime prètèng
wadya | kasor

--- 45 ---

kasêsêr ing dasih | kadyangganing tugu tunggak | ambagêgêg dèn
cinthungi ||

22. lir ratuning kutu-kutu | tan pantês ingaji-aji | jinja pêpajuning praja |
marma lênggana gumanti | pilênggah paduka rama | mung sèwu anuwun
adil ||

23. Arya Damar tyas anjêtung | wêgah dènira anggalih | puguh panggah
ingkang putra | kang myarsa samya mbolèhi | anuta pangrèhing rama |
yêkti sayogya pinanggih ||

24. pra wadya sadayanipun | nêdya abiprayèng kapti | mêmayu tan
anulaya | sumuyun mangayum sami | mamandaya kawiryawan |
mêmudya ardyanira ji ||

25. Radèn Patah tyas mawuntu | kèndêl lênglêng tan kêna ngling | tan
ketang rèh pamiluta | Sang Parasdya mamarsudi | aturing pra wadya-
wadya | tan dadya pandudut budi ||

26. adrênging driya kadaut | dhêdhêp dènnya mbêbolèhi | wêgah dènira
tumanggah | wau ta duk amiyarsi | kang ibu Putri ing Cina | yèn kang
putra dèn sèlèhi ||

27. lungguhing raka sru gupuh | têdhak Sang Rêtna Subanci | mring
pasewakaning raka | prapta nggèning putra kalih | njujug putra Radèn
Patah | tumrêcêp amituturi ||

28. dhuh anggèr dipun tumurut | karsane ramanta mangkin | lamun
lêngguk lêngganaa | sapa kang ingsun-tingali | ingsun rumasa wus tuwa |
pantês anggilir gumanti ||

29. ingsun lan ramanta kulup | mung mêmunjung puji-puji | ing
karaharjaning praja | lulusa jêmênêng [19] aji | mêngku tanah ing
Palembang | Dyan Putra tan kêna gigrig ||

30. tutur pangrèhe kang ibu | tan kalêbu jroning batin | Arya Damar
angandika | lah yayi nêngêna dhingin | putranira bokmanawa | durung
kapanggih ing galih ||

31. Radèn Patah lajêng mundur | bubarane kang samya nangkil | Arya
Damar saha garwa | kondur [kon...]

--- 46 ---

[...dur] pakuwon jro puri | kasaput dalu samana | warnanên Rahadèn Siwi
||

32. anèng padalêmanipun | karanta-ranta ing galih | yèn maksiha anèng
pura | tan wun pinaksa gumanti | angganti karatonira | rinasa saya
ngranuhi ||

33. dadya nêdya nis ing dalu | anungkulakên kang rayi | Radèn Kusèn
kaparêngan[20] | marêk ramebu mring puri | wau ta Rahadyan Patah |
lajêng kesah angendrani ||

34. nurut urung-urung banyu | tan ana janma udani | anggana datanpa
wadya | praptèng sawawining puri | mugut sih ing kadang warga | ngantêpi
sêdyaning kapti ||

35. adrênging driya andarung | amêmirang murang margi | amiroga
raganira | kawibawan tan tinoli | mangalèr têtênging nala | anduduk
dènya lumaris ||

11. Mègatrüh[21]

1. kawarnaa wau ta ari kang kantun | Radèn Kusèn saking puri | mêngtas
umarêk ramèbu | tan eca raosing galih | lajêng manjing dalêm gêdhong ||

2. punakawan prasami kapati turu | karana wus lingsir wêngi | Radèn
Kusèn duk andulu | unggyaning kang raka sêpi | wus kacipta lamun lolos ||

3. karêrantan katongton sih trêсна tuhu | yèn kariya nguciwani | bok laju
kinarya ratu | maksih mudha damèng budi | tur tan yogya winiraos ||

4. kadang sêpuh sanès rama tunggil ibu | kang raka merang lunga nis |
wit tinari madêg ratu | mangka puruna nglampahi | dèstun têtên melik
melok ||

5. gèlêm gumalênggêm gumantiya ratu | kirang kasujanan budi | dadi
rubeda karya ru | antuk rêngu rêngat batin | dadya rêrantaming wartos ||

--- 47 ---

6. angêdhangkrang kang anom umadêg ratu | kadang tuwa kèsi-kèsi |
saparan-paran andarung | katon apa ingsun iki | etunga ambêbeda roh ||

7. baya bêcik saparane ingsun anut | nora karonèhan pikir | pan wus sama
bêgjanipun | tibaning lêlakon iki | bok cobanirèng Hyang Manon ||

8. sawusira kapanggih raosing kalbu | wau ta radèn taruni | lon napak
tilasing laku | tan ana janma udani | murcane rahadèn karo ||

9. kaparêngan saparanira rinantun | praptaning jawi nagari | ngambah
têba dalan lêbuh | nuju pajar wijang sasi | myat janma lampah sawiyos ||

10. wus anarka yèn kang raka kang lêlaku | sinêru dènnya lumaris | dupi
parêk nguwuh-uwuh | Radèn Patah kagyat noli | yèn kang rayi kang
angruroh ||

11. dadya kèndêl anèng sangandhaping taru | tan dangu sampun
kapanggih | lajêng asatata lungguh | kang raka ngandika aris | paran
praptanira mêngko ||

12. kadhêmpalan anusul apa tinuduh | dene jêng rama ngulari |
lêlayangan layu-layu | anggana datanpa kanthi | apa karsanta kemawon ||

13. ingkang rayi Dyan Kusèn lon aturipun | saking sêdyamba pribadi |
rumaos tan sagêd kantun | pêjah gêsang anglampahi | saparan paduka
andon ||

14. Radèn Patah duk myarsa katon sih lulut | rakêt rumakêt ing ari | tan
antara gya rinangkul | angandika masmu tangis | dhuh-dhuh yayi
kadangingong ||

15. ingsun dahat kapotangan ing sih lulut | apa sun-karya sêmbulih | wus
yayi wangsula gupuh | mbawanana mukti sari | ngêbrêgana ing kaprabon
||

16. gumantiya jêng rama mêngku wadya gung | anèng Palembang nagari
| sun yayi sèwu jumurung | aja mikir sangga-runggi | ngarung ngaru was
ing batos ||

--- 48 ---

17. sayêktine sirèku wus bènêripun | aywa tolih maring mami | kang rayi
angaras suku | pan sarya umatur aris | marawayan wêtuning loh ||

18. dhuh pukulun karsa-paduka saèstu | kang rumambah amba-pundhi |
nanging raosing tyas-ulun | botên pisan anglampahi | rèh ing karsa kang
dhumawoh ||

19. kang saèstu entar-paduka tumuntur | saparan palari-lari | pêjah
gêsang sampun kantun | kang raka ngandika aris | sukur yayi yèn
mêngkono ||

20. ingsun mêngko pan sêdya lunga anglangut | nuruti osiking galih | kang
rayi têka jumurung | nadyan ngidêrana bumi | sampun pisah sakarongron
||

21. Radèn Patah lajêng anutugakên laku |[22] ari Dyan Kusèn Lêstari |
ênêngna kang murang laku | dupi ndungkap bangun enjing | otêr wadya
sakadhaton ||

22. lamun rajaputra kalih murcèng dalu | jalwèstri samya anangis |
ramèbu ingaturan wruh | lajêng gugup angulati | nalasah jroning kadhaton
||

23. tan kapanggih tiniti paraning laku | tan ana banon kang rêmpit |
ramèbu tyas kapingu | mangungun tan kêna angling | mijil saking ing
kadhaton ||

24. wadyabala dhinawuhan anglêluru | parane kang putra kalih | wadya
sandika turipun | gugup asamêktèng kardi | tan adangu nulya bodhol ||

25. dènnya ngluru pinrênca sajuru-juru | sagunging wadya gung alit | ana ngalor ana ngidul | ngetan ngulon niti warti | mêksa tan antuk pawartos ||

26. duta wangsul ramèbu kataman tyas dhuh | tansah kantu kontrang-kantring | wadyabala

--- 49 ---

wayang-wuyung | wusnya pinupus ing galih | asumendhe ing Hyang Manon ||

27. kawarnaa malih ri sang rajasunu | lampahe anamur sandi | pasisir lèr kang jinjug | mangu-mangu aningali | antarane samudra rob ||

28. tan adangu miyat janma alêlaku | saking kilèn amarani | kawangwang warnane bagus | taruna lampah pribadi | dadya kandhêg radèn karo ||

29. sarêng tundhuk pan lajêng satata lungguh | rumêsêp salaman taklim | bagya-binagya rahayu | wusing rêrêm sawatawis | Radèn Patah amamartos ||

30. dhuh wong sanak kang lagya tèmbe apundhuh | nuwila-ganda ing warti | sampun kirang paring maklum | anênungka nungkak krami | ing pundi pinangkaning don ||

31. miwah kang sinêdya tuwin namanipun | sang prapta umatur aris | saking Malaka don-ulun | pêparab nama Sèkh Sabil | ingkang ayêyoga ingong ||

32. pan Khalifah Kusèn panêngêranipun | kalêbêt bangsa ulami | Sèkh Iskak kang darbe sunu | kang wus samya angajawi | dene talêr saking wadon ||

33. pan pun ibu saking Madura ing dangu | putrine Arya Baribin | nggèn-amba krêdyat lêlaku | badhe maring tanah Jawi | asuwita sang akatong ||

34. Sang Aprabu Brawijaya Majalangu | supados wrin tatakrami | ngiras martuwi sadulur | kang sampun sami ngajawi | sakeca dènira manggon ||

35. balik ari ing pundi pinangkanipun | myang nama sêdyaning kapti |
sakaro pating karuncung | Radèn Patah amamarti | nama paran
sangkaning don ||

36. Sang Sèkh Sabil duk myarsa suka ing kalbu | rumasa yèn antuk kardi |
dyan kalih sinawang sawung | wangunane mawa wingit | bok

--- 50 ---

kalayu sakarongron ||

37. dadya lajêng rumêsêp ngakên sadulur | kapranan karênan galih |
Radèn Kusèn lajêng matur | mring raka yèn amarêngi | nurut ing laku
kemawon ||

38. maring tanah Jawi asuwitèng ratu | kang raka saharjèng galih | katri
rêmbag sabayantu | anulya lumampah malih | langkas sêdyane sang
anom ||

1. marsudi. (kembali)
2. ingugung. (kembali)
3. karang. (kembali)
4. kinamandaka. (kembali)
5. Kurang satu suku kata: ngangge wasitatama. (kembali)
6. dupi. (kembali)
7. awirya. (kembali)
8. ananggapi. (kembali)
9. badhaya. (kembali)
10. Teks asli: Pucung. (kembali)
11. bagya. (kembali)
12. kabêgjanira. (kembali)
13. kathah. (kembali)
14. dhatêngan. (kembali)
15. ngêndhèh. (kembali)
16. Tidak terbaca: samya. (kembali)
17. ahlul. (kembali)
18. winarni (dan di tempat lain). (kembali)
19. jumênêng. (kembali)
20. kaparênga. (kembali)
21. Teks asli: Dudukwuluh. (kembali)

22. Lebih satu suku kata: Radèn Patah lajêng nutugakên laku.
(kembali)

12. Sinom

1. wau wong agung katiga | praptèng têtining jaladri | samya ngupaya
nangkoda | kang layar mring tanah Jawi | sêdya anumpal-kèli | ngaleyang
kalayu-layu | raryan ujunging karang | rêrêm mèt pêngaring-arîng | ing
sagara ruhara mangayubagya ||

2. praptane ri sang katiga | êrob rumarap kang warîh | sumirat lir
sumamburat | surat kasorotan rawi | karênan warni-warni | rêna
kaananing ranu | pêtha manthuk pêpanthan | êsthane tumut angèsthi |
lêstarine dènirarsa angajawa ||

3. lumut lumêr lamat-lamat | kasurung panranging warîh | obah-obah
mawa ombak | yayah sung pangarih-arîh | dèn asarèh ing kapti | sampun
nêrang -nêrang laku | sêsarah anggêlasah | taru ruru mawa sari |
ngambar-ambar rumambah nanduki grana ||

4. karya sumyahing sarira | lêсах sah kasrang ing angin | ngungun ing
pangangênira | manganti-anti tan prapti | baita kang lumaris | dadya wong
agung katêlu | eca langên muhara | wontên coba andhatêngi | anênungkul
nungka pangikaling beka ||

5. tan antara dangu prapta | janma duryasa kêkalih | wasta Supali Supala |
mbêbègal karyanirèki | sura berawa sêkti | tau tate tandhing ji-tus |
purwane botoh kalah | dunya wisma suta rabi | samya têlas tinohakên

--- 51 ---

ing kasukan ||

6. dadya surak anggêrangsang | kapanjingan manah juti | roro sanak
ambêbègal | ngèdhèng nggodha ngadhang margi | nggêgiro briga-brigi |
ngalambrang saantukipun | Radèn Patah ngandika | yèn ana wong mbègal
kalih | Radèn Kusèn kinèn mire sumingkira ||

7. rèhning rare dèrèng masa | lawana lumawan tandhing | mimbuihi karya
rubeda | Dyan Kusèn lawan Sèkh Sabil | lajêng samya sumingkir | wong
begal narajang purun | Radèn Patah cinandhak | wong bêbegal kasaliring |
kalih pisan kajongor tiba kalumah ||

8. satangine narik kadga | Rahadèn Patah tinitir | wanti-wanti linarihan |
ananging tan angênani | pangrasanira kadi | anuduk wayanganipun |
dangu-dangu wong begal | gugal curigane giris | kalih pisan kaprabawan
ing kiparat ||

9. ambruk rubuh kalabakan | sêsambate nuwun alim | sanalika Radèn
Patah | kèndêl angêningkên galih | karamate martani | lajêng prapta angin
ribut | prahara aruhara | wong begal katub ing angin | samya tiba ing
wismane sowang- sowang ||

10. raharja tanpa sangsaya | kamuman ing pangaksami | samading
kusuma-tama | kataman têmah amari | maarda durtèng kapti | atabêri
mamardya yu | tataning anggaota | tita anglêgutèng tani | rantaning tyas
juti antuk paramarta ||

11. wau ta Rahadèn Patah | lajêng ngawe ingkang rayi | Radèn Kusèn
gurawalan | marêk kalawan Sèkh Sabil | samya masêmu tangis | tan
nyana manggih rahayu | Radèn Patah ngandika | pan saking marmaning
Widhi | maksih padha rinaksa katiga pisan ||

12. dèn samya gung anarima | sang kalih samya ngastuti | wahyaning
kang pangandika | wusnya ngaso sawatawis | lajêng lumampah malih |
katiga rendhon ing laku | nèng têtèning [têpi...]

--- 52 ---

[...ning] samudra | samya sumêngka ing wukir | kèndêl saluhuring ardi
Rasamuka ||

13. samya amêmati raga | mèsu amêmasuk budi | mamrih kasidaning
sêdya | muntu tyas ing sari ratri | kacarita tri sasi | nèng Rasamuka
manungku | antuk sih parmaning Hyang | wontên nangkoda lumaris |
saking Bangkahulu nêdyanjarah ing tanah ||

14. praptèng pasisir Palembang | palwa tan sagêd lumaris | dadya susah sanalika | cipta kataman bilahi | nangkoda mêtês budi | paran rêh karananipun | kandhêging ponang palwa | tandya waspadèng pangèksi | yèn sukuning sêngkan ardi Rasamuka ||

15. kanggènan rare jêjaka | katri samya pêkik-pêkik | Juragan ngartika ing tyas | kèndêling palwa bayèki | kang mawa rarya katri | bok darahing pandhita gung | myang trahing witaradya | dadya adarbe punagi | yèn baita bangkit mentar ngèstu pada ||

16. sanalika punang palwa | saksana nulya lumaris | kandhêg paminggiring arga | Nangkoda anglaksanani | tumurun saking kèci | lajêng sumêngka ing suku | ing wukir Rasamuka | marêk radèn putra katri | dhewe-dhewe sumungkêm nganorkên raga ||

17. sarya umatur ngrêrêpa | dhuh anggèr-anggèr wong sigit | kang andon sudira brata | suwawi yèn amarêngi | karênaning panggalih | kula aturi mêmundhut | barang sèsining palwa | kang apèni rajapèni | kinarsakna kawula datan suwala ||

18. sira wong agung katiga | pangandikanira aris | sêmulêt mêmamad prana | he wong sanak kang sêdyapti | sih kadarmanirèki | bangêt panarimaningsun | nanging aywa rudita | dèn ruktènana pribadi | dananira kang sarwèdi sun tan nêdya ||

19. amung yèn panujuning tyas | ingsun nunut numpal-kèli | jogna jajahaning Jawa |

--- 53 ---

Nangkoda suka miyarsi | matur langkung prayogi | mangkana sasampunipun | wau radèn katiga | têdhak kerid manjing kèci | tan antara baita mangkat alayar ||

20. antuk angin karya gancang | baita tan dangu prapti | laladaning lèlautan | pasisiring Surèngwèsthi | labuh jangkar wus minggir | ya ta wong agung katêlu | tumêdhak ing dharatan | Nangkoda tur pangastuti | sinamaning sabda prasidaning lampah ||

21. nangkoda lajêng umangkat | ngalaya alayar malih | parêng lan radèn katiga | sah saking têngbinging tasik | praptane Ngampèlgadhing | kacaryan dènira ndulu | asrine bale panjang | santri rêgêng bawa dhikir | atilawat sêsingiran salawatan ||

22. sêngsêm rumasuk ing driya | natmata tataning sastri | dadya sande sêdyanira | dènniyarsa suwitèng aji | mring prajêng Majapait | nênggih Radèn Patah wau | karsa apuruhita | maring ing Jêng Sunan Katib | kang ngimami kaharjaning Ngampèldênta ||

23. nanging kang rayi tan rêna | lan pawong mitra Sèkh Sabil | kêdah kumudu suwita | maring Natèng Majapait | Dyan Patah angastuti | mring mitra lan arinipun | lajêng asêsewangan | sahe Dyan Kusèn Sèkh Sabil | Radèn Patah umanjing ing bale panjang ||

24. pinanggih santri lurah | kang rumêksa amajibi | anama pun Alim Du'llah | sasampuning salam taklim | tandya bagi-binagi | sayogyaning rêh rahayu | Radèn Patah tinanya | aran don sêdyanirèki | Radèn Patah pêpajar sajarwèng warta ||

25. anama Rahadèn Patah | saking Palembang nagari | sutaning Sang Arya Damar | praptane sêdya ngabdi [1] maring Suhunan Katib | Alim Du'llah mentar gupuh | marêk ing Jêng Suhunan | dinangu umatur aris | lamun wontên rare praptarsa suwita ||

--- 54 ---

26. ature duk atêtannya | wus rinèntèsakên nuli | ing bêbuka têngèng pungkas | Jêng Sunan suka miyarsi | lan ing nguni ngemuti | duk anèng Palembang rawuh | amaringi pêparab | sutèng Arya Damar nguni | kadi ingkang angaturkên Alim Du'llah ||

27. Jêng Sunan lajêng dhêdhawah | sang prapta kinèn nimbali | Alim Du'llah tur sandika | mèsat tan antara bali | Radèn Patah wus kerid | praptèng ngarsa ngaras suku | nulya lênggah satata | kinurmatan dupa wangi | ngambar-ambar lir ambagya para yoga ||

28. Jêng Sunan ing Ngampèldênta | langkung rêsep aningali | warnane Rahadèn Patah | dyatmika sarwa rêspati | Rahadèn Patah ugi | jrih asih sumungkêm suku | mring Sunan Ngampèldênta | rumasuk nrus lair batin | dupi sampun rêrêm sarèh sawatara ||

29. tinuju ing pamudyarja | sudarmanya kang mandhiri | dènira bawani
praja | anèng Palembang baladi | Dyan Patah matur aris | saking pangèstu
pukulun | ing saentar-kawula | pangèstu-tuwan basuki | anartani lumantar
wèh paramarta ||

30. Jèng Sunan malih ngandika | praptanira Ngampèlgadhing | apa
tuduhing ramanta | têka lamban tanpa kanthi | kang liningan turnya ris |
amba priyangga saèstu | ri sampuning mangkana | marta lèlakoning nguni
| duk entare saking nagari Palembang ||

31. wosing wit praptèng wasana | Jèng Sunan ngungun miyarsi | alon
pangandikanira | apa pantês sira kaki | nunggal lan santri miskin |
pangwikane dhingkal-dhingkul | adoh ing parisuka | langka nungkêmi
makiki | bungah-bungah yèn nuju ari Jumungah ||

32. pan antuk jakat sidhêkah | pae suwitèng wirya di | wruh titaning
tatakrama | suka parisuka ngènting | Dyan Patah matur malih |

--- 55 ---

makatên saèstunipun | sampun kawula-têmah | botên lèmèr sukêr sakit |
tyas kumêdsu kédah mangudi ngibadah ||

33. rumambah rêruba sêmbah | tabêt tabèk para nabi | tambah rubuh-
rubuh gêdhang | ngêtrêpi patraping santri | Jèng Sunan ngandika ris | yèn
mangkono sèwu sukur | ginau[2] lara lapa | bok tèmbe wibawa mukti |
ngajap-ajap mêmui tanjaning bégja ||

34. tan kaliru ing pangarah | sêdyanta sun angidèni | dadiya dèdalan
mulya | palal rinilan ing Widhi | winidyèng para wali | sun milu njangka
anjungkung | Dyan Patah tyas kasrêpan | rumasa kapasukan sih |
sangsaya jrih konjêm siti ngaras pada ||

35. ature ngasor nalangsa | dhuh pukulun maha yogi | wahyaning kang
sabda-tama | kawula darmi mêmui | sapakantuk ngêngudi | idining daulat
agung | Jèng Sunan angandika | pusthinên èsthining wèsthi | aywa
kabêsturon ing pangarahira ||

36. tan lirwa rèh ing wasana | Radèn Patah angantêpi | agêming agama
mulya | Jêng Sunan karênan ing sih | ing siyang lawan ratri | tan kêna sah
saking suku | kadya putra priyanga | sarèhning raos anunggil |
kadyangganing satu mungging ing rimbagan ||

37. nênggih gantya kang winarna | kang samya sêdya angabdi | maring
nagri Majalêngka | Dyan Kusèn lawan Sèkh Sabil | sapraptaning nagari |
pakèwêd raosing kalbu | sarèhning nêmbè prapta | èwêd dènnya
minangkani | dèrèng antuk mitra kang sapta kulina ||

38. dadya sayuk tekad praya | mring alun-alun sang kadwi | lênggah
ngandhap wringin kêmba | duk samana amarêngi | Sri Narendra tinangkil
| dene pra wadyabala gung | anèng ing pagêlaran | Nata waspadèng
pangèksi | lamun soring waringin ana katingal ||

--- 56 ---

39. rare kalih maksih jaka | samya pepe kawlasasih | dadya Patih
Gajahmada | kinèn niti anakoni | sandika mêsat aglis | prapta sor waringin
kurung | panggih radèn kalihnya | dinangu sajarwa jati | têtalêre
alunanirèng sarkara ||

13. Dhandhanggula

1. Radèn Kusèn umatur rumiyin | asadhepok nganorakên raga | dhuh sang
duta-tama mangke | kauningana ulun | rare dama anumpal kèli | asal
saking Palembang | ingkang asêsunu | anama pun Arya Damar | dene
sêdya kawula badhe angabdi | padaning Sri Narendra ||

2. sawusira dumunung kya patih | lajêng ndangu rare kang satunggal |
Sèkh Sabil alon ature | dhuh sang duta pukulun | inggih amba nama Sèkh
Sabil | Khalifah Kusèn suta | dene ta pun ibu | têtalêr saking Madura |
kacarita putrine Arya Baribin | asal saking Malaka ||

3. dene sêdya kawula anunggil | nêdya kêsdu suwitèng narendra | kêkipu
manawi kangge | ya ta sang mantri ngayun | wusnya têtang dènnya aniti |
aturing sakalihan | wangsul marêk ngayun | ngaturkên sarèntèsira |
alurannya miwah sêdyaning sang kalih | ing wiwitan wêkasan ||

4. sri narendra langkung sukèng galih | sakalihan nulya tinimbangan | datan
adangu praptane | marêk byantarèng prabu | amabukuh konjêming siti |
Sang Prabu Brawijaya | karênan andulu | ing citraning sakalihan | miwah
samyā widagda ing kramaniti | pantês sasolah-bawa ||

5. katanggapan dènira angabdi | radèn kalih winor pamagangan |
kalangkung suka manahe | datan antara wau | abibaran kang samya
nangkil | nata andhatulaya | kasaput ing dalu | kacarita lama-lama | Radèn
Kusèn Sèkh

--- 57 ---

Sabil dènnya angabdi | kanggêp pangawulannya ||

6. pinarcaya ing sabarang kardi | tan kêna sah saking ing ngarsèndra |
yayah putra sakalihe | parêng wahyaning wahyu | Radèn Kusèn
katarimèng sih | ginanjar mêngku praja | ing nagari Têrung | ran Dipati
Pêcattandha | pan Sèkh Sabil tinuduh mring Ngampèlgadhing | pan
amintaa prênah ||

7. pan supados nunggila agami | sakalihan sampun kalampahan |
Pêcattandha budhal age | maring nagari Têrung | sinung wadya ing
sawatawis | Sèkh Sabil lajêng mangkat | maring Surèngkewuh |
sapraptaning Ngampèldênta | mring Jêng Sunan Katib katanggapan ing sih
| praptaning pupulunan ||

8. lawan saking tuduhing narpati | kang putra kinèn maringi prênah |
anulya dinunungake | mêngku tanah ing Ngudung | angimami nata agami
| Sèkh Sabil tan lênggana | mangkat maring Ngudung | dhêkahe wus karta
arja | kathah janma kang samya manut agami | Sèkh Sabil lajêng karan ||

9. nênggih Jêng Sunan Ngudung wêwangi | datan ana ing sangsayanira |
têkyan sawêwèngkon kabèh | rêrêming rèh rahayu | ênêngêna winarna
malih | Jêng Sunan Ngampèldênta | dènnya ngambil sunu | maring sira
Radèn Patah | kasangsaya kasok katrêsnanirèng sih | rinakêtakên pisan ||

10. dhinaupkên lan putranirèki | Ratu Panggung panêngêranira | atut
runtut sakarone | lan wontên putranipun | apêparab Makdum Ibrahim |
tinanêm anèng Benang | minangka pangulu | panêtêp panatagama |
kalaksanaan ing Benang wus dèn dunungi | dhêkahe karta arja ||

11. duk samana Sang Makdum Ibrahim | lajêng karan nama Sunan Benang
| datan ana sangsayane | nihan gantya winuwus | nênggih Radèn [Ra...]

--- 58 ---

[...dèn] Satmata nguni | anèng laladan Benang | saharja anglangut | sêdya
maring prajèng Arab | tanpa wadya kapencut amungguh kaji |
sapraptaning Malaka ||

12. myarsa lamun wontên sarjana di | apêparab Sèkh Molana Iskak |
padhukuhan desa Pase | alim mangulah ngèlmu | pan kasêbut winali
mukmin | wau Radèn Satmata | kapencut ing suwur | nêdya kèndêl
puruhita | tan uninga lamun kang eyang pribadi | pan sudarmaning rama
||

13. sapraptane Pase wus kapanggih | lan Sang Pandhita Molana Iskak |
dahat gung pakurmatane | tan wrin yèn wayahipun | dene lagya tèmbe
udani | lajêng lênggah satata | bagya- binagya yu | wusnya rêrêm
sawatawa | sang pandhita nandukkên wacana manis | dhuh satriya utama
||

14. rèhning pun bapa nêmbè upèksi | kalilana anuwila ganda | sintên ta
paduka anggèr | nama myang dunungipun | lan punapa sêdyaning kapti |
kasasar pagubugan | ompok-ompok samun | padhêkahane pun bapa |
Dyan Satmata sadhepok umatur aris | dhuh Sang Maha Minulya ||

15. prapta kawula ngarsa Sang Yogi | kédah kêsdu anglêlêbur tapak |
anyantrik manawi kangge | dene tuwan andangu | ing salsilah pinangka
mami | saking dhukuh ing Benang | kang sotah anêbut | ulun aran pun
Satmata | kang mancêri ing jasad kawula nguni | nama Sèkh Wali Lanang
||

16. bangsa alim saking atas-angin | kilap asal-usule pun bapa | kacupêtan
jalèntèrhe | dene nguni pun ibu | putri saking Blambangan nagri | lênging
sêdya-kawula | duk ing purwanipun | nêdya dhatêng tanah Arab |
nyatakakên kapencut amungguh kaji | ngupadi sadu dinya ||

17. Molana Iskak duk amiyarsi | sarèntèsè Rahadèn [Ra...]

--- 59 ---

[...hadèn] Satmata | gya rinangkul lungayane | sarya ngandika arum |
tarèmbèle si kenthol iki | iya kalinganeya | iki jêbulipun | cukulane Wali
Lanang | praptèng kene tan anyana tan angimpi | yèn sira wayahingwang
||

18. dene wus diwasa sira kaki | lagi iki têtmu sarawungan | ajaa
rinèntèsake | tulus nora sumurup | sasat liyan kabrayan yêkti | labêt
kapatèn damar | wit dèdaman samun | samoha mahas molana | yèn
mangkono pan wus karsaning Hyang Widhi | praptanirèng Malaka ||

19. Radèn Satmata duk amangêrti | yèn Sèkh Iskak punika kang eyang |
sudarmanirèng ramane | gupuh mangaras suku | sarya matur anor malat
sih | dhuh sêmbahan kawula | sukur bage sèwu | baya sagêd kasêmbadan
| nggèn kawula luru-luru lari-lari | wontên daulatira ||

20. Sang Sèkh Iskak langkung sukèng galih | apirêna maring ingkang
wayah | nrus rumasuk kasok sihe | dupi ing wanci dalu | amarêngi ri Sukra
Manis | sira Molana Iskak | alênggah pitêkur | ingadhêp maring kang
wayah | Dyan Satmata tumrêcêp umatur aris | dhuh sêmbahan-kawula ||

21. rèhning amba maksih mudha pingging | dèrèng wikan jatining
Pangeran | mugè jêng eyang ing mangke | paringa sawab maklum |
anyamadi kawula yêkti | dadosa padamaran | pêpêtênging kalbu | kang
eyang alon ngandika | bocah iki antuk nugrahaning Widhi | wajib sun
wêdharana ||

22. kaki lamun sira kudu ngudi | jatining Pangeran ingkang nyata | payo
mring gon ing asêpèn | supaya bisa kusus | ingkang wayah sumanggèng
kapti | kang eyang lajêng kesah | kang wayah tumuntur | prapta têtbaning
atêba | Sang Sèkh Iskak lênggah ing pêpunthuk mênçir | satata lan kang
wayah ||

--- 60 ---

23. ingkang eyang angandika aris | ingkun tuduh ing patakyanira |
Pangeran iku nyatane | wus ana ing sirèku | aja mamang dènnya ngèncêbi

| nanging samono uga | nganggo kudu-kudu | nasabi tanangsubira | pan
kawula iku kudu angalingi | pananing sêsimpênan ||

24. ingkang wayah lon aturirèki | kadospundi sabdaning jêng eyang | têka
amêmindho gawe | ngêngkoki nyatanipun | palajênge botên ngakêni |
dene mawi warana | kang eyang nabda rum | wus mangkono patrapira |
kudu nganggo êmpan papan angarani | gaib bangsa punika ||

25. ingkang wayah nulya matur malih | lawan pundi jatining Mukhammad
| lan Allah paran tunggale | ucap-ucapanipun | ya Allahu Rasulullah | ulun
kadunungêna | babar pisanipun | kang eyang alon ngandika | prakarèku
kocap kitab Johar Mukin | gambuh gaib babarnya ||

14. Gambuh

1. rungunên wayahingsun | bok kabuka bêbukaning kawruh | kawruhana
hikayating Nukat Gaib | gaibing Pangeran iku | lan rasul yêkti yèn elok ||

2. kumpul lan pisahipun | anèng karsa wisesa puniku | Nukat Gaib dadi
kanyataan yêkti | anèng ing sira sirèku | padha katêkan ing kono ||

3. Allah Mukhammad iku | dene têngêse ingkang karuhun | Allah iku
jatining aran sayêkti | wujud mokal têngêsipun | jatining Pangeran kono ||

4. dene ta têngêsipun | kang akyan karijiyah puniku | sajatining
wêwayangan ana dening | Allah Mukhammad lripun | sajatining Allah
kono ||

5. ya sajatining rasul | anapon kang aran Allah iku | pan sarira de kang
aran sarirèki |

--- 61 ---

nênggih rahsa ya rahsèku | Datu'llah ingkang kinaot ||

6. ing Datu'llah puniku | ya dat rasul ya têngêse Ingsun | Inkang Murba Jati
Langgêng Wisèsèki | ya iku sajatinipun | Nukat Gaib pan mêngkono ||

7. dene dununganipun | iya ana ing asma pêpitu | kawruhana pan puniku
sajatining | ing rupa Mukhammad Rasul | nênggih lamlam kang sawiyos ||

8. mata ping kalhipun | ping tri wayah niyat ping patipun | kaping lima
iman kaping nême tokid | sarengat kang kaping pitu | têngêsipun winiraos
||

9. lamlam tunggal jêjuluk | têngêse mata tunggal pandulu | ingkang wajah
tunggal kaanan lirnèki | têngêse niyat puniku | jênênging kaanan awor ||

10. têngêse iman iku | tunggal rahsa tokid tunggal wujud | têngêse sarengat
samêktanirèki | kaanan tunggal jatiku | ya jatine salat kono ||

11. salat kang limang waktu | ngadêg jênênging kaanan iku | dene rukuk
tunggale kaanan tuwin | asujud pan mulyanipun | nênggih ing kaanan
kono ||

12. kaanan jatinipun | jati karsa purba wisesèku | dene lungguh sampurna
kaanan jati | nênggih tunggal rahsanipun | tunggaling kaananingong ||

13. rahsa jati karsèku | karsa wisesa priyanganipun | têngêsipun nyata
yèn ing jasad iki | ênggone khak sabhanahu | wa ta 'ala kang kinaot ||

14. dene khalifahipun | ing êkhak nênggih Allah puniku | khalifahing Allah
pan Mukhammad tuwin | Mukhammad khalifahipun | pan Adam Adam
gumantos ||

15. mukmin khalifahipun | khalifahing mukmin khak satuhu | khalifahing
êkhak ya ing khak

--- 62 ---

sajati | aja mamang dèn tuwajuh | antêp kang wus winiraos ||

16. dene kaki sirèku | têka kadhêmpalan[3] layu-layu | kudu adrêng nyatakakên munggah kaji | lah apa kang sira-buru | tan liyan yêkti mangkono ||

17. Mêkah Madinah iku | ka'batu'llah wus anèng sirèku | yèn wus urus êrose ing sêmbah puji | apa manèh pinaèlu | kana kene ya ing kono ||

18. luhur lamun panuju | muliha maring tanah Jawèku | tèmbe sira dadi pandaming rat Jawi | kang wayah nêmbah andhêku | rahsaning raos rumaos ||

19. lan antuk sabda luhung | kang lumahan tinahênan kalbu | lir cumlêguk pangugêring guru kaki | kang amikanakên ing kun | kaananing elok-elok ||

20. ri sampuning dumunung | sidi sidaning kadadènipun | pan kasaru ing wanci wus gagat enjing | Sèkh Iskak lan wayah kondur | sampun praptèng dhepok karo ||

21. sarêng praptaning esuk | Radèn Satmata apamit mantuk | amituhu wangsul marang tanah Jawi | kang eyang suka jumurung | radèn wayah nulya bodhol ||

22. tan winarna ing ênu | dènira layar anèng ing laut | sampun prapta dhukuhira ingkang lami | lajêng angalih mangidul | maring Jipang dènnya manggon ||

23. tan lami linggar gupuh | sêdya maring ing Tandhês Sang Bagus | pan kapalang tan darbe baita nguni | gya wontên tukang parau | manggihi maring sang anom ||

24. Ki Panangsang ranipun | praptanira angaturkên prau | mung sajuga payon ing nginggil tan mawi | Radèn Satmata tan ayun | karana tan mawa payon ||

25. karya sangsayèng laku | lawan linantipan pasang sêmu | bok punika dadya sasmitaning [sasmita...]

--- 63 ---

[...ning] ragi | marma giyota parunggu | dahat lênggana anganggo ||

26. Ki Panangsang agupuh | lajêng pinayonan kang parau | wusing brukut
dyan ingaturakên malih | radyan karênan ing kalbu | tumêdhak sarta
mirantos ||

27. nulya amancal laut | praptèng Tandhês kèndêl kang parau | Dyan
Satmata tumurun saking ing kèci | adarat ing lampahipun | ing sêdyanira
sang anom ||

28. jujuk pangagêngipun | ing Tandhês kang minangka luulu[4] | ajêjuluk
nênggih Pangeran Pinatih | sapraptanira ing ngriku | karênan satata
lunggoh ||

29. gya bagya-binagya yu | tannya sangkan paran sêdyanipun | Dyan
Satmata rumèntès sajarwa jati | Pangran Patih sukèng kalbu | luntur sihe
mring sang anom ||

30. dadya ingambil mantu | tan alami jinênêng pangulu | anèng Tandhês
angimami ing agami | sarta sinungan jêjuluk | Pangeran Khalifah kaot ||

31. datan lami winuwus | kadhatêngan prênah mantunipun | pangran
patih nama Ki Agêng Balawi | mêngtas saking ambêburu | mring wana
ambêrêg sato ||

32. praptane atur dunung | maring Pangeran Khalifah wau | lamun
sakiduling Tandhês wontên ardi | sae pasang rakitipun | ran Giri Gajah
kadhaton ||

33. puniku langkung patut | mangka panggènane amêmêsu | tapa-brata
maladi samadi êning | lamun panudya ing kayun | binadranana
dhêdhepok ||

34. kula tumut jumurung | Pangran Khalifah suka ing kalbu | sang
parasdya dahat katariman ing sih | Pangeran Khalifah gupuh | marêk ing
rama wêwartos ||

35. ing sarèntèsing atur | lamun pinarêng panudyèng kayun | minta amit
apan sêdya dèn

--- 64 ---

dhukuhi | supados karta rahayu | ing Giri Gajah kadhaton ||

36. Pangran Khalifah wau | mèsu anèng saluhuring gunung | kacarita
pitung dina pitung ratri | dènira muja manêkung | tilawat Kur'an tan
pêdhot ||

37. sawusing pitung dalu | tinimbalan maring ramanipun | salêbêting
padhepokan dèrèng rakit | maksih ingaturan kondur | ing dalêm Tandhês
kemawon ||

38. Pangran Khalifah wau | anuruti ing sudarmanipun | maring Tandhês
sadintên sadalu pamt | pan awangsul anênungku | mring Giri Gajah
kadhaton ||

39. karsanira linaju | kawandasa ri têkyan botipun | ingkang rama Pangran
Patih anjurungi | dènnya abadra mardya yu | mamrih marta karahayon ||

40. ya ta sawangsulipun | Pangran Khalifah siyang myang dalu | datan
pêgat tilawat ngêningkên galih | praptèng kawandasa dalu | dènnya
nênêdhèng Hyang Manon ||

41. tinimbalan agupuh | mring kang rama datan arsa kondur | apan nêdya
nutugkên ing satus ari | karasa dènnya manungku | nèng Wukir Gajah
kadhaton ||

42. pra sakabat sadarum | tinimbalan ambabada dhukuh | kalaksanan
punang wana wus barêsih | sowang-sowang karya dhukuh | kang awisma
wus angrodon ||

43. karta arja kang dhukuh | Pangran Khalifah suka ing kalbu | dupi
sampun andungkap ing satus ari | Pangeran Khalifah wau | samana
miyarsa wartos ||

44. lamun ing Surèngkewuh | wontên pandhita kasuwur kasub | dhukuhira
winastan ing Ngampèlgadhing | wus dadya wali pinunjul | ngimami agama
kaot ||

45. Pangran Khalifah gupuh | marêk ing rama atur dèdunung | lamun
nêdya sowan maring

--- 65 ---

Ngampèlgadhing | mangalap sor anggêguru | Pangran Pinatih rumojong ||

46. lajêng budhalan gupuh | sawatara siswa kang tumuntur | lampahira
datan winarna ing margi | ing Ngampèldênta wus rawuh | umarêk
kasmaran ing don ||

15. Asmaradana

1. tinampanan basa manis | mring Jêng Sunan Ngampèldênta | Pangran
Khalifah lumongsor | lajêng ajawaban asta | myang bagya-binagyarja |
Jêng Sunan Ngampèl andangu | aran myang sangkaning sêdya ||

2. Pangran Khalifah mamarti | jinalènrèhkên sadaya | duk myarsa Jêng
Sunan Ngampèl | langkung sukaning wardaya | alon dènnya ngandika |
yèn mêngkono putraningsun | gya rinangkul kang lungayan ||

3. aja tambuh sira kaki | dudu wong liyan kêbrayan | mung lagi kapatèn
obor | ing sun ramanta priyanga | kadangingsun ramanta | nanging tuwa
bapakamu | lagya tumindak nak-sanak ||

4. Pangeran Khalifah aglis | gurawalan ngaras pada | amêlasasih ature |
dhuh pukulun kangjêng paman | dèn agung pangaksama | pan kawula
botên langkung | badhe sêdya puruhita ||

5. rèhning mudha damèng budi | wontêna ing sih-paduka | supados
wontên kaote | Jêng Sunan Ngampèl ngandika | mêngkono iku darma |
ingsun aparing pituduh | atas saking pamintanta ||

6. jangji mantêp sira kaki | umatur Pangran Khalifah | saèstu amba
rumojong | punapa sakarsa-tuwan | kêkipu nglêbur tapak | Jêng Sunan
luntur sihipun | rumasa kawogan tuwa ||

7. dupi ing antara ratri | Jêng Sunan ing Ngampèldênta | têdhak ing gèn
ing asêpèn | Pangran Khalifah datan sah | lajêng satata

--- 66 ---

lênggah | Sunan Ngampèl ngandika rum | maring Pangeran Khalifah ||

8. apa wus lèmèk sirèki | umatur sampun dhêdhasar | inggih
sakawontênane | Jêng Sunan malih ngandika | apa patakonira | Pangran
Khalifah umatur | pundi dununging Pangeran ||

9. lan kawulane kang pundi | dene Gusti lan kawula | tan kêna pinisahake
| wulanging guru kawula | Pangran anèng kawula | dene kawula puniku |
pan ana ing Gustinira ||

10. amba pan dèrèng mangrêti | yèn kawula ngakênana | Pangeran paran
dadine | dene tan langgèng nèng dunya | lawan duk anèng dunya | ewah
gingsir darbèkipun | pundi tandhane kanggènan ||

11. Jêng Sunan ngandika aris | iku minangka trêsandha | yèn sira kawula
tulèn | kasandhangan apês dunya | iya dadi antara | kalawan Gusti Maha
Gung | matur Pangeran Khalifah ||

12. kang makatên kados pundi | upami bale kancana | kanggènan ratu
kinaot | têka mawi angrêrusak | botên rêksa-rumêksa | saèstu wêngku-
winêngku | têka mawi beda-beda ||

13. Jêng Sunan ngandika aris | bènêr kaya wuwusira | nanging kurang
panggilute | Pangeran Ratu upama | kawula solahira | owah-gingsire
puniku | rumasaa yèn kawula ||

14. nanging rumasaa Gusti | trape anèng papan-êmpan | ing lair batine
kono | apan kaanane ana | tunggal kajatènira | awit kaananirèku | solah-
tingkah saking Allah ||

15. Pangeran kang angidèni | lamun kurang panarima | kasandhangan
coba gédhe | kapurba karsa wisesa | yèn luput sinung dosa | yèn ana
panalangsamu | yêkti sinung kanugrahan ||

16. marma dèn têpsila[5] kaki | aja sira kumalamar | ugêran sajroning
batos | Matur Pangeran Khalifah | ulun sampun tumanja |

--- 67 - --

mênggah pisah-kumpulipun | Gusti kalawan kawula ||

17. sasampuning wrin sajati | êrosing kang dèdunungan | kados pundi
pratikêle | dene babing kasampurnan | rêricikane kathah | lan kathah
pralambangipun | têngêse lajim punika ||

18. lawan subut kaping kalih | pundi asmaning Pangeran | ananing Widhi
kapriye | lawan pribadining Allah | pundi sêdyaning Allah | dhèwèking
Hyang kang saèstu | lawan lire sul punapa ||

19. lan jatining Hyang kang pundi | kaanane Widhi nyata | Datu'llah paran
dununge | lawan sêdyaning Datu'llah | lawan ingkang akarsa | pundi
wimbuhing Allahu | lan tunggale Widhi uga ||

20. lan jangka tigang prakawis | lan tan ana ing sarira | lan kang anèng
sarirane | tan adoh lawan sarira | lan masalah katiga | dene ta ingkang
rumuhun | nênggih imbar wêwayangan ||

21. lawan kitab makuthèki | latar putih tanpa sastra | pukulun artosna
mangke | Jêng Sunan alon ngandika | lajim ênêng têngêsnya | subut pan
gandhènganipun | lire kadi urip-kita ||

22. kang ngwikani ing pribadi | ingkang kawasa priyangga | lawan kang
miyarsakake | tan liyan pribadinira | kang akarsa piyambak | miwah kang
andulu iku | sayêkti yèn dhèwèkira ||

23. ingkang anabda pribadi | kang langgêng kêkêl priyangga | kang maha
mulya dhèwèke | ingkang elok ya piyambak | maha suci priyangga | kang
asih pribadinipun | ingkang ngasihi piyambak ||

24. puniku sêmuning lajim | têngêse rumambah ing rat | Pangeran kang
sanyatane | sinêbut saking kawula | yèn kawula tan ana | sayêkti kang
jagad lêbur | Pangerane ora ana ||

--- 68 ---

25. yèn ing asmaning Hyang Widhi | yèku kang uwus dèn ucap | kaananira
Hyang Manon | apan tan sêdya priyangga | pan pribadining Allah | ya
sêdya baka puniku | aywa mundur abêbakal ||

16. Durma

1. pan sêdyaning Allah pan langgêng priyangga | ingkang anguwasani |
murba amisesa | ana ing urip-kita | têngêse karsaning ati | sajatinira |
panunggaling pribadi ||

2. ingkang nabda ingkang ningali tan liyan | kaananing Hyang pasthi |
pundi dhèwèking Hyang | anuli saurana | ingkun dhèwèke Hyang Widhi |
ingsun punika | têngêsipun punapi ||

3. saurana iya mantêp têngêsira | kang sêdya ingkun yêkti | têngêse pan iya
| ora ana kaanan | roro myang tingal kêkalih | pan ora ana | ya pangucap
kêkalih ||

4. ing têngêse ingkun iki kang anêdya | ya ingkun ingkang urip | ingkun
kang kuwasa | ingkun kang amiyarsa | ingkun ingkang aningali | ingkun
kang wikan | ingkun kang maha suci ||

5. ingkun ingkang maha agung maha mulya | ingkun kang anjati ning |
ingsun kang nugraha | ingkun ingkang anabda | ingkun kang suksma
linuwih | ingkun kang tunggal | ingkun kang bêstu jisim ||

6. iya ingkun kang urip datanpa nyawa | langgêng tan owah gingsir |
ingsun kang sampurna | kang agung kang wisesa | kang elok ingkun
sayêkti | pan ingkun ingkang | kang muji kang pinuji ||

7. inghun ingkang tanpa ênggon tanpa arah | inghun kang tanpa warni |
inghun tanpa rupa | inghun kang tanpa masa | kang tanpa jiyat sun iki |
tanpa musapah | tanpa tuduhan mami ||

8. inghun ingkang mantêp ananingsun dhawak |

--- 69 ---

malih yèn dèn takoni | êndi jatining Hyang | dèn enggal jawabira | jatining
Allah kang pasthi | kaananing Hyang | sêdya ana pribadi ||

9. têngêsipun purba karuhun kang tanpa | wiwitan lan tanpa wit | pan
inggi punika | kang yêkti jatining Hyang | êndi kaananing Widhi | ingkang
sanyata | saurana dèn aglis ||

10. angèstokkên ing dhiriningsun piyambak | lire wus tan ngulati |
sakathahe mapan | wus kawêngku dening Hyang | jêr inghun ratu linuwih |
ratu kang tunggal | tunggal datan kêkalih ||

11. yêkti inghun kang mantêp ing dhèwèkingwang | madêg ratu pribadi |
ing karatoningwang | tan ana mêmadhaa | agunging karaton-mami |
langgêng tan owah | urip tan kênèng pati ||

12. lan malih yèn tinakonan êdatu'llah | saurana dèn aglis | iya tansah
molah | lawan tanpa wêkasan | ingkang aran Allah pasthi | jawabên
enggal | kaananira yêkti ||

13. kang akarsa lan pundi wimbuhing Allah | saurana dèn aglis | iya
karsanira | kang tan ana towangnya | kang tan ana kirangnèki | lawan
kang nora | kêna ing owah gingsir ||

14. lamun ana sujanma ingkang têtannya | pundi tunggaling Widhi |
enggal saurana | aran kang ingaranan | tunggal tan wujud kêkalih | wus
nora mamang | lan ora mindho kardi ||

15. dene lamun tinakènan malih sira | jangka tigang prakawis | ingkang
dhingin uga | tan adoh lan sarira | pan anèng sarira ping dwi | ping tri
kasrira | saurana dèn aglis ||

16. kang tan adoh saking sarira sahadat | tan anèng srira takbir | kasrira
sakarati | kadya paran lirira | saurana dipun aglis | liring sahadat | among
winong pribadi ||

17. têngêsipun takbir pan sira Pangeran | anêmbah lan amuji | ing
pribadinira | têngêse kang sakarat | dene tan êsak ing pati | lan ora
mamang | lan malih bokmanawi ||

--- 70 ---

18. tinakonan masalah tigang prakara | dene ingkang rumiyin | imbar
wêwayangan | lan kitab amakutha | latar putih tanpa tulis | lire dèn etang
| kang imam mulya suci ||

17. Pangkur

1. sasmitaning kawimbuhan | kawruhana ya pangucapirèki | miwah ing
pangrungunipun | tuwin paningalira | nora nana pangucap roro têtêlu |
dadi solah tingkahira | boya êsak boya sêrik ||

2. boya tasbèh mung Datu'llah | kewala dèn karasa yèn abukti | dèn
karasa yèn anginum | sêmbahyang dèn karasa | dèn karasa iya Datu'llah
puniku | ingkang wus awuru Allah | yèku aran salat daim ||

3. lawan malih ingaranan | martabate ing kasdu takrul takyin | kasdu
nênggih artinipun | mapan karêping niyat | dadi cipta dene têngêsipun
takrul | iku pamêksaning niyat | panggraita dadinèki ||

4. lire ingkang takyin nyata | wasesane ing niyat kang sayêkti | sang cipta
ing dadosipun | kasdu punika iman | takrul tokid takyin makrifat lirisipun |
ingkang iman yèn anaa | gumlèthèk yêkti tan sêrik ||

5. tan sak tingale ing Allah | ingkang tokid ênênge lawan mosik |
glèthèking paningalipun | pangucap pamiyarsa | nyata ingkang

angênêngakên puniku | kang angglèthèkakên Allah | myarsakkên
ngucapkên pasthi ||

6. Allah Ta'ala mapan kang | amimbuhi dadi sampun sak sêrik | tingalira
mring Hyang Luhur | inggih ingkang makrifat | ing ênênge osike
paningalipun | pangrungu pangucapira | dadi lan dhèwèkirèki ||

7. têngêse puniku nyata | bila tasbèh bila tasbèh lirnèki | tan loro
kaananipun | mapan Allah kewala | kang angucap mênêng mosik tuwin
mambu | pan nyata mring ananira |

--- 71 ---

poma wus aja sak sêrik ||

8. sasmitaning rahsanira | kang angucap kang dèn ucap Hyang Widhi |
poma dèn awas dèn emut | nora na liyan-liyan | ana dene yèn tinakonan
sirèku | punapa pangawruhira | ing Allah jawabên aglis ||

9. pangawruhingsun ing Allah | kawimbuhan kaananing Hyang Widhi |
wontên malih سوالipun | apa ujar sakêcap | lawan laku satindak mênêng
gonipun | nuli enggal saurana | ujar sakêcap puniki ||

10. iya kang ngucap Hyang Suksma | dene laku satindak sarta Widhi |
kang aran mênêng goniku | iku wus nora susah | angulati ing Allah ing
dhirinipun | pira martabating Allah | saurana tri prakawis ||

11. nênggih tasnip kang kapisan | ingkang kaping kalihe insan kamil |
kandil kaping tiganipun | tasnip liyêp têngêsnya | insan kamil kang
sampurna artinipun | kandil roh ilapi lirnya | utawi sêmuning tasnip ||

12. tingal kang suluh sampurna | iya wahyu iku têngêse malih | dadi
paningal kang kusus | têngêse wahyu nyata | mila wajib sami dèn ênêngna
iku | prabedanirèng paningal | ing nabi wali myang mukmin ||

13. nabi têtêp tingalira | para mundur tingale wali mukmin | pira
martabating laku | jawabên rong prakara | kadi gêni kang dhingin ping
kalhipun | kadi angin têngêsira | sêmune kang dadi gêni ||

14. pinèt panase kewala | pan têngêse puniku amrih gêlis | panarimanira sampun | kasuwèn dene ta kang | kadi angin pinèt tan kêna linuru | têngêse wus nora pisan | susah angulati malih ||

15. pintên martabat sarira | saurana iya tigang prakawis | ana dene kang rumuhun | kadya tanggal sapisan | kaping kalih lir tanggal ping sanganipun | tiga lir tanggal patbêlas |

--- 72 ---

dene ta ingkang rumiyin ||

16. kang kadya tanggal sapisan | iya dene atulis lair batin | kang kadya ping sanganipun | têngêse luluh sirna | kahanane ing kaananing Hyang Agung | kang kadi tanggal patbêlas | dene panêdyane sami ||

17. kadya kang andadèkêna | ing têngêse ping patbêlas kang sasi | wus prapta ing wangênipun | tibaning ing kawula | nora ta yèn dadiya Gusti puniku | nanging iya dadi uga | pintêr martabat pamanggih ||

18. jawabên limang prakara | kang rumiyin gélèthèknya kang ati | yèkang kaping kalihipun | katêpêking lumampah | panjêriting anangis kang kaping têlu | kêtuging nutu kaping pat | ping lima corèking ngantih ||

19. lire sipat jamalu'llah | dene kêtuging anutu lirnèki | wêdaling pangucapipun | nyata yèn nora mamang | nora susah angulati ing Hyang Agung | ya kang ngucap iku Allah | poma aja pindho kardi ||

20. martabating bumi pira | saurana kèhe tigang prakawis | dating roh ilapi iku | nênggih ingkang kapisan | kapindhone roh jasadi sadayèku | kaping tiga tanpa prênah | tanpa tuduhan sayêkti ||

21. martabating kanugrahan | lamun besuk sira dèn têtakoni | pintên kanugrahanipun | sahadat saurana | tri prakara nênggih ta ingkang rumuhun | ngêncêngakên imanira | nêguhkên ing tyas ping kalih ||

22. ping tri ngosikkên gaota | lamun sira iya tinakèn malih | nugrahaning
salat iku | pira kang rêcikan | saurana pan têtung prakara iku | dhingin
mêgatakên karsa | tinggal cipta kaping kalih ||

23. madhêp kaping tiganira | lawan pira kanugrahaning takbir | saurana
dèn agupuh | iya tigang prakara | dhingin kawruh wêruh kaping kalhipun |
jatining kawruh ping tiga |

--- 73 ---

pintên nugrahaning budi ||

24. jawabên tigang prakara | sayêktine cipta ingkang rumiyin | gaita ping
kalhipun | kang cipta ping tiganya | nugrahaning roh pira jawabên gupuh |
pan iya têtung prakara | dene ta ingkang rumiyin ||

25. urip tan kalawan nyawa | kaping kalih ananira kang pasthi | tan dèn
anakkên lyanipun | ping tri Allah kewala | nora nana kang momorana
puniku | sayêkti saking priyangga | wong anom kang dèn mangrêti ||

18. Sinom

1. lamun sira tinakonan | ya ta ing datu'lwujudi | pira kèhing kanugrahan |
nuli saurana aglis | sakarat lire yêkti | dene kanugrahanipun | iya têtung
prakara | wus anèng ananirèki | dhingin adhêp idhêp kaping kalihira ||

2. mantêp ingkang kaping tiga | lan pira kanugrahaning | iman enggal
saurana | pan iya tigang prakawis | sukur ingkang rumiyin | tawêkal ping
kalhipun | kaping tigane sabar | pintên nugrahaning tokid | saurana pan
amung kalih prakara ||

3. nênggih têtêp kang kapisan | wêdi ingkang kaping kalih | wontên malih
sualira | pintên ing kanugrahaning | makrifat mangka nuli | saurana dèn
agupuh | iya namung satunggal | ana ing angganirèki | apan nênggih
karsa wisesa priyangga ||

4. pintên martabat karêman | saurana tri prakawis | para mukmin karêm
ap'al | karêm sipat para wali | dene kang para nabi | êdat pakarêmanipun

| liring karêm Datu'llah | sok wontêna asya nênggih | karêm sipat sok wontêna gumlethaka ||

5. lire karêm ap'alu'llah | sok wontêna obah osik | yèn sakit paningalira | nênggih kabuka sayêkti | ing sipat jalal tuwin | jamal [ja...]

--- 74 ---

[...mal] kamal kaharipun | dadine imanira | makbul gumlèthèking ati | dadi antuk sampurna yakining gêsang ||

6. pintên martabating nyawa | saurana dipun aglis | kathahing nyawa satunggal | pan iya mung roh ilapi | marmane mung sawiji | têngêsing urip puniku | pan iya mung satunggal | tan ana urip kêkalih | ing pasthine amung kaanan satunggal ||

7. lamun sira tinakonan | pundi Allah padha mangkin | dèn aenggaurana | sapa ingkang ngucap iki | aja ta sira-dalih | yèn dudu sira Hyang Agung | sayêkti kang dèn ucap | kang ngucap tan lyan Hyang Widhi | nanging kudu wêruha ing panarima ||

8. anapon ing panarima | dèn kadi toya lan siti | lawan dipun kadi udan | miwah dipun kadi wêsi | lan dèn kadi jaladri | kang kadi lêmah lan banyu | dèn rumêsêp têngêsnya | nora pêgat kang rohani | ana dene têngêse kang kaya udan ||

9. dene tan pêgat tingalnya | anapon kang kadi wêsi | sakarsanira marentah | dèn gaweya pangot lading | pêthèl wadung upami | nora owah sipatipun | maksih wêsi kewala | dene kang dadi jaladri | ya ing ngriku duduwa ing ngriku uga ||

10. punika pasthi kang asal | ing ujar sakêcap tuwin | laku satindak kalawan | kang mênêng ing ênggon nênggih | yèn wus dadi jaladri | nora owah katingalipun | [6] dulu dinulu dhawak | tan ana tingal kêkalih | nora nana pangucap roro punika ||

11. dadi salate sampurna | wêruh paraning ngabêkti | wêruh paraning sêmbahyang | pênêring nyata tan[7] sisip | wêruh paraning osik | wruh [..]ning[8] ênêngipun | wêruh paraning ngucap | wruh paraning pamiyarsi | wruh paraning ngadêg wruh paraning lênggah ||

12. wêruh paraning anendra | wêruh paraning atangi |

--- 75 ---

wêruh paraning amangan | wruh paraning nginum warih | wêruh paraning
ngising | wêruh paraning anguyuh | wêruh paraning suka | wêruh paraning
prihatin | wruh paraning ngidul ngulon ngalor ngetan ||

13. wêruh paraning mangandhap | wêruh paraning manginggil | wêruh
paraning ing tengah | wêruh parane ing pinggir | wêruh paraning urip |
wruh paraning patinipun | kabèh ingkang gumêlar | kang gumrêmêt kang
kumêlip | nora samar wêruh parane sadaya ||

14. tamat masalah kaanan | poma èstokêna kaki | aja nganggo
kumalamar | rasukên rasane iki | yèn wus wêruh dèn wêrit | dèn asasab
aywa umung | aja sawiyah-wiyah | nganggowa parah yèn angling | dèn
kêkêra karanane sangkan paran ||

15. yèn maido têmah kopar | kapiran angapirani | dadi ora ngayawara |
sulange salah pamilih | tan mingsra kalbèng musrik | sak sêsêk kaliru
surup | êmbuh mbuh pinangèran | kèngsêr sire anêlisir | tanpa kusur
kabalusuk tibèng sasar ||

16. kèndêl pangandikanira | Jêng Sunan ing Ngampèlgadhing | mêmêjang
wijanganira | tanjaning ngèlmu sajati | wau ta kang winisik | Pangran
Khalifah ngrêrasuk | rasaning rèh rinasa | pêpajar winiji-wiji | wus
kagulung gumêlêng golonganira ||

17. anèng ing sarira Suksma | kang gumêlar anèng bumi | kang sinimpên
kang dèn samar | wus mungwing sarira sami | lire wus angawruhi | ing
gêlar kukudanipun | pan saking ing manusa | ananing aral sakalir | dadi
talêr lèlêre wus kalampahan ||

18. ya ta Pangeran Khalifah | ngaras pada sang ayogi | sarêng praptaning
nugraha | cahya gumilang nêlahi | mungwing antarèng alis | ing Pangran
Khalifah wau | pratandha katarima | sih-ing guru sang sêdyapti | kang

- -- 76 ---

rumambah ing siswa tanpa wangênan ||

19. ri sampunira mangkana | Jêng Sunan ing Ngampèlgadhing | kondur lan
Pangran Khalifah | praptèng padalêmanèki | mêmangun angabêkti | datan
sah ing siyang dalu | Jêng Sunan Ngampèldênta | sangsaya tumanêm ing
sih | mring kang putra siswa Pangeran Khalifah ||

20. samana ing lama-lama | Pangran Khalifah ingambil | mantu antuk
putranira | putri ingkang saking wingking | wus atut palakrami | tan ana
sangsayanipun | gya Pangeran Khalifah | kinèn umantuka malih | lamun
raja pandhita ing Tandhês seda ||

21. tèmbe gumantiya paman | mintasih Pangran Pinatih | ingkun ingkang
abêbana | sandika kang sinung angling | tan antara wus amit | Jêng Sunan
Ngampèl jumurung | mangkat Pangran Khalifah | datan winarna ing margi
| sampun praptèng Tandhês padalêmanira ||

22. lajêng marêk saha garwa | mring rama Pangran Pinatih | langkung
suka ing wardaya | praptane akanthi rabi | rêsep Pangran Pinatih | mring
putra sakaronipun | anulya dhinawuhan | yèn raja pandhita lalis |
langkung ngungun sabdaning guru kanyatan ||

23. ya ta Pangeran Khalifah | karsaning Pangran Pinatih | ginantyaakkên
lênggahira | raja pandhita kang lalis | wus samya dèn sahidhi | jumênêng
dadya sêsêpuh | ulu-uluning imam | laladan Tandhês Garêsik | parentahan
anèng Pangeran Khalifah ||

24. langkung suka sukurira | tan alami anulya mit | kondur maring Giri
Gajah | jinurungan pudyastuti | gya budhalan sarimit [9] | datan winarna
ing ênu | wus praptèng Giri Gajah | têtêp ngimami agami | para siswa
brangta praptaning sogata ||

--- 77 ---

19. Asmaradana

1. sangsaya dènira alim | ya ta Pangeran Khalifah | mawardi ing agamane
| kongsi dadya puruhitan | janma liyan kang prapta | karta raharja kang
dhusun | ing Giri Gajah kadhatyan ||

2. samana ing lami-lami | nênggih Jêng Pangran Khalifah | karane
padhêkahane | nama Sunan Giripura | gantya ingkang winarna | parêngan
ing lakonipun | nênggih nagari Jêpara ||

3. kang dadya sirah mêngkoni | pan Tumênggung Wilatikta | adarbe putra
sawiyos | Radèn Sahit namanira | ingkang sampun kasusra | andugalira
kalangkung | karêm madat ngabotohan ||

4. kêplèk kècèk dhadhu-posing | karêm nyêbrot ngabotohan | tinundhung
ing sudarmene | dadya kesah maring wana | manongan ngulandara | tan
suda pamursalipun | mandar sangsaya andadra ||

5. dadya wana Jatisari | tintrim tan ana wong ngambah | pan samya jrih
sadayane | sakiranira rahadyan | amatèni dèdalan | ya ta ri mangkana
nuju | nênggih Jêng Suhunan Benang ||

6. lampah midêr ing wanadri | anggana datanpa rowang | dupi prapta
laladane | talatahing Jatisêkar | Radèn Sahit uninga | lamun wontên wong
lêlaku | loyang-loyang priyangga ||

7. ciptanira Radèn Sahit | mangkya antuk bêburakan | nulya pinanggih
ijèn | angagar-agar kalewang | wau Jêng Sunan Benang | atangginas[10]
wacana rum | hèn wong begal dèn saranta ||

8. katanggungan anangani | nganiaya wong sajuga | tur tan ana paedahe |
ingsun nora nggawa dunya | amung karana Allah | manira angsung
pituduh | jangji nora sinikara ||

9. Radèn Sahit anauri | lah apa pituduhira |

--- 78 ---

Sunan Benang ngandika lon | sira mêngko angantiya | ing dalêm tigang
dina | lamun ana wong lêlaku | saking wetan tanpa rowang ||

10. panganggone sarwa langking | lan sumping wora-wari bang | sarta awangi gandane | iku nuli dèn begala | sabab iku sudagar | anamar nênamur laku | nggawa rajabrana kathah ||

11. amituhu Radèn Sahit | warahe sang alêlampah | wasana sande sêdyane | dènirarsa ambêbegal | ya ta Jêng Sunan Bêrang | alêstari lampahipun | wus prapta ing Ngampeldênta ||

12. dupi antara tri ari | nênggih Jêng Suhunan Benang | anêtêpi ubangine | dènira asandi warta | maring wong ambêbegal | angagêm busana wulung | sêsumping worawari bang ||

13. lampah ngilèn mung pribadi | karsane Jêng Sunan Benang | atêrus maring Carêbon | sapraptane Jatisêkar | Radèn Sahit uninga | wong mangangge sarwa wulung | lan sumping worawari bang ||

14. ya ta kang wêwarta nguni | tan taha dyan tinarajang | pan ingadhangan lampahê | wau ta Jêng Sunan Benang | masang cipta sasmita | nulya anon ing lor kidul | wetan kilèn myang ing têngah ||

15. sanalika Radèn Sahit | winalik paningalira | lor kidul wetan myang kulon | ana kang arsa binegal | jatining Sunan Benang | tan owah saking gènipun | pinuja saking mujijat ||

16. Radèn Sahit tan bisa ngling | wimbuh kataman prabawa | tan bangkit kesah saking gèn | ngandika Suhunan Benang | lah mara têkakêna | gonirarsa begal iku | ingsun tan nêdya gingsira ||

17. Radèn Sahit langkung ajrih | ature anuwun tobat | Jêng Sunan ngandika alon | bêtik wong nêdya raharja | yêkti ingsun apura | nanging elinga sirèku | gonirambêk goragodha ||

--- 79 ---

18. emanên badan pribadi | kang anêdakakên sira | kabêh rahayu ambêke | tumêkane jênêngira | pan nora mantra-mantra | dadi nyêbal tan aturut | kalêbu ninggal lanjaran ||

19. apa nora angawruhi | lêpiyaning kuna-kuna | kang padha dadi cariyos
| ala kalakuwanira | lawan tindak raharja | ana tandhaning panêmu | têka
anrang nêrak sarak ||

20. duk miyarsa Radèn Sahit | tyasira sinung pambuka | rumasa
kaluputane | dènnya dadya durjasèng[11] rat | ciptanirèng wardaya |
mangke sêdyarsa gêguru | ngalap ambêk kasudarman ||

21. muhung sêdya angastuti | sawusnya angaras pada | Jêng Sunan
Benang nulya ge | amêcat muji-jatira | mulya[12] katon sajuga | Radèn
Sahit nêmbah matur | dhuh sang kasdu marah arja ||

22. kawula sêdya marèni | awoning lampah kawula | pangèstu tuwan
kemawon | kasagêdna kasêmbadan | nglêluri ayuning rat | Jêng Sunan
ngandika arum | darma naksèni kewala ||

23. bêcikira sun idèni | jangji mantêp sêdyanira | manawa ana bêgjane |
parêng ing sih rahmatu'llah | apa wus nora was-was | kudu anut
sarèhingsun | ature sumanggèng karsa ||

24. Jêng Sunan Benang anuli | nancêbakên êcisira | pan sarya ngandika
alon | hêh Sahit iki cisingwang | tunggunên cêkêlana | lamun ingsun
durung rawuh | aywa sira lunga-lunga ||

25. mêngko karia basuki | ingsun nutugakên lampah | Dyan Sahit
angèstokake | wau Jêng Suhunan Benang | lêstari lampahira | kunêng
gantya kang winuwus | kang anèng ing Ngampêldênta ||

26. duk samana amarêngi | anênggih Rahadèn Patah | marêk ing Jêng
Sunan Ngampêl | minta prênah patanahan | kang apantês kanggenan |

--- 80 ---

Jêng Sunan Katib anuduh | ing prênah panggènanira ||

27. kinèn ngilèna lumaris | maring wana ing Bintara | pan ing Dêmak
talatahe | nuli kinèn ngulatana | ingkang dadya pratandha | yèn manggih
glagah ganda rum | sanggène dèn dhêkahana ||

28. sayêkti ing têmbe buri | Bintara dadya nagara | prênahing glagah
gandane | Radèn Patah tan lênggana | pituduhing martuwa | tur wus
dadya gurunipun | sanalika lajêng mangkat ||

29. sagarwa putra tan kari | bêkta kanthi sawatara | ing marga tan
winiraos | praptaning wana Bintara | angulati galagah | ingkang amawa
ganda rum | samana sampun kapanggya ||

30. ênggèning galagah wangi | wau ta Rahadèn Patah | kèndêl lèrêm
sawadyane | pan samya ambabat wana | bêbadra karya wisma | tan
antara dadya dhukuh | kèh janma kèlu sarkara ||

20. Dhandhanggula

1. pan wus kathah kang ngayum pêpanti | ing Bintara pan wus karta arja |
kadi praja karajane | ya ta malih winuwus | Jêng Suhunan ing
Ngampèlgadhing | wontên ta putranira | ran Masakèh Mahmut | kadange
Jêng Sunan Benang | sanès ibu saentarira ing nguni | kang putra Radèn
Patah ||

2. sinung prênah kinèn angimami | talatahing wukir Muryapada | kang
putra tan lêngganèng rèh | Sang Sèkh Masakèh Mahmut | duk samana
anglaksanani | mangkat sakulawarga | ing sarawuhipun | anèng wukir
Muryapada | adhêdhukuh sangkêp dènnya pasang rakit | karajan karta
arja ||

3. têtêp dènnya ngimami agami | lajêng nama Jêng Sunan Darajat |
sinuyuman ulama kèh | dadya paguron agung | Muryapada kadya nagari |

--- 81 ---

awisma bêbanjaran | sanggèn-nggèn adhukuh | nihan mangkya kawarnaa
| Jêng Suhunan Giri Gajah amarêngi | anglampahi angluwat ||

4. antuk pitung dina pitung bêngi | nèng kaluwat tan dhahar tan nendra |
amatèkakên ragane | lan duk sadurungipun | angaluwat duk anglampahi |
tapa ing tigang wulan | ing sawêdalipun | dènira tapa ngaluwat |
awêkasan lir badan suksma sajati | waspadèng dat sanyata ||

5. yayah dumunung ing insan kamil | pan wus sirna pawujuding dunya |
kondur mring padalêmane | ri sang kana winuwus | amarêngi dina sawiji |
wontên ta putranira | jalu maksih timur | pan mêngtas sapihan enggal |
manggung beka ruhara dènya anangis | sinambut ingkang rama ||

6. binêkta mêng-amêng maring jawi | kang supados aring dènya mular |
pêksa tan suda tangise | duk samana anuju | sandhing sela sapinggir kali |
nglangkungi agêngira | kawêkên ing kalbu | dènya ngênêng-nêng ing
putra | sela agêng kang wontên sapinggir kali | ingawatkan[13] dipangga
||

7. tan antara ponang sela nuli | lajêng gambira dadya dipangga | ing
ngriku kang putra sarèh | kèndêl dènira muwun | ajrih maring solahing
èsthi | Jêng Sunan Giri Gajah | rumaos kaduwung | dene têka kabrabeyan |
dadya tobat minta aksamaning Widhi | angênêngakên cipta ||

8. ponang èsthi sinung sabda malih | gajah watu wangsul dadya sela |
mulih maring ing asale | Jêng Sunan Giri kondur | amangsuli carita malih |
nênggih Jêng Sunan Benang | saking alêlaku | karsa maring Jatisêkar |
anuwèni kang putra Rahadèn Sahit | apa mantêp ing sêdya ||

9. sapraptaning wana Jatisari | Radèn Sahit datan nêdya kesah | ngugêri
guru wêlinge |

--- 82 ---

dyan pinariksa gupuh | Radèn Sahit sasat ngêmasi | kantun kêtêk kewala |
Sunan Benang wau | locitanirèng wardaya | bocah iki baya kêna sun
dandani | dadine sadu dibya ||

10. tan antara anulya winisik | jatining ngèlmu rasa sasmita | sakala bisa
nggarègèh | règèng-règèng alungguh | anampani sarahsèng ngèlmi |
kabuka ing wardaya | nugraha kang rawuh | sawusnya angaras pada |
Radèn Sahit wus rinilan kesah saking | ing wana Jatisêkar ||

11. sarêng dènira linggar sang kalih | jêng Suhunan kondur maring
Benang | radèn kesah saparane | anutugakên laku | amartapa ngidêri
bumi | lajêng tapa angluwat | cêgah mangan turu | dènira mèt kanyatahan
| gaibing Hyang kang anèng manusa yêkti | mêmêsu masuh raga ||

12. ênêngêna gantya kang winarni | nênggih nagari ing Majalêngka |
Prabu Brawijaya mangke | myarsa pawarta umum | lamun tanah ing
Bintarèki | ana janma dhêdhêkah | akasub kasumbung | nênggih
kawêntaring kathah | ingaranan kusuma sudibya sakti | aparamartèng
wadya ||

13. kyèhning janma samya lulut asih | èsthinirarsa rêrakit kitha | sang
nata langkung dukane | cipta yèn dadya mungsuh | bok andadra
ambilahèni | lamun nora pinapas | tèmbe akaryèwuh | matur Arya
Pêcattandha | dhuh pukulun kauningana dewa ji | kang dados têmbung
warta ||

14. apan kadang amba sêpuh Gusti | tunggil biyung saking putri Cina |
sumangga dadya karsane | jangji sampun umatur | masa borong dènnya
anggalih | Sang Prabu Brawijaya | duk miyarsa atur | ana karasa ing driya
| angèngêti duk Arya Damar ing nguni | katriman putri Cina ||

--- 83 ---

15. wus amawa wawratan tri sasi | nanging dèrèng nganggêp babar pisan
| rèhning dèrèng wruh yêktine | wasana ngandika rum | lamun nyata
aturirèki | sun-têmpuhakên sira | timbalana gupuh | iya kadangira tuwa |
sun kanthèni wadyaningsun wong prajurit | nggawa gêlar sapapan ||

16. dhawuhêna ing timbalan mami | lamun mopo rampungana pisan | yèn
gêlêm seba ing tèmbe | sun junjung lungguhipun | Pêcattandha gya
lèngsèr aglis | lajêng atata-tata | samêktaning laku | prajurit ing
Majalêngka | kang pinatah umiring duta pangarsi | sangkêp
sagêgamannya ||

17. pêpilihan tédaking winani | winatara ana wong salêksa | tan antara
budhal age | sang dipati ing Têrung | ing samarga-marga prihatin | asih
trêsna kang ketang | bok kaliru surup | mopo dènnya tinimbangan | ewuh-
aya paran dènira mbolèhi | sarirane katêmpah ||

18. pan kapêksa dinuta ing Gusti | saupama matura acabar | tan sagêd
anyebakake | maring kadange sapuh | baya antuk pangira batin | sakutu
tunggal karsa | yèn manuta dhawuh | lamun lênggana tan seba | ingkang
raka lajêng kinèn animbali | tan wurung bantên nyawa ||

19. dangu-dangu pamanggihing galih | amung pasrah sumendhe ing titah
| yèn makatên panêmunne | sukur antuk pitulung | ingkang raka anut
pinurih | ing atur pamiluta | lêpas lampahipun | praptèng laladan Bintara |
bêbanjaran èsthane kadya nagari | kanggènan ing sri nata ||

21. Sinom

1. para wadya Majalêngka | sadandananing ajurit | anut pangrèhing
pangarsa | Pêcattandha andhawuhi | kinèn apasang rakit | pasanggrahan
kang apatut | sajuru-jurunira |

--- 84 ---

kang liningan nglaksanani | wadyabala wus atata pasanggrahan ||

2. warnanên wadyèng Bintara | kang samya kanggènan baris | samya
angungsi sasaran | cipta lamun dèn lurugi | saking ing Majapait | rumasa
keroban mungsuh | katur ing Radèn Patah | undhang ing sawadya sami |
saanane kinèn samêkta bêbaya ||

3. nahan saajanging ajang | nêdya purun nanggulangi | wadya sayuk
abipraya | labuh parêng angêmasi | tan antara miyarsi | lamun
panganjuring laku | Dipati Pêcattandha | kadange nèm tunggal bibi | Radèn
Patah karasa-rasa ing driya ||

4. ketang sih kadang taruna | kesahe mring tanah Jawi | anglabuhi saba
paran | mangkya dinuta ing Gusti | kinarya senapati | anglurugi
jênêngipun | nggawa gêlar sapapan | paran dadining ajurit | mungsuh
kadang tur atunggal dadah dulang ||

5. ananging sun rasa-rasa | nora prabeda ing batin | mêngkono
pangangênira | saking kapêksa ing Gusti | bundêr raosing galih | kalamun
wus bêtjanipun | lah iya kinapakna | lamun anungkula isin | awasana
anglindhung karsaning Suksma ||

6. tibaning lèlakonira | maksih kênèng sanggarunggi | dhêdhêp wadya sa-
Bintara | wrin Gustine ngêmu sêdhih | nanging tan ana ngrêti | kang
dadya wêwadosipun | pangiraning pra wadya | mung ketang ajrih ing jurit
| wong bêbadra rinoban wong sanagara ||

7. warnanên kang masanggrahan | wadyabala Majapait | anênêrang rêh
ing karsa | kang dinuta mandhegani | Pêcattandha anuding | wadya katiga
lumaku | sarta mawa pustaka | kadi kadi nantang jurit | angêngantêp tita
pangastining sêdya ||

8. karya gêlar rekadaya | yèn prapta priyangga sirik | bok rinasan para
wadya | kirang

--- 85 ---

kasujanan budi | marma tinrap ing tulis | tulusa dènnya tumanduk | tan
dadya ewuh-aya | pamilutaning pangarih | tan antara duta lampahe wus
prapta ||

9. ngarsane Rahadèn Patah | angaturakên kintaki | wus pinundhut
tinupiksa | bêbuka ungêling tulis | tur sêmbah pangabêkti | pun ari Dipati
Têrung | amba atur uninga | lampah kawula puniki | pan kapêksa dinuta
ing sri narendra ||

10. ngantêp ing sêdya paduka | mangkya tuwan dèn timbali | ing rama
paduka Nata | lamun karsaa sumiwi | sêdya pinaring linggih | upami
lêngganèng dhawuh | mopo purun amampang | kawula kinèn ngrampung
| nanging ulun sèstu botên pisan-pisan ||

11. amêngsah ing kadang tuwa | kang sampun kapulêt ing sih | tan sah
ing salaminira | mung ajrih kapurbèng Gusti | upami tan nglampahi |
pakèwêd raosing kalbu | bok kêni ing pangira | murina kadang sayêkti |
karya suda pangandêlaning suwita ||

12. nêmpuh byat purun lumampah | kalakona dadya jurit | amba mung
ngaturkên pêjah | tan nêdya lumawan tandhing | saèstu sampun wajib |
anguntapna pêjah-ulun | nanging yogya kawarta | mila manawi marêngi |
sih ing kadang nggaliha rêksa rumêksa ||

13. paduka asumiwiya | ing ramanta sri bupati | bok manggih darajat
mulya | tur sae dipun tingali | ajrih maring sudarmi | sudarmane sih ing
sunu | lan têmbung kaelokan | bapa kolu maring siwi | jangji anut nêting
sih dumunung manah ||

14. lan wêwatoning wong tuwa | lèsèhe yèn dèn slondhohi | mampange
yèn tinandhingan | marma paduka dèn eling | wêlas daging adaging | lulus
sapanginggilipun | botên dados pocapan | wasana paduka galih |
pakèwêde têmbe wingking ulatana ||

--- 86 ---

15. mung dèn agêng pangaksama | botên pisan amamardi | mamarah ing
kadang tuwa | mung saking trêсна sayêkti | titi ungêling tulis | Radèn
Patah suka ngungun | wasana tyas kalêgan | nêdya nut pangrêhing ari |
pêngemane pan saking rêksa rumêksa ||

16. lajêng akarya wangsulan | tan adangu sampun dadi | sinungkên duta
pangarsa | kanthi ginanjar pisalin | busana mrêta sami | katanggapan atur
nuwun | duta wus pamit mentar | linilan lumèngsèr ngarsi | lêlancaran
datan winarna ing marga ||

17. wus prapta ing ngarsanira | Sang Pêcattandha Dipati | ngaturkên sul-
angsul sêrat | binuka têmbunging tulis | nihan kang pudyastuti | lumintu
mawantu- wantu | saking ing kadang tuwa | Radèn Patah kang sêdya sih |
maring yayi Sang Dipati Pêcattandha ||

18. sawusing kadya punika | yayi ambalang kintèki | sarahsane wus
kadhadha | sayêkti ingsun turuti | aywa awancak galih | nanging budhala
rumuhun | sun bangêt anarima | prasêtyanira ing mami | anglabêti sih
trêсна tanpa wangênan ||

19. ngeman awèh palimarma | bécik lamun dèn turuti | sapadha-padha
raharja | yayi para lawan mami | lêstari ing salami | nora kapêdhotan
tuwuh | ênggone akêkadang | padhaa tarik-tinarik | sukur bage aywa sah
salaminira ||

20. tamat wiraosing surat | Sang Pêcattandha Dipati | kalangkung
sukaning driya | dene kang raka wus kandhih | lajêng undang tumuli |

mbudhalakên wadyanipun | mantuk mring Majalêngka | dene mungsuhe
wus nglêndhih | nêdya ngasor asung pratandha ing surat ||

21. sadaya atur sumangga | sarèhning dènnya tinuding | apan sampun
angsal garan | gampil yèn cidra ing jangji | Pêcattandha lingnya ris |
sayêkti wus anèng aku | yèn dadining rubeda | têmahan samya ngastuti |
Pêcattandha [Pê...]

--- 87 ---

[...cattandha] lajêng bidhal saha wadya ||

22. gumuruh samarga-marga | lir mêngtas ajayèng jurit | sagung wadyèng
Majalêngka | datan winarna ing margi | wus praptèng Majapait | Sang
Adipati ing Têrung | lajêng umanjing pura | marêk ing ngarsa Narpati |
aturira gambuh gambirèng wardaya ||

22. Gambuh

1. sri narendra andangu | paran karya praptanira kulup | ênggonira sun-
duta mungkasi kardi | Pêcattandha nêmbah matur | dhuh pukulun sang
akatong ||

2. amba sampun ingutus | animbali kadang amba sêpuh | Radèn Patah
sadhatêng amba ing nguni | pakèwêd raosing kalbu | manawi ulun
têtêmon ||

3. bok lajêng botên anut | kang saèstu campuh pêjah sampyuh | wit
kawula rumaos dinutèng Gusti | tan etang-etung sadulur | mung ngêmban
purbaning Katong ||

4. nanging pangraos ulun | ular-ular pambekaling kewuh | pakantuka
rumêksa sakalih-kalih | rèhning anêbu sauyun | pinayu rèh karahayon ||

5. sasagêd-sagêd ulun | rekadaya mamèt pasang patut | ing panantun
kawula tumrapkên tulis | pamiluta têmbung alus | supados nglêndhih
kemawon ||

6. pan saraosing dhawuh | padukendra kapajar sadarum | sampun dunung
kawula mulêt malat sih | mèt prana karênanipun | trêsnaning kadang
karongron ||

7. pun raka enggalipun | darbe kogêl maringi sul-angsul | sarêng mangke
katura paduka aji | pustaka nulya pinundhut | binuka lajêng winaos ||

8. saraosnya [14] wus dunung | sri narendra langkung sukèng kalbu |
dene Radèn Patah sampun mratandhani | yèn tèmbe arsa anungkul |

--- 88 ---

wasana ngandika alon ||

9. maring Dipati Têrung | bènêr kulup gêlarira iku | dadi padha angeman
daging adaging | aja kongsi kongsêp kungsul | lulusa ngroyom-rinoyom ||

10. nanging samono mau | lamun ana palèsèding catur | tan nêtêpi sun
têmpuhakên sirèki | Pêcattandha alon matur | ulun sumangga Sang
Katong ||

11. lajêng kalilan mundur | amakuwon Dipati ing Têrung | lawan wadya
prawira kang mêngtas ngiring | lèngsèr saking ngarsa prabu | sadaya wus
amakuwon ||

12. binoga pra sadarum | myang pisalin kang asarwa luhung | wadyabala
nanggapi kamartaning sih | kadamane ratunipun | kang rumambah tan
atowong ||

13. ri mangkana ta wau | tan alami Radèn Patah rawuh | amung kering
wadya santri sawatawis | kawangwang wangunanipun | mêlasasih
mangalap sor ||

14. praptaning praja gupuh | kerid dening risang Mantri Ngayun | manjing
pura kandhêg anèng Srimanganti | patih tur uningèng prabu | sri narendra
lajêng miyos ||

15. têdhak ing kori Mangu | lênggah ginarêbêg ing para rum | Radèn
Patah sarawuhira sang aji | konjêm kang muka ndhêkukul | mangkana
wau Sang Katong ||

16. nalikanya andulu | Radèn Patah wêwangunanipun | èsmu wêlas karaos
sajroning galih | dinuga prayogèng tanduk | pasang-liringing pasêmon ||

17. myang solah bawanipun | dèdêg pangadêg wijanganipun | ing sarira
sami kalawan sang aji | ri mangkana sang aprabu | ing tyas sangsaya
sumêdhot ||

18. rumaos talêripun | saking Rêtna Subanci ing dangu | duk ambobot
katrimakakên mêngkoni | Sang Arya Damar rumuhun | bok iki

--- 89 ---

dadine mêngko ||

19. nanging tyas maksih mangu | dene dèrèng trang pandangunipun |
marma kêdah anandha kang dadya saksi | sang nata lajêng amundhut |
paèsan sampun sumaos ||

20. nulya ngilo sang prabu | mawas wayangan ingkang kadulu | sariranya
lan Radèn Patah kang warni | tan ana prabedanipun | mung kaot sêpuh
lan anom ||

21. kênyaring prabanipun | miwah rompyohing sariranipun | Radèn Patah
saèstu sampun ngêblêgi[15] | lan citranira sang prabu | kadi jambe nom
pinaro ||

22. sang nata suka ndulu | kapisrênan lumuntur sihipun | awasana
linunturan sabda manis | rinangkul lungayanipun | babo Patah
putraningong ||

23. samêngko sira kulup | pantês lamun dadi abdiningsun | Radèn Patah
ngaras padèng narapati | ature sumanggèng kayun | sotah ngabdèkkên
wong bodho ||

24. tan wrin ing unggah-ungguh | tatakrama ngawula ing ratu | sampun
kirang sagantêning pangaksami | mung ngaliha[16] lowung-lowung |
dadya tênggan juru kêbon ||

25. Rahadyan Patah wau | lajêng ginanjar busana luhung | neka warna
karênan amrêta sami | samoha tinampèn sampun | tur nuhun dahat
kacadhong ||

26. lajêng kasaput dalu | sri narendra kondur angadhatun | Radèn Patah
sinung pakuwon ing puri | tinunggilkên putra prabu | sinungga-sungga tan
towong ||

27. pan sarêng enjingipun | sri narendra amiyos supênuh | pêpak
wadyabala kang samya anangkil | kya patih kaparêng ngayun | angandika
sang akatong ||

28. hèn patih kawruhanmu | dhawuhêna mêngko karsaningsun | pan si
Patah iya sun ganjar palinggih | ngong sêngkakakên ngaluhur | manjing
[man...]

--- 90 ---

[...jing] dadya wadyaningong ||

29. angrêha Bintarèku | jajar lawan si Dipati Têrung | iya uga sun
jênêngkên adipati | ingsun wèhi sadasèwu | supaya gêlis angrodon ||

30. dene ta wajibipun | pratandhane kawêngku dening sun | asebaa
kalamasa Sênèn Kêmis | anèng pagêlaran ingsun | patih sandika wotsinom
||

31. sarèhning karsa prabu | lajêng dhinawuhakên sadarum | maring Radèn
Patah kang linunturan sih | ature sèwu anuwun | kanugrahan kang
dhumawoh ||

32. parêng wadya jumurung | anastuti samya saur manuk | Radèn Patah
gurawalan mangabêkti | ing suku sang maha prabu | winisik sabda sajatos
||

33. hi babo putraningsun | besuk esuk abudhala gupuh | arjakêna
padhukuhan Bintarèki | karana ing tèmbe iku | bisa yèn dadya karaton ||

34. lan pangalihing pulung | anèng nagara Bintara besuk | dene sebanira
marang Majapait | mung sabên masa Katêlu | dadi sawarsa [...]umaos ||
[17]

35. Dipati Bintarèku | aturira sakalangkung nuwun | amêmundhi
wahyaning kang wahyu jati | lumantar karya marta yu | kawiryawan kang
rumoyom ||

36. ya ta sasampunipun | abibaran kang samya supênuh | sri narendra
kondur maring dalêm puri | kya patih sakancanipun | sowang-sowangan
makuwon ||

37. lajêng kasaput dalu | datan winarna rêroncènipun | sarêng enjing
Dipati ing Bintarèki | wus amit sang maha prabu | linilan sawadya bodhol
||

38. lan sadandananipun | ubarampe sapakartinipun | wus kabêkta
gumuruh samargi-margi | wong kang samya usung-usung | saparantining
[saparanti...]

--- 91 ---

[...ning] bot repot ||

39. datan winarnèng ênu | sampun prapta dhukuh Bintarèku | sowang-
sowang sasênêngge pasang rakit | ing papan pomahanipun | wus karta
raharja ngrodon ||

40. janma kang adhêdhukuh | jêjêl angrèp tan kêna ingetung | ing Bintara
wus arja kadya nagari | sabdaning pandhita ratu | samya nartani kalakon
||

41. Sunan Ngampèl rumuhun | ping kalihe Brawijaya Prabu | anawabi ring
sabda amratandhani | mung kari tibaning pulung | pinucung rèh paraning
don ||

23. Pocung [18]

1. gantya wau Radèn Sahit kang winuwus | dènira angluwat | antarantuk
tigang sasi | saluware kadi suksma ngejawantah ||

2. raosipun sesining rat wus kagulung | gêgolonganira | gumilang tanpa
ling-aling | nanging dèrèng antuk tandha kanyataan ||

3. kabulipun lèlèring gêlar anggulung | ing ari ijabah | rumambah ing lair
batin | anartani kakênan ing kene kana ||

4. lamun durung katonton nyata kang tamtu | mangunah karamat | tan
pêgat dènira ngudi | nora ketang bantêr-bantêr tapa brata ||

5. ciptanipun asagêda undha-usuk | lawan gurunira | pirabara angungkuli |
musêng mêsu tinalêsih sah ing cipta ||

6. sawusipun Radèn Sahit alêlaku | matêngakên tapa | angèli ilining kali |
sarwi nyangking gêni murub kantar-kantar ||

7. lamun sampun praptèng sawanganing laut | wau kang dahana |
cinêlupakên ing warih | maksih pêjah pan wangsul-wangsul kewala ||

8. maring luhur angèli kali tinurut | ndungkap kaping sapta | praptèng
sawangan jaladri | gêni murub cinêlupakên ing toya ||

9. nora surud maksih ajêg urubipun | Dyan

--- 92 ---

Sahit gya mêngtas | ragi marêm ing panggali | ngudi nyata mangkya
antuk kanyataan ||

10. sah lêlaku mangilèn ing purugipun | Cirêbon sinêdya | sapraptaning
Gunung Jati | lajêng njujug sajroning masjid araryan ||

11. anênamur kadi wong bumi puniku | tanggap angkat karya | anut
marbot lawan kêtib | sabên dalu ngisèni ponang pabongan ||

12. têngêsipun basa pabongan puniku | artine padasan | tan ana kang
angyaktèni | ing laming dina ana kang uninga ||

13. lajêng katur jêng sunan ing Jati Gunung | tingkah kang mangkana |
jêng sunan wêlas ningali | dene sabên toyaning pabongan asat ||

14. kang angangsu angisèni isinipun | mung marbot satunggal | Jêng
Sunan ing Gunung Jati | tan anyana yèn ana wong nêmbè prapta ||

15. kang angangsu ginalih marbot satuhu | dadya kang pabongan | pan
sinatakên kang warih | wusing asat nulya ingisenan êmas ||

16. karsanipun ingalapa juru ngangsu | ingkang winêlasan | kawarnaa
Radèn Sahit | sarêng enjing sêdya ngisèni padasan ||

17. kagyat ndulu pabongan sat toyanipun | ing jro ngisenan mas | ngartika
sajroning galih | yèn cinoba dening kang para oliya ||

18. tan adangu pabongan saumpakipun | pinudya dadya mas | nulya
kadya kancana di | katarima rêhning mujijat karamat ||

19. sarêng esuk Jêng Sunan ing Jati Gunung | têdhak arsa salat |
sarawuhira ing masjid | tan alami pabongan saumpakira ||

20. malih wujud pan dadya êmas sadarum | ngungun sanalika | muwus
sadalêming batin | yèn marbote ika yêkti Walîu'llah ||

21. tan adangu tinimbangan jêng sinuhun | wus prapta ing ngarsa |
anênggih Rahadèn Sahit | tinakenan nama kawijilanira ||

--- 93 ---

22. alon matur Dyan Sahit mring jêng sinuhun | dhuh Sang Maha Yogya |
tuwan parasdya ngêngudi | aluraning salsilah badan kawula ||

23. kang satuhu saking Jêpara pukulun | pun Sahit wastamba | ingkang
ngwontênakên kami | apanênggran Tumênggung Mlayakusuma ||

24. urutipun saking kaki duk rumuhun | trahing wong ulama | tanah
sabrang atas-angin | pan tinanêm dadya Bupati ing Tuban ||

25. marmanipun bapa kawula ing dangu | katêngêran nama | dening Sri
Brawijaya ji | apêparab Ki Tumênggung Wilatikta ||

26. lênggahipun ing Jêpara kang winêngku | wau duk miyarsa | Jêng Sunan
ing Gunung Jati | alurannya langkung suka ing wardaya ||

27. rêna sarju rêsep rumêsêp rumasuk | kadi tan kêna sah | cipta lamun
antuk kanthi | Jêng Sinuhun lan Radèn Sahit asalat ||

28. sawusipun jêng sunan anulya kondur | padalêmanira | Dyan Sahit tan
kêna kari | lami-lami saya kasok sih katrêsnan ||

29. pinikasdu pinèt ipe gya dhinaup | lan kadang wanudya | warnane ayu
linuwih | apêparab nama Rêtna Siti Jenab ||

30. sarta sinung nama dening jêng sinuhun | nênggih Sèkh Malaya | atut
dènya palakrama | tan alami kinèn adhukuh ing wana ||

31. sinung dunung panggenan ingkang pakantuk | kinarya dhêdhêkah |
Sèkh Malaya anastuti | lajêng mangkat bêbadra ababad wana ||

32. siyang dalu Sèkh Malaya alêlaku | pan ajaga-jaga | nêng papan kang
dèn dunungi | amêminta kaharjaning padhukuhan ||

33. enggalipun wus raharja ponang dhukuh | kathah kang awisma |
pradesane wus sarwa sri | sinung nama padhukuhan Kalijaga ||

34. karsanipun anênggih minta sêsêpuh | kawruhing ngèlmu khak | mring
Jêng Sunan Gunungjati | dimèn tamsil sarahsaning babarpisan ||

--- 94 ---

35. marêk gupuh ature amêlasayun | dhuh sêmbahan amba | kalunturana
pun patik | kêdah kêsdu ngèstokakên ngèstu pada ||

36. jêng sinuhun karênan ing galihipun | maring Sèkh Malaya | dupi wanci
sampun ratri | gya kinanthi maring ing nggèn pasênêtan ||

24. Kinanthi

1. Sèkh Malaya nêmbah matur | mring Jêng Sunan Gunungjati | dhuh
pukulun sang pinudya | amba minta tuduh jati | singir kang sampun
kinocap | paran artosipun mangkin ||

2. wontêna ing sih pikulun | rèhning mudha damèng budi | sasat sato
upaminya | Jêng Sunan ing Gunung Jati | alon dènira ngandika | rungunên
mêngko sun wisik ||

3. têngêse singir pan kidung | kinarya pangeling-eling | para sèkh ing tanah
Arab | yèn pana winor ing gêndhing | sadhapur singir punika | saking Sèkh
Ibrahim Arki ||

4. iya tatkalane panggut | ing kaca ingkang barêsih | yèku lawan
dewangkara | mangka antarane kadi | dahana akantar-kantar | wus nyata
tanpa ling-aling ||

5. sabawang sumilir iku | iya kang sêdya ngulati | kalawan kang ingulatan
| iya kang nêdya pinanggih | yayi rasakna dèn krasa | puniku ujaring singir
||

6. wontên malih singiripun | asale saking Sèkh Sabti | satuhu makrifatira |
têtêp dadi aling-aling | antarane kang tumingal | nênggih mring kang dèn
tingali ||

7. sirnakna ing tingalipun | ing liyan kang dèn tingali | wontên malih
singiringwang | nênggih saking Sèkh Mukidin | Kangjêng Sèkh Mukidin
mapan | kang putra Sèkh ing Arabi ||

8. yèn mikir tanjèh sirèku | dadia kang bangêt nuli | yèn amikir tasbèh sira
| ing

--- 95 ---

wêwilange dèn dadi | yèn katam karone sira | dadi surasa sayêkti ||

9. aningalana sirèku | ing Gusti kalawan Gusti | kalawan kumpule ika | aja
pisahe dèn pikir | yèn uwis mangkono sira | Maha Suci Maha Gusti ||

10. kalèkên nyataning makhluk | kalamun sira nduwèni | mata kalawan
paningal | kang makhluk puniku dadi | kanyataaning kalèkan | yèn sira iku
nduwèni ||

11. angên-angên lawan kalbu | yèn nora nduwèni uwis | aja kudu amicara
| tanpa gawe wong ngaurip | kalamun sira wus nyata | duwe mata karo ati
||

12. sayêktine kang kadulu | liyan kang tingal sawiji | sawiji ing dalêm rupa
| puniku singir pan maksih | kang saking Kangjêng Sèkh nama |
Mujidina[19] Ibnu Arbi ||

13. padha nyirnakna puniku | têtulisan kang tinulis | lan sakèhe kitabira |
kang muni pangucap ngèlmi | lamun nora mangkonoa | tan kagêpok kang
sayêkti ||

14. lawan ing tyas tan atêguh | katungkul pijêr ngulati | karana satêmên
uga | [...] [20] [...] [21] ing sawuwus ing sun iki ||

15. minangka kutha pikukuh | ing kutha angênguthani | pan kutha
kuthaning kutha | kèdêran kang angubêngi | ing lêlarèn pancadriya | tan
kêna binêdhah dening ||

16. sasmita dangdanipun | apan nora angêntasi | amung binêdhah ing
baka | yèku ingkang angubêngi | agême Sèkh Aribi'llah | kang darbe
kidung puniki ||

17. lah punika kidungipun | Sèkh Abu Yajib Bastami | tan ana paningalira |
amung ingkang angalingi | pan nora na ingkang ilang | pan anging
pandêngirèki ||

18. sapa yun wruh ing sirèku | iya tingalana saking | saking sira sarta sira |
têmuning sira [si...]

--- 96 ---

[...ra] sirèki | pan dumêling ananira | sasama samèng sasami ||

19. nora beda lawan ing.sun | yèn dedea iku sisip | yèn tunggal iku sasar |
sasar sisip wujud siji | agawok ing.sun tumingal | ing wong angulati Gusti ||

20. sun srahkên birahiningsun | marang angên ing.sun iki | mangka gêsêng
ciptaningwang | gêni badan kang nggêsêngi | sayêktine nuli kêna |
ingkang para mbirahèni ||

21. sayêkti badan kumêlun | rêmuk ing rèh manaputi | lan singir malih
punika | kidungane Sèkh Rudadi | mangkana pandhita mulya | Sujadi wa
Kuwatihi ||

22. pangandikane Hyang Agung | kalamun ing.sun kapanggih | kalawan
kêkasihingwang | dadi kawula pan mami | kalamun ing.sun kapisah |
kalawan kêkasih mami ||

23. sun dadi ratuning ratu | ratu ratuning sabumi | ratu angratoni jagad |
ratu ratu angratoni | ing ratu ratu sadaya | mangkana Jêng Sèkh Rudadi ||

24. lah punika singiripun | Sèkh Samangu Asarani | ing ngêndi ananing
ana | ananing beda ing ngêndi | ananing beda lan ana | apa pisah apa
tunggil ||

25. lawan êndi wohing banyu | kang mêtù saking wiyati | têngêse woh
banyu ika | saking wite ingkang mijil | yêkti wênang saking tunggal |
paworing woh lawan uwit ||

26. uwus yayi mung puniku | mungguh babaraning singir | tarbukaning
sangkanparan | kêni kinarya nyaringi | panglimbanging budinira | Sèkh
Malaya anampèni ||

27. kanugrahan kang linuhung | sarahsaning wos wus tamsil | Sèkh
Malaya ngaras pada | mring Jêng Sunan Gunungjati | alon wau aturira |
wong dadya guru sajati ||

28. yèn kirang waspadèng sêmu | kasamaran têmah mamring | rahsane
datan kacêkap | kathah guru-guru [gu...]

--- 97 ---

[...ru-guru] sisip | kèngsêr sire kabalasar | tulus amangeran tulis ||

29. Jêng Sunan ngandika arum | angèl pratingkahing urip | sanadyan ahli
kitab | ahli suluk ahli pikir | lamun nora puruita | tatane kurang prêmati ||

30. dene pra oliya sagung | tulis mung mangka pangeling | nanging
rahsane datan sah | sahe saking tinalêsih | maksude musawaratan | mrih
mulyane mêgat pati ||

25. Mêgatrüh

1. Nabi Musa ngaku luhur tanpa guru | ngamungkên ujaring tulis |
ngandêlakên Torètipun | dèn nyana wus anguwisi | tan wruh lamun
maksih adoh ||

2. mèh kalantur ing pratingkah èsmu puguh | gya binêndon ing Hyang
Widhi | nulya kinèn anggêguru | nggêguru mring Nabi Kilir | kang kari anut
mangkono ||

3. sajatine ingkang aran guru iku | dudu guru muruk ngaji | dudu guru
muruk ngidung | dudu guru muruk tulis | dudu guru muruk ngêdot ||

4. dudu guru muruk kasêktèn puniku | dudu guru muruk dhikir | paguron
anane iku | dene guru kang sayêkti | kang amêjang ngèlmu jatos ||

5. aja sira nggêguru pandhita bêsus | pandhita sipat namèki | lan falafat
malhipun | tabêrèn sêsanjan nênggih | yèku pandhita angomong ||

6. tuwin aja nggêguru pandhita lêngus | yèku pandhita sak sêrik | lawan
aja anggêguru | pandhita kakèhan sikir | karya was-uwasing batos ||

7. lawan aja nggêguru pandhita gundhul | pan iku pandhita lamis | apan
kangjêng nabi rasul | remane amung sumunggi | kapirit lawan bêbaon ||

--- 98 ---

8. pan sakabat sakawan bela jêng rasul | kapat pisan pan sumunggi |
kangjêng rasul parasipun | sajêge mung sapisan thil | pan ora kongsi
amindho ||

9. kang utama pandhita ngaku baliku | sasolahe ambodhoni |
zayinnapsaka puniku | anênggih bilmaksiyati | salah tingkah kang
mangkono ||

10. dene zayinnapsaka pandhita iku | têngêse bilmaksiyati | pandhita kang
ninggu rambut | paèsing awak sayêkti | dudu paèsing panganggo ||

11. dêbog bosok mrak kacancang gênthong umus | iku pandhita kasirik |
lawan tawan brana iku | buja kirana marsandi | karo utama ginuron ||

12. katigane pandhita wiladi iku | kang utama dèn guroni | lire dêbog
bosok iku | lara gêng kang pandhitèki | mrak kacancang anyêngungong ||

13. têngêsipun têngabure kêng kawêtu | lumaku yèn dèn guro | têngêse kang
gêngthong umus | gêngbrèh tan bisa ngrawati | wêtune saênggon-ênggon ||

14. dene tawan brana pandhita puniku | kang ana labêting kanin | lan
sapêpadhane iku | kang acacad kang aciri | sirikên aja ginuron ||

15. pandhita kang buja kirana puniku | tan pêngat amangun tapi | nyêgah
napsu hawanipun | pakarêman dèn buwangi | saciptane wus sayêktos ||

16. pan waluya sadaya pangèstunipun | tan ana kawula gusti | wus karêm
ing ora iku | dene pandhita marsandi | kang ngibadah lair batos ||

17. nora pêngat mulyakkên sariranipun | pujine ngèbêki bumi | saosike
ênêngipun | nora samar dadi puji | sêmbah pujine tan pêngot ||

18. dene ingkang pandhita wiladi iku | asarèh

--- 99 ---

wuwuse aris | tan wuruk sudi karyèku | lakune pandhita supi | dèn antêpi
lair batos ||

19. wontên ruke[22] pandhita salah ing ngèlmu | wa[23] llahu a'lam yèn
mati | mêngkono ing tekadipun | besuk yèn ing sun ngêmasi | mulih
maring purwaningong ||

20. maring nukat gaib ing pinangkanipun | rêrêmukan wujud dhingin |
mati bali maring wujud | iku pandhita kasirik | tan kêna tinut wong bodho
||

21. muridipun puniku dadi wong mêrdud | pandhita satêngah malih | ora
na Pangeran iku | sapêncaring nukat gaib | jêbule pasthi nyatêngong ||

22. besuk ing sun samêngkone iya ing sun | awal akir masesani | jagad
kabèh ing sun tènun | nora nana batal bitil | karam kèrêm mêkrah mêkroh
||

23. lanang wadon nora nana walêripun | Allah nora marentahi | gawe batal
karam iku | pan amung karsaning nabi | Rasulullah amakewoh ||

24. pandhitèku dadi guyêng muridipun | lan ana pandhita malih | tekade
cahya tinunggu | besuk yèn ingsun ngêmasi | anungku cahya ing kono ||

25. muridipun puniku dadi wong êdul | lan wontên pandhita malih | besuk
yèn ing patiningsun | kawin lan Pangeran mami | salêkêring
wismaningong ||

26. ingsun gawa kabèh aja na kang kantun | mêngkono kang pandhitèki |
sarupane muridipun | iku dadi wong barjaki | tunggal lanang wadon kang
wong ||

27. wontên malih anggilingan ngèlmunipun | patine anjêbul malih | muride
dadi wong kêbur | lawan wong ubêk puniki | kabèh anggêpe mangkono ||

28. wontên malih kang pandhita ngèlmunipun | besuk yèn ingsun ngêmasi
| nampani sawarga

--- 100 ---

agung | widadari pitung kêthi | muride dadi wong egot ||

29. pan puniku warnane wong salah ngèlmu | kang tan pantês tinut wuri |
mungguh ing kapatènipun | miwah ing uripe sangkin[24] | karya sak kang
tan waspaos ||

30. nêniwasi ing wasana tanpa wuwus | pangwasa tan misesani |
panuksmaning kang pangèstu | ya ta ana salah malih | ing têkad kawruh
samêngko ||

31. satêngahing pinandhita ngèlmunipun | pêpokotan tan udani | ing tarki
lawan tanajul | muridipun dèn arani | wong bèr wangkal lan bèr pugoh ||

32. wontên malih kang pandhita ngèlmunipun | napase dèn galih Gusti |
wus mangkono anggêpipun | sarupane muridnèki | samya dadi tukang
abot ||

33. wontên malih kang pandhita ngèlmunipun | sok mulyaa ing dunyèki |
pasthi mulyèng akiripun | sarupane muridnèki | kabèh dadi wong
piyangkoh ||

34. wontên ingkang pandhita durung satuhu | kasêlak pangakunèki | tog
ing êndon wulangipun | nyamut-nyamut maksih têbih | durung mantra-
mantra nggêpok ||

35. maksih sarak kewala pralambangipun | tuna bêth kang samya amrih |
pandhita mangkono iku | upamane muridnèki | wong ngimêl mamah klasa
moh ||

36. wontên malih kang pandhita ngèlmunipun | nora nana nabi wali |
kuna-kuna rasul rusul | pan iku muride dadi | wong sumêca durung enjoh
||

37. poma yayi estokna yèn anggêguru | saliyane saking mami | dèn awas
wasananipun | angèle wong ulah ngèlmi | yèn kablèndèr amalendho ||

38. Sèkh Malaya alon dènira umatur | mring Jêng Sunan Gunungjati | sèwu
ing pamundhinipun |

--- 101 ---

wrin rêrancangan rêricik | parabote amrih kawroh ||

39. nanging ulun mangke kalilana matur | lampahaning para nabi | kang
sampun kawarta wau | Nabi Musa Nabi Kilir | dene têka sèwu elok ||

40. Nabi Musa amêngku sarengat agung | tur ngiras dadya narpati | Nabi
Kilir nabi rusul | sarengat tan amêngkoni | mung mungkul sarèhing lakon
||

41. tēka mawi Nabi Kilir kang linuhur | amung kang buwana balik | asor asare aluhur | kang luhur asor malatsih | jêng sunan ngandika alon ||

42. ngèlmu iku tan pasthi nèng janma luhur | tan pasthi nèng janma singgih | tan pasthi nèng janma sêpuh | ana nugraha pribadi | tarkadhang ana wong anom ||

1. Kurang satu suku kata: praptane sêdya angabdi. (kembali)
2. sinau. (kembali)
3. kêdhampalan. (kembali)
4. lu-ulu. (kembali)
5. trapsila. (kembali)
6. Lebih satu suku kata: nora owah tingalipun. (kembali)
7. lan. (kembali)
8. Tidak terbaca: paraning. (kembali)
9. sarimbit. (kembali)
10. atrangginas. (kembali)
11. durjanèng. (kembali)
12. nulya. (kembali)
13. ingawatkên. (kembali)
14. suraosnya. (kembali)
15. ngêplêki. (kembali)
16. nggaliha. (kembali)
17. sumaos. (kembali)
18. Teks asli: Pucung. (kembali)
19. Muyidina. (kembali)
20. Baris ke-4 tidak ada: 8u. (kembali)
21. Baris ke-5 tidak ada: 8a. (kembali)
22. rêke. (kembali)
23. wallahu. (kembali)
24. mangkin. (kembali)

26. Sinom

1. kadhang anèng sudra papa | nora kêna dèn gagapi | tan kêna kinaya ngapa | pêpancènira pribadi | yèn rinilan ing Widhi | nadyan durung masanipun | angulah kalêpasan | rêrantame wus pratitis | angungkuli pangawikaning kukuma ||

2. kaya mau Nabi Musa | kalawan Jêng Nabi Kilir | kawruhe ing kasunyatan | linuhurkên Nabi Kilir | marga wus anglakoni | akarêm mring ora iku |

acêgah napsu hawa | ing nala dumilah wêning | konang-onang kaananing
kene kana ||

3. mandar antuk kanugrahan | panjênêngan Nabi Kilir | kinarya hèb
Nabiu'llah | nartani nora ngêmasi | wus angênggoni gaib | lair batine
kawêngku | iku ujaring kitab | êmbuh nyatane samangkin | dene pan wus
karoban ing pirang jaman ||

4. umatur Sang Sèkh Malaya | dhuh pukulun sang ayogi | bilih makatên
kang sabda | ulun

--- 102 ---

kapencut ing kapti | kados Jêng Nabi Kilir | kédah kêsdu anggêguru | amba
nyuwun pitêdah | mangkya dumunung ing pundi | nadyan têbih jangji
kenging ingulatan ||

5. saèstu kawula angkah | lari-lari angulati | numpal kèli ngulandara |
ngrêranggèh nugraha jati | jêng sunan ngandika ris | ujaring pawarta iku |
iya ing Baru'lakbah | dumununging Nabi Kilir | tanah Lulmat agaib
panggonanira ||

6. kaya nora kalampahan | sira adrêng anglêlari | sasat ngupaya
kumandhang | Sèkh Malaya matur aris | kêncêng tyas ulun mangkin |
amung pangèstu pukulun | sagêda kasambadan | pinanggih Jêng Nabi Kilir
| kalilana mangkat samangkin kewala ||

7. ngungun sakala miyarsa | Jêng Sunan ing Gunung Jati | mring antêpe
Sèkh Malaya | winawas ing sambang liring | dadya damar sajati | wasana
sèwu jumurung | lajêng ungkur-ungkuran | Jêng Suhunan Gunungjati |
mangu mulat angkate Sang Sèkh Malaya ||

8. kondur padalêmanira | Sang Sèkh Malaya winarni | lampahe
alêlancaran | tan ana baya kaèsthi | amung nugraha jati | angugêr grana
jêjantung | mangalor paranira | praptèng pasisir Samawis | mangu mulat
lirap-liraping samudra ||

9. tan ana palwa katingal | anuju kalaning ratri | pakèwêd raosing driya |
dènirarsa numpal kèli | kalangan ing jaladri | nanging merang lamun

wangsul | nadyan datan kantênan | têtêng ingkang dèn ulati | mangsah
mudya angêningakên wardaya ||

10. mêtêg gêlaraning hawa | amung anyipta sawiji | tanjane ingkang
sinêdya | wontên parmaning Hyang Widhi | sakala Nabi Kilir | prapta
anèng ngarsanipun | apindha rare bajang | ganda ngambar marbuk wangi
| duk mangeja apindha gêbyaring kilat ||

--- 103 ---

11. Sèkh Malaya tan kumêcap | dènnya umangsah samadi | Jêng Nabi Kilir
ngandika | luwarên pardining budi | aja tan buh sun iki | jatine kang sira
luru | Nabi Kilir ya ingwang | ana paran amarsudi | kudu têtumu lan jênêng
ingsun samangkya ||

12. Sèkh Malaya mudhar asta | gurawalan mangênjali | alon wau aturira |
sumangga karsa Sang Yogi | saèstu tuwaning sih | tan kilap sasêdya ulun |
Nabi Kilir ngandika | bêtêr aturira iki | sadurunge sajarwa yêkti sun wikan
||

13. sira kêsdu puruhita | anênabêt kaya mami | dumadia gaibu'llah | apa
bisa anglakoni | sumingkiring asinggih | Sèkh Malaya nêmbah matur |
rèhning sampun sinêdya | abot ènthèng dèn lampahi | jangji antuk
wêwêngan sih kawêlasan ||

14. dhumatêng jasad kawula | pindha sato saupami | angkala dèdalan
mulya | jêng nabi ngandika aris | ingsun darma njalari | atas anèng
kabêgjanmu | lah mêtêma kewala | sun tuduhkên nggon kang éning |
supayane wêruha ing panarima ||

15. Sèkh Malaya tan lênggana | wau ta Jêng Nabi Kilir | sumêbut saking
panggenan | pan kadya anampêl wêtis | Sèkh Malaya tan kari | tan
adangu prapta sampun | ing nggèn langkung ajêmbar | lir ara- ara aradin |
kinubêng ing samudra tanpa watêsan ||

16. wus kinèn mbuka paningal | Sèkh Malaya aningali | panggènan
kalangkung jêmbar | myang samudra tanpa têtêpi | lênglêng rèh ing
pangèksi | datan wrin èlor myang kidul | kulon kalawan wetan | surya
candra tan kaèksi | panyanane dumunung jagad walikan ||

17. Sèkh Malaya matur nêmbah | pukulun Sang Maha Yogi | kawula
nyuwun têtanya | punika alam ing pundi | dene ta sarwa mamring | lamat-
lamat nyamut-nyamut | nglangut tanpa

--- 104 ---

wêkasan | ngandika Jêng Nabi Kilir | wruhanamu ya iki panggonaningwang
||

18. nora nana paran-paran | mung asunya lawan ruri | têka sira
kapibrangta | kaya raganingsun iki | apa kang dèn ulati | ing kene sêpên
asamun | umatur Sèkh Malaya | makatêna botên lirip | rêhning sampun
dados kêkêncêngan kula ||

19. sanadyan prapta ing pêjah | botên rumêngkang pun patik | Jêng Nabi
Kilir ngandika | sukur yèn mantêp ing kapti | payo padha lumaris | Sang
Sèkh Malaya jumurung | lajêng midêr lumampah | tan adangu aningali |
cahya padhang tri rupa andiwangkara ||

20. warna abang irêng jênar | Sèkh Malaya matur aris | punika cahya
punapa | ngandika Jêng Nabi Kilir | pramana aranèki | upama anèng sirèku
| êndi kang dèn pilih | Sèkh Malaya matur aris | langkung ajrih yèn botên
wontên pitêdah ||

21. datan dangu katingalan | cahya pêthak anêlahi | parêk lan cahya
katiga | Sèkh Malaya matur malih | cahya punapa kari | parêk lan cahya
katêlu | jêng nabi lon ngandika | bok ana kang sira pilih | Sèkh Malaya
ature dahat tan arsa ||

22. yèn tan kalawan pitêdah | ngandika Jêng Nabi Kilir | kabèh cahya iku
tunggal | kacatur anèng sirèki | ya padha anênarik | mêmarah akarya
dudu | kang rupa cahya abang | atuduh napsu tan bêcik | nganakakên
penginan panas baranan ||

23. ambuntoni kaelingan | ing kawaspadaning budi | dene cahya kang
akrêsna | karsane ngubêngi runtik | andêdawa andadi | padhang
panggawe ayu | dene kang cahya jênar | nanggulang cipta kang bêcik |
sayêktine ngêgungkên panggawe rusak ||

24. ingkang putih iku nyata | mung suci tan ika iki | prawira ing karaharjan
| iku kang

--- 105 ---

bisa nampani | sasmita kang kalingling | sajatining rupa iku | anampani
nugraha | lêstari pamoring kapti | nanging iku kinrubut napsu têtiga ||

25. yèn kurang sabar santosa | kêna ginoling ing bêlis | kerut maring
panasaran | yèn kuwat tan mindho kardi | kasor dening kang putih | kang
têlu samya angratu | luamah lan amarah | supiyah ginêdhong batin |
mutmainah jumênêng ratu utama ||

26. kalêgan raosing driya | Sèkh Malaya anganggêpi | tuduhing Sang
Maha Yoga | marbudyèngrat Nabi Kilir | nulya ngandika malih | hèn Sèkh
Malaya sirèku | paran pambudinira | êndi kang sira antêpi | wahanane
kang cahya patang prakara ||

27. umatur Sang Sèkh Malaya | punapa sampun ngidaki | punika têtênging
paran | têka kinèn amêmilih | ngandika Nabi Kilir | sayêkti puniku durung |
lagi anèng trêsandha | Sèkh Malaya matur malih | sèwu sisip yèn anampik
amiliha ||

28. mindhak anggêgadhang lêpat | pan kawula sèwu ajrih | yèn botên
saking pitêdah | lajêng alêlampah malih | Sèkh Malaya ningali | urub siji
angênguwung | wêwolu konyarira | ana lir pêputran gadhing | wênèh
kadya ana pêputran mutyara ||

29. dumêling abra markata | Sèkh Malaya matur malih | punika urub
punapa | maya-maya angêbati | urube mung sawiji | andarbèni cahya
wolu | Nabi Kilir ngandika | pangarêp urubing budi | iya iku kang sajati
wênang tunggal ||

30. têngêse saliring warna | iya anèng sira kaki | tuwin isining pratala |
ginambar anèng ing dhiri | jagad agung myang cilik | tan ana
prabedanipun | purwaning catur yoga | kang cahya kapat pan sami | iya
dadi tandha uriping bawana ||

--- 106 ---

31. tinimbangkên anèng sira | jagad agung jagad alit | isèn-isène tan beda
| kinarya wahana yêkti | salwir rupa wus anis | ngumpul mring rupa satuhu
| kadya tawon gumana | sawang putran mutyara di | cahyanira kumilat
tanpa wayangan ||

32. Sèkh Malaya matur nêmbah | dhuh sang maha yoga suci | punapa
inggi punika | kang pinrih dipun ulati | rupa ingkang sajati | Nabi Kilir
ngandika rum | dudu kang sira sêdya | kang mumpuni ambêk jati | nora
kêna kalamun winaspadaa ||

33. tanpa rupa tanpa warna | nanging bisa amarnani | tan gatra datan
satmata | tan dumunung nggon sawiji | dumununge kalingling | kang awas
waskithèng sêmu | mêtêki isining rat | narambahi ing dumadi | kaanane
yèn dinumuk datan kêna ||

34. umatur Sang Sèkh Malaya | dhuh pukulun Sang Maha Ning | ulun
nyuwun tuduh nyata | dene dèrèng anggêpoki | nugraha kang sayêkti |
Nabi Kilir ngandika rum | hèn kaki Sèkh Malaya | ingkun pèpajar
samangkin | dèn arêncang pamucunge ing pangancam ||

27. Pocung[1]

1. Kangjêng Nabi Kilir angandika arum | dèn wori pralambang | upamane
rasa iki | anèng lotèng kang adi-adi punika ||

2. pantêsipun kang lotèng upaminipun | kaya bumbu iwak | winor lan
iwakirèki | rasa iku ati suci ingkang nyata ||

3. iya iku nurbuwah sajatinipun | ya iku duk ana | sipat jamal aranèki | yèn
wus mêtu ingaranan johar awal ||

4. diwasèku johar akir aranipun | ingkang johar awal | ingaku rasa sajati |
ingkang akir sawujud ati uripnya ||

5. johar iku duk sawujud rasa tuhu | urip tunggal rasa | tunggal johar awal
singgih |

--- 107 ---

johar akir sawujud ing uripira ||

6. johar akir narima ing solahipun | batin kang sinêmbah | miwah ta ingkang pinuji | iya iku jatine Pangeranira ||

7. iya iku pan nora roro têtêlu | iya iku Nukat | lan Gaib ing nguni-uni | Nukat Gaib tan ana ing gantira ||

8. tēmênipun Nukat pan jênêngirèku | sawuse tumiba | iku ingaranan napti | ngèlmu iku sajatine panguripan ||

9. nêptu iku tinarik lan alipun | alip ingaranan | jisim latip pan sayêkti | jênênge pan ingaranan ananira ||

10. nêptu iku johar awal aranipun | ing sajênêngira | urip ingaran sajati | sajatine ingaran gêtih kang gêsang ||

11. gêtih urip ingaran rasulu'llahu | alaihi'ssalam | patêmon rasa sajati | gêtih iku kang ingaranan sahadat ||

12. rasa jati rasaning dat sami wujud | Jabraail Mukhammad | lan Allah tunggal sajati | têtlu iku kapatira lan angkara ||

13. iya iku gêtih urip aranipun | dene wong palastra | tan ana gêtihirèki | gêtih iku awor ilang lawan suksma ||

14. suksma iku ilang anane kang wujud | iya padha ana | alip aran roh ilapi | roh ilapi jisim latip jatinira ||

15. aranipun jisim iku duk ing dangu | alip ingaranan | tanpa ngucap tan ningali | tan miyarsa tanpa tingal tanpa karsa ||

16. iya iku kang alip tibaning nêptu | arane dadya na | jinabaran roh ilapi | roh ilapi datu'llah tuwin kawawas ||

17. roh ilapi gégêntining dat satuhu | alip iku uga | anèng johar jabar jèrè |
pujinipun ram kalam birahi nama ||

18. birahine ingaranan Allah iku | tan roro wujudnya | sapa wêruha yèn
dadi | yèn wêruha tan ngarani namanira ||

--- 108 ---

19. sipatipun jamal kang ngarani iku | sipat jalal ingkang | akon ngarani
puniki | dene ingkang akon Allah angandika ||

20. marang rasul yèn tan ana sira iku | ingkun nora nana | kang nêbut
Allah sayêkti | iya sira ingkang ngarani maringwang ||

21. sira iku iya tunggal lawan ingkun | ingkun iya sira | sira iku iya mami |
iya iku tarbukaning rasaningwang ||

22. sira iku ing dunya akirat uwus | amêngku sadaya | hèn Sèkh Malaya
sirèki | dipun eling jabar jèrè alip ika ||

23. aja luput ing logat tanangsubipun | babaring kaanan | anèng ing wujud
ilapi | ilapate dèn anggambuh ing wardaya ||

28. Gambuh

1. mungguh ta yêktinipun | sêmuning alip iku amêngku | budi jati nir
wikara jroning budi | nglairkên birahinipun | amicara tunggal karo ||

2. karo tunggal sawujud | lawan karone puniku dudu | iya iku budi johar
aranèki | iya budi iman iku | alip puniku sayêktos ||

3. tumiba maring naptu | sajatine ingkang alip iku | sarwa nora norane
ingakên kadi | iya budi iman iku | alip puniku mangkono ||

4. kaanane satuhu | kang johar awal sayêktinipun | ingkang johar awal
pan kaanan jati | istinja junup puniku | jabaning johar kinaot ||

5. sung ganda lan warnèku | kang johar awal ing nguninipun | iya iku
tibaning naptu sajati | urip tunggal jatinipun | jroning johar awal kono ||

6. urip kalawan lampus | ya sajroning johar awal iku | lah pagene
sêmbahyang anèng dunyèki | lire ing dunya puniku | mangka purbaning
dumados ||

7. dèn kawangwang satuhu | yèn naptu gaib

--- 109 ---

anèng sirèku | lah pagene sira ngadêg nèng dunyèki | sidhakêp kalawan
mangu | marmane sidhakêp kang wong ||

8. tunggal kaananipun | tunggal solah paribawanipun | wicarane tunggal
pangucapirèki | wêdhar tangan nuli rukuk | kasaru duk tibèng kono ||

9. tumètèse kang banyu | banyu kang suci wêning umancur | êningipun
madi uriping sakalir | yèn rukuk karasa iku | iman saderah kinaot ||

10. sasamine puniku | kaananing rasa mêngko iku | lah pagene asujud
anèng ing bumi | marmane sujud puniku | panuksmane cahya kaot ||

11. ingkang cahya puniku | ana paran ing sasmitanipun | iya iku
patêmoning rupa jati | rupa iku dat satuhu | dating Hyang Suksma kang
elok ||

12. dene ingkang rumuhun | sadurunge bumi langitipun | ingkang ana
dhingin pan ananirèki | ing dunya kerat sirèku | mêngkono lire sayêktos ||

13. nanging lamun wus wêruh | dèn awêri warananirèku | ati êning
têlênge ingkang prêmati | yèn gèbrèh kuwur balawur | atiwas
waskithaning don ||

14. awit basa puniku | nora kêna linair yèn durung | papan êmpa apan
nèng pasêpan sêpi | supaya wênganing kayun | angganthêng manthêng
gumathok ||

15. wus kaki mung puniku | tanggapana wahyuning Hyang Agung | Sèkh
Malaya tyasira padhang nampani | kanugrahan kang dhumawuh | sanalika
jlêg salin nggon ||

16. bale kancana luhung | amawa cahya adi ngênguwung | sèn-isène
jagad wus tan ana kèksi | pêpadhange tumalawung | Sèkh Malaya matur
alon ||

17. dhuh dhuh Sang Maha Wiku | bale punapa kang katon mancur | dene
wau sêpa-sêpi suwung mamring | tan wontên bale kadulu | têka mangke

--- 110 ---

angêrobong ||

18. raosing badan ulun | nikmat manpangat ingkang tinêmu | botên arip
lan lêsû botên angêlih | Nabi Kilir ngandika rum | ênggone batin ing kono
||

19. sajatine ya iku | karaton kang nugraha linuhung | lamun katarima
rinilan ing Widhi | nora sarana linuru | iku sajatining kawroh ||

20. yèn janma kang wus putus | têtêp patitis têrus rumasuk | bisa ngrasuk
angrasa kang dèn ranggoni | sangkanparan wus kawêngku | ngalih nggon
mboyong kadhaton ||

21. kang binoyong puniku | yêkti kadhaton kang wus dumunung | anèng
sira karana jatining pati | kang amati iku napsu | suksmane murba maring
don ||

22. ing mula-mulanipun | beda lawan janma kang durung wruh | migêg-
migêg bêngêgêg tan bisa budi | mêtulu kacambah watu | nging dadi hawa
kemawon ||

23. amaning urip iku | yèn kalarab bok kaliru surup | surupane ginèrèt
maring ibêlis | êmbuh-êmbuh kang binuru | kadi kapatèning sato ||

24. Sèkh Malaya umatur | yèn makatên ing sabda pukulun | ulun sampun
tan nêdya awangsul malih | pedah punapa dunyèku | amung susah lan
rêkaos ||

25. kathah rubedanipun | beda-beda têmah karya dudu | balik ngriki
rêribêd tan anglabêti | nikmat manpangat tinêmu | karaos raos rumaos ||

26. jêng nabi ngandika rum | nora kêna mangkono karsamu | pan kasiku
maring Hyang Kang Murbèng Pasthi | durung masa kalanipun | datan kêna
anggege nggon ||

27. iku anyupêt tuwuh | awit kênane sarana lampus | marma sira kêna
dumunung ing ngriki | pratandha nampani wahyu | besuk bisa kaya
ingong ||

--- 111 ---

28. nanging tan kêna mbanjur | sarèhning iki sira wus wêruh | sarahsaning
gaibing Hyang Maha Suci | wus amung samono iku | padha andum
karahayon ||

29. ya ta sasampunipun | bale kancana datan kadulu | parêng musna
kalawan Jêng Nabi Kilir | Sèkh Malaya apan sampun | wangsul alame kang
manggon ||

30. katon babaranipun | keblat papat ing ngandhap myang luhur | lawan
Sang Hyang Diwangkara amrabani | jagad sagara myang gunung |
antaranira tan keron ||

31. anèng têpinging laut | Sèkh Malaya angên-angên ngungun | dene ing
pandulu lir sarahsèng ngimpi | kêplase pan wus kacakup | sangkêp
sangkanparaning don ||

32. upama sêkar kuncup | mangkya sampun masane cumucup | ngambar-
ambar gandanya kasturi jati | ing wasana lajêng kondur | tan wangsul
maring Carêbon ||

33. mring padalêmanipun | Kalijaga pan lajêng misuwur | Sèkh Malaya
anrus kadibyaning ngèlmi | lajêng dadya imam agung | pra alim marsudi
kawroh ||

34. Sèkh Malaya kasêbut | apan saking padalêmanipun | nênggih Sunan
ing Kalijaga wêwangi | ênêngna ganti winuwus | pêparênganing lêlakon ||

35. wontên ta kadangipun | Jêng Sunan Ngampèl ing Surèngkewuh | sanès
ibu nama Sayid Ali Mukid | angajawi pan anjujug | ing Ngampèl mêsu
paguron ||

36. ing pangajawinipun | duk Jêng Sunan Kali anggêguru | Sunan Benang
mulane kinarya kari | wêdharing caritanipun | supados tan amêmêdhot ||

37. kata ingkang linuhung | Sayid Ali Mukidi tinuduh | dadya imam mring
Jêng Sunan Ngampèlgadhing | kaprênah anèng Majagung | kèh janma
kasmaran ing don ||

--- 112 ---

29. Asmaradana

1. ya ta Sayid Ali Mukid | dhukuhe karta raharja | kang samya awisma
ngrodon | kathah samya manjing siswa | wasana lajêng karan | nama
Pangeran Majagung | nanging tan tumut wilangan ||

2. wali wolu tanah Jawi | pan ugêr- ugêring imam | aliya punika akèh | pan
datan milya golongan | wali wolu punika | wali nukba aranipun | têngêse
wali tututan ||

3. waliu'llah tanah Jawi | mung wolu wilanganira | dene kang ambawa
dhewe | angislamakên kabudan | ngradinakên agama | samya kasêbut
sinuhun | têngêse pêpundhèn êkhak ||

4. Sunan Ngampèl kang rumiyin | Sunan Gunungjati nulya | Sunan
Ngudung katigane | Sunan Giri Giri Gajah | Sunan Makdum ing Benang |
Sunan Alim ing Majagung | Sunan Mahmud ing Darajat ||

5. anulya Jêng Sunan Kali | kasêbut wali pamungkas | sinung luhur darajate | lan wali-wali sadaya | antuk hidayat mulya | pama nabi kangjêng rasul | wolu karan Walisana ||

6. têngêse dununging wali | kang manggon wolu punika | liya punika pan akèh | tan kasêbut Walisana | ingaran wali nukba | nukba tututan lirisun | liring tututan sambungan ||

7. sambunganing para wali | puniku wali anakan | anane pan wus amanggon | manggon dununganing bapa | bok kalêbu golongan | nênggih wali kutup sèwu | ewoning waling jagad ||

8. wali salumahing bumi | kang kasêbut ing wirayat | anênggih sèwu cacahé | yêkti samya kadunungan | aliya tanah-tanah | sambunganing wali wolu | sayêkti akèh kewala ||

9. aliya kang wus rininci | ricikaning Walisana | mangkya kapratelakake | sagunging wali anakan | supadya janah gênah | wijange dununganipun | para wali sowang-sowang ||

--- 113 ---

10. kang nututi ambêk wali | anênggih Sunan Têmbayat | lan Sunan Giri Parapèn | Jêng Sunan Kudus kalawan | Sultan Syah Alim Akbar | Pangran Wijil Kadilangu | kalawan Pangran Kêwangga ||

11. Ki Gêdhe Kênanga Pêngging | malihe Pangeran Konang | lawan Pangeran Cirêbon | lan Pangeran Karanggayam | myang Ki Agêng Sêsela | tuwin Sang Pangeran Panggung | Pangeran ing Surapringga ||

12. lan Kyai Juru Martani | ing Giring myang Pamanahan | Buyut Ngerang Sabrang Kulon | lan Ki Gêdhe Wanasaba | Panêmbahan Palembang | Ki Buyut ing Banyubiru | lawan Ki Agêng Majasta ||

13. malihe Ki Agêng Gribig | Ki Agêng ing Karotangan | Ki Agêng ing Toyajêne | lan Ki Agêng Toyareka[2] | pamungkas wali raja | nênggih Kangjêng Sultan Agung | kasêbut wali nurbuwat ||

14. tamat rêrincèning wali | yèn mungguh ing tanah Jawa | samya mulya
darajate | mangkya mangsuli carita | turuting Walisana | mulya gêng
karamatipun | Jêng Sunan ing Giri Gajah ||

15. agêng paguronirèki | sinuyudan pra ulama | pan wontên sabat sawiyos
| saking tanah Sitijênar | nama San Ali Ansar | katêlah dununganipun |
winastanan Sèkh Lêmahbang ||

16. ya Lêmahbang Lêmahkuning | tan ana prabedanira | Sèkh Lêmahbang
salamine | anênuwun dêdunungan | rahsane ngèlmu rasa | ugêr-ugêring
tumuwuh | Jêng Suhunan Giri Gajah ||[3]

17. dèrèng lêga ing panggali | wrin sêmune Sèkh Lêmahbang | watêk
wus akèh sikire | marmane datan sinungan | bok sak sok mbuwang sasak |
ngilangkên ling-aling agung | tan anganggo masa kala ||

18. tyasira dahat rudatin | sira wau Sèkh Lêmahbang | anuwun-nuwun
tanpolèh | rumasa tuna

--- 114 ---

ing gêsang | dadya nêdya nêmpuh byat | namur amèt momor sambu |
atindak karti sampeka ||

19. duk samana Sunan Giri | nuju ing ari Jumungah | pan arsa mêjang
muride | Sèkh Lêmahbang angrêpa | dhuh pukulun jêng sunan | bilih
kaparêng saarju | ulun bela puruhita ||

20. ngandika Jêng Sunan Giri | Allah durung pasang yogya | amêjanga
dina kiye | marang ing pamintanira | wau ta Sèkh Lêmahbang | angrasa
yèn pinakewuh | butêng êru kabatinan ||

21. lajêng kesah maring jawi | locitanira ing driya | yèn mangkono tanpa
gawe | ngawat-awati wus lawas | tiwas datanpa tuwas | mèt wasana pijêr
kawus | rewa-rewa ingewanan ||

22. mêjang miji para kaji | sabên ing ari Jumungah | tan kêna manjing saraos | rumasa yèn tan kinarsan | bécik sun cidranana | tan ana druhakanipun | mêmikan ing pangawikan ||

23. Sèkh Lêmahbang wus udani | panggonan pamêjangira | amatêk aji sikire | sanalika malih warna | arupa dhandang seta | manggon ing panggènanipun | pamêjangan jêng suhunan ||

24. ciptane wus tan udani | dènira tingkah mangkana | Jêng Sunan Giri Kadhaton | yêkti datan kêkilapan | solahe Sèkh Lêmahbang | angandika jêng sinuhun | mring sagung para sakabat ||

25. hèn ta kawruhana sami | ingsun tan sida amêjang | nora enak atiningong | besuk ing Jumungah ngarsa | sida pamêjangingwang | dadya bubar para kaum | praptaning ari Jumungah ||

26. kadhatêngan para wali | sêdya pagunêman rasa | angumpulakên[4] kawruhe | sampun amanggih sulaya | dadining rêmbagira | Sunan Giri

--- 115 ---

aturipun | inggih sumangga ing karsa ||

27. nanging ulun nuwun alim | sêdya amêjang sakabat | sarèhning sampun masane | kang para wali sadaya | jumurung ngayubagya | Sunan Giri têdhak gupuh | maring pamêjanganira ||

28. angumpulakên ulami | wau ta Sang Sèkh Lêmahbang | datan kandhêg sasêdyane | dènniyarsa mêtêt sarahsa | nulya mancala warna | pan arupa cacing kalung | sênêdan soring pratala ||

29. tan ana janma udani | mung Jêng Sunan Giri Gajah | kang wrin sasolah tingkahe | nanging tan imunasika | rêhning wus jangjinira | maringkên nugraha agung | maring sakabat taruna ||

30. Sinom

1. hèn ta padha kawruhana | dununge kang nukat gaib | pan aputih warnanira | dene gêdhene rininci | mungguh ing jagad iki | tinandhinga pirang èwu | yuta alam tan timbang | têngêse kang nukat gaib | apan saking gaibing kang kanyataan ||

2. istingarah tan kajaba | istingarah tan umanjing | istingarah tan kawêdal | tan kajro istingarahing | sayêkti luwih gaib | tan owah gingsir puniku | langgêng tanpa karana | kang jumênêng ki rohani | apa rupanira duk nalikèng dunya ||

3. nora owah sêbutira | cahya mancorong nêlahi | lir êmas binabar anyar | dene ta ingkang rohani | pan Mukhammad sajati | aja êsak aja masgul | anane kawruhana | sah ing tekad kang prêmati | pan lêlima prakara rubedanira ||

4. ingkang dhingin katon pisah | katon tunggal kaping kalih | kaping tri katon tan pisah | ping pat mêtù katon yêkti | kaping limanirèki | katon mêtokake iku | lah padha dèn

--- 116 ---

budia | sakabèhe para murid | aja pègat nggonira musawaratan ||

5. yèn darbe panêmu sira | sumantakêna mring mami | lan ta manèh kawruhana | asma pêpitu puniki | Allah ingkang rumiyin | ping ro wujud mokal iku | wujud ilapi trinya | kaping pate roh ilapi | kaping lima pan iya akyan sabitah ||

6. kaping nêmu akyan karijah | kaping pitune winarni | pan Allah lawan Mukhammad | iku dèn budia sami | matur kang para murid | pukulun saèstunipun | kajarwanana pisan | kantênanipun nampèni | botên beda dadining pambudinira ||

7. Jêng Sunan Giri ngandika | mungguh atine[5] kang yêkti | Allah pan jatining aran | lire wujud mokal nênggih | Pangeran kang sajati | liring wujud ilapiku | jatining warna rupa | dene aran roh ilapi | apan iku sajatining urip kita ||

8. dene ta akyan sabitah | sajatining ana yêkti | mungguh kang akyan karijah | lire wayangan kang pasthi | Allah Mukhammad liring | ya Allah

rasulu'llahu | ing bedane panunggal | Allah sarira sayêkti | ing têngêse
sarira puniku rahsa ||

9. iya sajroning kang rahsa | iku mapan datu'llahi | datu'llah dat rasulu'llah
| karo pan dadi sawiji | artine kang sajati | kang amurba langgêng ing sun |
murba jati wisesa | sajatining nukat gaib | dèn pracaya tan liyan yêkti
punika ||

10. pra sakabat duk miyarsa | sabdaning Jêng Sunan Giri | tanggap atampi
nugraha | mathêm dènira mêmundhi | wasana matur malih | dhuh
pukulun jêng sinuhun | balik ingkang punika | pan sampun tuwan logati |
kang rumiyin rubeda gangsal prakara ||

11. kawijangna babar pisan | supados lajêng gumlinding | botên rêgêd
angalêndhang | sagêd

--- 117 ---

bunar suci wêning | ngandika Sunan Giri | iku tan kêna winuwus | kudu
kanthi nugraha | têtune sira pribadi | mêngko lagi durung kêna kabukaa
||

12. padha anggitên priyangga | kasaru sampun byar enjing | Jêng Sunan
ing Giripura | kondur ing dalêmirèki | bubarana para murid | sowang-
sowangan umantuk | warnanên Sèkh Lêmahbang | nênggih kang alaku
sandi | lajêng mêdal saking sajroning pratapa ||

13. wus awarna Sèkh Lêmahbang | tamsil sal-silahing ngèlmi | yèn
Pangeran Ingkang Nyata | dènira boya antuk sih | gya kesah saking Giri |
mantuk mring dununganipun | tanah ing Sitijênar | lajêng ngubalakên
ngèlmi | kathah janma kacaryan apuruhita ||

14. maring sira Sèkh Lêmahbang | wêjange tanpa rêricik | lan wus
atinggal sêmbahyang | rose kewala liniling | mêtêng tanpa ling-aling | wus
dadya paguron agung | misuwur kadibyaning | dènira talabu'llilmi | wus
tan beda lan sagung para oliya ||

15. sangsara[6] kasusrêng janma | akèh kang amanjing murid | ing praja-
praja myang desa | malah sakèhing ulami | kayungyun ngayum sami |

kasoran kang wali wolu | gunging paguronira | pan anyuwungakên masjid
| karya suda kang amrih agama mulya ||

16. santri kathah kèh kabawah | mring Lêmahbang manjing murid | ya ta
Sang Sèkh Sitijênar | sangsaya gung kang andasih | dadya imam pribadi |
mêngku sarèh bawahipun | paguroning ngèlmu khak | kawêntar praptèng
nagari | lajêng karan Sang Pangeran Sitijênar ||

17. satêdaking Majalêngka | kalawan darahing Pêngging | kèh prapta
apuruhita | mangalap kawruh sajati | nênggih Ki Agêng Tingkir | kalawan
Pangeran Panggung | Buyut Ngerang ing Bêtah | lawan Ki Agêng ing
Pêngging |

--- 118 ---

samya tunggil paguron mring Sitijênar ||

18. ing lami-lami kawarta | maring Jêng Suhunan Giri | gya utusan
tinimbangan | duta wus anandhang wêling | mangkat ulama kalih | datan
kawarna ing ngênu | wus prapta ing Lêmahbang | duta umarêk mangarsi |
wus apanggih lan Pangeran Sitijênar ||

19. nandukkên ing praptanira | dinutèng Jêng Sunan Giri | lamun mangkya
tinimbangan | sarênga salampah mami | wit Jêng Sunan miyarsi | yèn
paduka dados guru | ambawa imam mulya | marma tuwan dèn timbali |
têrang sagung ing para wali sadaya ||

20. prêlu amusawaratan | cundhuking masalah ngèlmi | sagêda nunggil
sêrêpan | sampun wontên kang sak sêrik | nadyan mawi rêricik |
apralambang pasang sêmu | sagêda salingsingan | Pangran Sitijênar
angling | ingsun tinimbangan Sunan Giri Gajah ||

21. apa têmbunge maringwang | ature duta kêkalih | inggih maksih Sèkh
Lêmahbang | Pangran Sitijênar anging | matura Sunan Giri | Sèkh
Lêmahbang yêktinipun | ing kene nora nana | amung Pangeran Sajati |
langkung ngungun duta kalih duk miyarsa ||

22. andikane Sèkh Lêmahbang | wasana umatur aris | kados pundi karsa
ndika | têka makatên kang galih | wangsulan kang sayêkti | pangeran

ngandika arum | sira iku mung darma | aja nganggo mêmadoni | inghun iki
Jatining Pangeran Mulya ||

23. duta kalih lajêng mêsat | lungane datanpa pamit | sapraptaning Giri
Gajah | marêk ing Jêng Sunan Giri | duta matur wotsari | dhuh pukulun
Jêng Sinuhun | amba sampun dinuta | animbali Sèkh Sitibrit | aturipun
sêngak datan kanthi nalar ||

--- 119 ---

31. Kinanthi

1. makatên wiraosipun | hèn sira duta kêkalih | inghun mêngko tinimbalan
| ing ngarsa Jêng Sunan Giri | matura yèn nora nana | kang ana Pangeran
Jati ||

2. sakala kawula rêngu | paran kang dados pamanggih | dene angakên
Pangeran | ulun nuntên dèn wangsuli | sira iku mung sadarma | ngaturake
ala bêcik ||

3. wau sapamyarsanipun | lêngêg Jêng Suhunan Giri | jaja bang mawinga-
winga | kadya age dèn tédhaki | rinapu pra auliya | dhuh sang ambêk wali
mukmin ||

4. dèn sabar panggalihipun | inggih katandha rumiyin | kêkêncêngane ing
tekad | gampil pinanggih ing wingking | yèn sampun kantênan dosa |
kados botên makalahi ||

5. lèlèh ing panggalihipun | myarsa sabdaning pra wali | Jêng Sunan ing
Giri Gajah | duta kinèn wangsul malih | animbali Sèkh Lêmahbang | ujare
kinèn nuruti ||

6. jangji seba ngarsaningsun | ujanên ywa mindho kardi | duta lajêng
nêmbeh mêsat | sampun prapta ing Sitibrit | panggih lawan Sèkh
Lêmahbang | nandukkên dènnya tinuding ||

7. mring Sunan Giri Kadhatun | Pangeran dipun timbali | sarênga
salampah kula | Pangran Sitijênar angling | mêngko Pangeran tan ana |
ingkang ana Sèkh Sitibrit ||

8. duta tan sawalèng wuwus | sarèhning sampun winêling | inggih mangkya Sèkh Lêmahbang | kang wontên dipun timbali | ngandika Sèkh Sitijênar | Pangeran tan amarêngi ||

9. awit Sèkh Lêmahbang iku | wayahing Pangeran Jati | nadyan sira ngaturana | ing Pangeran Kang Sajati | lamun Sèkh Lêmahbang ora | masa kalakona yêkti ||

10. duta ngungun lajêng matur | inggih kang dipun aturi | Pangeran lan Sèkh Lêmahbang | rawuha [ra...]

--- 120 ---

[...wuha] dhatêng ing Giri | sagêda musawaratan | lan sagunging para wali ||

11. Pangran Sitijênar nurut | lajêng kering duta kalih | praptane ing Giri Gajah | pêpêkan kang para wali | Pangeran ing Sitijênar | anjujug Jêng Sunan Giri ||

12. lajêng ingandikan arum | bageya Pangran kang prapti | rawuhe ing ngarsaningwang | Pangran Sitijênar angling | dhuh pukulun sama-sama | tumêka suka basuki ||

13. Jêng Sunan ngandika arum | marma sanak sun aturi | kasok karoban ing warta | yèn andika tèki-tèki | makiki nêngkar ngèlmu khak | dadi paguron sabumi ||

14. ngasorakên wali wolu | mandar bawa imam suci | datan asuci Jumungah | saèstu ngong anjurungi | pira-pira sira bisa | alim ngêlêm para wali ||

15. Pangran Sitijênar matur | nggèn amba purun mbawani | mêdhar gaibing Pangeran | awit Allah sipat asih | asih samining tumitah | sabên titah angranggoni ||

16. nganggowa ugêring ngèlmu | kang abuntas dèn atitis | sampun ngantos sêlang sêbat | mindhak ambêbingung pikir | amèt ansar dadi sasar | karena kirang barêsih ||

17. pedah punapa mbêbingung | ngangèlakên ulah ngèlmi | Jêng Sunan Giri ngandika | bènêr kang kaya sirèki | nanging luwih kaluputan | wong wadhèh ambuka wadi ||

18. têlênge bae pinulung | pulunge tanpa ling-aling | kurang waskitha ing cipta | lunturing ngèlmu sajati | sayêkti kanthi nugraha | tan sabên wong anampani ||

19. Pangran Sitijênar matur | paduka amindho kardi | ndadak amêrangi tatal | têtelane ing dumadi | dadine saking nugraha | punapa botên ngalami ||

20. Sunan Giri ngandika rum | yèn kaya wuwusirèki | tan kêna dèn nggo rêrasan | yèn gèbrèh [gè...] ||

--- 121 ---

[...brèh] amêdhar wadi | Pangeran nora kuwasa | anane tanpa ling-aling ||

21. êndi kang ingaran luhur | êndi kang ingaran gaib | êndi kang ingaran purba | êndi kang ingaran batin | êndi kang ingaran baka | êndi kang ingaran latip ||

22. êndi kang ingaran bêsus | êndi ingaran birai | yèn baka mbabar balaka | bakal bubur tanpa bibit | mangka Pangeran Kang Nyata | nora kêna dèn rasani ||

23. pan nora kêna dinumuk | anane wahana gaib | matur Pangran Sitijênar | sêdya purun amabêni | bantahan masalah rasa | sinapih kang para wali ||

24. dhuh sanak sakalhipun | ywa tansah abên prang sabil | prayogi kanyatakêna | wontên ing nggèn kang asêpi | sampun sêpên sêpi hawa | sarahsa sagêd anunggil ||

25. wontên kawêkasanipun | yèn mukit yêkti karadin | Jêng Sunan ing Giri Gajah | wrin kêdhaping sambang liring | sabdaning para oliya | lajêng angandika aris ||

26. he Sèkh Lêmahbang sirèku | aja pijêr amadoni | besuk ing ari Jumungah | padha musawarat batin | yêkti katandha kanyata | lèlère asmarèng ngèlmi ||

32. Asmaradana

1. Sèkh Lêmahbang nayogyani | prapta ing ari Jumungah | nuju Ramadhan wulane | marêngi tanggal ping lima | kumpulan pra oliya | anêdhêng kalaning dalu | ngrakit papan kang prayoga ||

2. sakathahing para wali | samya pagunêman rahsa | ing Giri Gajah ênggone | akarsa musawaratan | ing bab masalah tekad | dèn waspada ing Hyang Agung | wajib sami nyatakêna ||

3. kang samya angulah ngèlmi | lamun bijaksanèng driya | dadi wijang sayêktine | tan beda lan puruhita | mungguh rahsaning rasa |

--- 122 ---

pralambanging pasang sêmu | tan liya saking punika ||

4. nadyan akèh kang wêwisik | wosing wasana wus ana | mung kari mèt pratikêle | ing sawusira pêpêkan | Kangjêng Sinuhun Benang | ingkang miwiti karuhun | lan Sinuhun Kalijaga ||

5. Sunan Carbon lan kang rayi | padha nêrang Sèkh Lêmahbang | lan Suhunan Majagunge | Suhunan ing Bantên lawan | Suhunan Giri Gajah | samya agunêm ing ngèlmu | jênênge masalah tekad ||

6. Jêng Sinuhun Ratu Giri | amiwiti angandika | he sanak manira kabèh | pratingkahing wong makrifat | aja dadi parbutan | dipun sami ngèlmunipun | padha peling-pinelingan ||

7. wong wêwolu dadi siji | aja na wong kumalamar | dipun rujuk ing karêpe
| dèn waspada ing Pangeran | nênggih Sinuhun Benang | ingkang miwiti
karuhun | amêdhar ing pangawikan ||

8. ing karsa manira iki | iman tokid lan makrifat | wêruh ing kasampurnane
| lamun maksiha makrifat | mapan durung sampurna | dadi batal
kawruhipun | pan maksih rasa rumasa ||

9. Sinuhun Benang ngukuhi | sampurnane wong makrifat | suwung ilang
paningale | tan ana kang katingalan | iya jênênging tingal | mantêp
Pangeran Kang Agung | kang anêmbah kang sinêmbah ||

10. pan karsa manira iki | sampurnane ing Pangeran | kalimputan
salawase | tan ana ing solahira | pan nora darbe sêdya | wuta tuli bisu
suwung | solah tingkah saking Allah ||

11. Sinuhun Benang anuli | ngandikani wali samya | hêh sanak manira
kabèh | puniku kêkasih alam | yèn mungguh ing manira | jênênge roh
sêmunipun | ingkang roh Nabi Mukhammad ||

--- 123 ---

12. nora beda ing roh iki | yèn sêdya mutabangatan | tan beda ing
panunggale | kadya paran karsandika | matur wali sadaya | botên sanès
kang winuwus | sampun atut sabda tuwan ||

13. pundi kang ingaran nabi | jênênging roh ing sêmunya | mapan iku
kêkasihe | sadurunge dadi jagad | mapan jinatèn tunggal | dèn dadèkakên
karuhun | kang minangka kanyataan ||

14. Sinuhun Majagung nênggih | amêdhar ing pangawikan | ing karsa
manira dene | iman tokid lan makrifat | tan kocap ing akhirat | mung
padha samêngko wujud | ing akhirat nora nana ||

15. nyataning kawula Gusti | iya kang muji kang nêmbah | apan
mangkono lakone | ing akhirat nora nana | yèn tan anaa iman | tan wêruh
jatining ngèlmu | nora cukup dadi janma ||

16. Jêng Sunan ing Gunung Jati | amêdhar ing pangawikan | jênênging makrifat mêngko | awase marang Pangeran | tan ana ingkang liyan | tan ana roro têtêlu | Allah pan amung kang tunggal ||

17. Jêng Sunan Kalijaga ngling | amêdhar ing pangawikan | dèn waspada ing mangkono | sampun ngangge kumalamar | dèn awas ing Pangeran | kadya paran awasipun | Pangeran pan nora rupa ||

18. nora arah nora warni | tan ana ing wujudira | tanpa masa tanpa ênggon | sajatine nora nana | lamun nora anaa | dadi jagadipun suwung | nora nana wujudira ||

19. Sèkh Bêntong samya melingi | amêdhar ing tekadira | kang aran Allah jatine | tan ana liyan kawula | kang dadi kanyataan | nyata ing kawulanipun | kang minangka katunggalan ||

20. Kangjêng Molana Mahribi | amêdhar ing pangawikan |

--- 124 ---

kang aran Allah jatine | wajibu'lwujud kang ana | Sèkh Lêmahbang ngandika | aja na kakehan sêmu | iya Ingsun iki Allah ||

21. nyata ing sun kang sajati | jêjuluk Prabu Satmata | tan ana liyan jatine | ingkang aran bangsa Allah | Molana Mahrib mojar | iku jisim aranipun | Sèkh Lêmahbang angandika ||

22. kawula amêdhar ngèlmi | angraosi katunggalan | dene jisim sadangune | mapan jisim nora nana | dene kang kawicara | mapan sajatine ngèlmu | sami amiyak warana ||

23. lan malih sadaya ngèlmi | sampun wontên kumalamar | yêkti tan ana bedane | salingsingan punapaa | dèning sêdya kawula | ngukuhi jênênging ngèlmu | sakabèhe iku padha ||

24. Kangjêng Sèkh Molana Mahrib | sarwi mèsêm angandika | inggih lèrês ing sêmune | puniku dede wicara | lamun ta kapirsaa | dèning wong akathah saru | punika dede rarasane ||

25. tuwan ucapna pribadi | aja na wong amiyarsa | anuksma ing ati dhewe
| puniku ujar kêkêran | yèn tan kênaa tuwan | amalangi jênêngipun | bok
sampun kadi mangkana ||

26. nênggih Jêng Suhunan Giri | amêdhar ing pangandika | pasthine Allah
Jatine | jêjuluk Prabu Satmata | sampun wancak wicara | tan ana
pêpadhanipun | anging Allah Ingkang Tunggal ||

27. ya ta sakathahing wali | angèstokakên sadaya | mapan sami ing
kawruhe | amung sira Sèkh Lêmahbang | tan kêna pinalangan | cinêgah
wali sadarum | tan owah ing tekadira ||

28. angandika Sèkh Sitibrit | pan sampun ujar manira | dènnya nututi
kapriye | dhasare ingkang amêdhar | pamêjange maringwang | puniku
wuruking guru | datan kenging ingowahan ||

29. amêksa tan kêna gingsir | sinuwalan ing akathah |

--- 125 ---

tan kêna owah tekade | sampun ujar linakonan | pan wus jangjining
Suksma | Sunan Carbon ngandika rum | sampun ta tuwan mangkana ||

30. punika ujaring jangji | yêkti binunuh ing kathah | nênggih sampun ing
kukume | wong ingkang angaku Allah | ngandika Sèkh Lêmahbang | lah
mara tuwan dèn gupuh | sampun ngangge kaloreyan ||

31. dhasar kawula labuhi | ngulati pati punapa | pan pati iku parênge |
sarênge sih kawimbuhan | pan tansah kawisesa | kang têka jatining
suwung | ana kadim ana anyar ||

32. ngulati punapa malih | nora nana liyan-liyan | apan apês salawase |
anging Allah Ingkang Tunggal | ya jisim iya Allah | tokid têngêse puniku |
apan tunggal kajatènnya ||

33. sakathahing para wali | pra samya mèsêm sadaya | miyarsa ing
pamuwuse | kukuh tan kêna ingampah | saya banjur micara | amiyak
waranipun | nora nganggo sita-sita ||

34. angaku jênêng pribadi | andadra dadi rubeda | ngrêribêdi wêkasane |
nêrang anênêrak sarak | rêmbuge andaliga | mawali pra wali wolu |
winalon kurang walaka ||

35. lajêng abubaran sami | kang para wali sadaya | kondur mring
padalêmane | mung Jêng Sunan Giri Gajah | kang kawogan anglunas |
kang murang sarak ing ngèlmi | mupung dèrèng ngantos lama ||

36. Jêng Sunan Giri nyagahi | ing sirnane Sèkh Lêmahbang | yèn sampun
praptèng masane | adêge nata ing Dêmak | bédhahing Majalêngka |
sadaya samya jumurung | lajêng samya pakumpulan ||

37. sagunging kang para wali | mrih bédhahing Majalêngka | dene kang
jinago-jago | sira wau Radèn Patah | Lêmbupêtêng Madura | lan
sakulawarganipun | kang wus samya tumut Islam ||

--- 126 ---

38. Jêng Sunan Ngampèl mambêngi | mring para wali sadaya | lawan
putra sadayane | rèhning Prabu Brawijaya | among sasêdyanira | mring
para wali sadarum | pinardikakkên kewala ||

39. Radèn Patah matur aris | inggih nadyan makatêna | jêr tan nunggil
agamine | pangangkah kula ing mangkya | inggih sanusa Jawa | sampun
ngantos wowor sambu | sagêda nunggil agama ||

Perangan II (Taksih lajêngipun sêkar Asmaradana)

40. nihan kang ngarêmbag sami | ngêpung prajèng Majalêngka |
warnanên Jêng Sunan Ngampèl | ing mangkya anandhang gêrah | para
wali kumpulan | saos ngarsaning sang prabu | Jêng Suhunan
Ngampèldênta ||

41. gêrahe saya ngranuhi | ciptanira Jêng Suhunan | pan sampun praptèng jangjine | rinoyom ing putra wayah | mêdharakên pitungkas | praptaning kamulyanipun | panguburirèng astana ||

42. aywa binaturan inggil | pan sawatara kewala | aywa sinungan pêpayon | ingkang para putra wayah | ngèstokakên pitungkas | myang para wali sadarum | anaidi kaprasidan ||

43. ri sampunnya amêmêling | Jêng Suhunan Ngampèldhênta | mapan-mapankên têtatèn | nglêgèyèh tan dangu seda | tangis umyung gumêrah | putra wayah uyang-uyung | ngiyêng wuyung kawuyungan ||

44. samana samya sinapih | dening pra wali sadaya | kinèn mupus ing papasthèn | angèsthia paripurna | layoning wong atuwa | kang liningan parêng lipur | lèmpêr pêpêr ing sungkawa ||

45. enggaling carita nguni | layon nuli binarsihan |

--- 127 ---

anulya sinaosake | salèr masjid Ngampèldênta | ri sampuning mangkana | kumpulan pra wali agung | matah mêminta agama ||

46. Jêng Suhunan Ratu Giri | lawan Jêng Suhunan Benang | sedaning Jêng Sunan Ngampèl | têtêp dadya imam mulya | para wali sadaya | pêpancènè tan kaliru | sabawahe sowang -sowang ||

47. pan sampun winêngku sami | tan ana sangsayanira | Jêng Sunan Giri Kadhaton | pan arsa jumênêng nata | têtungguling agama | jêjuluk suhunan ratu | têtunggul khalifatu'llah ||

48. wus kasambadaning kapti | dènira jumênêng nata | sinuyunan [7] ing wadya kèh | adêging tunggul agama | samana kaparêngan | putraning Dipati Têrung | kang anèng Tandhês kinarya ||

49. papatihing Ratu Giri | nama Pangeran Palembang | ulama kêtib modine | kathah kinarya punggawa | Jêng Sunan Giri Gajah | jinurung sakarsanipun | madêg Nata Waliu'llah ||

50. jamanira Ngadiyati | nênggih panjanging pawarta | kapyarsa saking
ing Ngampèl | wau ta Jêng Sunan Benang | kabaranang ing driya | nuli
abidhalan gupuh | akanthi sabat sakawan ||

51. marang Tandhês sêdya panggih | lan pangran patih kang paman |
nênggih enggaling cariyos | wau Jêng Suhunan Benang | wus panggih lan
kang paman | pangran patih gupuh-gupuh | ngurmati praptaning putra ||

52. pan lajêng satata linggih | anèng sanggar pamêlêngan | sang prapta
sinung pambage | sarju kaharjaning sêdya | agati gita-gita | baya ana
karya prêlu | Sunan Benang rum aturnya ||

53. dhuh pangran paman pinatih | marmamba agêpah prapta | wontên
ingkang dados raos | inggih miyarsa pawarta | lamun ing Giri Gajah | ki
raka rekane ngaku | ambawa dadya sri nata ||

--- 128 ---

33. Sinom

1. lamun saèstu mangkana | kula pan sèwu ngamini | jangji mantêp rêhing
karsa | nanging kang ulun calangi | wontên darêdah wingking | pocapane
langkung saru | wus aran Waliu'llah | ulama bangsaning alim | têmah lali
kalingan ing solah salah ||

2. melik mbalela ing nata | dêstun têmên dèn arani | wiku wikuning
antigan | putih jaba ing jro kuning | yèn sisip-sisip têmbir | damêl
pamurunging laku | lèlakon kacugêtan | marang kang adarbe bumi |
dadya-dadya ngèmbèti daging awaras ||

3. paduka kaparèng têtah | têka botên mêmelingi | tingkah kang botên
prayoga | karsa tuwan kados pundi | ya ta pangran pinatih | duk miyarsa
turing sunu | lêngêg ing sanalika | dangu nganam-anam budi | duk kabuka
arum pangandikanira ||

4. he putraningsun ing Benang | aja sira andêdalih | ngira ingkang ora-ora
| maring raganingsun iki | ing sun kaliwat saking | garunêkan kudu-kudu |

pêpeling sarta sulang | nanging ingsun sambang liring | kakangira karyane
angêmu rasa ||

5. marma sun rarah kewala | ping pindhone wêktu iki | lagya dinuluran ing
Hyang | kakangira Ratu Giri | mangunahe andadi | sinuyudan wadya kaum
| kêtib modin ulama | andina-dina ndalidir | praptanira ya dahan kapasang
yogya ||

6. bêcik katêmu priyangga | mring kakangira ing Giri | apa sarasaning
driya | aja nganggo sanggarunggi | dadi padha patitis | tan nganggo
lidhah sinambung | mèsêm Jêng Sunan Benang | pan sarya umatur aris |
yèn makatên kawula anyuwun lilah ||

7. mangkat ing mangke punika | pangran pinatih njurungi | Jêng Sunan
Benang gya budhal | santri kacatur tan kari | sapraptanirèng

- -- 129 ---

Giri | sumêngka sêngkaning gunung | sarawuhing talaga | angin agêng
andhatêngi | tanpantara prahara karya ruhara ||

8. angrangsang-rangsang kasêrang | pancawora saya tarik | ya ta Jêng
Suhunan Benang | agêm kuluk mèh kagingsir | santri ingkang angiring |
muriring tansah kasurung | panêranging maruta | rêrangkalan sru
murinding | Jêng Suhunan Benang akèndêl sakala ||

9. pan angêningakên cipta | mamrih pambèngkasing angin | tan kèndêl
sangsaya ndadra | ardaning bajra mawrêdi | dadya osiking galih | maring
kang raka jumurung | nyata lamun narendra | sirêp ponang angin-angin |
têmah ngungun mangangên-angên kalintang ||

10. mring kasudibyaning raka | wasana laju lumaris | sapraptaning
Giripura | kadhaton njujug ing masjid | rêrêm ing sawatawis | kang raka
nulya inguwuh | saking masjid kewala | lawan ing sasmita lair | Jêng
Suhunan ing Giri sampun uninga ||

11. yèn kang rayi Ngampèldênta | kang anguwuh saking masjid | nanging
datan arsa mêdal | rumaos tan dèn kramèni | têka tan praptèng panti |
sarêng ndungkap wanci luhur | Jêng Sunan Giri Gajah | arsa salat maring
masjid | nanging nilib mêdal margi kang wadonan ||

12. salat luhur Jêng Suhunan | ing Giri Gajah sawusing | sabakdanira
asalat | Jêng Sunan Benang turnya ris | mring raka Sunan Giri | paran ing
kalamunipun | inggih masjid punika | punapa botên ginalih | dene
dhoyong keblating kang pangimanan ||

13. Jêng Sunan Giri ngandika | ing wau katub ing angin | akarya obahing
keblat | Sunan Benang matur malih | prayoginipun mangkin | jinêjêgkên
keblatipun | mèsêm Jêng Sunan Arga | kalamun mangkono yayi | sira
ndêdongaa ing Allah Ta'ala ||

--- 130 ---

14. supayane kasêmbadan | anuwun jêjêging masjid | ingkang rayi Sunan
Benang | tanggap datan lêngganèng ngling | amêsu cipta êning | pan
amatêk donga luhung | Jêng Sunan Giripura | pan jumurung angamini |
katarima sarèh mangunah karamat ||

15. pan amin kaping sapisan | obah sêsakaning masjid | pating jarêthot
swaranya | sarêng amin kaping kalih | amingêr ponang masjid | mangkana
kalih Sang Wiku | anggung diya-diniya | mung lawan ampeyan kalih |
sarêng bawa donga amin kaping tiga ||

16. masjid têtêp ingkang keblat | wus lêtês datan pradondi | sakalihan
langkung suka | wau ta Jêng Sunan Giri | kalawan ingkang rayi | Jêng
Sunan Benang agupuh | mudhar pandonganira | samya lênggah ing
surambi | ri sampuning antuk rêrêm sawatara ||

17. nênggih Jêng Suhunan Benang | matur mring Jêng Sunan Giri | dhuh ki
raka paran marma | paduka ngakên narpati | kang raka anauri |
nggoningsun angaku ratu | yêkti pakoning Allah | Sunan Benang matur
malih | yèn makatên nyuwun tandha kanyataan ||

18. sêksine madêg narendra | kawula arsa udani | nauri Jêng Sunan Arga |
iya yayi luwih bêcik | payo mangkat tumuli | marang ing Mêkah mring
dunung | nêrangkên saksinira | mring Allah Kang Maha Suci | ngêningakên
ênêng anèng ing Bètu'llah ||

19. kang rayi datan lênggana | sawusing samêkta sami | sakalihan nulya
mangkat | tan ana amawa dasih | lajêng anitih kèci | palwa kêras

lampahipun | praptèng sabrang Malaka | palwa kandhêging lumaris |
karsanira Jêng Suhunan Giripura ||

20. akampir wismaning eyang | tur gurunira sajati | ri Sang Sèkh Molana
Iskak | dyan tumurun saking kèci | njujug wismaning kaki | Pase
padhêkahanipun | pan sampun pinanggihan |

--- 131 ---

kalih suka rêna sami | nulya sinung panêmbrama karaharjan ||

21. rahayuning sakalihan | tinannya paraning kapti | apa baya ana karya |
kadhêmpalan praptèng ngriki | kang wayah matur aris | sajarwa ing
karsanipun | sêdya maring Bètu'llah | ngupados saksi prêmati | pinaido
dènira jumênêng nata ||

22. marang kang rayi ing Benang | mangkyarsa ngatas ing Widhi | paran
sidaning sahidan | Molana Iskak duk myarsi | sarèntèsing pawarti | dadya
suka gujêngipun | arum dènnya ngandika | têka kaya bocah cilik | padha
kadang dadi udur dèg-adêgan ||

23. tiwas andon tanpa pedah | kadêrêng kangsèn marsudi | prayogane
kalihira | wangsula mring tanah Jawi | tan susah amèt sêksi | mring
Bètu'llah angêlangut | iya ingsun kaduga | dadi sêksining Hyang Widhi |
dèn pracaya yèn sira tumbuh sanyata ||

34. Gambuh

1. aywa kaliru surup | mêngko ingsun jatèni satuhu | ing lèlakonira iku
angèmpêri | kadi anggane rumuhun | Jêng Nabi Yusup sang katong ||

2. duk gumantyèng kaprabun | iya dudu dadi warisipun | anyêlani karaton
ratu ing Mêsir | myang lir Nabi Musa dangu | duk gumantyèng Raja Fir'on
||

3. yêkti mung amrih ayu | iya bakal kang nampani besuk | aja katon
anggantyani ratu kapir | marma karo dèn aemut | aja pisan angalap dho ||

4. kang dudu wajibipun | pangêcame cupêt tan kacakut | cinakêpa ing
pangancam kang abêcik | pirabara têmbe besuk | bisa mbaboni kaprabon
||

5. lêstari sapandhuwur | yêkti tan ana sangsayanipun | Sunan Giri Sunan
Benang duk miyarsi |

--- 132 ---

ing sabdaning eyangipun | andhêku dahat ngalap sor ||

6. langkung dênnya mituhu | Jêng Suhunan Benang lon umatur | yèn
makatên dhawuh paduka sang yogi | kawula inggih nênuhun | idi
timbanging karaton ||

7. ingkang wayah pukulun | kakang Suhunan Giri Kadhatun | Sèkh Molana
Iskak jumurung ngidèni | pangandikanira arum | kulup sun milu rumojong
||

8. mungguh peranganipun | kakangira ing Giri puniku | angratoni
sakabèhe para mukmin | dene panjênênganipun | ngratoni agama kaot ||

9. iya utawa ngèlmu | Sunan Benang sakalangkung nuhun | wahyaning
kang pangèstu dahat kapundhi | mangkana sasampunipun | lêganing tyas
sakarongron ||

10. anulya amit wangsul | mring kang eyang jinurungan kayun | sigra
lèngsèr anumpal palwa lumaris | gancang lampahing parau | praptaning
Tandhês sakaron ||

11. sewang-sewangan laku | dènira wus samyantuk sabda yu | Sunan Giri
lajêng mantuk maring Giri | Sunan Benang laju kondur | mring
Ngampèldênta kang dhukoh ||

12. praptane Surèngkewuh | Jêng Suhunan lajêng nama ratu | ajêjuluk
Prabu Nyakrakusuma di | Ratu Wahdad parabipun | Panatagama kinaot ||

13. para ulama sagung | mangkya kataman sêngkêling kalbu | awit saking
ing praja desa pacêklik | larang kang sarwa tinuku | têmahan karya
rêrusoh ||

14. colong cêlêr calimut | saking kalirên tan kêlar tuku | samubarang
larang dènnya anglêlari | jalwèstri pating bilulung | katêndagan kang
binadhog ||

15. kang sabar kamilurus | lara kasangsaya têmahipun | tan antara
narendra ing Maospait |

--- 133 ---

animbali Patihipun | Gajahmada wus sumaos ||

16. anèng ing ngarsa Prabu | Brawijaya angandika arum | hèn ta paran
patih ing rêmbugirèki | mungguh ing pailan agung | akarya sangsayaning
wong ||

17. mandar dadya dahuru | akèh ingkang dursila ing laku | yèn awèta
mangkene ngrusakkên nagri | kya patih nêmbah umatur | dhuh pukulun
sang akatong ||

18. inggih prayoginipun | mêmundhuta tumbal kang pakantuk | amrih tata
têntrêming praja narpati | dhatêng ing Giri Kadhatun | kang sarwa
waspadèng wados ||

19. kabul pandonganipun | bokmanawi ambengkas dahuru | sri narendra
duk myarsa suka kang galih | saksana lajêng anuduh | mantri madharan
sang katong ||

20. Ki Bubak wistanipun | wusnya winêling alèngsèr gupuh | wêdalira
sarêng lan rêkyana patih | duta lêpas lampahipun | ing marga tan winiraos
||

21. praptaning Surèngkewuh | njujug Pêcattandha wismanipun |
apanêngran Kiyai Jenal Ngabidin | wus panggih satata lungguh | anèng
bale sakarongron ||

22. sinungsung ing bagya yu | Kyai Bubak amangsuli nuwun | dhuh wong mitra sayêkti sami basuki | Kyai Jenal malih muwus | he sanak kang nêmbè rawoh ||

23. kados amawa prêlu | tingalipun lampah situ-situ | Kyai Bubak alon dènira mangsuli | inggih sakalangkung prêlu | dinuta ing sang akatong ||

24. pan kinèn amêmundhut | têtumbal kêmandên mrih rahayu | awit mangke praja di ing Maospahit | sangêt apailan agung | lamun sambada ing mangko ||

25. atêrêna tumundhuk | maring Giri sowan sang awiku | Kyai Jenal agupuh dandan tumuli | lajêng budhalan lêlaku | praptane Gajah

--- 134 ---

Kadhaton ||

26. umarêk jêng sinuhun | lagya pinarêk para nakêdum | kêtib modin ulama suhada mupti | tarap andhèr anèng ngayun | praptane duta dumrojog ||

27. ing ngarsa jêng sinuhun | Kyai Bubak Ki Jenal umatur | lampahira dinuta ing sri bupati | dihin paring salamipun | ping kalih dinutèng Katong ||

28. mundhut têtumbalipun | saranane kapailan agung | ing sabawah nagari ing Majapait | amrih sirêping dahuru | sagêd karta karahayon ||

29. kèndêl ing aturipun | jêng suhunan duk miyarsa atur | dutèng nata dahat kabaranang runtik | sugal pangandikanipun | hèn duta lamun mangkono ||

30. ingsun ya gèlêm angsung | anumbali kang pailan agung | lamun ratunira aprapta pribadi | sarta pasrah prajanira [8] awit karsaning Hyang Manon ||

31. nagara Majalangu | sinèrèkke mring Giri Kadhatun | ping pindhone
Bubak lan Jenal Ngabidin | nora sun lilani ngaku | lungguh ing paringing
Katong ||

32. anggêpên paringingsun | krana bumi kabèh darbèkingsun | pan wus
atas saka karsane Hyang Widhi | lah kapriye panganggêpmu | apa manut
apa mogok ||

33. Ki Jenal amituhu | anut punapa sadhawuhipun | amung Kyai Bubak
kang lêngganèng kapti | duk samana lajêng mundur | tan tolih wuri
ambêrsot ||

35. Pangkur

1. datan kawarna ing marga | Kyai Bubak praptane Majapait | lajêng
marêk sang aprabu | matur rèh ing dinuta | maring Giri mundhut sarana
mrih ayu | têtumbaling pêpailan | wasana tan antuk kardi ||

--- 135 ---

2. wangsulaning Sunan Arga | wus ingaturakên sadaya sami | ya ta wau
sang aprabu | myarsa aturing duta | sanalika sakalangkung dukanipun |
asru dènira ngandika | hèn hèn si pidir wong santri ||

3. nora dhèngêr kabêcikan | satêkane nèng pulo Jawa iki | yêkti lumaku
angaub | anèng wêwêngkoningwang | sakarêpe pan nora sun arubiru |
mêngko têkarsa mbalela | datan amalang sêpati ||

4. wani ambadal parentah | ing têngêse sêdya wani ngakoni[9] | lawan
panjênêngan ingsun | iya lamun mangkana | Gajahmada iya timbalana
gupuh | Kyai Bubak nêmbah mêsat | tan antara sampun prapti ||

5. angiring rêkyana patih | praptanira ing byantara narpati | pinajaran sa-
rèhipun | purwa madya wasana | langkung ngungun patih ngatas karsa
prabu | wontên tiyang murang krama | angandika sri bupati ||

6. iya enggal lurugana | amijiya kang pantês mukul jurit | kyana patih
nêmbah matur | yèn panudyèng karsendra | Arya Leka kang mangka
têtindhihipun | wus widagdèng gèlaring prang | kados tan mindho gawèni
||

7. sri narendra langkung suka | iya bécik kinèn mangkat samangkin |
kanthènanana wadyaningsun | wong prawira salêksa | tur sandika patih
lèngsèr saking ngayun | sawijile saking pura | undhang ing wadya prajurit
||

8. Arya Leka kang pinatah | lajêng tata samêktaning ajurit | kèndhang
gong samya gumuruh | gubar bèri wurahan | abusêkan asikêp gêgaman
agung | pêdhang towok duduk larap | wus samya kuswa miranti ||

9. budhal gêgamaning yuda | tri gumuruh gora rèh nggêgêtêri | lampahira
situ-situ | tan winarna ing marga | praptèng Giri suhada lêbe myang kaum
| wus samya samêkteng[10] yuda | abaris sêngkaning wukir ||

--- 136 ---

10. sarêng asurak gumêrah | wong ing Giri lan wong ing Majapait | lajêng
acampuh prang pupuh | caruk aliru papan | dêr-idêran anèng sêsikuning
gunung | prajurit ing Majalêngka | ambêk paksa bandha wani ||

11. sumbare kadi gêrantang | wong ing Giri aja anêdya gingsir | jajalên
jêjênggulipun | gul-agule ing praja | wong ngumbara pêksa angêmbari
ratu | rêraton tan nganggo tata | wantune wêwatêk santri ||

12. tan dhèngêr ing kabêcikan | nganggo anggêp amirunggul wong bumi |
tan lana dènnya kêkuwu | nèng wawêngkoning arga | pangakune
pangawikan kaya wiku | wikana kaananira | mung nènungkul mikênani ||

13. sêmbahyange sabên dina | jungkar-jungkir tan jêjêr anjêjêrih | anjarah
pangarahipun | mitênah angarenah | yèn prajurit kang nyata tan
anènungkul | maju dhadha mundur dhadha | pêpukule ing ajurit ||

14. wong Giri duk amiyarsa | sêsumbare prawirèng Majapait |
tumaranggal garap gangsul | aja kakèhan ucap | tandhingana wantêre
wong santri gundhul | bêtundhêl agama mulya | kang wruh kamulyaning
pati ||

15. tangèh yèn anêdya ginggang | adu unggul gêgalaning nagari | pantès
wong gunung mbêkunung | nanging kaananira | yèn wong Islam angrusak
wong kapis kupur | tan antuk papa pataka | mandar manggih swarga suci
||

16. iki rupane wong sura | nora irib dèn robana ing tandhing | tumplakên
wong Majalangu | ingsun masa mirisa | wong ing praja duk myarsa rêngat
tyasipun | saya mangsah mawulinga | tan etang bêbaya pati ||

17. tinadhahan wong ing Arga | langkung rame dènira aprang kalih | gêlar
dumuk angun-angun | pêpati tan petungan | dangu-dangu wong Giri
karoban mungsuh | atêmahan karepotan | dhadhal lan kandhah kalindhih
||

--- 137 ---

18. kêkiwul tan antuk lawan | wadyèng praja ngrampit sumêngkèng wukir
| wong gunung pating bilulung | jalwèstri lêng-ulêngan | asasaran ana
ngungsi gunung samun | rêrangkalan tibèng jurang | saking dènnya giris
miris ||

19. êlêbing mêngsah nagara | tan antara nêdya ngrabasèng puri | para
garwa nangis umyung | pawongan mawuyungan | kathah-kathah
sêsambate mêlasayun[11] | karya ngrêsing kang miyarsa | mangkana
Suhunan Giri ||

20. eca dènira alênggah | duk samana nênggih lagya marêngi | anyêrat
Kur'an anjungkung | nglêrêsi surat Ikhlas | ponang kalam anulya binuwang
mamprung | cinipta dadya curiga | kalam lajêng dadya kêris ||

21. Ki Kalam-munyêng wastanya | dyan sinabdan kinèn anganut nuli |
ponang dhuwung ngamuk liwung | mangsah mêngsah kaangsah | kang
katrajang pasah pêjah raganipun | pêpati tanpa petungan | kamuk dening
kalam kêris ||

22. sakarine kang apêjah | dhadhal larut tan ana mangga pulih | Arya Leka
kapalayu | ngintar tan tolih rowang | ya ta sapraptaning praja Majalangu |
katur ing Sri Brawijaya | langkung ngungun tan kêna ngling ||

23. sinigêg datan winarna | kawuwusa wau Suhunan Giri | uninga
mungsuwus mundur | dhadhal larut sasaran | dhuwung Kalam-munyêng
wangsul ngarsanipun | kopah-kopah akuthah rah | duk mirsa Suhunan Giri
||

24. kang dhuwung nulya sinabda | kinèn wangsul asale kalam malih |
sanalika nulya wangsul | dadya kalam panurat | jêng suhunan langkung
tobat ing Hyang Agung | sari ratri asêmbahyang | lan sagung para ulami
||

25. dahat kasusra ing jagad | nênggih karamate Jêng Sunan Giri | sagung
ingkang para kaum | kêtib modin suhada | agamane ingugêr graning
jêjantung | madhêp kèdhêp tan kumêdhap |

--- 138 ---

andhadhapakên ing dhiri ||

26. anggêpe mring Gustinipun | sungku sungkêmira trus lair batin | rèh
ing sapakon tan mingkuh | ngukuhi pangawikan | pinangkane karakêt lan
sang awiku | ingurus êrosing rasa | rumasuk rasikaning sih ||

27. marma kasêngsêm datan sah | labuh labêt ing sapati saurip | tan was-
was wosing pakewuh | pan wus acipta tunggal | ênêngêna nihan ta malih
winuwus | sarênganing lêlampahan | rubeda kang narawungi ||

28. Prabu Anom ing Palembang | sutanira Pêcattandha Dipati | kang wus
kinarya rumuhun | Pêpatih Sunan Arga | praptèng Jawi ing Tandhês
ingkang jinujug | kanthi wadya sawatara | Sunan Giri wus miyarsi ||

29. yèn kang putra ing Palembang | praptèng Tandhês utusan animbali |
ingkang dinuta kapanggih | Ki Garigis sakabat | ndhawuhakên laju
umarêka gupuh | ngarsèng rama jêng suhunan | dahat dènnya nganti-anti
||

30. Prabu Anom ing Palembang | duk miyarsa ture Kyai Garigis |
pangandikanira arum | ya bangêt bungah ingwang | nanging mêngko
matura rama sinuhun | ingsun gêlêm tinimbangan | anuwun satata linggih ||

31. Ki Garigis nulya mentar | prapta ngarsanira Suhunan Giri | saaturira
wus katur | Prabu Anom ing Palembang | Sunan Giri duk myarsa
kalangkung bêndu | jaja bang mawinga-winga | pangraosira ing galih ||

32. dene karsane priyangga | Ki Garigis kinèn awangsul malih | jêng sunan
ngandikanipun | tutura wus kalêgan | pamintane anjaluk satata lungguh |
Ki Garigis nêmbah mêsat | tan adangu sampun prapti ||

33. ngarsaning Prabu Taruna | dyan umatur yèn panuwunirèki | kédah
asatata lungguh | èstu sampun kalilan | Prabu Anom Palembang budhalan
gupuh | lawan wadya sawatara | kering

--- 139 - --

mring Kyai Garigis ||

34. lajêng sumêngka ing arga | Ki Garigis kinèn angrumiyini | samana
nulya kapêthuk | dutanira suhunan | maringakên pisalin busana luhung |
dhumatêng putra kang prapta | Palembang Prabu Taruni ||

36. Sinom

1. Ki Garigis wangsul nulya | ngirid kang mbêkta pisalin | tundhuk lan
Prabu Taruna | angaturakên pisalin | saking rama Sang Yogi | labêt sih
trêsna ing sunu | pan sampun tinanggapan | munggèng talam salaka di |
linuruban ing usap-tangan sinulam ||

2. saksana nulya binuka | gandanira amrik wangi | warnanira kang busana
| kampuh paring ujung wilis | myang kuluk tunggul putih | rasukan ajobah
landhung | calana akêkêncan | lugas tanpa mawa têpi | Prabu Anom ing
Palembang langkung suka ||

3. sadaya rinasuk samya | asarwa sangkêp rêspati | alaju ing tindakira |
sapraptanira ing Giri | anjugug ing surambi | duk samana jêng sinuhun |
sampun kapanggih lênggah | ingayap para ulami | praptanira kang putra
dyan ingacaran ||

4. laju alênggah satata | kang putra sampun nuruti | sami mungging kursi
dhênta | jêng suhunan aningali | tyas kabaranan runtik | netyandik jaja
malatu | kang asta suraweyan | pangandikanira wêngis | anakingsun wong
bêning ladak kumêthak ||

5. wani nyanggrang anyêngkirang | ngêdhangkrang satata kursi | kêngsêr
kasêsêr tan arsa | yèn mangkono analisis | mêjanani mring mami |
nggoningsun anama ratu | marma nguni sun karya | pêpatih nulya
ngoncati | dadi maksih ana garunêking manah ||

6. payo aja katanggungan | lamun sirarsa ngayoni | padha tandhing
kaprawiran | mbabar kadibyan [ka...]

--- 140 ---

[...dibyan] kasêktin | aja asanggarunggi | ngarah apa tiru tanduk | anak
kalawan bapa | padha angèsthi ing Widhi | labêt saking sabab kalêbdan
ing loba ||

7. dukane sangsaya kathah | nênggih Jêng Suhunan Giri | wantune wali
minulya | prabawane mrêtandhani | orêg kang bumi gonjing | prapta kang
prahara lesus | gêtêr patêr putêran | kang umiyat giris miris | maras-
maras kang myarsa êru ruhara ||

8. ya ta Sang Prabu Taruna | kèndêl tan bisa mangsuli | gumêtêr sariranira
| ketang saking dahat ajrih | mawinga-winga wêngis | dukane rama
sinuhun | ponang riwe dlèwèran | kongsi kêbês anêlêsi | maratani kampuh
rasukan clana ||[12]

9. kêkês tan adarbe karkat | cahya biyas kadya mayit | tumungkul arawat
waspa | ture nuwun pangaksami | sakarsaning sudarmi | amung amundhi
mituhu | lêjar ing sanalika | dukane Sinuhun Giri | parêng sirêp orêge arga
prahara ||

10. arum dènira ngandika | kulup yèn wus pasangyogi | apa kang dadya
pratandha | saksana Prabu Taruni | lèngsèr saking ing kursi | sadhepok
lênggah tumungkul | kadi pasrah jiwangga | jêng sunan lumuntur ing sih |
dyan rinangkul ingaras ingkang lungayan ||

11. dhuh babo ta putraningwang | pun rama ing mêngko gênti | njaluk
sèwu pangaksama | wêngkunên ing lair batin | ndadak dadya raryyalit |
kawêngku ngubungi nêpsu | matur Prabu Taruna | sampun lèrêsipun wajib
| rare beka kapêkak saking dêduka ||

12. wontên ingkang kinèringan | tur dadya sarana yêkti | tédah dèdalan
widada | widagda sandining wèsthi | duk myarsa Sunan Giri | turing putra
sakalangkung | rêsêp rumasuk ing tyas | ngandika sarwi têtaring | yèn
mangkono pra ulama sahidana ||

--- 141 ---

13. si kulup Prabu Taruna | samêngko sun ambil siwi | ing donya rawuh
akhirat | pan dadya putra pangarsi | aywa sah ing salami | lan kadang
wargane besuk | tulusa saduluran | pan iya ing sun parabi | Prabu Anom
Acipta Suradiraja ||

14. kêtib modin pra ulama | samya jumurung ngamini | wahyane karya
mangkana | wau ta Prabu Taruni | umangsah manganjali | padaning rama
sinuhun | tan pègat ingarasan | wusing antara nulya mit | palarasan
angrêrêmakên sarira ||

15. linilan mring jêng suhunan | pakuwon dèn sêsênêngi | aywa rungak
arêringa | pangaring- aringing galih | yêkti ing Giri iki | tan beda lawan ing
Têrung | prajane sudarmanta | Prabu Anom lèngsèr aglis | wus makuwon
lèngsèr masjid saha bala ||

16. laming dina samana | sangsaya rumakêt ing sih | nênggih Sang
Prabu Taruna | matur ing Jêng Sunan Giri | dhuh pukulun Sang Yogi | yèn
wontên karsa pukulun | praja kang maksih kopar | jajahan nagari Jawi |
ulun suka kinarya pêpukul yuda ||

17. Jêng Sunan Giri tan arsa | dèrèng usume samangkin | lan dede
bubuhanira | amisesèng ratu kapis | yêkti ing Dêmak benjing | wênang
karya abang biru | murisèng tanah Jawa | awit wajib darbe waris | ing sun
iki mèlu mbakali kewala ||

18. nanging tan wênang bêbuka | ambaku bukaning kardi | kadar wong
makum nêkêka | bangkita mung angakoni | tan bangkit angêngkoki |
makikine mêngku kukum | ngrangkul dudu khakira | antuk dêduka ing
akhir | mung rumêngkuh mèt barukuting sarengat ||

19. kadi lèlakon ing kuna | kang kinonang rada mukti | panjênêngan Nabi Musa | lan Nabi Yusuf ing Mêsir | ngganyani ratu kapi | kapracaya amrih ayu | karahayoning jagad |

--- 142 ---

dening Hyang Kang Maha Suci | mrih sumungkêm agême agama mulya ||

20. ing wuri tan ana bakal | tumular gilir gumanti | sumulam sumuyun Islam | tan kasêlan ing salami | saline alam salim | kalulun dulur-dumulur | kapi kupur kapapas | iku pedahing pawarti | tan rubeda widada salaminira ||

21. Prabu Anom ing Palembang | miyarsa sunduking [13] kapti | sabdaning Suhunan Arga | dahat kagêlan ing galih | dadya aminta amit | mantuk maring prajanipun | nênggih tanah Palembang | Sunan Giri anglilani | sanalika lèngsèr budhal saha bala ||

22. kinanthenan pêcattandha | têtuwane Surèngwèsthi | ing marga datan winarna | praptèng Palembang nagari | ri Sang Prabu Taruni | makuwon sawadyanipun | dene ta Pêcattandha | pan datan linilan mulih | nèng Palembang nênggih ginanjar nagara ||

23. anèng tanah Dhahonpura | lan ing Balitung nagari | dahat dènyya suka rêna | katrêm kapiluta ing sih | kang rama wus miyarsi | Sang Adipati ing Têrung | kondure ingkang putra | kalangkung suka ing galih | wus sambawa wadyabala ing Palembang ||

24. ênêngna mangkya winarni | karajan ing Giri malih | samana Kyai Panangsang | dinuta jêng Sunan Giri | ambêdhah prajèng Pathi | dene kawarti misuwur | nênggih malih agama | ngugêmi kabudan malih | laju kinèn atata tatane pisan ||

25. Kyai Panangsang gya budhal | anggawa prajurit mukmin | myang ulama kèhe sa-mas | ing marga datan winarni | prapta jajahan Pathi | wus pinêthuk baris agung | nggènggèng sayagèng laga | wong Giri anêrak wani | tinadhahan rame prang samya prawira ||

26. tandange lir saradula | adu sura ambêk pati | mangsah suk ungsir-
ungsiran | tan ketang ambêbêntusi |

--- 143 ---

wong Giri wong ing Pathi | parêng ambyuk ambarubuh | pêpati tan
petungan | mêngsah rowang kèh kalindhih | têmah dadya bêngawan rah
sarah bathang ||

27. sarêng surak mawurahan | katawur sambating kanin | suka katrapan
sungkawa | karapu rarasing gêndhing | têngaraning ajurit | kêndhang
gong bèri ambarung | sangsaya sru kang aprang | ngantêp pêpukuling
jurit | dangu-dangu wadyèng Giri karepotan ||

28. labête karoban lawan | mèt tindhih malah kalindhih | dadi kèngsêr
asasaran | ngungsi marang senapati | Ki Panangsang ningali | kasêsêring
wadyanipun | ambêk sura marata | ngêngimpu wadya kang kering | nêdya
mangsah soroh pati ngungsir mêngsah ||

29. warnanên Jêng Sunan Arga | tan kasamaran ing kapti | yèn dutanya Ki
Panangsang | karepotan ing ajurit | wadyabala kalindhih | labêt karoban
ing mungsuh | nanging Kyai Panangsang | pêpulih amundur isin | jêng
suhunan prapta anèng palurugan ||

30. pan datan akanthi wadya | sarawuhira ing Pathi | pinêthuk Kyai
Panangsang | prapatane pakuwonèki | [14] jêng sunan andhawuhi | Ki
Panangsang kinèn mundur | dèrèng usume mangkya | yèn linabuhana pati
| bêbasane sulung kalêbu tumangan ||

31. kêkiwul tan antuk lawan | bubuhanira ing benjing | Sang Adipati
Bintara | kang wênang misesèng jurit | karana iku wajib | Ki Panangsang
nêmbah matur | apan sêdya anglawan | pêjah gêsang dèn andhêmi | suka
lila dadosa bêbantêning prang ||

32. kêdah mêksa ngangsa mêngsah | jêng suhunan duk miyarsi |
angandika èsmu duka | hèn Panangsang sun punagi | yèn bisa mbêdhah
Pathi | ingong paras jenggot ingsun | Ki Panangsang gya mangsah | sisane
wadya umiring | praptèng rana campuh lawan wong Santênan ||

--- 144 ---

33. gumuruh tangkêping yuda | wadya Pathi ambyuk wani | wau ta Kyai Panangsang | pangamuke ambêk pati | lir banthêng tawan kanin | kang tinêrak mawut-mawut | pêpati tan petungan | kang prapta saya ngêrobi | datan petung anumbuk bêtus ing aprang ||

34. anangkêpi mungsuhira | matambah-tambah mimbui | caruk corok arukêtan | wong Giri barise miris | Ki Panangsang dèn byuki | katêmahan kapêlayu | kapêthuk Jêng Suhunan | ing Giri konjêm ing siti | matur tobat tan kuwasa nguwatana ||

35. jêng sunan mesêm[15] ngandika | lah payo lolos rumiyin | nêntremkên anata bala | sêdhêng amarêngi jangji | soring wong Pathi iki | Kyai Panangsang jumurung | lajêng ngimpuni wadya | jêng sunan kondur mring ardi | praptêng Giri maniti anata wadya ||

36. kang samya pêjah ing aprang | warise kinèn gumanti | anapak tilasing bapa | wus raharja kadya nguni | sarêng ing lami-lami | Kyai Panangsang ingutus | anglurugi ing Tuban | dene kawêntar ing warti | Dipatine Tuban mangkya pawong mitra ||

37. lawan dipati ing Daha | Ki Panangsang budhal aglis | kêbut wong sa-Giripura | sapraptanira ing Tuban | lajêng ngêpung nagari | nênggih wong Tuban sadarum | kêkês tan ana lawan | rumasa karoban tandhing | Dipatine ing Tuban angguladrawa ||

37. Dhandhanggula

1. nulya utusan marang ing Giri | pan anungkul ngaturakên tobat | amasrahakên prajane | sarta sawadyanipun | myang darbèke baita sami | Jêng Sunan Giripura | asuka kalangkung | tinarimèng parimarma | dyan utusan wadya kinèn animbali | Ki Panangsang sawadya ||

2. winartan yèn Dipati ing Tuban | wus bêbana

--- 145 ---

ngaturakên tobat | Ki Panangsang undhang age | sawadya kang winêngku | budhal mantuk marang ing Giri | nênggih sapraptanira | njujug jêng

sinuhun | katanggapan boja-krama | suka rêna rumasuk ing lair batin |
sumungku sungkêmira ||

3. Ki Panangsang pan jinunjung nami | sinungan nama Arya Panangsang |
datan lami antarane | Jêng Sunan Giri wau | gêrah sangêt prapta ing jangji
| para wali anglayat | layone sinuhun | samana wus binarsihan | nênggih
lajêng ingastana anèng Giri | karsane Sunan Benang ||

4. lawan Jêng Sunan ing Gunungjati | mangkya kang pinatah dadya imam |
ing Giri satêlatahe | putranira kang sêpuh | pangran dalêm ingkang
gumanti | anunggak sêmi nama | ing Giri Sinuhun | pasêbutanirèng kathah
| Jêng Suhunan Giri ingkang kaping kalih | sawusing sinahidan ||

5. jumênêngira Jêng Sunan Giri | alastari ngiyumi ulama | kêtib modin
sabangsane | para wiku sadarum | kondur maring dalême sami | tan ana
sangsayanya | ing mangkya winuwus | nagari ing Majalêngka | Prabu
Brawijaya sampun angsal warti | yèn Sunan Giri seda ||

6. sutanira pan sampun gumanti | tan lilane Prabu Brawijaya | têtêp
mampang kêramane | dene tan saos atur | pamêngkune ing tanah Giri |
karsa pinukul ing prang | samana anuduh | putra kang mangka manggala
| anindhihi wadya kang nggêmpur ing Giri | Arya Gajahpramada ||

7. lajêng bidhal saking Majapait | kinanthènan prajurit rong lêksa |
samêkta sagêgamane | gumuruh lampahipun | mabarungan kêndhang
gong bèri | surak samarga-marga | mangkana winuwus | mèh prapta ing
Giripura | wong ing Giri miyarsa siyagèng jurit | amêthukakên mêngsah ||

8. caruk rukêt samya silih ungkih | ukêl okol

--- 146 ---

akakah-kakahan | kang ayuda langkung rame | bêrêg buru-binuru | dangu-
dangu wadya ing Giri | kasêsêr karepotan | miris kapalayu | karoban ing
mungsuhiira | samya ngungsi ngarsane Suhunan Giri | rinampit wadyèng
praja ||

9. langkung duka Jêng Suhunan Giri | lajêng nggirèkakên wadyabala |
mêthukkên mêngsah unggahé | saajang-ajangipun | pra ulama datan

kadugi | linawana ing yuda | tiwas tanpa unggul | margi karoban ing lawan
| wong ing Majapait upama jaladri | wong Giri pama wangan ||

10. Sunan Giri madêg surèng galih | mangsah lawan Ki Arya Panangsang |
akanthi wadya salawe | sabate ramanipun | pêpilihan trahing winani |
campuh lan wong ing praja | ambêk sura nêmpuh | dadya rame kang
ayuda | kang katrajang wadyabala Majapait | bubar mawut sasaran ||[16]

11. samya ngungsi marang senapati | wau Ki Arya Gajahpramada | miwah
prawira kanthine | miyat kang baris agung | samya bibar agiris miris |
amiyarsa pawarta | yèn kang mangsah kiwul | Suhunan ing Giripura |
kanthi Arya Panangsang prajurit sêkti | myang wadya pêpilihan ||

12. ngamuk rampak ngrampak golong pipit | têtah akarya rusaking
wadya | undhang sakalèrèhane | kinèn tumandhing pupuh | sarêng
mangsah lan wadyèng Giri | campuh prang liru papan | rok rukêt acaruk |
tumundhung ngêrobi lawan | wong ing Giri mêksa kasor gundhili ||[17]
Suhunan Giripura ||

13. kèngsêr tan anêdya mangga pulih | lolos ngungsi gisiking samodra |
lawan sakulawargane | wontên sabat kaplayu | Kyai Wanapala kêkasih |
mangilèn pangungsinya | lajêng adhêdhukuh | nèng wana Krêndhawahana
| kawarnaa prawira ing Majapait | wus atas ing pawarta ||

--- 147 ---

14. yèn ing Giri têtêp sampun sêpi | lajêng ngrusak sakathahing wisma |
samya ingobongan kabèh | myat ing astananipun | Sunan Giri wong
Majapait | langkung panasing manah | sumêdya linêbur | dyan samya
minggah ngastana | arsa ndhudhuk jarate Jêng Sunan Giri | sadhatênge
ngastana ||

15. wong ing Majapait aningali | wong kêkalih samya calaina | sawiji
pincang sikile | dingkol satunggilipun | samya têngga astana Giri | ing
mulabukanira | anênggani kubur | duk bêdhahing Giripura | tan abisa
ngungsi awor rewangnèki | labêt anandhang cacad ||

16. dadya sami nêmpuh byat angungsi | anèng jroning astana kewala |
jêjarah marang gustine | ya ta wong Majalangu | takèn marang janma
kêkalih | kang nandhang cacat hina | prênah kuburipun | Suhunan ing

Giripura | wong kêkalih nêdyan[18] tan sajarwa ajrih | kalamun pinêjahan ||

17. satêmahan tinuduhkên nuli | astanane Sunan Giripura | suka sapamiyarsane | sanalika ing ngriku | gêdêr mangsah wong Majapait | dupi arsa tumandang | ndhudhuk jaratipun | ngangkat pacul linggis samya | kênèng alat sumaput pêt kang pangaksi | aniba gulasahan ||

18. sarta sami angutahkên gêtih | lajêng ginanti ing rowangira | tan pae kalawan kabèh | kang akèh jrih andulu | katur marang Sang Senapati | Arya Gajahpramada | langkung dukanipun | sanalika lajêng têdhak | lajêng ngatag wong calahina kêkalih | yèn mopo pinêjahan ||

19. wong kêkalih sakalangkung ajrih | dyan tumandang andhudhuk astana | tan antuk walat kalihe | ya ta pandhudhukipun | sasampuning têlas kang siti | nggêpok tutup balabag | kinèn mbuka gupuh | mêngane ponang balabag | swara umyung bumi gêtêr gonjang-ganjing | wong mundur minggah ||[19]

--- 148 ---

38. Durma

1. tan antara mijil tawon wêndran yutan | ndalêdêg wanti-wanti | saking ing astana | lajêng angamuk mêngsah | ngêntupi wong Majapait | gègèr puyêngan | kang miyat giris miris ||

2. ponang tawon mijile sangsaya kathah | ngungsir wong Majapait | pabarisan bubar | mawut samya sarsaran | tan kêna dèn pirantèni | kagila-gila | pangamuke mbêk wani ||

3. kang cinandhak aniba saênggonira | rinobon dèn êntupi | anjrit asêsambat | anggêrêng lir raksasa | awak abuh netra bintil | amanang-manang | abang dhapur mêmêdi ||

4. anêmahi pêjah saking kasakitan | tan bisa lawan tandhing | kang tan manggih pêjah | lumayu bêrankangan | tan etang bêbaya wèsthi | nênunjang palang | dènira ngungsi urip ||

5. lajêng samya umanjing sajroning praja | wadya ing Majapait | tawon
nglud saparan | katingal saya ngrêda | liwêran ngêbêki langit | swara
wurahan | yayah anggêmpur bumi ||

6. pêtêng ndhêdhêt lir mêngdhung ngêndanu andhap | gêtêr patêr nggêtêri
| otêr aputêran | jalwèstri apuyêngan | saparan akontrang-kantring |
wayang wuyungan | tumbuh-tumbuh dèn ungsi ||

7. asasaran lumayu saparan-paran | gêdêr sajroning puri | tangising
wanudya | karya ngrês kang miyarsa | sagung para rajasiwi | aparêng
tandang | sinêngguh mêngsah prapti ||

8. praptêng jawi miyat tawon wêndran yutan | wangsul lumayu
nggêndring | tan atolirowang | Sang Prabu Brawijaya | sagarwa putra
miranti | gugup busêkan | dyan jêngkar saking puri ||

9. lolos ngetan anjog tanah Wirasaba | têtah ing Majapait | suwung
prajanira | tawon ingkang ambêdhah | sarêng praja sampun gusis | tan
ana janma | kang tawon sirna sami ||

10. kawarnaa wau wong kang nandhang cacad | calahina [ca...]

--- 149 ---

[...lahina] kêkalih | kang têngga astana | kubure Sunan Arga | undure
wong Majapait | calahinanya | waluya kadi nguni ||

11. psarean dyan tinata ingurugan |[20] pinaripurna pulih | kacarita nulya
| rêmbag nusul gustinya | nênggih Jêng Suhunan Giri | ngalèr parannya |
praptêng têtèping tasik ||

12. wus apanggih lawan Sunan Giripura | matur yèn sampun gusis | baris
Majalêngka | kenging alating rama | kang sampun sumare Giri |
bêbukanira | praptêng wasana titi ||

13. wus rinèntès katur sapawartanira | Sunan Giri duk myarsi | suka
anarima | sanalika gya budhal | nêdya kondur maring Giri | sagarwa putra
| myang para wadya sami ||

14. praptèng Giri jèng sunan langkung sungkawa | myat padalêmanèki |
risak ingobongan | katuju myarsa warta | yèn nagari Majapait | mangkya
suwungan | karsa rumusak[21] gènti ||

15. gya utusan wadya maring Majalêngka | samya kinèn ngusungi |
saguning paseban | myang wisma kang prayoga | tuwin bangsal alit-alit |
wus kalaksanan | ingusungan mring Giri ||

16. pan rinakit padalêmanira samya | miwah ing gèning dasih | wus
pinaripurna | wismane sowang-sowang | raharja kadya ing nguni | para
ulama | têtêp ngulah agami ||

17. kawarnaa Sang Aprabu Brawijaya | sampun miyarsa warti | yèn tawon
wus sirna | kondur sagarwa putra | lajêng lumêbèng jro puri | kang
wadyabala | samya prapta anggili ||

18. angulihi banjar pakaranganira | wismane sirna sami | lajêng tata-tata |
ênggène sowang-sowang | dene bangsal alit-alit | miwah paseban | pan
wus winangun malih ||

19. tata tèntrêm nagari ing Majalêngka | nihan warnanên mangkin | pra
wali kumpulan | sagung

--- 150 ---

para dipatya | bupati satriya mantri | kang wus samyeslam | Prabu
Jaranpanolih ||

20. kang wus manut anunggil agama Islam | Prabu Jaranpanolih | ing
Sumênêp praja | lawan Natèng Madura | Sri Lèmbupêtêng wêwangi |
myang kadangira | Dewa Kêlut ing Bali ||

21. tuwin Sri Bathara Katong Pranaraga | pan apêpakan sami | nèng
prajèng Bintara | êngênthêlakên rêmbag | angrabasèng Majapait | pinukul
ing prang | sampun usume mangkin ||

22. apêpucuk purun karya karusakan | maring astanèng Giri | sêdhêng
pinaranggal | wus matêng rêmbagira | pinatah-patah ing kardi | Jêng
Sunan Benang | senapatining jurit ||

23. Adipati Bintara mangka narendra | angadoni ing jurit | ngrurah prajèng
kopar | ana dadya sandeya | nênggih ing Têrung Dipati | sawêg karoban |
suka katrêsnaning sih ||

24. maring panjênêngan Prabu Brawijaya | sandeyanirèng galih | bok
mêngsah kawratan | kalêban kawibawan | arêmbag amrih prayogi | Jêng
Sunan Benang | dhawuh Sang Adipati ||

25. ing Bintara kinèn akintun pustaka | maring Sang Adipati | ing Têrung
samangkya | têmbung suka uninga | lamun arsa angayati | ngrabasèng
kitha | karajan Majapait ||

26. ngèstokakên Sang Adipati Bintara | sampun akarya tulis | mantri kalih
mangkat | ênêngna kang lumampah | nênggih ing Bintara mangkin |
samyâ rêmbagan | sagunging para wali ||

27. karya masjid abahan sadaya mêpak | ingkang badhe kinardi | abubuh-
bubuhan | para wali sadaya | pan wus samya amiranti | saka balungnya |
amung Jêng Sunan Kali ||

28. bubuhane saka ingkang durung ana | tansah dènnya ngadhêpi | wong
amadung wrêksa | dinangu Sunan Benang | kaya paran jêbèng êndi |
bubuhanira | saka guru sawiji ||

29. dene mêngko datan ana katingalan | kabèh wus amiranti | mung
ngêntèni sira | jêbèng aja

--- 151 ---

sêmbrana | dèn adêgkên benjing enjing | alon turira | wau Jêng Sunan Kali
||

30. panêmbahan gampil kiranganing saka | mangke amba ngupadi |
nabda Sunan Benang | sukur lamun wus ana | lajêng kesahan lumaris | ya
ta kawarna | Jêng Sinuhun ing Kali ||

31. ngumpulakên tatale wong madung wrêksa | angadhêpi undhagi |
pêthèlan pasahan | tatale kang tinata | tinumpuk-tumpuk wus inggil | nuli
sinabdan | mulih asale siji ||

32. sanalika tatal dadya witing wrêksa | wutuh galondhong siji | gya malih
sinabdan | hèn kayu bangsanira | pan dadya sasaka masjid | bêcike
mangkya | dadia saka nuli ||

33. tan antara kang galondhong dadya saka | warnanira rêspati | sarêng
enjingira | andhèr samya pêpêkan | saguning kang para wali | Sinuhun
Benang | pangandikanya aris ||

34. lah ta payo lêkasana nambut karya | sagung para undhagi | gumrah
awurahan | sabdaning wali mulya | tan ana rêkasa sami | akuwat langkas |
kang samya ngupakarti ||

35. saka tatal pinarnah anèng lèr wetan | pangimamaning masjid | lan
liyane saka | saking pra auliya | sadaya sampun rinakit | sadandannanya
| tan ana kang kawuri ||

1. Teks asli: Pucung. (kembali)
2. Toyarêkta. (kembali)
3. Bait ini sampai dengan pupuh 32 bait 39 sama dengan Seh Siitijenar
Pupuh I bait 13 sampai dengan Pupuh IV, tetapi Seh Sitijenar belum
habis. (kembali)
4. angumpulakên. (kembali)
5. artine. (kembali)
6. sangsaya. (kembali)
7. sinuyudan. (kembali)
8. Guru lagu seharusnya: 8u, sarta pasrah prajanipun. (kembali)
9. ngayoni. (kembali)
10. samêktèng. (kembali)
11. mêlas ayun. (kembali)
12. Kurang satu suku kata: maratani kampuh rasukan calana.
(kembali)
13. cundhuking. (kembali)
14. Lebih satu suku kata: praptane pakuwonnèki. (kembali)
15. mèsêm. (kembali)
16. sarsaran (dan di tempat lain). (kembali)
17. Kurang satu suku kata: wong ing Giri mêksa kasoran gundhili.
(kembali)

18. nêdya. (kembali)
19. Kurang dua suku kata: wong loro mundur minggah. (kembali)
20. Kurang satu suku kata: pasarean dyan tinata ingurugan.
(kembali)
21. rinusak. (kembali)

39. Pangkur

1. sampun dadya masjid Dêmak | tundha tiga langkung dênnya rêspati |
têngah pangimaman agung | kanan kering ginatra | datan ana kuciwa ing
pasang wangun | ri sampunira mangkana | sagunging kang para wali ||

2. pradondi lêtêsing keblat | mastakane masjid ka'batu'llahi | satêngah
kirang mangidul | anggung diya-diniya | kang sawênèh kirang ngalèr
lêtêsipun | oyog-ingoyog tan pêgat | pan sami asta sawiji ||

3. obahing masjid upama | lir dèn ingêr wong pitung atus nênggih |
mingêr ngalèr mingêr

--- 152 ---

ngidul | sami jinawil asta | pan Sinuhun Benang kewran keblatipun |
ngandika kinèn ngèndêlna | luhung iya mangke bêngi ||

4. samya nêndhèng Pangeran | ing bêtêre keblat lan ka'bah iki | ya ta
kawarna ing dalu | wali wolu prasamya | anêndha sarwi mawas
keblatipun | ka'bah lan Mèkah katingal | saking ing Dêmak nagari ||

5. kang para wali anyawang | ing lêtêse keblat Mèkah pradondi | Sunan
Kali nêmbah matur | maring Jêng Sunan Benang | yèn makatên tanpa
wêkasan puniku | madêg Sunan Kalijaga | ing guru sarya tur bêkti ||

6. marêp mangidul margagah | asta kiwa nyandhak sirahing masjid | asta
ingkang têngênipun | anyandhak sirah ka'bah | tan antara masjid lan
ka'bah wus gathuk | Sèkh Malaya aris mojar | lah sadaya kadipundi ||

7. punika masa ewaha | saking ingêr kanan miwah ing kering | pan
pitulunging Hyang Agung | sigra samya amawas | wus mupakat

ka'batu'llah nulya wangsul | wanci pajar sidik samya | asalat kang para wali ||

8. Sunan Benang dadya imam | Sunan Kali kang adan angamati | sawusira bakda subuh | kumênjar kang raditya | pamidhangan kang kilèn ana gumandhul | samya ningali sadaya | saguning kang para wali ||

9. Suhunan Benang ngandika | iku apa gumandhul sun tingali | ulêse walulang wêdhus | ing jro ana isinya | kinèn nguthik bêbuntêlan sampun runtuh | ing ngarsane Sunan Benang | cinandhak dipun ungkabi ||

10. ing jêro isi rasukan | dhapur takwa ana isine tulis | lorodan agêm jêng rasul | dene kang ginadhuhan | Sèkh Malaya Suhunan Kalijagèku | Sinuhun Benang ngandika | lah nêdha ki jêbèng Kali ||

11. sira ingkang dhinawuhan | Sunan Kali sujud sarwi ngadhêpi | sigra andonga tafakur | ngungun [ngu...]

--- 153 ---

[...ngun] wali sadaya | Sunan Benang alon pangandikanipun | punika Antakusuma | lêlangsarane jêng nabi ||

12. ulêse iku pan iya | walulange wêdhus kongsi barindhil | puniku salaminipun | kinarya pasalatan | kangjêng nabi lah iya karyanên iku | kulambi kang dhapur takwa | dene kang anganggo benjing ||

13. kang mbêkêli tanah Jawa | sapa ingkang dadi ratu ndarbèni | Ki Gondhil arane iku | Sunan Kali tur sêmbah | wus mangkana lamine datan winuwus | Suhunan Ngudung tinêdah | nglurug marang Majapait ||

14. minangka pêpucuk yuda | dene wuri wus sinadhiyan baris | bêbantu ngadoni pupuh | sêdhêng kaiting rêmbag | ingkang samya Islam kabubuhan brubuh | kumpule nêng Surabaya | lawan wontên kang wêwêling ||

15. nênggih jêng Suhunan Benang | maring Sunan Ngudung lamun ajurit | lawan si Dipati Têrung | rowangên sawatara | Sunan Ngudung anyambut rasukanipun | mring Sinuhun Kalijaga | Kyai Antakusumèki ||

16. wus bidhal saking Bintara | saha wadya gumrah samargi-margi |
warnanên ing Majalangu | nênggih sampun miyarsa | yèn ginitik prang
lawan Suhunan Ngudung | Sang Aprabu Brawijaya | saksana undang ing
dasih ||

17. kinèn mapagkên ing yuda | Gajahmada undang-undang tumuli | wus
prapta wadya gumuruh | samya amukul kêndhang | andalêdêg golongan
sajuru-juru | sagung kang para punggawa | dene kang para dipati ||

18. pan samya katiban layang | kawarnaa duta ing Dêmak nguni | pan
sampun prapta ing Têrung | surat katur dipatya | gya binuka kadhadha
saungêlipun | kalangkung jibêging manah | dene karya suduk gunting ||

19. ing Dêmak sayêkti kadang | Majapait pêpundhèn dhasar gusti |
nanging sarêng dangu-dangu |

--- 154 ---

kapanggih galihira | nadyan gusti yèn kupur agamanipun | wênang lamun
cinidranan | sanalika karya tulis ||

20. sul-angsul marang ing Dêmak | duta mêsat praptèng Dêmak nagari |
ponang sêrat sampun katur | ing Dipati Bintara | dyan winaos sarahsaning
angsul-angsul | sang dipati langkung suka | ya ta wau ponang tulis ||

21. dyan katur Suhunan Benang | têmbungira mangayubagyèng puji |
dènira arsa anggêmpur | karaton Majalêngka | nanging amba ing têtêbe
amapag pupuh | pan sampun katon mbalela | dènira rumêksèng Gusti ||

22. benjang praptanirèng masa | campuh yuda sagah mêngani kori |
tamat ing pamaosipun | Jêng Sinuhun ing Benang | sakalangkung suka
sukur ing Hyang Agung | dene wus tanpa sumêlang | kang dadya raosing
galih ||

23. sanalika aparentah | samya kinèn siyaga ing ajurit | têngaraning prang
tinabuh | sagunging wadyabala | wus sanega sadandananing prang pupuh
| budhal saking ing Bintara | gumuruh samargi-margi ||

24. kadya têdhuh ing akasa | laju anjog tanah ing Surèngwèsthi | samya
ngrêrêmakên laku | angaso masanggrahan | ênêngêna warnanên malih
ing Têrung | pan sampun tampi parentah | saking rajèng Majapait ||

25. lajêng bidhal saha wadya | praptèng praja pinatah mandhegani |
dadya senapati sêpuh | timbang lawan sutendra | Prabu Anom Atmawijaya
jêjuluk | mangke manggalaning yuda | têtunggul angirid baris ||

26. mênggah Dêmak sarêng prapta | Sunan Ngudung pramukanirèng
dasih | kèndhang gong bèri abarung | gubar bëndhe wurahan | Adipati
Têrung lawan sutèng prabu | Sang Arya Atmawijaya | amapag mêngsah
kang prapti ||

27. cinarita tèmpuhing prang | wadyèng Dêmak lan bala Majapait |
Senapati Sunan Ngudung |

--- 155 ---

ngawaki ing ngayuda | tèmpuh lawan Sang Adipati ing Têrung | rèhning
kalih sênapatya | mangka wêwêngkoning jurit ||

28. katêmpah amisesèng prang | gêlarira samya amamèt tindhih | samya
dumuk angun-angun | wuru riwut lan rowang | corak-caruk ambêrêg buru-
binuru | samya suka ing ngalaga | wong Dêmak karoban tandhing ||

29. lan prawirèng Majalêngka | kuthèthèran samya ngungsi ing wuri | wau
Jêng Suhunan Ngudung | tan nêdya ngundurana | ngangsa nêngah ngiwa
nêngên ngangsi mungsuh | tandange lir singa lodra | tan etang awuru
gêti ||

30. prawira ing Majalêngka | kang katrajang mawur sasaran ngungsi |
maring senapatnipun | ing Têrung Pêcattandha | sarêng miyat wadya
gung wêwêngkonipun | kasêsêr kasoran ing prang | sang dipati angawaki
||

31. saha nggêrêgakên wadya | sarêng mêngsah kinèn ngêrobi tandhing |
wong Dêmak kang wus kêplayu | myat senapatinira | ngungsir mêngsah

dadya wangsul akêkiwul | têmpuh prang udrêg-udrêgan | bangun
kawanèning jurit ||

32. abubrah tataning gêlar | mêngsah rowang kèh samya angêmasi | Jêng
Sunan Ngudung kasambut | tatu lamunge[1] kiwa | kang marjaya sira
Sang Dipati Têrung | labêt kasêsiwo ing prang | wor sru campuh liru
tandhing ||

33. wadya Dêmak srêng miyat | [2] Sunan Ngudung kaparwasa ing jurit |
lolos sasaran lumayu | tan ana tolih rowang | Kyai Antakusuma mantuk
rumuhun | prapta nagari ing Dêmak | apan sarwi kuthah gêtih ||

34. Jêng Suhunan Kalijaga | duk tumingal lajêng asung pawarti | mring
garwanya Sunan Ngudung | bokayu katiwasan | pan si kakang kasambut
ing aprang pupuh | garwa Sunan Ngudung mojar | adhi sintên kang
pawarti ||

35. ngandika Sang Sèkh Malaya | Kyai Antakusuma

--- 156 ---

mangke mulih | apan sarwi kuthah marus | kakang anyurtanaha | pan
kulambi kula ingkang dipun sambut | jabaning pasthi rinaksa | dene
salêbêtning pasthi ||

36. sintên kawasa nyêgaha | garwa Sunan Ngudung wau duk myarsi | asru
dènira amuwun | wus mantuk Sèkh Malaya | tan antara layone Suhunan
Ngudung | wus rawuh nagari Dêmak | sinarèkkên kilèn masjid ||

37. samana wus kapiyarsa | dening para senapatining jurit | kang baris ing
surèngkewuh | yèn wadya ing Bintara | kasor ing prang Jêng Sunan
Ngudung kasambut | sagung kang para oliya | mung sumarah rèhing kapti
||

38. Sang Adipati Bintara | lawan para kadang sayuk ing kardi | sêdhênge
mangke ginêmpur | praja ing Majalêngka | sarêng undhang ing wadyabala
gumuruh | wusing samaptèng ngayuda | budhal saking Surawèsthi ||

39. gora rèh swaraning bala | ambalabar lir robing jalaniddhi | lawan Jêng Suhunan Kudus | kinèn ambanjêlana | ingkang rama nênggih Jêng Suhunan Ngudung | dadya manggalaning bala | senapatining ajurit ||

40. Sunan Kudus tan lênggana | sanalika tanggap kuswa miranti | lan sawadyabalanipun | sadandananing yuda | Sunan Gunungjati nganthèni pangulu | kalawan sarbane pisan | kinèn ngêrapkên ing jurit ||

41. lan êcisnya Sunan Benang | Sunan Giri paring sarana kêris | Kalam-munyêng namanipun | kadadyan saking puja | ing Palembang Arya Damar akêkintun | pêthi kamandèn sajuga | saking uwa dwijaning wil ||

42. Sunan Kudus nulya budhal | saha wadya sapraptanirèng Giri | samana pra sampun kumpul | lan para senapatya | andum karya ing Majapait kinêpung | Sang Adipati Bintara | anèng salèring nagari ||

43. lan sagung para dipatya | pra prawita[3] miwah

--- 157 ---

satriya mantri | kadi mêngdhung angêndhanu | dene Jêng Sunan Benang | anèng kulon lan para oliya kumpul | kêtib modin myang suhada | sabangsane pra ulami ||

44. narendra ing Pranaraga | Sri Bathara Katong sawadya sami | kanthi Prabu dewa Kêlut | ing Bali saha bala | anèng kidul amangku gêgaman agung | Sri Lêmbupêtêng Madura | lan Prabu jaranpanolih ||

45. ing Sumênêp anèng wetan | saha wadya sadandananing jurit | samana wong Majalangu | pan samya kagegeran | dene wontên mêngsah prapta pindha têdhuh | sumahap angêpung kitha | kadi durmane ing jurit ||

40. Durma

1. nulya katur Sang Aprabu Brawijaya | yèn wadya Dêmak prapti | datanpa wilangan | nêdya ngrabasèng kitha | sri narendra duk miyarsi | langkung sungkawa | èwêd raosing galih ||

2. dene mêngsahira sagung para putra | lamun nungkula isin |
panjênêngan nata | nistha kalokèng jana | dèrèng cacak ing ngajurit |
angadu bala | pêpukuling ngajurit ||

3. sanalika sri narendra undang- undang | maring kang para siwi | lan para
dipatya | myang Patih Gajahmada | kinèn mêthukkên ing jurit | mêngsah
kang prapta | ing Bintara myang Giri ||

4. Patih Gajahmada angrigakên bala | miwah para dipati | tuwin para
putra | kinèn samêktèng yuda | gumuruh kêndhang gong bèri | barung
gong raya | golong sabilik-bilik ||

5. Senapati Rahadèn Atmawijaya | lan ing Têrung Dipati | miwah Arya
Leka | Arya Jaka Tambula | lawan Radèn Sewagiri | Dyan Yudasara |
myang Radèn Sawunggaling ||

6. Dyan Panurta lawan Radèn Dewantara | miwah Arya Saruni | Arya
Saradhênta | Arya Gagakpranala |

--- 158 ---

tuwin Arya Balaruci | Dyan Jalalana | kerig sawadya sami ||

7. senapati putraning Sri Brawijaya | kang maksih anêtêpi | agamaning
rama | pan samya ambêk pêjah | dènnya rumaksèng nagari | wusing
siyaga | budhal sawadya kerig ||

8. kadya tasik mbalabar maring dharatan | pinatah-patah sami | kang
tunggul daludag | sajuru-jurunira | rinarêngga sarwa asri | pradangga
umyung | tabah-tabahan ngrangin ||

9. lampahira praptèng kikis kilèn praja | prawira Majapait | akupêng
kalangan | jêjêl tanpa petungan | swara lir manêngkêr langit | prawirèng
Dêmak | miyat wong Majapait ||

10. mêthukakên yuda ngangsgakên bala | kêndhang gonge tinitir |
tanggap nyandhak tangan | angatag senapatya | sagunging kang para
wali | myang pra dipatya | rêmbag tanduking jurit ||

11. Adipati Bintara lon aturira | maring Suhunan Giri | paran kang prayoga
| tanduking ngadilaga | ngandika Suhunan Giri | para mujijat | bèbèrêna
ing mangkin ||

12. supaya wruh kêmandene sowang-sowang | lamun panudyèng kapti |
iya agêm sarban | saking Carbon kinirap | anèng antaraning ratri | kang
saking ingwang | mêngko kapanggih benjing ||

13. kanthi lawan pêthi kang saking Palembang | wus cundhuk ing
panggusti | sapraptaning masa | sarban sampun kinirap | pabarisan
Majapait | mijil awêndran | tikus makêthi-kêthi ||

14. andalêdêg marang jroning pabarisan | kumêrap angêrobi | mring
pakuwon mêngsah | mêmangsa samubarang | sangune sadaya ênting |
miwah dandanan | rantas arontang-ranting ||

15. kagegeran pabarisan Majalêngka | tan kêna dèn sayuti | lamun
pinarwasa | kang prapta saya ngrêda | sêdhih wong ing Majapait | swara
gumêrah | akarya giris miris ||

16. sapraptaning enjing wadya Majalêngka | samya kirap ing jurit |
anêmbang têgara |

--- 159 ---

sêdyarsa ngungsir mêngsah | dhuwung kang saking ing Giri | kaunus
nulya | anèng papaning jurit ||

17. sanalika mêdal tawon wêndran yutan | mring mêngsah angêntupi |
samya gundam- gundam | pêthi saking Palembang | binuka jumêgur muni
| lir blêdhèg sasra | pêtêng ndhêdhêt ing langit ||

18. mèsês ingkang lesus angin bayu bajra | bumi kadya ginonjing | gêtêr
maputêran | kèh wrêksa kaparapal | kasêmbuh wêdaling êcis | Jêng Sunan
Benang | anèng papaning jurit ||

19. nulya mēdal gēgaman wēndran ayutan | samya ngamuk pribadi |
anumpēsī mēngsah | pêthi saking Palembang | mēdal lēlēmbut anggili |
umyang ing tawang | nēluh wong Majapait ||

20. anggalasah pêpati tanpa petungan | sasesanirèng pati | bingung
mawuyungan | lir gabah ingintêran | pati-pati mbêbêntusi | wong
Majalêngka | tan ana kang ngundhili ||

21. amung ri Sang Prabwanom Atmawijaya | ngungsi sajroning puri |
Têrung Pêcattandha | wus amêngani lawang | wadya ing Dêmak udani |
yèn mēngsahira | larut tan ana kèri ||

22. Adipati Bintara undang ing wadya | angrampit jroning puri | ngangsgêg
barisira | Sang Prabu Brawijaya | miyat para senapati | sawadyabala |
tumpês tapis ing jurit ||

23. sakarine kèngsêr lumayu sasaran | agiras giris miris | sagunging
gēgaman | angamuk sowang-sowang | lawan tawon angêntupi | Sri
Brawijaya | tyasira kontrang-kantring ||

24. kamicicèn sabêdhahing Majalêngka | saking tawon ing nguni | akarya
sangsara | mangkya wuwuh gēgaman | samya angamuk pribadi | tanpa
petungan | saya miris ing galih ||

25. karsa lolos maring nagri Pranaraga | sagarwa putra sami | jêngkar
saking pura | ya ta wadya ing Dêmak | pan sampun miyarsa warti | yèn sri
narendra | sampun lolos ing ratri ||

26. nulya katur Sang Adipati Bintara | tan antara [anta...]

--- 160 ---

[...ra] ngaturi | kang raka sang nata | Bathara Katong prapta | paran ing
rêmbagirèki | dene kang rama | ngungsi mring Pranaragi ||

27. Sang Bathara Katong prayogining rêmbag | ingantêpa samangkin |
tinonjok ing sêrat | bok darbe kaemutan | angeman ingkang nagari | lan
karajannya | anut agama suci ||

28. lêstarine dadi pêpundhèning jagad | ing dunya praptèng akhir |
sarèhning wong tuwa | wajib lamun rinaksa | dene lamun nora kêni |
nadyan wong tuwa | wênang dèn wisesani ||

29. yêkti abot marang lakuning agama | ana têpaning nguni | kocap
jroning Kur'an | èmpêring lêlampahan | jamaning Nabi Ibrahim | pan
ingkang rama | pinrih agama suci ||

30. Patih Hanyar dahat dènira lênggana | ngantêpi pati kapid | wêkasan
dèn lunas | winasesa ing pêdhang | ananging samono yayi | masa
manggaa | kadi Nabi Ibrahim ||

31. pan sêdhênge iya binurak kewala | saking ing Pranaragi | kèndêl
andikanya | Bathara Katong ika | Dipati Bintara nguni | dyan karya surat |
kadi kang pamrayogi ||

32. ingkang raka narendra ing Pranaraga | datan adangu dadi |
sinungakên duta | kinèn ngaturkên rama | ponang duta mèsat aglis | pan
sampun prapta | nagari Pranaragi ||

33. kawarnaa Sang Aprabu Brawijaya | pinarêk para siwi | lawan para
garwa | lan wadya sawatara | ingkang kaparêk ing ngarsi | Ki Gajahmada |
rêmbag sarèh ing jurit ||

34. kinèn ngimpu wadya kang lumayu ing prang | myang ngirup kanan
kering | dèn samya siyaga | rumaksèng Gustinira | dèrèng dangu gunêm
kawis | praptaning duta | saking Dêmak nagari ||

35. dumarojog ing ngarsa mundhi nawala | katur ing sri bupati | sampun
tinanggapan | mring Prabu Brawijaya | binuka sinuksmèng galih |
têmbunging surat | miluta mêmalat sih ||

--- 161 ---

36. kaatura ing sêmbah sungkêm kawula | pun Patah nyuwun alim |
sampun kêkirangan | sagantên pangaksama | praja paduka ing mangkin |
sampun abêdhah | emuta jêng dewa ji ||

37. lamun sanggêm angagêm agama mulya | kondura mring nagari |
lulusa wibawa | ambawani bawana | dados pêpundhèning siwi |
sawadyabala | wontên ing nusa Jawi ||

38. bilih maksa ngêkahi agami kopar | Budha ingkang binudi | kêdah tan
widada | weda ing dadinira | sumangga kangjêng rama ji | ulun anjarah |
titi ungêling tulis ||

39. ya ta wau Sang Aprabu Brawijaya | duk wrin ungêling tulis | kang
saking kang putra | Sang Dipati Bintara | tan pisan akarya lilih | ing
galihira | mandar sru katêtangi ||

40. dukanira jaja bang mawinga-winga | pangandikanya wêngis | têtêp
wong druhaka | kudu ngêndhih wong tuwa | anut agamaning santri |
anistha papa | nguthakil sugih pokil ||

41. masa ndadak kagêbang ingkang mangkana | ya jênêng inghun iki |
sanadyan rusaka | lêbur lan prajaningwang | sayêkti inghun andhêmi |
duta dèn enggal | tutura anak mami ||

42. sun tan arsa anuta agama Islam | nyulami rêhing ngèlmi | lir para
ulama | êmoh maring kukama | eman kang wus sun têtêni | tumanêm ing
tyas | ingimankên salami ||

43. mamèt mangat wêkasan nora kaduman | dadi makmum angêmim |
agamèng atmaja | ngêmohi kang wus tamat | têtama têtah utami | balik
ing Dêmak | wong ngame dèn romèsi ||

44. sungsang sarik kasêsêr marang ing sarak | asarana sak sêrik | morèg
ngarah apa | ngarah ngrurah ing rama | arêp ngarêpi nagari | nêgor
nugraha | anggêre amandhiri ||

45. tanpa surup pangirupe wong ing Arab | ngêraman dèn ramuhi | karam
karahmatan | ngamuk mumuk amamak | yèku karime wong mukmin | tan
nganggo imam | katêtah tadhah amin ||

--- 162 ---

46. saya kathah dukane Sri Brawijaya | ingkang myarsa samya jrih | ya ta
duta Dêmak | tinundhung nulya mèsat | warnanên sri pramèswari | putri
ing Cêmpa | dahat ambêbolèhi ||

47. maring raka Sang Aprabu Brawijaya | nanging datan ginalih | wau
dutèng Dêmak | praptaning pabarisan | matur solahé tinuding | purwa
wasana | dènnya ngaturkên tulis ||

48. Adipati Bintara lan para kadang | ing Bali Pranaragi | kalangkung
bramantya | lajêng undang ing wadya | kinèn mbudhalakên baris | anglud
amburak | Narendra Majapait ||

49. ingkang ngungsi anèng kitha Pranaraga | tanggap sagunging dasih |
lajêng mukul kèndhang | gong bèri mawurahan | gumuruh sagung prajurit
| ambèr mbalabar | lir èrobing jaladri ||

50. praptèng Pranaraga wus pinêthuk ing prang | mring mêngsah Majapait
| rame lèng-ulêngan | caruk rok liru papan | nanging wong ing Majapait |
kasoran ing prang | labêt karoban tandhing ||

51. atêmahan pêpati tanpa petungan | mung kantun para siwi | lawan
para nata | miwah kang para garwa | wong Dêmak saya angrampit | Sri
Brawijaya | lingsêm dadya ngoncati ||

52. lolos ngilèn lawan sagung para garwa | dene kang para siwi | pisah
ting salêbar | angungsi sowang-sowang | wadya ing Dêmak nututi | mring
sri narendra | pisah lan para rabi ||

53. kuthetheran ana ngungsi jurang parang | ing siluk-siluk sungil | Dipati
Bintara | nglantun tindaking rama | kapapag lan ibu sori | putri ing Cêmpa
| Rêtna Andarawati ||

54. sru karuna sêsambat amêlasarsa | dhuh anggèr minta urip | ing nguni
manira | pan wus nunggal agama | kang putra umatur aris | sampun
sumêlang | ulun kang magêrsari ||

55. sanalika lajêng amundhut jêmpana | tan dangu [da...]

--- 163 ---

[...ngu] praptèng ngarsi | Raja Putri Cêmpa | wus winot ing jêmpana |
kinèn ngangkatkên rumiyin | marang ing Benang | pra wadya saur paksi ||

56. nulya mangkat warnanên Sri Brawijaya | sungkawa angranuhi | miwah
garwa putra | ping kalih kasor ing prang | wadyanira tumpês tapis |
maksih binurak | manggung ngêgungkên brangti ||

41. Asmaradana

1. langkung dènnya kawlas-asih | Sang Aprabu Brawijaya | samarga-
marga wirangrong | mêtêk kapêtêk ing driya | rêncêm karantam-rantam |
agunge kaprabonipun | ambawani nusa Jawa ||

2. binuya-buya ing mangkin | anrang baya tan kaetang | ketang ambêk
ratu gêdhe | sumimpang papa myang nistha | angurêbi nagara | mung
anêdya nganyut tuwuh | nêtêpi budi utama ||

3. sayah kèndêl analisis | anèng tanah ardi Sawar | pan talatah laladane |
ing ardi Sèwu punika | Sang Prabu Brawijaya | kukud ngracut jagadipun |
têmah anêmahi seda ||

4. tan ana ingkang udani | kang layon agilang-gilang | wantuning
Narendra Gêdhe | pan akarya gara-gara | tidhêm-tidhêm ing wiyat |
rêmêng-rêmêng angêmu truh | surêm sunaring raditya ||

5. kadi ambelani lalis | sesining rat pramuditya[4] | rêrêp sirêp kumarane |
tan adangu mawa teja | ing saluhuring arga | warnanên kang anglêlantun
| Sang Adipati Bintara ||

6. saparanirèng rama ji | sapraptane wukir Sawar | miyat teja wêning
katon | prênah saluhuring arga | anulya pinarpêkan | praptèng sêsiluking
gunung | kapanggih layoning rama ||

7. sang dipati anungkêmi | pan sarywa maca udrasa | dhuh rama
pêpundhèn ingong | dene têka kawlas-arsa | anilar kawibawan | ngantêpi
ing kapis kupur | kapisan papa pataka ||

--- 164 ---

8. nguni karsa anuruti | angagêm agama mulya | kaluhuran salamine |
sadangunira ngrêrantam | prapta Jêng Sunan Benang | anèng wuri
angêngimur | aduh babo kadang ingwang ||

9. aywa ngêkèhkên prihatin | mungguh sedane ramendra | mupusa
rèhning papasthèn | ya iku ratu utama | angantêpi ing têkad | lumuh
kasora anungkul | balik ing mêngko dèn enggal ||

10. paripurnanên kang jisim | kaastanaa ing Dêmak | tulusa dadya
pêpundhèn | katona ing batin Islam | Adipati Bintara | sanalika nulya lipur
| mituhu dhawuhing raka ||

11. layon nulya dèn sucèni | sawusnya pinaripurna | animbali wadya kinèn
| sadiya papante sawa | datan adangu prapta | layon pan sampun
dinunung | sajroning karda rinêngga ||

12. ingangkat mring Dêmak aglis | pinikul Jêng Sunan Benang | Dipati
Dêmak sisihe | praptaning nagri Bintara | layon Sri Brawijaya | samana
sampun kinubur | kadi satataning Islam ||

13. sawusnya sang adipati | kondur maring dalêmira | para wali pêpak
kabèh | lan para narendra kadang | kang wus nunggal agama | Sunan
Benang karsanipun | mangkya Dipati Bintara ||

14. ingadêgakên narpati | anèng nagari ing Dêmak | sadaya samya
rumojong | amung Sunan Giripura | kêdah anyêlanana | jumênêng ratu
rumuhun | dalêm kawan dasa dina ||

15. awit ingkang rama swargi | inggih dèrèng kalampahan | têtêpe
jumênêng katong | nyêlani karaton Budha | pan kinarya sarana | wuri
luluse lêstantun | ngganyani karaton Islam ||

16. tan gumantyèng ratu kapid | jumurung Jêng Sunan Benang | pan sampun jumênêng katong | Jêng Suhunan Giripurwa | sinuhun pra oliya | Dêmak dèn lih namanipun | nagari Ngawantipura ||

17. jangkêping kawan dasa ri | Sang Adipati Bintara | kang gumantyèng karatone | jêjulukirèng [jêju...]

--- 165 ---

[...lukirèng] karajan | Sultan Syah Alam Akbar | Brawijaya Siru'llahu | khalifatu rasulu'llah ||

18. waha Amiri'lmukminin | Bajudi 'Abdu'lhamid khak | dene mangka êmbanane | sutèng Kya Gêng Wanapala | aran Patih Mangkurat | wau ta pulunanipun | kang jumênêng Sunan Benang ||

19. sagunge kang para wali | samya jumênêng pujangga | ngiras kinarya pêpundhèn | jaksa kang mêngku pradata | Ki Agêng Wanapala | para ulama sadarum | kathah kinarya punggawa ||

20. saundha sabilik-bilik | kaliwon mantri mangandhap | mangkana ing sasampune | rêmbag kang para oliya | dene tan ana prapta | Sang Adipati ing Têrung | paran kang dadya karana ||

21. mangkya maleca ing jangji | pan dèn anti sawatara | yêkti katara karêpe | ya ta mangsuli carita | raja putri ing Cêmpa | sasedaning garwanipun | Sang Aprabu Brawijaya ||

22. gêrahira angranuhi | labêting tyas kararantam | onêng mangunêngan tinon | tinahan nala tan kêna | ngênês konus tan rêna | mawas wahananing tuwuh | jumrunuh nêmahî seda ||

23. rinoyom ing para siwi | layon wus pinaripurna | pra wali kang nyalatake | sinarèkakên anulya | desa Karang Kajênar | ênêngna datan winuwus | ingkang wus mulyèng akhirat ||

24. warnanên ing Majapait | putraning Sri Brawijaya | kang jêjuluk Prabu Anom | Dyan Arya Atmawijaya | maksih nêdya angrêbat | karatoning ramanipun | tansah ngirup-irup wadya ||

25. karsa angadhaton malih | wusing sawatawis kathah | para wadya
gêgamane | Adipati Pêcattandha | ing Têrung tumut merang | sandeya ing
galhipun | bok tinarka anêmaha ||

26. nalikanya anyedani | Sunan Ngudung nêng payudan | dadya tumut
arêraton | ing pra wadyabalanira |

--- 166 ---

kinèn samaktèng yuda | pan wus agêng barisipun | kapiyarsa saking
Dêmak ||

27. samana gya dèn lurugi | Sunan Kudus kang dinuta | mbêkta
wadyabala kaot | pinêthuk wong Majalêngka | udrêg rame prangira |
samyak antaran bau | rok rukêt silih curiga ||

28. prawira ing Majapait | kasoran karoban lawan | têtah atumpêsan
kabèh | kang kari giris sasaran | ngungsi saparan-paran | sira Sang Dipati
Têrung | nglèrèg saha wadyabala ||

29. anèng Têrung pacak baris | sandeya bok malês pêjah | Sunan Kudus
dènirandon | angadoni jayèng yuda | sedanira kang rama | nênggih Jêng
Suhunan Ngudung | marma sampun tanggung ngaras ||

30. dene Sang Prabu Taruni | Dyan Arya Atmawijaya | lolos angungsi
mangilèn | lajêng kèndêl adhêdhêkah | ardi Lawu samana | jêjuluk Ki
Agêng Gugur | ngiras mêsu tapa brata ||

31. sarêng ing alami -lami | garwa putra sami prapta | bela ngêdêm
adhêdhepok | pasang rakiting panggènan | lir tuhuning pandhita | atêtêp
sinuhun-suhun | wong kanan keringing arga ||

32. nihan ta wau winarni | Sunan Kudus Senapatya | sarêng myat
mêngsah wus kasor | gya parentah anjêjarah | saising jro pura | ya ta
kalaksanaan sampun | wijile antuk boyongan ||

42. Mijil

1. Sunan Kudus saksana anuding | bupati kang kinon | anggitika ing
Têrung kuthane | Adipati Madura nindhihi | sampun budhal aglis |
sapraptaning Têrung ||

2. wus pinêthukakên ing ajurit | rame aprang popog[5] | wadyèng Dêmak
akasor yudane | samya ngungsi marang senapati | ya ta duk ningali | Jêng
Suhunan Kudus ||

--- 167 ---

3. wadyanira kasor ing jurit |[6] samya katêlangso | Sunan Kudus
kalangkung dukane | gya tumêdhak tan amawi dasih | mung kapitu santri
| sapraptaning pupuh ||

4. wong ing Têrung anèng jro kuthèki | ngungak pagêr banon |
mungsuhi katon ewon kêthèn | dadya wadyèng Têrung wêdi giris | para
mantri nangis | Sang Dipati Têrung ||

5. ingaturan nungkul anuruti | dyan nduta ponang wong | mêtat sarya
ambêkta surate | katur marang Sunan Kudus nuli | atur pati urip | Sang
Dipati Têrung ||

6. pangran ing Kudus suka ing galih | angandika alon | salamêta saniyate
mangke | nora kongsi wong cilik kèh mati | marma tan sumiwi | sumêlang
maring sun ||

7. dumèh kangjêng rama duk ing nguni | seda ing palugon | iya paman
marwasèng yudane | yêkti apa wong urip puniki | nora wruh ing pasthi |
karsane Hyang Luhur ||

8. mêtal saking sajabaning biting | asêlur ponang wong | sampun prapta
cundhuk nèng ngarsane | Jêng Suhunan Kudus ngacarani | sapraptaning
ngarsi | Sang Dipati Têrung ||

9. sêdyanira arsa awotsari | sinungan sabda lon | paman dawêg
sêsalaman bae | sampun paman mawi awotsari | angarah punapi | paman
lawan ingsun ||

10. kadi dene sami tunggil jinis | paman lawan ingong | sang dipati
kalangkung dêkunge | sasampune sêsalaman sami | atur pati urip | lan
rajabrana gung ||

11. Sunan Kudus suka aningali | angandika alon | paman nuntên kula turi
age | marang Dêmak panggiha pribadi | lan rakanta tuwin | ing Mulki Sang
Wiku ||

12. Sri Narendra Bintara sayêkti | sukèng tyas tumonton | abipraya budhal
sawadyane | lampahing marga datan winarni | praptaning nagari | Dêmak
marêk gupuh ||

--- 168 ---

13. Sultan Syah Alam Akbar marêngi | pinarêk kadhaton | saha wadyabala
pêpak andhèr | Sunan Kudus wus prapta ing ngarsi | kalawan angirid |
Sang Dipati Têrung ||

14. sami ngaras padèng narapati | rinangkul karongron | langkung samya
karaos manahe | dyan binakta umarêk Sang Yogi | marang dalêm masjid |
sakaloronipun ||

15. samya nêmbah ing pada Sang Yogi | ingandikan alon | iya muga
linastarêkake | nggone ngagêm agamaning nabi | rêhning samya urip |
pan tuntun-tinuntun ||

16. yèn nampika agamaning nabi | wong iku pakewoh | Sultan Bintara
paran karsane | anaria marang Ki Dipati | ing Têrung puniki | jêng sultan
umatur ||

17. inggih têksih têtêp adipati | ing Têrung pilunggoh | angradina ing bang
wetan kabèh | anrapêna agamaning nabi | sarengat dèn radin | Sang Wiku
jumurung ||

18. Adipati Têrung anastuti | dhawuhing Sang Katong | sawusira gya
linilan lèngsèr | saha wadya sinungan rêrakit | pakuwon sarya sri | ing
sajuru-juru ||

19. lami anèng ing Dêmak nagari | ya ta winiraos | putrinira sang dipati
mangke | suwarnanira ayu linuwih | karsane sang aji | anêdya pinundhut ||

20. ginanjarakên kinarya rabi | yèn tyasnya rumojong | antuk Suhunan
Kudus badhene | Adipati ing Têrung njurungi | sumanggèng karsa ji |
rèhning wajibipun ||

21. ratu agung angayomi dasih | karya karahayon | Sultan Dêmak
kalangkung sukane | enggaling carita sang suputri | pinanggihkên nuli |
lan Sinuhun Kudus ||

22. binawahan panggihing akrami | atut sakarongron | datan ana ing
kasangsayane | Dêmak kalangkung arjaning nagri | nihan ta winarni | sri
nataning sunu ||

--- 169 ---

43. Sinom

1. wontên parênganing kandha | nênggih trahing Majapait | nama Ki
Agêng ing Sela | ing nguni ingkang sêsiwi | nênggih Sèkh Abdu'llahi |
karan padalêmanipun | Kya Gêng Gêtaspanhawa | Gêtaspanhawa ing
nguni | kang pêputra Lêmbupêtêng Tarub ika ||

2. Lêmbupêtêng putranira | narendra ing Majapait | Sang Aprabu
Brawijaya | patutan ing Wandhankuning | kathah kadangirèki | sêpuh
anèm samya ngaub | kathahira winarna | kadang kalihwêlas iji | kang
asêpuh nama Ki Agêng Abdu'llah ||

3. Tarub agung dhukuhira | dene panênggaking ari | sira Ki Agêng Sesela |
ari malih kang sumêndhi | Nyai Agêng ing Pakis | ingkang lajêng krama
antuk | Kyai Agêng ing Karang | ari malih kang sumêndhi | Nyai Agêng
Amad Anom wismèng Purna ||

4. kapat tungguil ibu rama | dene kadangira malih | sumêndhi kang sanès
rena | saking tanah Sokawati | priya dèrèng anami | alena kalane timur |
malih sumêndhinira | pawèstri kang awêwangi | pan ing Kare Nyi Agêng
Jayapanatas ||

5. sumêndhi malih wanodya | wasta Nyi Agêng Wiradi | ing Wanglu
padalêmannya | ari malih kang sumêndhi | Nyai Agêng Syamsuddin | ing
Bongkang dhêdhukuhipun | ari malih wanodya | akrama angsal ing Bali |
apanênggran Nyai Agêng Wangsaprana ||

6. sumundhul ri malih kênya | kang krama angsal ing Pragi | padhukuhan
dhusun Bongkang | Wirawangsa kang wêwangi | ari malih pawèstri |
dèrèng nama seda timur | ari wuragil pisan | panênggran Nyi Agêng
Mukmin | ingkang wisma padhêkahan Ngadibaya ||

7. sasedanira kang rama | Ki Gêtaspandhawa nguni | nênggih Ki Agêng
Sesela | para kadangira sami | sadaya dèn ayumi | labête ambêk marta yu
| mangka liruning bapa | majibi kadang taruni |

--- 170 ---

nadyan kadang tuwa takluk angawula ||

8. mangkana Ki Agêng Sela | pakartine asêsabin | kang mangka
panggaotannya | kadang-kadangira sami | tan liyan among tani | kang
dumadi asilipun | duk samana pan lagya | amêmacul marang sabin |
wancinira awan ngajêngakên asar ||

9. anuju mênthung limêngan | udanira riwis-riwis | nênggih Ki Agêng ing
Sela | tanpa rowang anèng sabin | mêmacul anampingi | ya ta nuli ana
rawuh | arupa janma tuwa | anulya wau mrêpêki | gya cinandhak maring
Ki Agêng ing Sela ||

10. muni jumêgur swaranya | nanging maksih dèn cêkêli | saksana wau
binanda | sawusnya binakta mulih | ingaturakên nuli | marang Dêmak
sang aprabu | wusnya katur sang nata | nulya kinunjara wêsi | nanging
maksih rupa kaki -kaki tuwa ||

11. antara wus pitung dina | ana nini-nini prapti | pan sarya ambêkta toya
| marani kunjara wêsi | sawusnya marêpêki | kunjara siniram sampun |
mring nini-nini tuwa | nyuwara jumêgur muni | kang kunjara bubrah kaki
tuwa musna ||

12. samya gêtun ngungun mulat | wadya ing manca prasami | mring solah
bawa mangkana | bujating kunjara wêsi | mangkana kang winarni |
kasusranira pinunjul | Kyai Agêng ing Sela | kabyawarèng kanan kering |
aprakoswa pratandha anyêkêl gêlap ||

13. marma dadya ila -ila | praptaning jaman samangkin | yèn ana
gêbyaring kilat | tinawaran ing sêsanti | mrih tan kongsi ngênani | pan
mangkana mantranipun | ya jungkas kali adam | Mukhammad Rasulu'llahi
| lan angakên têdhake Ki Agêng Sela ||

14. insya'Lah kalis ing gêlap | Ki Agêng Sela winarni | pan datan antara
lama | nulya na dhadhalang prapti | saking Dêmak nagari | mbêbarang
[mbê...]

--- 171 ---

[...barang] marang ing Tarub | amayang bèbèr purwa | sadaya kang
aningali | samya brangta marang bojone ki dhalang ||

15. kang anama Kyai Bicak | warnanira ayu luwih | wijang ing pada
wadana | sasolah bawa mantêsi | ki dhalang yèn angringgit | rabine
nggèndèr ing pungkur | dadya ojating kathah | saênggèn-ênggèn
anggèndhing | kapiyarsa marang Ki Agêng ing Sela ||

16. bojone Ki Dhalang Purwa | èstu yèn ayu linuwih | ya ta Ki Agêng
Sesela | wus kagiwang jroning galih | mangkana dèn rakêti | Dhalang
Purwa wus binujuk | anulya pinêjahan | Dhalang Ki Bicak wus mati |
sadarbèke wus katur Ki Agêng Sela ||

17. bojone lan kêmpulira | wus katur sadaya sami | sakalangkung sukanira
| sarêng wau aningali | pawèstri lawan ringgit | atanapi kêmpulipun | Kyai
Agêng Sesela | sarêng wau aningali | marang kêmpul kalangkung
kasêngsêmira ||

18. kantun dènnya darbe karsa | mring dhadhalang ingkang èstri |
karêmên ing kêmpulira | kinarya bindhe[7] prayogi | pan sampun dèn
wastani | Kyai Bicak namanipun | samana lama-lama | kang bëndhe dipun
èstrèni | marang Kangjêng Suhunan ing Kalijaga ||

19. bëndhe dadya tandhaning prang | kalamun kinarya jurit | lamun
munya anèng tawang | pasthi yèn mênang kang jurit | lan sapa kang
ndarbèni | ing benjing saturunipun | pinasthi dadi nata | anèng nagri nusa
Jawi | wus mangkana Ki Agêng Sela pêputra ||

20. kawanwêlas kathahira | apan sawêlas kang èstri | têtiga kang sami
priya | pambayunira winarni | anama Rara Dungik | talêr saking garwa
sêpuh | asal ing Wanasaba | diwasanya palakrami | apanêngran Nyai
Agêng Lurungtêngah ||

21. sumêndhi malih wanodya | Rara Jantên kang wêwangi | krama antuk
Wanasaba | Ki Agêng Sungèb [Su...]

--- 172 ---

[...ngèb] kêkasih | sarêng alami-lami | ngalih padalêmanipun | maring
dhukuh Pakèringan |[8] lajêng kasêbut ing nami | apanêngran Nyai Agêng
Pakèringan ||

22. sumêndhi malih wanodya | Rara Jumantên kang nami | diwasanya
palakrama | antuk Ki Agêng ing Bangsri | Mandalika wêwangi | kasêbut
wong anguwuh | saking ing dhukuhira | karan Nyai Agêng Bangsri | arinira
kang sumundhul malih kênya ||

23. awasta Rara Jamirah | akrama angsal ing Jati | nama Nyai Nur
Mukhammad | karan Nyai Agêng Jati | kadang malih pawèstri | Dyah
Maherah namanipun | diwasa palakrama | Buyut Patanèn ing nguni |
apanêngran sira Nyi Agêng Suleman ||

24. duk samana lajêng karan | Nyi Agêng Patanèn nguni | sumêndhi malih
kadangna | kang saking ibu taruni | priya kalangkung pêkik | dèrèng
nama seda timur | ari malih wanodya | Rara Mahemunah nami |
apanêngran Nyai Agêng Jakariya ||

25. Pakisdhadhu dhêkahira | sumêndhine ari malih | kênya aran Dyah
Mangunah | diwasanira wêwangi | Nyi Amaddahar nguni | dhêdhêkah ing
Pakiskidul | sumundhul malih kênya | Rara Makmunah wêwangi | Pakisaji
nama Nyi Agêng Mukibat ||

26. kang sumêndhi malih priya | apanêngran Bagus Anis | krama samya ing Sesela | sumêndhi malih pawèstri | dèrèng sinungan nami | anêmahi seda timur | pan ngantos kaping tiga | patutan garwa taruni | saking Warung dèrèng nama lajêng seda ||

27. ingkang wuragil apriya | apanêngran Bagus Bayi | anênggih namung sajuga | têtalêrira ing siwi | ingkang laju[9] lêstari | garwa nèm kang saking Warung | sarêng diwasanira | wau ta Ki Bagus Bayi | Kyai Agêng Pasuson panêngranira ||

--- 173 ---

28. nihan ganti kang winarna | wontên panjênêngan wali | ahlul ing ngèlmi makrifat | sarana sarak dèn sirik | kasubirèng wêwangi | anênggih Pangeran Panggung | kadangira panênggak | lan Sunan Ngudung ing nguni | atmajane Khalifah Kusèn ing kuna ||

29. dadya paguroning kathah | winuruk ngèlmu sajati | têbih ing sêmbahyangira | mung winulang salat daim | sêmbahyang jroning batin | kèh samya masuk nggêguru | darbe amêng-amêngan | para kirik cilik-cilik | pan kinarya sasmita antêping têkad ||

30. satunggal nama pun Iman | satunggal nama pun Tokid | kêkalih sagêd anjilma | tan kênèng sah sari ratri | sarêng ing lami-lami | saya kasusra misuwur | kapyarsa saking Dêmak | tinimbangan mring nagari | Pangran Panggung wus umarêk sri narendra ||

31. njujug kamar pamidikan | kaparèng ngarsa sang aji | jêng sultan alon ngandika | he kisanak paran kapti | dene kula miyarsi | yèn andika dados guru | ngrêisak rukun Islam | adamêl suwunging masjid | lah jawabên paran ta antêping tekad ||

32. kula dipun sulangêna | Pangran Panggung duk miyarsi | sabdaning nata mangkana | sumungkêm umatur aris | ulun tadhah rêruntik | makatên saèstunipun | inggih kauningana | mila mbucal sarak nabi | wit ki murid mèt jatining sêsurupan ||

33. patrape ing sangkanparan | tanjêhe tanajul tarki | kang kocap dalêm hidayat | amung sajatining ngèlmi | mrih santosaning ati | nggayuh geyonganing kayun | yèn mbicaraa sarak | saengga paksi salindhit | tiwas polah salah pakolèhing nalar ||

34. karananing solah salah | pan sarak puniku inggih | dumunung sorah
pêpalang | jatining ngèlmu kang pundi | marma yèn pinarsudi |
cinundhukakên ing ngèlmu | amanggung salawana |

--- 174 ---

praptèng jangji mbalenjani | tan tuwajuh tyasira uwas sumêlang ||

35. watêkipun sumêlangan | ancasing kasidan jati | dadi ratuning rancana
| rubeda angrêribêdi | êmbuh êmbuh dèn rukti | wêdi lamun nêmu dudu |
dêdalaning dêlahan | tarlèn anêtêpi jangji | sadayanya pinuji mrih ndon
asmara ||

44. Asmaradana

1. jagad sakurêbing langit | salumahirèng bantala | saisèn-isène kabèh |
pan amung cinipta tunggal | tan nganggo karonèhan | lair batine
kawêngku | mantêp anêtêpi tekad ||

2. gumilang tanpa ling-aling | pinêlêng têtênging nala | mêlêng tan kêna
kalalèn | ngandika Sultan Bintara | kalamun makatêna | antêping têtad
kang sèstu | kula nyuwun cêculikan ||

3. nênggih sarahsaning ngèlmi | caritane kitab Kur'an | kang ngèmpêr
lapal murade | punika dèn pajarêna | têtèng rahsane pisan | punapa
jumbuh ing kawruh | pêngrasa krasa ing karsa ||

4. Pangran Panggung matur aris | dhuh Sultan ing bab punika | pan gampil
minangka angèl | gampil yèn sampun nugraha | angèl yèn tan kabuka |
ing pralambine ing ngèlmu | kang kangge ing kene kana ||

5. mung rasa maknaning ngèlmi | miwiti wruh ing sarira | sapisan wruh ing
ajale | wêkasan marang kamulyan | kapindho wruh sangkanya | ananira
kang satuhu | anane pan saking ora ||

6. ora pan apasthi dadi | dadine kinarya tladha | wujud mokal pratandhane
| minangka paesan wrana | warananirèng dunya | kang pasthi datira
suwung | sapisan pan nora nana ||

7. lan aja angaku yêkti | narimaa dene nora | iku pakone kang gawe |
wong tinitah anèng dunya | mung siji pakewuhnya | tan wênang

--- 175 ---

darbe karsèku | mung narah[10] lilah ing Allah ||

8. dèn eling-eling sayêkti | sakathahe kang tumitah | mangka yèn anaa
dhewe | wujude kalawan suksma | badan kalawan nyawa | puniku warana
agung | sipat cahya roh lan jasad ||

9. kang tan wruh tata kêkalih | puniku sangêt cidranya | amung sawiji
kawruhe | kaliwating sang utusan | kawruhe misih bakal | mokal dèn arani
èstu | uripe dèn aku Allah ||

10. sampun ta urip puniki | tan kêna ingaku Allah | suksmaning urip ta
mangke | kupur yèn ingaran Allah | kupur yèn ngembakêna | suksma
lawan uripipun | tan antara lawan Allah ||

11. Sultan Dêmak duk miyarsi | paturane kang mangkana | pakèwêd
angraosake | wasana alon ngandika | yèn makatên kisanak | kula ngudi
babaripun | salat kang mungguh ing badan ||

12. dununge sawiji-wiji | cundhuke lawan ngèlmu khak | têka kathah
ricikane | Pangran Panggung aris mojar | nênggih wantuning salat |
cundhuking ngèlmu linuhung | mangke tuwan pyarsakêna ||

13. salat luhur kang rumiyin | marmane patang rêkangat | duk sira
dinadèkake | tangan suku kapat pisan | dene ta salat asar | sakawan
rêkangatipun | inggih kadadiyanira ||

14. tangkêpaning dhadha kalih | pan talaga Kalkaosar | lawan gigirira
kabèh | gigir kering lawan kanan | salat mahgrib punika | ulun jarwa
dunungipun | marmane tigang rêkangat ||

15. êlènging grana kêkalih | miwah ta êlènging lesan | jangkêp têtiga
dununge | ana dene salat isya | mila rêkangat papat | ulun jarwa
dunungipun | inggih dumunung ing karna ||

16. kalih pisan dunungnèki | kalawan paningalira | jangkêp papat
rêkangate | dene salat subuh ika | mila kalih rêkangat | dadine badanirèki
| kalawan nyawa roh hayat ||

17. anane sunat talwitri | puniku sunat muakat |

--- 176 ---

tan kêna tininggal rêke | kêkalih rêkangatira | dadi kang winicara |
thukuling alis puniku | alis kanan alis kiwa ||

18. sunat rêkangat talwitri | jayetun lan labunira | mangkyamba
amojarake | dene kang naptu lêlima | puniku dèn waspada | kang
ndarbèni salat wêktu | andarbèni beda-beda ||

19. pan salat subuh kang wajib | kang ndarbèni Nabi Adam | duk kala
tinurunake | saking suwarga di mulya | apisah lawan garwa | langkung
susah kalhipun | dene tan ana rowangnya ||

20. wontên parmaning Hyang Widhi | Jabarail ngêmban prentah | dhawuh
mring jêng nabi rêke | paduka tampi sihing Hyang | ing mangke asalata |
rong rêkangat salat subuh | jêng nabi matur sandika ||

21. pukul lima pajar sidik | Nabi Adam nulya salat | kalih rêkangat salate |
uluk salam ngering nganan | kang garwa anèng wuntat | nauri salam
ngalekum | kalih parêng rêrangkulan ||

22. karantan karuna sami | jêng nabi alon ngandika | nora kaya ingsun
kiye | kapanggih kalawan sira | Dèwi Kawa tur sêmbah | inggih karsane
Hyang Agung | ulun panggih lan paduka ||

23. salat luhur kang ginupit | jêng Nabi Ibrahim kina | duk kataman coba
gêdhe | linêbokkên nêng tumangan | pan pinindha kunarpa | tampi
dhawuhing Hyang Agung | jêng nabi kinèn asalat ||

24. luhur arba barakatin[11] | jêng nabi anulya salat | dahana sirêp
kemawon | ana dene salat asar | Nabi Yunus lang karya | kala jêng nabi
marau | baita inguntal mina ||

25. jêng nabi susah tan sipi | anèng jroning wêtêng mina | wontên
parmaning Hyang Manon | jêng nabi kinèn asalat | asar patang rêkang |
jêng nabi asalat gupuh | kang mina tan kêlar nangga ||

--- 177 ---

26. bubrah awake ngêmasi | jêng nabi anulya luwar | saking jro wêtêng
minane | salat mahrib winicara | kang ngadani ing kina | panjênêngan
Nabi Ênuh | patopan kêlêming jagad ||

27. jêng nabi tobat tan sipi | rumasa yèn kaluputan | gya tinarima tobate |
anulya kinèn asalat | mahgrib tigang rêkang | wus salat jêng nabi wau |
ernawa wus sirna gêm pang ||

28. salat isya kang sayêkti | Nabi Musa ingkang karya | duk kala asor
yudane | amungsuh Raja Harkiya | para kaum sadaya | bingung tan wruh
ing lor kidul | kulon wetan ngarsa têngah ||

29. jêng nabi susah tan sipi | anulya asalat kajat | datan antara praptane |
Jabrail ngêmban parentah | uluk salam angucap | jêng nabi paduka gupuh
| dhinawuhan salat isya ||

30. matur sandika jêng nabi | tumulya asalat isya | pra kaum amulya
kabèh | Jabarail aturira | ulun kang malêsêna | marang Sang Pandhita
Balhum | têlas prakawising salat ||

31. Sultan Dêmak matur malih | inggih sampun katanggêlan | kawula
nyuwun artose | mênggah anasir punika | pintên kang pitêdahan | umatur
Pangeran Panggung | saking sêsêrêpan kula ||

32. pituduhing guru nguni | inggih pan amung sakawan | ananing anasir
batos | yèn anasir lair papat | matur Jêng Sultan Dêmak | suwawi mangke
dèn gupuh | wijiling pajar sajarwa ||

45. Mijil

1. Pangran Panggung angandika aris | pukulun sang katong | bangsa
anasir catur cacahé | ingkang dhihin anasiring Gusti | wêkasan winilis |
kasampurnanipun ||

2. êdat sipat asma af'al yêkti | dununge rinaos | bangsa êdat wujudira
anggèr | apa dene wujudé kumêlip | tan ana ndarbèni | mung Pangran
[Pa...]

--- 178 ---

[...ngran] Kang Luhur ||

3. ingkang gêdhe miwah ingkang cilik | pasangir pasêmon | iku
kagungane Allah kabèh | ananira nora darbe urip | mung Allah kang urip |
kang tunggal pandulu ||

4. dene bangsa sipat kang sayêkti | rupane kang katon | barang rupa
gêdhe myang cilike | saisine bumi lawan langit | tan ana ndarbèni | mung
Pangran Kang Agung ||

5. bangsa asma puniku sayêkti | araning dumados | sining bumi pan beda
jênêngé | inggih sadaya tan andarbèni | mung Pangran Kang Luwih | kang
darbe jêjuluk ||

6. têngesipun afê'al puniki | panggawe kang katon | sining bumi seje
pakaryane | seje jênêng seje kang pakarti | kabèh tanpa osik | mung Allah
Kang Luhur ||

7. sampun tâlas anasiring Gusti | gantya anasir roh | inggih sakawan
rêricikane | wujud ngèlmu nur suhut ranèki | yèn dèrèng mangarti | wiji-
wijinipun ||

8. liring wujud sajatining urip | urip kang sayêktos | ingkang aran manusa
jatine | yèn wadana sajatining èstri | pan ingkang alinggih | bandaru'llah
tuhu ||

9. kaping kalih pan ingaran ngèlmi | pangawruhing batos | bangsa ênur
punika têngêse | ingkang ingaran êroh ilapi | cahya kang nêlahi | kadya
lintang wuluh ||

10. dene kang bangsa suhut puniki | panêdyaning batos | dèn kaèsthi
cêngêng paningale | dipun awas ing sajroning takbir | anasir roh ênting |
dèn pracayèng kayun ||

11. anasiring kawula pinardi | dipun amangrêtos | bumi gêni angin lan
banyune | bumi punika dadine jisim | dahana pan dadi | cahya kang
umancur ||

12. angin dadya napas manjing mijil | banyu gêtihing wong | kapat samya
molah ngosikake | tarik-tinarik kalawan gaib | têlas bab anasir |

--- 179 - --

dipun awas êmut ||

13. Sultan Dêmak dahat sukèng galih | pinardiyèng wêwados | awasana
alon andikane | yèn makatên kularsa ngyaktèni | tekad kang prêmati |
maring Sangha-ulun ||

14. Pangran Panggung aturira aris | dhuh dhuh sang akatong | inggih
lamun makatên karsane | adhawuha arêrakit gêni | amba arsa basmi |
munggwing gêni murub ||

15. Sultan Dêmak kalêgan ing galih | parentah ponang wong | tan adangu
wus miranti kabèh | gunung kayu êduk lênga agni | wus rinakit
munggwing | anèng alun-alun ||

16. lawan anyuruhi para wali | kang waspadèng wados | pra ulama
mukmin sabangsane | wus apêpak andhèr praptèng ngarsi | Sang Prabu
Ngawanti | miyos ngalun-alun ||

17. Pangran Panggung kinanthi ing kering | wuri kirik karo | Iman Tokid
datanpa sah nggone | Sultan ing Bintara abêbisik | kinèn anglêkasi |
umanjing ing latu ||

18. Pangran Panggung lajêng ngandikani | ngatag kirik karo | cinêthètan
ana ing ngarsane | nênggih pun Iman lawan pun Tokid | pan kinèn
umanjing | sajrone ing latu ||

19. dyan umêsat kang canela kalih | manjing agni karo | sarêng lawan
kirik kêkalihe | manjing dahana arda mawrêdi | anèng jroning agni | kirik
lawan cripu ||

20. awêntala malah kirik kalih | samya abêburon | ngalor ngidul kang asu
solahe | wulunira salamba tan gigrig | kalis anèng agni | wus antara dangu
||

21. siningsotan kang kirik kêkalih | pan kadi inguwoh | gurawalan mêdal
sakarone | sarta agêm tarumpah ginigit | lir darbe pangarti | tundhuk
munggèng ngayun ||

22. ngaturakên tarumpah kêkalih | ingandikan alon | patrapêna ing ngêndi
ênggone | sona kalih amatrapkên aglis | ing palangkan adi |

--- 180 ---

kang ponang caripu ||

23. kang umiyat lêgêg tan kêna ngling | lênglêng ngungun ndongong |
pratingkahe pan ngêngeramake | mangunahe têka mratandhani | Sang
Prabu Ngawanti | angandika arum ||

24. dhuh ta paman sampun nyumêrêpi | ing rêh lampah elok | nanging
maksih kirang utamine | lamun botên andika pribadi | kang umanjing agni
| kirang antêpipun ||

25. dene amung asulih kêkirik | lan tarumpah karo | Pangran Panggung
alon ing ature | dhuh jêng sultan pan sampun kuwatir | manira pribadi |
kang umanjing latu ||

26. Pangran Panggung saksana anyangking | kamot ing asta ro | ingkang
têngên mangsi lawan êpèn | ingkang kiwa dalancang sajilid | dyan
umanjing agni | Jêng Pangeran Panggung ||

27. mantêp ing tekad tan was kuwatir | sapraptanirèng jro | lajêng
lênggah lawan angasta pèn | ponang papan dalancang tinulis | sasmita
inganggit | pan dhinapur suluk ||

28. purwakanya sêkar dhandhanggêndhis | tanduking pasêmon |
sariranya kang mangka talêre | sayêktinya mring Prabu Ngawanti |
palimping pêpeling | lamating tyas limut ||

29. Suluk Malang Sumirang wus dadi | mung sasêkar pangkon | pitulikur
pada sarিকে | amralambang sarasaning ngèlmi | pêpunting budi |
tekad kang tuwajuh ||

30. têteladan caritaning nguni | uwosing cariyos | Prabu Panji kang dadya
têtondhèn | duk maksihe pangeran dipati | murca kesah anis | namar
momor sambu ||

31. anèng Gêgêlang lumampah ngringgit | pan asandi wados | Dhalang
Jaruman ing pêparabe | kang umiyat kasamaran sami | ing mangkya
rinicik | sarkaraning kidung ||

--- 181 ---

46. Dhandhanggula

1. Malang Sumirang amurang niti | anrang baya dènira mong gita |
raryyanom tan wruh dudone | anggêlar ujar luput | anrang baya tan wrin
ing wèsthi | angucap tan wruh ing trap | kaduk andalurung | pangucape
layaluya | ambalasar dahat amalangsêngiti | tan kêna pinikalpa ||

2. andaluya kadêdawan angling | datan patut lan ujaring sastra | amurang
dédalan gêdhe | ambawur tatar tutur | anut marga kang dèn simpangi |

anasar ambalasar | amêgat kêkunthung | tan ana lampah dèn rewa |
Darma Aji kawingking tan dèn rasani | liwung kaya wong edan ||

3. idhêp adhêpe kadya rarywalit | tan angrasa dosa yèn dinosan | tan
angricik tan angronce | wus datan etang-etung | batal karam dèn ithi-ithi |
wus manjing abiwara | liwung tanpa tutur | anganggo kawênang-wênang |
wus kalêbu alame wong kupur kapis | tan kêna sinantaha ||

4. amurang sarak ujar sarèhing | acawêngah lan sabda pandhita | asuwala
lan wong akèh | winangsit andalung | kêdah anut marga tan yukti |
mulane ambalasar | sawab sampun antuk | jatining apuruhita | karantêne
tan ana winalangati | tan kênèng pringgabaya ||

5. pangucape wus datan pakering | tan ana bahyaning wong wikana | ing
kajatêne awake | tan ana bahyaning wruh | yêkti aja tinari-tari | pan
jatining sarira | tan roro têtêlu | kadyangganing rêringgitan | duk lungane
Sang Panji ngumbara singgih | kesah saking nagara ||

6. anèng Gêgêlang lumampah ngringgit | silih aran Ki Dhalang Jaruman |
amêndhêm kula bangsane | datan ana ingkang wruh | lamun Panji
ingkang angringgit | balolokên ing rupa | pan jatine tan wruh | padha
ngarani dhadhalang | dahat tan wruh yèn iku putra ing Kêling | kang

--- 182 ---

amimba dhadhalang ||

7. adoh kadohan tingale pangling | aparêk ing mangke kaparêkan | tan
wikan panji rupane | dèn sidhêp iku dudu | lamun rêke panji angringgit |
balolokên ing warna | sakèh kang andulu | lir Wisnu kalawan Krêsna | nora
Wisnu anging Krêsna Dwarawati | kang mumpuni nagara ||

8. wisesa Krêsna jatining siwi | kang pinudyèng jagad pramudhita | tan
ana wruh ing polahe | mung Krêsnajati Wisnu | kang amanggih datan
kapanggih | pan iya iku tunggal | ing kajatènipun | prakarane ana jagad |
amêtokkên kawignyan Sang Wisnu Murti | nyata kang aran Krêsna ||

9. kathah wong karêm dening kajatin | ciptaning wong durung puruhita |
dèn pisah- pisah jatine | dèn sêngguh sanès wujud | lan jatine kang

angulati | umbange wong kapiran | tambah kang dèn têtumu | iki ora ika
ilang | midêr-midêr jatine kang dèn ulati | tan wruh kang ingulatan ||

10. brahalane dèn gendhong dèn indhit | malah kabotan maring dandanan
| tur durung wruh sajatine | ciptane tanpa guru | ngamungakên jatining
tulis | awimbuh jatining Hyang | dèn tutur anggalur | tinurut kadi dèdalan |
sajatine dhèwèke nora kalingling | katungkul amêmilang ||

11. dosa gung alit kang dèn kawruhi | ujar kupur kapis kang dèn tulak | iku
wong mêtah kawruhe | sêmbahyang tan surut | puwasane dèn aji-aji |
tan kêna kasêlanan | kalimput ing kukum | kang wus têtaka ing wisesa |
sêmbah puji puwasa kang dèn ingganti | muhung sangkan lan paran ||

12. dosa gung alit kang dèn rasani | ujar kupur kapis kang dèn ulah | wus
liwung pasikêpane | tan na dulu-dinulu | tan angrasa tan angrasani | tan
paran-pinaranan | wutane wong iku |

--- 183 ---

pasthine dèn sidhêp nora | nora idhêp dèn sêngguh ana kêkalih | Kang
Amurba Misesa ||

13. yèn ingsun nyiptaa kang kadyèki | angur matia duk maksih jabang |
tan angetang tan angame | kathah kawongan prêlu | tata lapal kang dèn
rasani | sêmbahyang dèn gêgulang | puwasa tan surut | dèn sidhêp
anêlamêna | sumbalinga awuwuh andurbalani | akèh dadi brahala ||

14. pangrêngêningsun duk rare alit | nora Islam dening wong sêmbahyang
| tan Islam dening pangangge | tan Islam dening wêktu | datan Islam
dening kulambi | tan Islam dening tapa | ing pangrêngêningsun | ewuh
têgêse wong Islam | datan sêlam dening anampik amilih | ing kalal lawan
karam ||

15. kang wruh têtêse wong Islam iki | mulya wisesa jati kamulyan |
sampurna têtêyan omahe | wulune sagalêpung | brasta gêsêng tan ana
kari | anggane anèng dunya | kadya adêdunung | lir sang pandhita
ngumbara | sajatine wus mantuk Koripan malih | mulya putrèng Jênggala
||

16. tèmbe manira mangging wêwarti | warta anyar ambabar wicara |
kawilêt ujare mangke | tutur datan kawêngku | baya kuna iku kinunci |
dadya ingsun tan wikan | kagyat pun angrungu | mrih ilang angaji basa |
salawase durung wruh têngêse alip | dadya abukakrakan ||

17. apan padhang kadi tampaning sih | ing sihe mangke panunggalira |
awor wowor pan ing sihe | anggêlarêna tuwuh | sastra kabèh sampun
kalingling | nukat gaib pinangka | sastra kabèh iku | kang alim iku panutan
| sastra kabèh kang alip sastra kariyin | nukat pinangkanira ||

18. Alip iku pan badan ilapi | nugrahane mangke jênêngira | dudu Allah
sakarone | alip tibaning nêptu | dene datan ana momori | jênênge alip
lapat | sadurunge iku | jagad [ja...]

--- 184 ---

[...gad] dumadi wus ana | ing alipnya dene kinarya gêngenti | ananing
wujud tunggal ||

19. tunggal rasa tunggal wujud iki | tunggale mangke dinama-dama | tan
ana ngakên polahe | alip wujud kang agung | wujud mutlak kang alip iki |
iku jatining rasa | kadêdêre iku | kadêdêr iku lêlima | ingkang alip mata
wajah niat jati | iman lawan sarengat ||

20. jabare Allah mangke puniki | êjèrira iku Maha Mulya | pèsè iku
sucèhane | nora na Allah iku | pan wus sira Allah puniki | noraa dudu Allah
| Allah kabèh iku | lair batin iku sira | sastra kabèh gêngtine aksara alip |
Allah iku lah sira ||

21. kariyin kadêdêre kang alip | wiwitane mangke ing paningal | tingal
kang nyata tingale | paningale dat iku | paèsaning tunggaling jati |
tumurun jatinira | cahya kang tumurun | mungguh ing utêk punika |
ananira gumêlar ing jagad iki | cahya gumilang-gilang ||

22. satus pitulukur dadinèki | dadi tingal lawan pamiyarsa | napas pan
tunggal dununge | napas kajatènipun | ingaranan panji punika | panji
wayanganing dat | ing wuwus punika | dhatêng sakathahing imam | pan
sakèhe nêbuta kaanan jati | la ilaha illa'llah ||

23. ana pêksi mangku bumi langit | manuk iku endah ingaranan | sadêrah
uripe mangke | uripe manuk iku | amimbuhi ing jagad iki | netranipun
sakawan | warnane wêwolu | akulit sarengat ika | gêtihipun tarekat punika
singgih | ototipun hakekat ||

24. dagingipun makrifat puniki | sungsumipun sajatining sadat | êlêdan
tokid wastane | atinipun luk ênun | pêpusuhe supiyah nênggih | ampêrone
katijah | jantung budinipun | acucuk êmas punika | sungsumipun sakawan
warnanirèki | anyawa papat ika ||

25. uninipun ijrail puniki | socanipun yaiku [ya...]

--- 185 ---

[...iku] sakawan | anetra wulan srêngenge | napas nurani iku | grananipun
tursina nênggih | angahub soring arasy | kuping karo iku | wasta ing
gunung jabalkab | socanipun ra-ara tarwiyah nênggih | ing gunung
manikmaya ||

26. dhadha gigir lambung têngên iki | ingaranan macapat punika |
angombe rabbani mangke | awak nabi puniku | asuwiwi malaekati |
mencok ing Nabi Adam | kêpala puniku | Bagendha Ibrahim ika | utêkipun
betalmakmur iku singgih | pujine nêman prakara ||

27. iya iku dèn kawikan kaki | manuk iku têtungganganira | minggah ing
swarganta rêke | pilih kang wruh puniku | pan kinunci ing para wali |
manuk iku pan suksma | tanpa warna iku | têtunggangane kang awas |
manuk iku ya urip tan kênèng pati | têtèng dunya akhirat ||

28. titi tamat panganggiting nguni | nênggih kang Suluk Malang Sumirang
| kawruh ananing kajatèn | ya ta Pangeran Panggung | nulya mêtal saking
ing agni | sarya mundhi nawala | pan sampun pinêthuk | mring Sultan
Syah Alam Akbar | lawan sagung para wali myang ulami | gumuruh uluk
salam ||

29. sinauran salame pra sami | lan pra wali ajawaban asta | atur pudyèng
kaharjane | dènya manjing ing latu | têka tabik Nabi Ibrahim | suka sukur
ing Allah | Jêng Pangeran Panggung | ya ta Jêng Sultan Bintara | gurawalan
nêdya marêk mangênjali | supe lamun sri nata ||

47. Sinom

1. Pangeran Panggung samana | dahat dènira mambêngi | maring Jêng Sultan Bintara | dènnya kêdah mêngênjali | jawaban asta kalih | samya arsayèng tyasipun | sadaya kang

--- 186 ---

umulat | lênglêng ngungun tan kêna ngling | dene katon tingkah ing rèh kaelokan ||

2. ri sampunira mangkana | pustaka katur sang aji | kang Suluk Malang Sumirang | tinanggapan asta kalih | lawan dahat pinundhi | wau ta Pangeran Panggung | datan antara kesah | saking ing Dêmak nagari | alêlana masisir sakarsa-karsa ||

3. kirik kêkalih tut wuntat | saparanira lêlari | pun Tokid lawan pun Iman | warnanên wau kang kari | jêng sultan ing Ngawanti | kesahe Pangeran Panggung | dahat pangunguning tyas | lan anggyaning para wali | tan uninga kesahe saking panggènan ||

4. samya gêgêtnu kalintang | dene minglar tanpa warti | tan anganti tata lênggah | lawan jêng sultan Ngawanti | amung atur kintèki | anggitan sajroning latu | ingkang kinartèng basa | rinakêt sêkar artati | asasmita titining rèh kasunyatan ||

5. lan lare kang kalunyanan | rinèntès tutur angênting | yèn atam antuk utama | kanindhitan anartani | katartamtoning jati | laksitèng sawarti putus | puntoning tyas ambuntas | bontosing lair myang batin | jangji mantêp nêtêpi sarta prayitna ||

6. mangkana ponang pustaka | binuka sarahsanèki | mring jêng sultan ing Bintara | sangsaya ngungun tan sipi | tingkahira ing nguni | kados rumaos kaduwung | ing mangke kataliwang | sinawung rahsaning kawis | kawadaka wada wadaning wacana ||

7. kang awêca têtah murca | paran dènnya murcitani | ecane datan cancala | acêla cawêngah kapti | cêcalanging abêcik | oncate pan wus kabacut | catuning cêcathokan | cakêp kacakup ing budi | pênçarane gancare kang binicara ||

8. sanalika katarbuka | pangawikaning kintèki | tinakèkkên kang mardi
khak | kukama[12] ingkang

--- 187 ---

makiki | pustaka gya winingkis | winikankên para markum | kinèn
mupakatana | pustaka kang sinung kawis | amrih karya langkas
laksitaning kata ||

9. tata kang para oliya | nanggapi ponang kintèki | kang Suluk Malang
Sumirang | ganti-ganti nupiksani | sarahsane ginigit | pralampitane ing
ngèlmu | rajaputrèng Jènggala | amurca saking nagari | nèng Gêgêlang
laju nênamur dhadhalang ||

10. aran Ki Dhalang Jaruman | tan ana wruh lamun panji | ingkang lagya
angumbara | sinêngguh dhalang sajati | têkaning don ing nguni | mantuk
maring purwanipun | nênggih purèng Koripan | purna waluya sajati | pan
wus nyata yèn rajaputrèng Jènggala ||

11. duk samana tinarbuka | kêplasing rasa ginaib | maring Jêng Suhunan
Benang | hêh kanca pralambang iki | mênggah gagapan mami | tangsube
kalawan ngèlmu | pêpontoning makrifat | nênggih putra radèn panji | ing
Jènggala pralambang jaman kaanan ||

12. awit adarbe pêparab | Panji Inu Kartaparti | Jènggala darbe umpakan |
ing praja Jènggalamanik | manik rahsaning ngèlmi | lire prêmana puniku |
ngumbara pindha dhalang | dènnya nggêlarakên osik | ajêjuluk sira Ki
Dhalang Jaruman ||

13. punika pralambanging dat | iya anane kang pasthi | nanging tansah
mawa wrana | manggènè Gêgêlang nguni | pralambange ing urip | sayêkti
wajibu'lwujud | langgêng tan kêna owah | tan ana kang ngudanèni | lire
janma arang kang rasa kanggonan ||

14. antuke marang Jènggala | mring dalêm Koripan malih | pralambange
ing manusa | urip tan kêna ing pati | urip nêtêpi urip | nanging aja sêlang
surup | têngêse têtêpira | maring wiji kang sajati | lair batin sajatine iku
tunggal ||

--- 188 ---

15. iya Wisnu iya Krêsna | jatining kawula Gusti | kawulane pama wayang |
sucine dhalang sajati | ngibarate puniki | lir nyawa lan raganipun | pasthi
tan kêna pisah | gumêlare lair batin | nadyan panggulunge golong nora
ilang ||

16. kèndêl wau Sunan Benang | dènira amardikani | Jêng Suhunan Giripura
| sumambung dyan anglogati | Islam ingkang sayêkti | têngêse ingkang
dumunung | tan saking samubarang | lungguh ing jatining eling | kalal iku
kalêbu ing têngêsira ||

17. tan kang kalêbèku karam | sanadyan ahli ngabêkti | tan nganggo cara
ulama | masa wêktu rina wengi | mawa jubah kulambi | tapane dahat
anggêntur | yèn sêpên kaelingan | kênêng pambangusing[13] eblis |
têmah weda tan widada dadinira ||

18. sanadyan ahliya sarak | nganggo wêwalêring nabi | acêgah panggawe
karam | mung kandhêg ing aling-aling | nora têrus ing batin | tan
dumunung Islamipun | marma arang andungkap | ing têngêse Islam iki |
wose uwus kawawas wong kang waspada ||

19. ya ta anambungi sabda | Jêng Sunan ing Gunungjati | kang kocap
Malang Sumirang | paksi endah ingkang warni | amangku bumi langit |
sadêrah ing uripipun | uripe kang kukila | amimbuhi jagad iki | netra catur
wêwolu ing warnanira ||

20. akulit sarengat ika | gêtihê tarekat singgih | dene otote hakekat |
makrifat dagingirèki | cukup sadat sajati | tokid êlêd-êlêdipun | luk-ênun
atinira | pêpusuh supiyah nênggih | ampêrone katijah jantung budinya ||

21. acucuk êmas punika | sakawan sungsumirèki | anyawa papat
kathahnya | uninipun jabarail | soca sakawan isi | netra srêngenge
sitangsu | napas nurrani ika | kang grana tursina

--- 189 ---

nênggih | pan angahub anèng sangisoring arasy ||

22. kuping karo ing jabalkab | socanya tarwiyah nênggih | ing gunung ran
manikmaya | dhadha gigir kanan iki | macapat aranèki | rabbani
pangombènipun | awak nabi punika | suwiwi malekat iki | pencokane
anèng badan Nabi Adam ||

23. kapala Ibrahim ika | utêk Betalmakmur singgih | pujine ênêm prakara |
mungguh pralambanging paksi | iya pramana jati | sajati jatine ngèlmu |
dene panggonanira | anèng jagad sunyaruri | ngadam makdum alanggêng
tanpa karana ||

24. anane urip punika | sayêktine nukat gaib | wardine basa mangkana |
kaoling para musanip | nênggih karaton batin | sawênèhing para markum
| anêgêsi sêsotya | sotyaning wiji sajati | kang sawênèh njarwani wiji kang
samar ||

25. mungguh basa tri prakara | pan wus padha anggêpoki | poking papan
kang prayoga | masa borong ing pamikir | kêkêran iku ugi | dèn arapêt
dèn asêrung | rêrasan kang karana | rasakna rasikaning sih | aywa tansah
wor suh mungsêng ngadhuh ngêsah ||

26. kèndêl wau sabdanira | Jêng Sunan ing Gunungjati | sadaya
mangayubagya | ya ta sang prabu Ngawanti | wusnya dèn pradikane |
êrose rahsaning suluk | sulêking tyas nirmala | ngumala dumilah wêning |
manggung unang uninga kaananing khak ||

27. ri sampunira mangkana | Sultan ing Bintara mangkin | anêbar kang
wadyabala | nênggih kinèn amondhongi | saênggène kapanggih | sang
guru Pangeran Panggung | aturana mring praja | enggaling carita nguni |
wus kapanggih praptaning praja Bintara ||

28. tinunggilkên pra oliya | angimamana agami | mangka têtuwaning
praja | pinardika ulah

--- 190 ---

ngèlmi | sinungan pancèn sabin | nênggih siti uyun-uyun | pan sampun
kalaksanaan | sih nugrahaning narpati | Pangran Panggung têtêp
kawaliyanira ||

29. samana angalih aran | Jêng Sunan Gêsêng wêwangi | mangka
pêpengêtanira | ing kamulyan saking agni | ya ta kang para wali | tan lami
marsudi kawruh | pan saking karsa nata | ambawa kidung kakawin |
angêngimpu caturing caritèng kina ||

30. amrih dumadi darsana | rumêsêp dènnya ngêngudi | dèdalaning
kawidadan | apan sampun dèn ayati | ingkang ambuka anggit | lêlaguning
têmbang kidung | Jêng Sunan Giripura | minangka rêngganing kawin |
sinung nama têtêmbang asmaradana ||

48. Asmaradana

1. sadaya samya nahidi | laju kabyawarèng kathah | kinarya têmbang
lêlagon | nulya amurwa ruwiya | para wali sadaya | dèn urut pinatut
têmbung | tinêngran srat Walisana ||

2. lan pawukon wuryèng nguni | lêpiyaning jaman Budha | maksih
linastarèkake | yèn pawukon pananggalan | dina lawan pasaran | wuku
sarta dewanipun | padangon lan paringkêlan ||

3. apadene widadari | sêngkan turunan lêlima | pancasuda panunggale |
lawan petung paarasan | akarsa winêwahan | sêngkala nabi pêpitu |
sinung aran pana'asan ||

4. nênggih kinarya ngêmbari | lawan etang pasangan | lawan wontên
panganggite | pasangatan kang lêlima | anut jam-jaman dina | minangka
kêmbaranipun | nênggih dewa ari panca ||

5. cinundhukakên ing nguni | lawan kitab nujum ramal | nadyan dede
suraose | nanging sami darbe tandha | awon saening dina | samya kinarya
bêbaku | ngèlmu pirasat piyofat ||

6. dening pawukoning bayi | wuku lawan dewanira |

--- 191 ---

apa dene kêkayone | lawan manukane pisan | candra pralambangira |
miwah pangapêsanipun | tuwin tulak paliyasan ||

7. mêmulya asaput pranti | mawi winêwahan donga | mrih mupangat
karahayon | lan sarana mangka tulak | condhonging pujinira | sawusira
jêng sinuhun | anganggit namaning warsa ||

8. saking sastra bukaning wit | amiturut basa Arab | Alip Ehe Jimawale | Je
Dal Be Wawu Jimkhirnya | nganggit windu sakawan | angrisak windu
sapuluh | ing kina windu sangkala ||

9. umurnya sadasa warsi | riningkês catur kewala | pan wolung warsa
umure | kiniyas sawatêkira | wahyaning masakala | bumi gêni angin banyu
| ingkang samya winahanan ||

10. kang rumiyin windu Adi | watêke akèh dahana | akarya bilahi gêdhe |
anulya windu Kuntara | watêk akèh maruta | pancawarna angin banyu |
ingkang akarya sangsaya ||

11. windu Sangara kaping tri | watêke amirah toya | ping pat windu
Sancayane | watêke karya sangsaya | orêg rug ing bantala | têtah
anuwuhkên lindhu | pan windu catur punika ||

12. kinarya pathokan mangkin | pamuryaning pananggalan | kinanthèn
rolas sasine | kinarya kêmbaran masa | kang rumiyin Muharram | Shafarin
ping kalhipun | ping tiga Rabi'u'lawal ||

13. kaping pat Rabi'u'lakhir | kalima Jumadi'lawal | Jumadi'lakhir ping
nême | kaping kapitunya Rajab | kaping kawolu Sya'ban | Ramadhan ping
sanganipun | kaping sadasanya Syawal ||

14. kaping sawêlas kang sasi | winastanan Zu'lkaedah | Zu'lhijjah kaping
rolase | cundhuke kalawan dina | wuku miwah pasaran | pan samya
sinungan kuruf | parênganing windu warsa ||

15. ing satus rongpuluh warsi | umuring kuruf satunggal | nguni saking
Sunan Ngampèl | asal saking tanah Arab | awit kuruf Hadiyah |

--- 192 ---

nênggih Ahad têngêsipun | petang pathokaning dina ||

16. gantining ing kuruf malih | anulya kuruf Sabliyah | dina Sabtu
pathokane | gantinya malih Jam'iyah | lire kuruf Jumungah |
pêpathokaning pangetung | anulya kuruf Kamsiyah ||

17. ing têngêse kuruf Kêmis | pêpathokane ing dina | aganti Arba'iyah |
awit Rêbo ing pangetang | malihnya Salasiyah | Salasa ing têngêsipun |
awite angetang dina ||

18. saline ing kuruf malih | nulya kuruf Isnainiyah |[14] saking Sênèn
pangetange | jangkêp kang kuruf kasapta | ri sampuning mangkana |
malih ing panganggitipun | Jêng Suhunan Giripura ||

19. pamijèn sandhang rêjêki | lan panjang cêlaking yuswa | srat Paal nabi
pamirite |[15] lawan petang Sri Sadana | ginêlêng patang warsa | aju
undure ing petung | kèh kèdhike sandhang pangan ||

20. kalawan anganggit malih | etang têbiraning teja | lindhu banjir
panunggale | lan têbiraning grahana | candra kalawan surya | sampuning
panganggitipun | lajêng kajimrah ing kathah ||

21. sumêbar dumadya anggit | purwakan asmaradana | tinêrusakên
logate | asmaradana punika | lire karêm dèdana | labêt tarbukaning kalbu
| saking Hyang kang sipat murah ||

22. kêplase asmara kingkin | lambanging asmaradana | asma aran ing
têngêse | aran namaning Pangeran | andana awèh lirnya | dadya tan pêngat
tur-atur | sêmbah puji mring Pangeran ||

23. jêng sunan enjinge malih | manganam-anam ing driya | nulya nganggit
têmbang sinom | têngêse sinom punika | pradapa roning kamal | têruse ing
têngêsipun | sinom pan enur punika ||

--- 193 ---

24. sayêkti cahyaning urip | anom tan kênaning tuwa | kang pinudyèng
salawase | alanggèng tanpa karana | amimbuhi ing jagad | nulya Jêng
Sunan Majagung | nganggit têmbang maskumambang ||

25. lire pralambanging ngèlmi | kaantêpaning manusa | tekad kang
maring pêponton | lir gabus sinilêm toya | yêkti tansah kumambang | kang
utama ambêkipun | mas kinum tansah kumambang ||

26. pêtêng dadya padhang bangkit | cêkak bisa amêmanjang | kang awrat
kinarya ènthèng | ènthèng sangsaya tan kewran | angèndhêm myang
andhudhah | sadaya sampun kawêngku | wêwêngkone kang ginêlar ||

27. Sunan Kalijaga nuli | nganggit têmbang dhandhanggula | angajap
manis têngêse | pralambanging dhandhanggula | sayêkti pancadriya | pan
ati lêlima iku | sajati jatining sipat ||

28. pramana ingkang rumiyin | nganakkên kabijaksanan | pakarti ingkang
kinaot | kaping kalih munggèng karna | nganakkên kalêpasan | kaping
tigane ing irung | nganakakên kasantosan ||

29. kaping cature ing lathi | nganakakên kalêksanan | kalaksananing
lêlakon | kaping limane ing buja | paliwaraning karsa | anganakakên
puniku | ing wisesaning panunggal ||

30. sawusnya nulya anganggit | suluk kidungan pujian | pralambanging
ngèlmu jatos | lawan anganggit carita | jamaning Majalêngka | Ki Sutakara
kasêbut | Suta Micik dhusun Jombang ||

31. lan Jaka Sumantri Pêngging | timure Andayaningrat | ginancarkên
lêlakone | kalawan anganggit petang | kêkiyamaning dina | dadya
pambatang yèn nuju | janma akelang-kelangan ||

32. lamun nuju Dite ari | kalawan ing ari Tumpak | yèn kelangan tulus
anglès | bali maning [ma...]

- -- 194 ---

[...ning] lamun Soma | Anggara padha rowang | Budha pênêtan puniku |
yèn Rêspati datan ilang ||

33. Sukra ngadhang dalan yêkti | jangkêp ingkang saptawara | warah
awon lawan sae | anulya Jêng Sunan Benang | anganggit sêkar durma |
nênggih macan têngêsipun | pralambanging sêkar durma ||

34. pan nêpsu kawan prakawis | kang dingin nêpsu amarah | anênggih
abang cahyane | ping kalih nêpsu luamah | irêng ing cahyanira | nêpsu
supiyah ping têlu | andarbèni cahya jênar ||

35. mutmainah cahya putih | sasampunira mangkana | nulya anganggit
cariyos | janma prajêng Majalêngka | lampahan Damarwulan | praptaning
antuk bagya yu | dumadi gambuh kamuksan ||

49. Gambuh

1. pêparênganing catur | Sunan Muryapada nganggit pangkur | lire buntut
kêplase pralambang ngèlmi | nênggih punika pangukud | pambirating
manah awon ||

2. kanêpson dunungipun | munggwèng anèng wisesaning kayun | Sunan
Giri Parapèn tumut anganggit | pan punika kadangipun | Jêng Sunan Giri
Kadhaton ||

3. nganggit sêkar mêgatruh | têngêsipun pan anêrang jawuh | kêplasipun
ing jarwa têrusing ngèlmi | amêgat êroh puniku | pangracuting alam katon
||

4. mrih êning dunungipun | anèng kaananing ênêngipun | parêngannya
Jêng Suhunan Gunungjati | pan anganggit sêkar pucung | wit kluwak
artine raos ||

5. lawan pangraos iku | yêkti mangka pêpucuking kayun | panunggale
kawula kalawan Gusti | asipat kalawan wujud | winawasa kang waspaos ||

6. ing kaprasidanipun | sidining driya kang amrih [a...]

--- 195 ---

[...mrih] sadu | awidada panduk pandoning dumadi | kawaspadan tan kadaut | dyatmika têkaning maot ||

7. sawusnya Jêng Sinuhun | ing Gunungjati nggupitèng kidung | jamanira prajèng Pajajaran nguni | ing purug léluripun | salasilahing karaton ||

8. awit jumênêngipun | Sri Maèsatandrêman ing dangu | praptanira adêge ing Majapait | Jêng Sunan Gêsêng winuwus | anganggit sêkar pamiyos ||

9. wiyose yêkti wêktu | wêktu kaananing urip iku | urip iku jatining wiji sajati | dèn awas wasananipun | tarman puntuning pêponton ||

10. sawusnya jêng sinuhun | nulya nganggit cariyos winangun | pêparênging jaman prajèng Majapait | Jaka Sujanma ing dangu | sutèng Brawijaya Katong ||

11. Dhadhapan dhukuhipun | wusing mangkana têmbang sadarum | pan kinarya rêrêngganing kidung kawin | sinungan aran puniku | têmbang macapat lélagon ||

12. parênca têngêsipun | warna-warna seje têngêsipun | têmah lajêng sumêbar dumadya anggit | sawênèhing para markum | nênggih andarbèni kaol ||

13. macapat têngêsipun | nguni pêthikan pan etung catur | ingkang dhingin ngraras saking sêkar kawi | sêkar agêng têngêsipun | saking slisir kang kapindho ||

14. têngahan kaping têlu | kaping pate macapat puniku | yêkti kêna ingaranan têmbang cilik | nênggih wontên kaolipun | saking pandhita kinaot ||

15. têmbang macapat wau | apan kaliru ing sastranipun | ing bêtêre mancarpat artinirèki | manca lèlima puniku | arpat têngêse sumaos ||

16. lawan sewaka iku | dadi sewakaning limang têmbung | kang dèn adu ingêdhongkên pindha

--- 196 ---

gêndhing | dhingin laknyana puniku | ulu ingkang kaping pindho ||

17. suku kang kaping têlu | dene kaping pate iku tarung | kaping lima
talingan samya ndarbèni | dirga entaraning têmbung | panêngêraning
lêlagon ||

18. nulya wali sadarum | anganggit pananggalaning ngèlmu | beda-beda
dadining dêlahan nunggil | kinumpulakên ing kawruh | sêsurupan kang
kinaot ||

19. Sunan Giri rumuhun | ananing dat gêgêlaranipun | Suhunan ing
Tandhês anggêlarkên ngèlmi | wahananing dat winuwus | gaibe rèh wèh
waspaos ||

20. Suhunan ing Majagung | kaananing dat wêjanganipun | Sunan Benang
anggêlarkên ingkang ngèlmi | nênggih ing pambukanipun | tata malige
rinaos ||

21. ing dalêm Bait-al-ma'mur |[16] Sunan Muryapada wêjangipun |
pambukane tata malige ing nguni | dalêm Bait-al-muharramu |[17] kunêng
malih winiraos ||

22. anênggih Jêng Sinuhun | Kalinyamat wêwêjanganipun | pambukane
tata malige sajati | Bait-al-mukaddas jronipun |[18] Jêng Suhunan ing
Carêbon ||

23. wêjanganipun ngèlmu | ing panêtêp kasantosanipun | Iman Kangjêng
Suhunan Kajênar nguni | nênggih gêgêlaranipun | sasahidaning dumados
||

24. kalih pangkat winuwus | wontên gêlaran wêjanging ngèlmu | pan
wêwolu panjênêngan para wali | ingkang ginita rumuhun | nênggih
tarbukaning sinom ||

50. Sinom

1. babaran pangikêtira | nênggih Jêng Suhunan Giri | Parapèn wêjanganira
| jatining raos winisik | ananing dat tajali | ingkang langgêng wujudipun |
sinasmitèng pralambang |

--- 197 ---

Jêng Suhunan Atasangin | pan amêjang gêlaran kaananing dat ||

2. Jêng Sunan ing Kalijaga | wêwêjanganirèng ngèlmi | tata malige punika
| ing dalêm Bait-al-ma'muri |[19] lan ambabar rêricik | parobotira sadarum
| patrap jênêngirèng dat | nanging dèrèng dèn rêrakit | patrap pratikêlê
satunggal-satunggal ||

3. dene Jêng Sunan Têmbayat | kalilan Jêng Sunan Kali | amiridakên
wêjangan | pambuka malige jati | ing Bait-al-muharrami |[20] Sunan
Padusan ngglar kawruh | tata maligenira | dalêm Bait-al-mukaddasi |[21]
Jêng Suhunan Kudus wêwêjanganira ||

4. têtêp santosaning iman | Jêng Sunan Gêsêng ing nguni | nggêlarakên
sasahidan | panganggite para wali | êros rahsaning ngèlmi | anunggil
suraosipun | karena ngèlmunira | wêwiridannya anunggil | sami saking
Jêng Suhunan Ngampeldênta ||

5. kumpule kang sêsurupan | ginêlêng dadya sawirid | wiji wêjanging
wêjangan | jinêjêr sajroning tulis | dene kang dèn calangi | cacalane anak
putu | yèn tan dadya mukmin khas | bok tibèng kawula langip | pan
minangka pikukuh kakating tekad ||

6. ri sampuning kalampahan | panganggiting para wali | karsaning Sultan
Bintara | kang samya ulah agami | sinung wêwaton sami | saking Kur'an
mukilipun | mamrih angèstokêna | kamulyaning para nabi | dadi sidik
sidaning ngudi ngibadah ||

7. kang kocap layang Ambiya | pan ayating kangjêng nabi | kang wus
sinungan hidayat | ilham rinilan ing kardi | kitab watoning tulis |
panjênêngan nabi wolu | rumuhun Nabi Adam | katarbuka saking gaib |
pan akarya kitab kathahe sadasa ||

8. Nabi Êsis pan akarya | waton kitab sèkêt iji | Nabi Idris pan akarya | kitab kèhe tigang [ti...]

--- 198 ---

[...gang] dèsi | dene Nabi Ibrahim | akarya kitab sapuluh | pan Kangjêng Nabi Musa | mung karya kitab sawiji | kitab Torèt panêtêking kasantosan ||

9. Nabi Dawud pan akarya | kitab Jabur mung sawiji | dene ta Jêng Nabi Isa | pan akarya kitab Injil | gégêlêngan sawiji | dene Kangjêng Nabi Rasul | Mukhammad karya Kur'an | myang kitab gunggungirèki | pan ingetang cacah satus kawan dasa ||

10. dene nabi kang sinungan | wahyu nurbuwating Widhi | kang samya mêngku sarengat | katrahan malekat nabi | pan amung nêr winarni | Nabi Adam kang rumuhun | nênggih kaping sawêlas | Nabi Musa kaping kalih | katurunan malekat ping kawan dasa ||

11. Nabi Nuh kang kaping tiga | katurunan limang dèsi | dene ping pat Nabi Isa | kaping ro wêlas nuruni | Kangjêng Nabi Ibrahim | kaping sawidak anurun | ping nêr Nabi Mukhammad | kaping rong lêksa nuruni | pan kinarya beda budi kang utama ||

12. dene ta sarengatira | ing nabi sawiji-wiji | sarengate Nabi Adam | ngalalakên laki rabi | lan sadulur pribadi | sarengate Jêng Nabi Nuh | angalalakên mangan | ing kirik gumêlo yêkti | Nabi Ibrahim ngalalakên nginum arak ||

13. sarengate Nabi Musa | dosa pati dèn patèni | sarengate Nabi Isa | hukum pati nora mati | Jêng Nabi Mukhammadin | Mustafa ingkang rinasul | winênang rabi papat | dene panjênêngan nabi | ingkang sinung mêngku kang cahya nurbuwat ||

14. lan mêngku wahyu kukumah | katiga kocap ing tafsir | ingkang dhingin Nabi Adam | Nabi Musa kaping kalih | nabi rasul kaping tri | nabi kang umadêg ratu | pan nêrêm kathahira | kang tampi hidayat jati | lan amêngku wahyu kukumah têtiga ||

--- 199 ---

15. Nabi Yusuf purwanira | Jêng Nabi Dawud ping kalih | ping tiga Nabi Suleman | nabi kang madêg narpati | Nabi Adam rumiyin | Malebari prajanipun | kalêbêt tanah Arab | Nabi Yusuf tanah Mêsir | pan Jêng Nabi Mukhammad nagri Madinah ||

16. nabi kang mêngku agama | pan nênem kathahirèki | ingkang dhingin Nabi Adam | Nabi Nuh kang kaping kalih | ping tiga Nabi Brahim | Nabi Musa kaping catur | ping lima Nabi Isa | ping nênem pan kangjêng nabi | kita ingkang rinasul nayakaningrat ||

17. kang binuka karya Kur'an | mangka pemuting dumadi | pan pinara tigang dasa | êjus surate rininci | Kur'an kathahirèki | satus pat bêlas babipun | dene sirahing surat | ing Kur'an tanjul arasi | apan kèhe pan iya satus nênem bêlas ||

18. titine surating Kur'an | satus ro wêlas kèhnèki | dene ta ayating Kur'an | rong èwu rong atus nênggih | punjul pitulas iji | kalimahing Kuranipun | kathahe têlung lêksa | nênem èwu rong atus nênggih | pan sadasa lan pitu sirahing Kur'an ||

19. arane surat Fatikhah | sirahing Fatikhah nênggih | dumunung anèng bismi'llah | sirahing bismi'llah alip | alip nukat kang dadi | sakèhing aksara iku | kang anèng jroning Kur'an | kasêbut nur Mukhammadin | wêwijange sawiji-wiji dèn ajad ||

20. Alip tansur jênêngira | anèng kitab Torèt dadi | erabe[22] ing Kur'an jabar | tuduh Mukhammadiyah | loro aksara alip | istilah jêjulukupun | jênênge anèng kitab | Injil êrabe pan dadi | Kur'an dadi jèr tuduh johar Mukhammad ||

21. ping tri alip aranira | pan mutakalimun waktu | kitab Jabur jênêngira | êrabe Kur'an Kuran pan dadi | [23] êpès tuduhirèki | anênggih jumênêngipun | Kangjêng Nabi Mukhammad |

--- 200 ---

kapat arane kang alip | pan khurufu'lluwakit ing jênêngira ||

22. anèng ing kitab Anbiya | erabe ing Kur'an dadi | tanwin sayêkti atêdah
| Mukhammadan adam sarpin | sirahing sastra alip | adêge ing iman iku |
naptu gaib siru'llah | ya Allah Rasulu'llahi | kawuwusa pan tatakramaning
Kur'an ||

23. kang rumuhun iku kir'at | kaping pindho aran jais | matlajim kang
kaping tiga | êmat kaping patirèki | jakafi limanèki | atartil ping ênêmipun
| matmufasil ping sapta | kaping wolu matmutasil | ingkang kaping sanga
aran bilagonah ||

24. mangalgonah ping sadasa | ilham sawêlasirèki | kaping ro wêlase ilhar
| ping tri wêlas ikhar nênggih | patbêlas ikhlas malih | kaping gangsal
wêlasipun | ihfa kaping nêmbêlas | ilfa ping pitulas mangkin | pan istika
dene kang kaping wolulas ||

25. pan ingaranan kalkalah | kabèh iku dèn arani | bangsane ing
tataswara | gantya aksara winilis | ingkang anèng ing dhiri | pinardika
wardinipun | dunungnya sowang-sowang | kang rumuhun aksara lip | pan
punika murwani jênênging iman ||

26. lungguhe ngisoring grana | munggwèng saluhuring lathi | kabèh kang
anandhang iman | sayêkti mangkono sami | kewan sabangsanèki | miwah
bêburon sawêgung | tan ana kasinungan | marma micara tan bangkit |
sayêktine muhung anèng ing manusa ||

27. mungguh têngêse manusa | kaole para utami | murade awarna-warna |
yèn Sunan Ngampèl ing nguni | dènira anjarwani | dene manusa puniku |
pinilah kalih pangkat | man têngêsipun linuwih | dene têngbung nusa
jinarwanan jagad ||

28. kêplase ing kumpulira | kaluwihane ing bumi | apadene tapêl Adam |
manusa asaling bumi |

--- 201 ---

yèn Sunan Atasangin | basa manusa puniku | sanadyan kalih kalpa | sanès
larikane nguni | manu iku mani esa pan satunggal ||

29. kêplase rasane pisan | pan toya ingkang piniji | pinuji mêtjèni jagad |
tan pae lan Mukhammadin | murade iku sami | manusa panutanipun |

yêkti Nabi Mukhammad | têtus lan duk maksih gaib | purwaning roh pan
saking ênur Mukhammad ||

30. isbate alip punika | mênang lair lawan batin | aksara êbe punika |
lambe wiwitan winarni | lambe ngisor lirnèki | marmane ingaran iku | iya
lambe wiwitan | dene mosikakên uni | miwah lawan wêdhare ing
pangandika ||

31. aksara ête punika | mungguh talêsihing wardi | pan iya ilat wêkasan |
kolure marang ing sêntil | marma acêcêk kalih | marga rong prakara iku |
sawiji mring têtêdhan | samubarang kang binukti | kaping pindho inuman
bangsane toya ||

32. aksara êce punika | mupakating para mukmin | têngêse rasa ganjaran |
dumunung tigang prakawis | asalira ing dhiri | yêkti saking Bait-al-ma'mur
|[24] lawan Bait-al-muharram |[25] têlu Bait-al-mukaddasi |[26] iya iku
pasamohaning Triloka ||

33. aksara êjim punika | jajantung têngêsirèki | ênggon kêmbênganing
karsa | kang nggêlarakên ing budi | dene ahe winarni | ing ngurip ta
têngêsipun | jatine iku cahya | pangarêp urubing budi | iku uga ingaran
kanthining atma ||

51. Kinanthi

1. akhe gêdhe kang winuwus | ujure para musanip | têngêse urip pamolah |
ya iku raga sayêkti | kang kanggonan pancadriya | antuk karêntêking osik
||

2. êdal cilik malhipun | lire ing dhadha kang

--- 202 ---

kering | êjal gêdhe dhadha kanan | rê gigir kiwa ningali | zai[27] gigir
têngên punika | artine malih ngawruhi ||

3. sin cilik ing têngêsipun | ambêkan maha sucining | ya iku jatining napas |
êsyin gêdhe rasa jati | tsad pan lêlamating netra | ya iku pramana êning ||

4. dlad paningal ati sukur | êthe ati angulati | tle angên -angên têngêsnya |
sajati-jatining eling | ain lire lambung kiwa | ing lambung têngêne grain
(ogin) ||

5. efe ati putih iku | Mutmainah kang sajati | êkaf dhadha kof apadhang |
lam sawêlah rêhing kapti | mim iku sikiling suksma | nun têngêse nora sêrik
||

6. dene ta aksara wawu | logate awèh rêjêki | aksara êhe punika | murade
mungkuling urip | lam-alip pan tunggal badan | ambyah roh ya jasad jati ||

7. tamat pêpathokanipun | mungguh wong laku agami | pan samya
angugêmana | dadya agêmaning ngèlmi | awèh makdum amanpangat |
têmên kataman utami ||

8. dadi parabot satuhu | kêna minangka sêsaring | sarana saking sarengat
| pêpêngêtaning wong langip | nadyan ngêlangut kaliwat | lawas-lawas
angawruhi ||

9. nihan mangkya kang winuwus | Sèkh Sitijênar ing nguni | sangsaya
karya sandeya | maring sagung para wali | Jêng Sunan ing Giripura | matur
Sang Prabu Ngawanti ||[28]

10. sapratingkahnya sadarum | dènira angorak-arik | saruning sarak
sarengat | jumênêng guru gêgurit | rosing sarasèng rêrasan | akarya
suwunging masjid ||

11. lamun awèta tumuwuh | ical batuwahing nguni | ta[29] wontên purun
sêmbahyang | ical caraning nagari | anggêre guru dèn arah | sumurah
anut kang murid ||

12. lawan cariyosing dangu | nalimpêt panglimpêt

--- 203 ---

ngèlmi | tan saking wiji wêjangan | arda marsadu anilip | nêlêm saluman
ing lampah | milalah amalik warni ||

13. mangka adat kukumipun | punika dipun pêjahi | ngandika Sultan
Bintara | inggih rinêmbaga sami | manira sampun pracaya | ing pratingkah
gampang rumpil ||

14. Jêng Sunan Giri agupuh | anyuruhi para wali | pan sampun prapta
sadaya | Sunan Giri anulya glis | mêdharkên karsaning nata | wali sadaya
ngamini ||

15. Pangran Sitijênar sampun | tinimbangan saking Giri | sapraptanira
samana | lan sabat kapitu ngiring | ginêdhêg gadhuging tekad | tan owah
kadya ing nguni ||

16. Sunan Kalijaga gupuh | sinasmitan Sunan Giri | saksana anarik
pêdhang | pan sarywa ngandika aris | hèn kisanak iki paran | Pangran
Sitijênar angling ||

17. gaib arane puniku | yêkti dumunung ing pasthi | parênging sih
rahmatu'llah | yèn tumama karya lalis | pan dadya suwarga mulya |
wasanane alam akhir ||

18. kang sru kinêkêr sinêrung | rosing sarahsa sajati | mangkya arsa babar
pisan | sampurna ing ênêng êning | kaonang-onang kanang rat | paran ta
dipun upadi ||

19. pêdhang tinibakkên sampun | mring Pangeran Sitikuning | pêdhot
jangga kapisanan | kang rah sumamburat mijil | dinulu abang mbaranang
| Sunan Kali mèsêm angling ||

20. lah ta iki warnanipun | kang wantêr amuntu pati | pan maksih lumrah
kewala | gêtihe pan nora putih | jisime pan maksih wantah | wujud pan
maksih kèksi ||

21. ponang ludira tan dangu | pan amalih warni putih | kang jisim kinukud
nulya | kinêbat saking sakêdhik | tan kumêdhap idhêpira | panoning rat
kang umèksi ||

22. dupi wus mèh pasang surup | kantun katon sakêmiri |

--- 204 ---

kacaryan mancala cahya | gumilang-gilang nêlahi | awarna catur prakara |
abang irêng kuning putih ||

23. tan antara gya rinacut | byar cahya manca kawarti | cahya wungu
kang kapisan | cahya biru kaping kalih | cahya ijêm kaping tiga | dadu
kaping patirèki ||

24. cahya jingga limanipun | tan dangu kinukud malih | pan dadya cahya
gumilang | prabanira anêlahi | pan kadya pêputran dhênta | tan antara
nulya gaib ||

25. sampurna kaananipun | punang ingkang warna putih | sakala istha
sêratan | winaca kang para wali | ungêle ponang aksara | la ilaha ila'llahi ||

26. sawusnya rah asumêbut | rinacut datan kaèksi | Jêng Sunan ing
Kalijaga | pangandikanira wêngis | pan kaya patining setan | jisim ilang
tanpa lari ||

27. wau kang murwêng don luhung | atilar wasita jati | he manusa sesa-
sesa | mungguh ing jamaning pati | ing rêh pêpunting tekad | santa
santosaning kapti ||

28. nora saking anom rungu | rêringa rêngat siningit | labêt asalin salaga |
salugune dèn ugêmi | ing pangagêmaning raga | suminggah ing
sanggarunggi ||

29. marmane sarak siningkur | karana angrêribêdi | manggung karya was
sumêlang | êmbuh-êmbuh dèn andhêmi | iku panganggoning dunya | yèn
ing pati nguciwani ||

30. sajati-jatining ngèlmu | lungguhe cipta pribadi | pusthining
pangèsthinira | ginêlêng dadya sawiji | wijanging ngèlmu dyatmika | nèng
kaanan ênêng éning ||

31. kèndêl swara kang karungu | wau ta Jêng Sunan Giri | alon dènira umojar | hèh kanca wasitèng wangsit | yèn rinasa sarasanya | puntoning pati patitis ||

32. tan kewran waranèng kawruh | nanging tanduking [tan...]

--- 205 ---

[...duking] awadi | pandoning murwèng dêlahan | sidi sidaning don adi | dumadi ywa kawadaka | linintu wanda samangkin ||

33. wali sadaya jumurung | saksana Jêng Sunan Giri | anyipta kang dêbog lusah | wus antuk sinabdan aglis | mangka lintuning kuwandha | Pangeran ing Sitiabrit ||

34. wus awarni jisimipun | para murid dèn timbali | kapitu wus praptèng ngarsa | tinodhi rèh paran kapti | murid kapitu aturnya | kèdah mèlu bela lalis ||

35. labuh labêtaning guru | angugêri lair batin | abantu bêbantên atma | para wali tan nêdyapti | rèh datan kadrêsan dosa | sangsora[30] yèn misèsani ||

36. adrêng andarung tyasipun | sabat kapitu rumanti | tumuntur sang puruhita | mantêp nêdya bela pati | dyan musthi ponang curiga | sadaya wus angêmasi ||

37. para wali langkung ngungun | wontên malih ingkang prapti | sabat satunggal kumêdah | ngudi ambelani pati | ing guru kang wus sampurna | Sunan Giri lingnya manis ||

52. Dhandhanggula

1. aywa sira adrêng rèhing kapti | gurunira aliwat druhaka | muhung sinanggaa dhewe | ya apa pedahipun | anglabuhi wong dosèng Widhi | marmane kawisesa | trang karsaning ratu | lupute ambubrah sarak | kang wus padha ingimanakên narpati | lakuning kuna-kuna ||

2. angugêmi agême ing ngèlmi | ngorakakên ing sarak sarengat | wus ana anggêr-anggêre | ingkang muni ing kukum | anêmahi ingukum pati | ing Arab Sèkh Mubarak | têpane ing dangu | iya kukum ing nagara | dene wani angimanakên agami | ugêr agême nata ||

3. sabat kang liningan matur aris | dhuh jêng sunan dhawuh kang mangkana | sanadyan nistha patine | yèn sampun jangjinipun | botên kenging dèn sêngguh nênggih | punika pati

--- 206 ---

siya | marmamba umatur | cumanthaka tar wrin angga | awit sêsêrêpan yèn sampun dèn èsthi | ngèlmune botên ical ||

4. pêpunting tekad wus dèn rakit | têkaning tokid pan wus pinasang | sumarah sarasaning rèh | lair batin kawêngku | pangawikan kang dèn wekani[31] | sumambung jêng suhunan | ing Carêbon gupuh | bènêr wuwusmu mangkana | nanging ana ing dunya kudu angudi | dadining kanyataan ||

5. katrimane wong ngimankên ngèlmi | mara payo jisime dèn enggal | paripurnanên bêcike | pinêtak kang pakantuk | antarane ing têtung bêngi | enjange dèn dhudhuka | yèn gandane arum | mratandhani yèn katrima | antuk swarga yèn gandane arus bacin | yêkti tan katarima ||

6. sabat siji manut rèhing kapti | layon dêbog pan sampun pinêtak | sampun ingantawisake | jangkêpe tigang dalu | layon pindhan dhinudhuk malih | mring sabat kang anandha | gandanipun arus | badhêg pêngus[32] bêlarongan | atur tobat wêkasan tumut anyantri | pra wali langkung suka ||

7. ponang jisim wus ngurugan malih | ya ta praptaning antara dina | kapiyarsa ing garwane | yèn lakinira lampus | anèng Giri Pangran Sitibrit | patine tanpa dosa | langkung mêngsulipun | sanalika lajêng dandan | lan ambêkta kulawangsa sawatawis | praptaning Giripura ||

8. njujug ngarsane Jêng Sunan Giri | têtambung gugat datan anarima | sapatine ing lakine | tan wontên dosanipun | anêmahi pati tan yukti | kalamun makatêna | punapa sinuhun | ical dènira kinarya | wali mulya nglampahi siya ing dasih | ngarenah nganiaya ||

9. dados kasêbut yèn kirang sidik | mangka pantêse ambêk sagara |
Sunan Giri andikane | nimbok [nim...]

--- 207 ---

[...bok] mung darma ingsun | anglakoni karsaning aji | marmane kawisesa
| somahira iku | labête anandhang dosa | ngrusak sarak nggorohi rêhing
nagari | Ni Lêmahbang aturnya ||

10. kadipundi karsane sang aji | têka damêl karênah ing wadya | amisesa
sakarsane | pan ratu sipat luhur | sipat maklum lan sipat asih | apan laki
kawula | mung mêmêjang ngèlmu | kasampurnaning ngagêsang | yèn
cidraa dados lêpat ing nagari | alah inggih punapa ||

11. para wali sami dèn lilani | mêtangakên amêtang ngèlmu khak | mawi
beda pêpandume | yèn lakyamba kang lampus | nêrak sarak tan[33]
nggêgorohi | ngèlmunipun abatal | jidik wêkasipun | sayêkti para oliya |
botên sanès inggih makatên pinanggih | kados laki kawula ||

12. Sunan Giri kewran ing panggalih | kèndêl manganam-anam ing driya |
katarbuka wangsulane | manuhara ngêngimur | yayi aywa sandeyèng
galih | patine lakinira | manggih swarga luhung | wit wus dadya
patêmbaya | nora nistha malah utama ing pati | putus ing kasunyatan ||

13. yêkti ingsun mung minangka margi | anjalari ngatêrkên dêlahan |
cangcut pancating kapatèn | lair batin kawêngku | Ni Lêmahbang duk
amiyarsi | tanduking pamindaka | ragi darbe lipur | wasana alon ngandika
| yèn makatên nyuwun pratandha ing mangkin | tandhaning katarima ||

14. Sunan Giri kèndêl mèsu budi | budidaya dadining mangunah |
angênêngakên êninge | gya mudhar ing sabda rum | lah ta yayi mara dèn
aglis | tumêngaa ing wiyat | paran kang kadulu | angèstokkên Ni
Lêmahbang | sanalika lajêng tumênga manginggil | katon kang langit
bêdhah ||

15. sarta katon sawarga sarwa di | tanpa timbang yèn ing alam dunya |
lakine lungguh ing bale | kang rinêngga raras rum | nunggil lawan kang
para nabi | sawusnya Ni Lêmahbang | pan katuju mungkul | langkung suka
anarima |

--- 208 ---

lamun benjang yèn amba nusul ing laki | mantuk ing rahmatu'llah ||

16. kadongakna sagêda anunggil | wontên kaanan ingkang minulya |
Sunan Giri ngèstokake | pangèsthining tyas sampun | Ni Lêmahbang
anulya mulih | lawan sakulawangsa | wuwusên kang kantun | Jêng
Suhunan Giripura | duk samana wus angaturi udani | lunase Ki Lêmahbang
||

17. sakalangkung sukurirèng Widhi | kang mungkasi Sunan Kalijaga |
mangkana wau karsane | Sultan Bintara gupuh | aparentah kinèn
mondhong | mring Sunan Kalijaga | pundi kang sinarju | pasitèn prajèng
Bintara | wadyabala kang dinuta mangkat aglis | praptaning Kalijaga ||

18. duta matur yèn kinèn mondhong | adalêma wontên ing Bintara |
mêmihiha sakarsane | pasitèn kang pakantuk | Sunan Kali ingkang pinilih |
Kadilangu kewala | kang duta jumurung | sanalika gya boyongan |
Kadilangu pan sampun pinasang rakit | pantêse padhepokan ||

19. kaature Prabu ing Ngawanti | sakalangkung suka sukuring tyas |
pinapudyèng kaharjane | para wali jumurung | têtêp mangka pusakèng
nagri | ambaurêksèng praja | ing salaminipun | tan ana sangsayanira |
ênêngên ing mangkya wontên winarni | parênganing lampahan ||

20. nênggih Buyut Paningrat ing nguni | mantunira Prabu Brawijaya |
Majapait sabêdhahe | asasaran lumayu | kanthi lawan putra pawèstri |
nama Dyah Namarwulan | karana kang ibu | putrine Sri Brawijaya | kang
panêngran Kusuma Rêtna Marsandi | mêngtas anêmbè seda ||

21. dene Buyut Paningrat ing nguni | yoganira Sang Ajar Parida | trah
Parijaka mulane | katarima sang prabu | duk anggêrit marang wanadri |
cinidrèng duratmaka | kang

--- 209 ---

amangsah kiwul | sira Ki Buyut Tandrêman | awasana kinarya panongsong
aji | yèn nuju acangkrama ||

22. aran Buyut Tandrêman dèn êlih | pinaring aran Buyut Paningrat | basa Paningrat têngêse | panêbar sorotipun | dènnya karyanira nongsongi | lami-lami samana | putrinira prabu | nandhang gêrah kalanglangan | tanpa mêngdha madal sagunging usadi | têngah dadya pratignya ||

23. sing ajanma bisa ngusadani | nora ketang cebol pêpêlikan | apapa longaning bale | ginanjarakên iku | mangka garwanira sayêkti | ya ta Buyut Paningrat | matur sang aprabu | yèn sagah amulyakêna | gêrahipun Sang Putri Rêtna Marsandi | dênira kalanglangan ||

24. wus kalilan lajêng ngusadani | gêrahira purna sanalika | sang dyah tinarimakake | makatên purwanipun | amangsuli lolose nguni | sira Buyut Paningrat | lawan putrinipun | kalunta-lunta ing lampah | prapta ardi Êduk kèndêl amartapi | karênan tèki brangta ||

53. Asmaradana

1. kawuryaning pasang rakit | pantês nggèning mati raga | dadya wau adhêdhepok | sira Ki Buyut Paningrat | kalawan putranira | pinindha wangunanipun | kadi duk nêng Majalêngka ||

2. rinaras sarwa rêspati | estha panggènan pandhita | dènnya ngarêm-arêm tyase | akathah kang tumut wisma | arja kang pakarangan | karan dhukuh Kadilangu | têtis iring Bogawanta ||

3. lèpèn agung langkung wingit | sarêng ing alama-lama | nêdhêng diwasa putrane | samana sawiji dina | sang rara arsa siram | mring kali cêlak ing ngriku | lawan sawangan samudra ||

4. pan kanggenan baya putih | nguni asale manusa | parab Radèn Butaijo | ing Pêngging ingkang pêputra | Sang Prabu Tunjungseta | witing salah warna bajul | anêmahi duka- cipta ||

--- 210 ---

5. angrurah asmarêng bibi | sêlir sêngkêraning rama | siningidakên ing lèpèn | kawênangan rama nata | mung sinung pangandika | bécik têngên pratingkahmu | têtika kadi baya seta ||

6. sanalika anêmahi | ila- ilaning sudarma | salin warna baya putèh | Sang
Aprabu Tunjungseta | tyas giyuh aruhara | garwa pangrêmbe linampus |
sarta linarung ing toya ||

7. wau ta putra kang sisip | dupi wrin yèn salin warna | sadhepok marêk
Sang Katong | matur amêmêlas-arsa | nalangsa rèhing dosa | borong
dènya wèh rahayu | mêmêla minta aksama ||

8. kang rama ngandika aris | iku wus karsaning dewa | tan bisa ngaksama
ingong | ananggung ing wong adosa | mundhak awèh druhaka | kang
putra lingsêm kalangkung | merang anggêbyur ing toya ||

9. anjog sawangan jaladri | têtuka amakayangan | ngratoni baya sakèhe |
jêjuluk Jalasangara | samana ngenggar-enggar | anungsung kali kalantur |
dadya kèndêl asênêtan ||

10. waspada dènya ningali | lamun wontên rare kênya | siram tanpa
rowang ijèn | anglela ing warnanira | ngasorkên langêning rat | bajul
karantan kaladuk | ngewat pangrêmbening rama ||

11. dèrèng marêm ing panggalih | anêmahi durwandawa | salah rupa bajul
putèh | têtamah kapugutan trêсна | akarya larasmara | mangkya ndulu
warnanipun | kusuma yu Namarwulan ||

12. dahat dènya nahên brangti | sang rara nulya sinarap | sang dyah
salin paningale | tan ngrasa sinaut baya | pan wus karsaning Suksma | lir
ingêmban kakung bagus | katon binakta ring wisma ||

13. sang rêtna lumuntur ing sih | pan sampun apulang raras | sang rara
lan baya putèh | sawusnya asmaragama | maring têtèping tirta | byar
puluh paningalipun | kadi nalikarsa siram ||

14. sang rêtna ngungun tan sipi | ciptaning tyas

--- 211 ---

lir supêna | mêngtas kalap panyanane | pinupus wus pasthinira | kêna ing pangrancana | sang dyah rara nulya mantuk | sapraptanira ing wisma ||

15. sarira karaos atis | matrênyuh lêsu alupa | anglong lir nandhang wirangrong | pratandha ngidham kaworan | dungkap ing tigang wulan | rompyoh amêpêk kang bayu | pasang wangune katara ||

16. lamun sang rêtna garbini | kang rama Juru Paningrat | uninga maring putrane | sanalika langkung kagyat | kang putra tinakenan | hèn nini sapa rowangmu | karênan asmaragama ||

17. de sira katon garbini | matura satuhunira | yèn wus padha saarjune | nora luwih wong atuwa | mung mikir kalaksanaan | kang putra tyas kèndêl mangu | pakewêd dènniyarsa wêca ||

18. dadya sinandi ing warti | atur wangsulan ing rama | dhuh rama ing saèstune | kawula lagya kinarya | lampahan dening Dewa | tan wontên rowang rêramuh | mangke anêmahi wawrat ||

19. kang rama jibêg ing galih | tiniti-titi tan wêca | dungkap praptèng sêmayane | sang rêtna ambabar putra | miyos jalu apelag | kang rama nalika ndulu | mring putrèstri langkung merang ||

20. dyan anglampus lêbu gêni | sang dyah kari kawlas-arsa | tinilar rama ibune | anggana datanpa rowang | mung karo ingkang putra | nanging tyasnya wus pinuntu | yèn sampun karsaning Dewa ||

21. kapyarsa ing lambung kering | para wangsa tangga desa | sami amirêng pawartos | yèn sang dyah adarbe putra | langkung kawêlas-arsa | tinilar ing rama ibu | dadya sanak tangga desa ||

22. sadaya sami martuwi | ketang saking kawêlasan | warna-warna pisungsunge | kang amrih dadya ing karya | mungguh ing darbe putra | popok wêdhak wêjah jamu | myang buja saananira ||

--- 212 ---

23. sabên dalu samya kêmit | jalwèstri jagi rumêksa | amurih rèh
karahayon | kawarnaa baya seta | prapta mêmindha janma | pasang
patute dinulu | lir patinggi kamituwa ||

24. pan sarya amawa kanthi | wong pawong batur sakawan | sabên dalu
ing praptane | kalamun wus wanci enjang | wong kang njagi rumêksa |
kêmit lajêng sami mantuk | mring wismane sowang-sowang ||

25. kari wong lima kang maksih | atêngga sang rêtnaning dyah | sasolahe
ngêmu wados | nanging Sang Dyah Namarwulan | miyat patinggi desa |
tan supe ing warnanipun | nguni kang nyidrèng asmara ||

26. dadya rumaos ing galih | yèn punika lakinira | ginumatèn sasukane |
sang kakung kalangkung rêna | sampun ingakên garwa | kanthi kapat
pawong batur | rumanti karyaning wisma ||

27. kang amindha gya mêmêling | hèn yayi wêwêling ingwang | sagung
dangdananing wadon | ywa kongsi ngungkuli priya | kisi lawan likasan |
bêbêthuk sêsaminipun | watêke ngapêskên jaya ||

28. sang dyah mituhu ing wêling | sarêng ing alama-lama | sang rêtna
têka kasupèn | kacarita sang amindha | lawan rowang sakawan | anuju
kalaning dalu | pan samya sakeca nendra ||

29. pan wus karsaning dewa ji | angracut kadibyanira | kasêktène baya
putih | dumadakan ulonira | ana kisi sumêlap | ya ta sarêng enjingipun |
sang amindha kamanusan ||

30. dadya baya putih malih | sabature kapat pisan | samya dadya baya
kabèh | anglênggorong maksih nendra | kang kêmit samya kagyat | alok
samya tandang tulung | bayarsa rinampog kathah ||

31. gugup Rêtna Namarsasi | èngêt wêwêlinging raka | lan sampun
anyipta batos | yèn baya kadadiannya | lakine sarowangnya | tan taha
angêmban sunu | marani ênggoning baya ||

32. sang dyah waspadèng pangèksi | yèn ana kisi sumêlap | saluhuring
ngulon-ulon | kisi dyan

--- 213 ---

ingambil nulya | baya putih gya musna | tan karuwan paranipun | sabature
kapat pisan ||

33. mantuk mring kayangan malih | murcane tilar wasita | hèn yayi aywa
prihatos | sirèki pisah lan ingwang | pan wus karsaning Dewa | amung
anak ingsun iku | arana Jaka Sêngara ||

34. sang dyan mituhu ing wangsit | dahat pangunguning driya | marang
eloking lèlakon | dene wau lakinira | tèka malih buaya | lajêng sirna tan
kadulu | mung mangsit ananing putra ||

35. mupus narima ing takdir | wau sagung kulawangsa | kang tandang
sêdyarsa ngrampog | samya angungun kalintang | kadya wong anyupêna |
laju bubaran umantuk | sang rêtna kari sungkawa ||

36. ya ta ing alami-lami | kang putra Jaka Sêngara | sampun sapangon
wayahe | mêmothah tannya kang rama | ing pundi dunungira | jinatenan
mring kang ibu | yèn kang rama ilang musna ||

37. ana ing bangawan kaki | kang putra langkung sungkawa | dahat
dènira ngrêdatos | dadya tansah amartapa | têpinging Bogawanta | angudi
kaananipun | kang amurwèng roning kamal ||

54. Sinom

1. sira Dyan Jaka Sêngara | dahat dènira marsudi | amêsu mêmasuh raga |
ing dalu pan antuk wangsit | hèn yoganingsun kaki | ingsun sudarmanta
tuhi | pan angung palimarma | margane manggih wirya di | suwitaa
maring nagara ing Dêmak ||

2. kèndêl pajaring wasita | Jaka Sêngara nulya glis | wêwarti mring ibunira
| dahat dènira mambêngi | sarèhning dèrèng wanci | rèhing basa tanggap
tanduk | sira wêton ing desa | kurang umur kurang budi | yèn angabdi
dumadi kurang prayoga ||

3. sira Dyan Jaka Sêngara | tan kêna dèn pêpalangi | nulya nênilib ing
lampah | mangkat tanpa pamit kanthi | kang ibu anututi | saliringan

--- 214 ---

lampahipun | ing tyas wayang-wuyungan | samarga-marga nrang wingit |
amung ketang katongton warnaning putra ||

4. wasana gêrah kasrakat | kataman ing bun-bun atis | têmah milalu sang
rêtna | jumrunuh laju ngêmasi | warnanên kang lumaris | Jaka Sêngara
anglangut | praptane nagri Dêmak | anjujug wisma wadya lit | nêdya
mamèt titine sacara basa ||

5. samana ingkang kanggenan | lajêng nêmah pagêring | akarya boros
malarat | sanggon-nggon ciniri-ciri | dènnya tan mupangati | Jaka Sêngara
milalu | tansah katimplak-timplak | dadya nêmpuh byat tan sipi | pepe
anèng sasoring waringin kêmbat ||

6. pan anuju dintên Soma | jêng sultan miyos tinangkil | waspada dènnya
tumingal | yèn soring waringin rakit | wontên rare kaswasih | kadi pepe
sêmunipun | saksana dyan utusan | kinèn nimbali mangarsi | paran
ingkang dadya darunaning driya ||

7. punang duta nulya mêsat | sawangsulira angirid | rare Ki Jaka Sêngara |
marêk byantaraning aji | dinangu paran kapti | pepe anèng ngalun-alun |
dene tigas kawuryan | sirèku rare ing ngêndi | sêmunira kaya angêmu
sungkawa ||

8. Jaka Sêngara turira | ulun rare kawlasasih | saking Kadilangu desa |
sutanipun tiyang alit | kalêbêt anak yatim | sampun tanpa bapa babu |
dèntên sêdya kawula | pan inggih sêdya angabdi | akêkipu labêting lêbu
paduka ||

9. duk myarsa Sultan Bintara | wêlas dènira ningali | marang Ki Jaka
Sêngara | katampèn dènira ngabdi | pan kinèn jajar linggih | punakawan
kang supênuh | lajêng kondur mring pura | bubar wadya kang anangkil |
kawarnaa wau Ki Jaka Sêngara ||

10. kanggêp dènira suwita | anulya kinarya mantri | sinung nama pun
Hèrmaya | sarêng ing alami-lami |

--- 215 ---

dinuta animbali | mring Ki Tumênggung Mataun | dene nêdya mbalela |
yèn mopo kinèn ngrampungu | kinanthènan wadya prajurit sanambang ||

11. Risang Hèrmaya umangkat | praptane kikis nagari | sagunging prajurit
samyā | kinèn akèndêla baris | Sang Hèrmaya nulya glis | umanjing mring
prajanipun | sampun panggih samana | nandukkèn dinutèng aji | Ki
Tumênggung Mataun atata lênggah ||

12. yèn praptanira dinuta | nênggih kinèn animbali | sarênga salampah
kula | ki tumênggung amangsuli | sandika anglampahi | nanging mangkya
atur ulun | dèrèng sagêd asowan | yèn sampun pinudyèng kapti | yêkti
sowan datan susah tinimbangan ||

13. Hèrmaya duk amiyarsa | alon dènira mangsuli | amalumah aturira |
kawula dinutèng aji | pan sampun dèn dhawuhi | yèn mopo botèn purun |
kalilan ngrampungana | ki tumênggung duk miyarsi | sanalika rêngu ing
sabda drawala ||

14. yèn makatên karsa nata | inggih sumangga ing galih | sami tandhing
kaprawiran | ngadu kadibyaning jurit | Hèrmaya anauri | punapa mantêp
saèstu | dènnya nêdya mbalela | Tumênggung Mataun angling | wus
sinêdya rêringa asil punapa ||

15. Hèrmaya nulya tumêdhak | sêsumbar ngajak prang tandhing | swawi
aywa katanggêlan | rukêt ukêl silih ungkih | nuli nataa baris | amêpaka
gêgamanmu | lah dipun aprayitna | ing sun wus kanthi prajurit | nora suwe
prajanira ing sun rusak ||

16. Hèrmaya ngintar ing lampah | Tumênggung Mataun nuli | parentah
amukul kèndhang | gugup asamêkta sami | gya kinèn anututi | Hèrmaya
ing lampahipun | dènnya kaduk pangucap | sandika kang sinung angling |
sarêng bidhal gumuruh pindha prahara ||

17. wau ta Risang Hèrmaya | praptane panggenan

--- 216 ---

baris | sanalika kinèn budhal | anglarag mungsuhirèki | tanggap kang
sinung angling | pra wadya budhal gumuruh | samya nguswa gégaman |
cundhuk lan mungsuh tan kongsi | atêtannya nulya prang ukêl-ukêlan ||

18. caruk corok liru papan | tandangira nggêgirisi | para prawira ing
Dêmak | lir raksasa mangsa daging | tan wontên ngucap ajrih | sayuk iyêg
sabayantu | wadya ing Mataunan | pindha banthèng tawan kanin |
atêmahan samya akarya pêpêjah ||

19. gantya êlong-ingêlongan | swara lir manêngkêr langit | suraking
wadya kang sura | myang sambating among kanin | tabah-tabahan atri |
gêtêr patêr rug gumuntur | lumintu aputêran | gêtêr kang samya prihatin |
angrêrantam têntre ming kontrang-kantringan ||

20. dangu-dangu tan kuwawa | wadyèng Mataunan kontit | kasor kasêsêr
ing aprang | tan ana kang mangga pulih | labêt karoban tandhing | sira
Tumênggung Mataun | mangsah pêpuluh ing prang | pinêthukakên tumuli |
lan Hèrmaya rame dènnya bandayuda ||

21. samya angagêm kadibyan | rèh kasantikan angênting | tan ana
ingkang kuciwa | caruk rok asilih ungkih | dangu-dangu katitih | sira
Tumênggung Mataun | tinigas murdanira | kapisanan angêmasi | sakarine
wadya anungkul arisan ||

22. lajêng angêngimpu wadya | kang samya anandhang kanin | sadaya
pinrih waluya | wus mulya kadi ing nguni | kumpul sagunging baris |
anulya budhal gumuruh | samarga suka-suka | pradangga anggung
ginêndhing | apratandha yèn mêngtas abandayuda ||

23. sirah munggèng ing gandhaga | ing wuri para kênya di | lawan para
rajabrana | sarwa di maneka warni | tuhu Hèrmaya mantri | pan senapati
pinunjul | agul-aguling aprang | duta tama angentasi | asêmbada taruna
prawirèng yuda ||

--- 217 ---

24. praptane prajèng Bintara | njujug Jêng Sultan Ngawanti | nuju miyos
siniwaka | tinangkil ing pancaniti | matur dènnya tinuding | nimbali Kyai
Tumênggung | Mataun ambalela | dadya pinukul ing jurit | awasana punika
ngaturkên sirah ||

25. tuwin sagung bêboyongan | rajabrana myang pawèstri | jêng sultan
langkung sukanya | dene katuju ing galih | sirnane kang kalilip | sira
Tumênggung Mataun | ing mangkya karsa nata | Hèrmaya kang
anggêntèni | nèng Mataun pan dadya senapati prang ||

26. lênggahe tri èwu karya | sarta sinungan wêwangi | Tumênggung
Jayasêngara | dene bêboyongan sami | rajabrana pawèstri | sadaya kinèn
amandum | ing waradining kanca | prawira kang mêngtas jurit | sirah kinèn
tinanjir anèng ing kana ||

27. dhawuhe sabda narendra | sampun kalaksanan sami | praptane antara
dina | karsanya sri narapati | pan tinariman putri | santana saking ing
Kudus | pan sarêng budhalira | wus kanthi garwa sang putri | angêbrêgi
catune tumênggung lama ||

28. pan wêwah karta raharja | sajênêngira ing nguni | Tumênggung
Jayasêngara | tan ana wong laku juti | sumuyud andêdasih | para
prawirèng Mataun | maring kamudhi anyar | ajrih kadibyaning jurit | duk
samana Tumênggung Jayasêngara ||

29. sanadyan sampun pinatah | nèng Mataun mandhegani | mangka
senapatining prang | maksih andarbèni wajib | sabên miyos tinangkil |
sang nata lajêng supênuh | liyane masa kala | angaturkên ulubêkti |
bangsa rajabranane ing Mataunan ||

30. saya kanggêp aturira | maring Sang Prabu Ngawanti | Tumênggung
Jayasêngara | tansah kinathik sang aji | tumut ngrêmbag nagari | kunêng
gantya kang winuwus | Kyagêng Kêbokênanga |

--- 218 ---

sasedanira ing nguni | ingkang rama Sang Aprabu Dayaningrat ||

31. datan gumantya narendra | kasêmbuh kang ibu lalis | adarbe kadang
sajuga | sêpuh ingkang awêwangi | Kêbokanigarèki | tan saarju karsanipun
| Kyagêng Kêbokênanga | marsudi agama suci | nguni anggêguru Pangran
Sitijênar ||

32. Kyagêng Kêbokanigara | tan arsa milu agami | ngugêmi kabudhanira |
sabêdhahe Majapait | amerang ing panggali | nèng ardi Marapi nglampus
| ari kari anggana | sira Ki Agêng ing Pêngging | tansah dènnya amêmêsu
puja brata ||

33. katarima dening Suksma | karamatira andadi | gya jumênêng wali
nukba | têngêse wali nututi | para wadya ing Pêngging | sih trêsnanira
kalangkung | nadyan tan dadya nata | anggêpe maksih anggusti | labêt
saking ambêk santa paramarta ||

34. ki agêng angèsthi wadat | nalika ari sawiji | kadhatêngan wong bumija
| karan anak Pakne Kadim | ing padhusunanèki | kalêbêt ing tanah Kêdhu |
dene ing praptanira | lan sutanira pun Kadim | parlunira nuwun
kasawaban donga ||

35. waluyane sutanira | ingkang anama pun Kadim | dene anak mung
satunggal | abisu sangkaning alit | wau Ki Agêng Pêngging | andêdonga
ing Hyang Agung | katarima ing puja | saking kodrating Hyang Widhi |
lawan sapangate Kangjêng Rasulu'llah ||

36. amari dènnya camêda | tètèh pangucapirèki | langkung sukur anarima
| dadya wau Pakne Kadim | lawan sutanirèki | anyakabat manjing batur |
mring Ki Gêdhe Kênanga | warnanên ing dintên malih | Kyai Agêng ing
Pêngging tuwi kang raka ||

37. kadang tunggil puruhita | awasta Ki Agêng Tingkir | dhepoke ing ardi
Purwa | wus kadi kadang sajati | labête Kyagêng Pêngging |

--- 219 ---

lola tan darbe sadulur | anèng ing ardi Purwa | lan raka samya marsudi |
sakalihan nêdya anangêtkên kayal ||

38. nuju sare layap-layap | amarêngi tanggal kaping | malêm salikur
Ramêlan | wontên wasita kapyarsi | hêh kulup Gêdhe Pêngging | karsane
Hyang Maha Agung | sira nora kalilan | kapati-pati marsudi | nutugake
nggonira nglakoni wadat ||

39. sabab karsaning Hyang Suksma | pan ing têmebe sira kaki | arsa
nêdhakake nata | linuhur sudibya sêkti | mêngku sanusa Jawi | [...] |[34]
[...] |[35] [...] |[36] [...] ||[37]

40. ing gugur panggonanira | pawèstri kaya sirèki | iya ngèsthi laku wadat
| awit tan apayu laki | anama Rara Alit | marga ala warnanipun | kèndêl
ujaring swara | ki gêdhe jênggirat tangi | ngungun antuk cipta-sasmita
sawantah ||

41. ingkang raka maksihendra | sira Ki Agêng ing Tingkir | gya winungu
sanalika | pan sampun atata linggih | wau Ki Agêng Pêngging | pratela
wêwangsitipun | Ki Agêng Tingkir mojar | hèn yayi sukuring Widhi | sira
antuk nugraha jroning supêna ||

42. ora luwih bokmanawa | iya bisa anartani | kadi kang kocap ing Kur'an |
panjênêngan para nabi | antuk kamulyan jati | tètèh wahananing tutur |
tan ana kang nalimpang | sawartane anêtêpi | Nabi Yusuf lan Nabi Brahim
ing kuna ||

43. payo padha linaksanan | Ki Agêng Pêngging nuruti | ing karsanira kang
raka | dhasar kang dipun labuhi | kang sarira sayêkti | laju tindak kalhipun
| ing wanci bédhug tiga | mituhu ujaring wangsit | ing samarga-marga
anggunng pêpucungan ||

--- 220 ---

55. Pocung[38]

1. lampahipun kang sinêdya maring Gugur | ki agêng kalihnya | sinêrang
dènnya lumaris | ngidul ngetan anjog dhukuh ran ing Sêkar ||

2. kalhipun mampir ngrêrêmakên laku | sampun pinanggihan | lan Ki
Agêng Butuh nguni | amarêngi tinjo Ki Agêng ing Ngêrang ||

3. dadya gupuh sinambroma ing sabda rum | dènnya abipraya | praptane
gita agati | kadingarèn karongron marene padha ||

4. sêmunipun kaya ana karya prêlu | Kyagêng Ardi Purwa | miwah Ki
Agêng ing Pêngging | ngaturakên nalika antuk wasita ||

5. Kya Gêng Butuh langkung suka sukuripun | myang Ki Agêng Ngêrang |
samyang angrangkul kang rayi | yèn mangkono sun jurungi lakunira ||

6. Iya tuduh dèdalan ingkang pakantuk | kang rayi kalihnya | dahat
kapinudyèn kapti | tan antara kacatur anulya mangkat ||

7. gupuh-gupuh gègancangan lampahipun | tan adangu prapta | anèng
wana Jatisari | pan kapapag janma lèlana sakawan ||

8. èstrinipun sawiji katiga jalu | Ki Agêng ing Bêtah | tan samar dènya
ningali | yèn punika kang pinajar ing wasita ||

9. Kyagêng Gugur gya kèndèl dènya lèlaku | Ki Agêng ing Bêtah | lan
sakadangira katri | lajêng nèrang ing karsaning panêmbahan ||

10. sêmunipun kados-kados mawa prêlu | têka rêreyongan | amawi
kadang pawèstri | Panêmbahan Gugur sajarwa ing warta ||

11. dhaup antuk Kyagêng Pêngging wêcanipun | ing tèmbe punika |
nurunkên ratu linuwih | asudibya sumbaga amandraguna ||

12. Kyagêng Butuh duk myarsa suka kalangkung | dene kang wasita |
kalihe kadoradarsi | awasana nanduki sabda la-êla ||

13. dadosipun sami katuju ing ênu | kula lan paduka | pan sampun
karsaning Widhi | kèdah

--- 221 ---

kumpul rêngganging balung apisah ||

14. tan adangu wau Ki Agêng ing Butuh | lajêng apêpajar | Ki Pêngging
sampun sumandhing | sarta Kyai Gêdhe ing Tingkir lan Ngêrang ||

15. sami tumut inggih badhe dhatêng Gugur | mituhu wasita | dene surasane wangsit | datan pae lir sabdane Panêmbahan ||

16. Kyagêng Gugur duk miyarsa langkung sukur | wasana sumangga | saharjune ing panggusti | Kyai Gêdhe ing Butuh alon turira ||

17. kang saèstu pangajape wus panuju | inggih botên ketang | kêcing-kêcing[39] dèn raupi | pamudyane mung angudi kalampahan ||

18. bujêng prêlu puwungan atunggal banyu | yêkti pasang yogya | tan ana winalangati | atut runtut lan têturutaning kuna ||

19. yèn kapetung kumpule salsilahipun | paduka punika | lawan Ki Gêdhe ing Pêngging | apan sawêg apan tumindak nak-sanak ||

20. ibunipun kang nama Ratu Pambayun | garwêng Dayaningrat | narendra adi ing Pêngging | punika pan putrining Sri Brawijaya ||

21. Majalangu dene ramanta ing dangu | Sang Prabu Taruna | Atmawijaya wêwangi | sami putranira Prabu Brawijaya ||

22. nanging sêpuh Pêngging Gêdhe ibunipun | dados kalêrêsan | arinta Dyah Rara Alit | antuk kadang priyangga atêmbung ngakang ||

23. Kyagêng Gugur duk miyarsa mèsêm muwus | e botên kadosa | ki raka karsane Widhi | langkung elok dènnya karya lèlampahan ||

24. têka sunduk sidi adon- adonipun | yèn sampun ginadhang | jêjodhoanira gampil | cêlak têbih pasthi badhe kalampahan ||

25. Kyagêng Butuh gumujêng ngandika arum | yayi pindho karya | saèstu salaki-rabi | wus kapasthi anèng lohkhil-makfulira ||

26. wusnya rêmbug wau Panêmbahan Gugur | binakta mring Bêtah | lan sakadangira sami | duk samana nênggih enggaling carita ||

--- 222 ---

27. praptanipun kêkaitan dintênipun | anikahkên nulya | sira wau Rara Alit
| antuk lawan Ki Gêdhe Kêbokênanga ||

28. Kyagêng Butuh tan kuciwa sêgahipun | maring tamunira | praptaning
kawan dasa ri | Ki Agêng ing Pêngging lan ing Ardi Purwa ||

29. pamit mantuk lawan Ki Agêng ing Gugur | pan sampun linilan |
jinurungan pudyastuti | dening raka ing Butuh lawan ing Ngêrang ||

30. lampahipun asewang-sewangan laku | Ki Kêbokênanga | pan sampun
prapta ing Pêngging | ingkang raka Ki Agêng ing Ardi Purwa ||

31. dèrèng kondur pan angrêrêmakên laku | antuk tigang dina | gya
kondur marang ing Tingkir | kawarnaa Ki Agêng Kêbokênanga ||

32. saya mangsud pratama prastawèng kawruh | nujuwari sajuga |
malêming Anggara Kasih | sabat Pakne Kadim angisêp sarkara ||

56. Dhandhanggula

1. dhuh bandara kang asih ing dasih | kamipurun matur sarasèhan |
nuwun uninga dununge | pralampitaning kawruh | isbat napi amba tan
ngrêti | paran ing wêjangira | ulun nuwun makmum | Ki Agêng Pêngging
ngandika | he rêngênta nalikanira Jêng Nabi | Rasul Nayakaningrat ||

2. wêktu subuh niat satêngahing | takbir ikram myang têkabulira |
pinarêng lan nugrahane | rinilan mêdhar ngèlmu | bangsa tekad têkabul
ngèlmi | ing napi lawan isbat | binabar ing kalbu | ywa kongsi tan mor ing
karsa | rêhning tunggal karya tunggil warni tuwin | amung beda asmanya
||

3. kabèh kalêbu obahing budi | beda-beda lan panunggalira | rêrasan rasa
rungone | pamawasaning kawruh | wruh ing dudu dêduga dadi |
widagdane kasidan | sidik ing pandulu | pandulu dêlênge ilang |
langlangana mêlêng dènira angliling | wêninge ing panunggal ||

--- 223 ---

4. ing nalika Jumungah jêng nabi | lawan para sakabat sakawan | nèng Baitu'llah sabakdane |[40] salat Jumungah laju | arsa mêdhar kawruh kang gaib | wiwite bangsa tekad | catur antêpipun | jêng nabi aris ngandika | hèh ta Umar Abu Bakar Usman Ali | payo padha rêrasan ||

5. kang sun rasa sarahsane ngèlmi | ing Hyang Maha Suci kang anitah | napi isbat prabedane | myang pisah kumpulipun | jroning rasa kawan prakawis | sawiji adhêpira | eklas kalhipun | tri antêp têtêping tekad | kaping pate sampurnanira ing pasthi | wruha bedaning tunggal ||

6. ngawruhana bedane kang napi | ngawruhana bedane kang isbat | paranta mungguh dununge | hèh sakabat-ngong catur | sapakolèh pikirên sami | salah siji kang tanpa | ilhaming Hyang Agung | sukur bage kabèh tanpa | bégjanira ywa kongsi anggendhong pikir | pra sakabat tur sêmbah ||

7. raosing tyas pan dèrèng amanggih | pan sumangga ing Gusti Panutan | abdinta nuwun jarwane | jêng nabi ngandika rum | bangsa tekad samya pinikir | yèn bènêr pirangbara | ing panêmunipun | ing mêngko pan ing sun jarwa | apan nênggih napi isbating Hyang Widhi | antêpe jroning rasa ||

8. waspadakna ananirèng Widhi | panunggale ing rasa punika | saobahe saosike | kalawan wêningipun | yèn wus wêning ananing yêkti | yêktine datan liya | mungguh ing Hyang Agung | pamomore karsanira | ambawani solah-bawanira iki | anglimputi tyasira ||

9. dumununge ana kang ngarani | turu lungguh atangi lumakya | iku ta nugraha lire | upama damar murub | urubira padha madhang | kang padhang iku nyawa | iya kang anglimput | ing sajroning rupa panas | yèku mangka ibarat ingkang wus yêkti | isbate ana sira ||

10. mamanging tyas têtêp isbat yêkti | napèkêna napi kang kisinin | ing awas pamoring gawe | kuwat tumibèng kewuh | jroning amrih antarèng [anta...]

--- 224 ---

[...rèng] pati | pati patitisêna | kang wêning dumunung | isbatina
kaananing dat | rasanira napi tingaling Hyang Widhi | pangêning cipta
maya ||

11. pancadriya driyane kang wêning | nirna mala mêmalaning driya |
idêkên ing bumi sarèh | ririh satiti ruruh | pêtêng rëntên ruktinên kapti |
tratap kêsaring nala | yèku mangka siku | pamurungirèng kasidan | yèn
tan eling awas lawan sipat napi | sipate awasêna ||

12. prabedane lan sawiji-wiji | dat wajibu'lwujud bokmanawa | ing kene
pinarêngake | cipta ingkang tuwajuh | jinatènan jatining jati | jatine
antêpira | dèra Kang Maha Gung | yèku marganing kasidan | widagdane
kandêl-kumandêl ing Widhi | pinandêng kang waspada ||

13. kaanane sêdyanên ing budi | ilapate ing dat kang sanyata | pinta-pinta
panggonane | bangsane isbat iku | napinira pan napi jinis | yèku mangka
panunggal | ing ananirèku | napinira isbatêna | ing tégêse murca
têtunggale dadi | pratandha nèng sihira ||

14. netyanta kang warna kaananing | dat sampurna nur mor ing kang
warna | awênês wêning bedane | dat salikin rumuhun | cahya saking ing
driya adi | lintang panjêr rahina | eram arum-arum | dat mutlak kadi
purnama | dat alimun ing sapanunggale dadi | sawarna lawan sipat ||

15. ilanging êdat asma wahyaning | dat subêkti lir surya warnanya |
muksaning dat subêktine | ing cahyaning dat suhut | angêbêki buwana
kaki | cahya tan ana madha | ing salaminipun | beda lan padhanging surya
| myang padhanging rêmbulan datan amirib | iku padhanging padhang ||

16. kang munggèng jroning padhang kang mêsthi | ananing dat pasthi
ananira | ananira sajatine |

--- 225 ---

ya ananing Hyang Agung | solah tingkah wus datan kalih | iku isbating
nyata | napi wus kapungkur | iku antêpe tyasira | antêp iku pêpadhang
paworing gaib | wong anom dèn waspada ||

57. Sinom

1. paranta ing sabatingwang | Abu Bakar Usman Ali | Umar mara kabèh
samyā | rasakêna rasa iki | thukule ingkang ngokil | pinarêng lawan
panuju | nugrahaning Hyang Suksma | yèn mungguh panêmu mami | sun
sumêndhe ingaran rêh ing kawula ||

2. ing kono manawa ana | panêmu salah sawiji | rujuk lan
panêdyaningwang | sukur bisa anuwuhi | waspadakêna malih | lèlakon
wèntèhanipun | sira padha uruna | kawruh wajib lawan napi | dadi bisa
sampurna kaananira ||

3. wuwuh kandêl-kumandêlnya | sakabat sujud ing siti | satangine sujud
nulya | ndonga sukur ing Hyang Widhi | samya umatur aris | dhuh Gusti
dutèng Hyang Agung | kang mangka nayakaningrat [[41] kang sèstu
panutan mami | dunya khirat kang paring swarga minulya ||

4. langkung gêng ingkang nugraha | mupangat tuan nrambahi | marma
umate sadaya | tangèh sagêde mangsuli | malah miluta saking | dutaning
Hyang sabdanipun | jêng nabi angandika | sukur yèn padha nyadhang |
yèn wus nyata sinêksi padha kadriya ||

5. ing kuna pan durung ana | sêksi masalahing tafsir | sirik sikune jubriya |
rèhning bêborongan budi | wit datan pinarsudi | kawaspadan tuna luput |
cacad marang wêweka | sambikala anasabi | kabêgjane agawe salah
panarka ||

6. dangdanane cipta maya | sangsaya adiyon angling | nglimputi lêbêting
arja | jumênêng manah kang wêning | mênèk manawa dadi | dalam
arjaning tumuwuh | ewuhe wong aulah | kawaspadan maring gaib |
bedanira asring kakênan

--- 226 ---

nugraha ||

7. rarasên ing samadyanya | kewala lair lan batin | antêpira kang santosa |
barang parentah Hyang Widhi | kang dadi lawan tafsir | aja gumingsir ing
kalbu | saobah osikira | pasraha karsaning Widhi | dadi sidik kasidanira
widada ||

8. racutên ing panarima | yèku têtalining eling | lire kabekaning driya |
wus tan ana anglabêti | ing mêngko sun jarwani | lakune ekhlasing kalbu |
napi patang prakara | lawan isbating kang tafsir | wujud ngèlmu nur suhut
napi isbatnya ||

9. dene wujud têngêsira | ya ana ananing Widhi | ngèlmu kawruh têngêsira |
ingkang kawruh ing Hyang Widhi | [...] |[42] [...] |[43] [...] |[44] [...] | [45]
yèku isbat babade kaanan tunggal ||

10. tunggale kaananing Hyang | iya ananira iki | ngawruhi Hyang
kawruhira | cahyaning Hyang Kang Ma Suci | iya cahyanirèki | muklising
Hyang Kang Aluhur | tan ana prabedanya | wruha bedaning atunggil | dadi
têtêp anane Gusti kawula ||

11. pan ing kono patrapira | sejene kawruhirèki | sinandhang iradating
Hyang | sinêrung aralirèki | têngêse angadhang | ing driyanira kang wanuh
| lan pancadriyanira | wèh pantog pêtênging ati | anênulak marang
kawaspadanira ||

12. sarèhna tyas kang santosa | rèhning aral kang ngawruhi | aja
ngêmêng panarima | trimanên ganjaran Widhi | dhaupa myang kèdhèping
| iradatira Hyang Agung | ing kono yèn wus nyata | têtêpe atunggal kapti |
yèku mangka loro-loroning atunggal ||

13. lorone aral kawula | wiji ing ujar sawiji | obah-osiking kawula | mênêng
muni kang awêning | yèn nêmbah lan amuji | tan ana jujuk-jinujuk |

--- 227 ---

pujine mung raharja | raharjane wong sabumi | barang tingkah polah iku
krana Allah ||

14. solah-bawa mêlasarsa | yèn ta ikhlas lair batin | dene têngêse kang
cahya | cahyaning Hyang Kang Ma Suci | kawawa amadhang | jagad cilik
jagad agung | myang Kang Murba Misesa | warna lintang lawan sasi |
kabèh ingkang sumorot cahya Kang Murba ||

15. padha cahya nora kêna | pinapadhan anglimputi | ing alam sahir kabirnya | kang sèstu cahyaning Widhi | sumandhing amadhangi | jagad gung akèh kalimput | momoring cahyanira | prabane sajroning kapti | anrambahi prabaning kang diwangkara ||

16. pira-pira prabawanta | tangi turu mlaku linggih | ya cipta kuwasanira | pribadi ingkang mastuti | têmtu nur-ing Hyang Luwih | dèn waspada ing pangangkuh | kukuhên utamanya | tuman tumêmêning Widhi | satuhune sirèku sarasaning dat ||

17. polah-tingkah saking Allah | ngawruhi bedaning tunggil | rèhning apês duwèkira | ngrasaa lamun antuk sih | sêngsêmana kang yêkti | iradat ingkang saèstu | têka ing ikhlasira | iku bokmanawa kêni | padhang iku pratandha antuk sihira ||

18. ing lohkhil-makful manawa | agung pamoring kalèki | iya têngêse anuksma | sinuksma mungguh Hyang Widhi | dene kang ngati-ati | mring badan têngênnya êmut | laire kawruhana | kawisayaning ngaurip | uripira anane ing sangkanparan ||

19. mangkono bangsaning cahya | dene cahya bangsa napi | sayêktine isbat uga | napine pan napi jinis | pamore bangsa gaib | warnane cahya wêwolu | dene kang catur warna | pratandhanira Hyang Widhi | amobahkên amosikkên ing kawula ||

20. kumalebating kang cahya | pratandha sira antuk [an...]

--- 228 ---

[...tuk] sih | ing Hyang Ingkang Murbèng Alam | tanapi antuk prihatin | tuna kalawan bathi | ing kono pan wus tinêmu | tan kêna tinampika | miwah tan kêna pinilih | tampanana ing nikmat lawan manpang at ||

21. rupa kang catur warnanya | abang irêng kuning putih | iku kodrating kanyatan | mawèh sêngênging ngaurip | obahing bumi langit | siru'llah ing wastanipun | marma sira dèn awas | marwasi ilapat jati | ana manèh kang cahya dadi pratandha ||

22. gêgolongan dèning cahya | tri warna wênês awêning | sajuga jênar pratandha | lara kapenaking dhiri | miwah raharjèng dhiri | dene putih ing

warnèku | mèh tinggal ingkang dunya | dene ingkang warna abrit |
pratandhane elingan sabarang karya ||

23. prananing cahya kang nyata | iku isbat napi jinis | puniku rêncananing
tyas | sring napi jamaning pati | sapisan anèmpèli | ingkang awas ikhlas
emut | wawasên kang waspada | angudi sampurnèng pati | sêdyanira dadi
kanthining Hyang Suksma ||

58. Kinanthi

1. dene lakune ing suhut | suhut têngêse amukhlis | mukhlis wus tan karêm
dunya | tan ana rêrasan malih | nora lara nora êsak | tan suka datan
prihatin ||

2. kaananing Kang Maha Gung | purba wasesaning mukhlis | Hyang
Suksma ndadèkkên alam | myang akarya bumi langit | isèn-isène bawana
| manusa tinitah luwih ||

3. tanpa uni tanpa wujud | ingkang wujud tanpa uni | tan arupa tan
aganda | ana ganda tanpa nami | kang wujud datanpa bawa | ana wuwus
tanpa warni ||

4. kang lungan tan nêdya mantuk | kang mulih tan lunga nguni | warna-
warna titahing Hyang | sinandhang titahing Widhi | sami sinung
kanikmatan |

--- 229 ---

mupangat murahing Widhi ||

5. kabèh rusak yêktinipun | tan ana langgêng sawiji | mung manusa kang
kinarya | tinitah luhur pribadi | ana rusak ana ora | uripe tan owah gingsir
||

6. sajati-jatine iku | Kang Murba Misesèng dasih | tunggal lawan mukhlisira
| tan ana sipat kêkalih | wruha bedaning panunggal | tunggalêna nala
êning ||

7. jatine prabedanipun | mukhlis tinarimaning sih | sihing Hyang marang
ing sira | têngêse panrimanèki | adhêpira ing Hyang Suksma | iku sajatining
mukhlis ||

8. ing kono prabedanipun | barang rêhira atunggil | ywa sira darbe
panyipta | kuwasa wasis pribadi | dèn sukur lawan narima | yèn pinarêng
sihing Widhi ||

9. dadine datan kalawun | kayunira kang lêstari | lêstari pamoring Suksma
| sinuksmanan kang patitis | murwaka purbaning karsa | karyanta tansah
dèn sihi ||

10. sampêt rampunging panurun | Budha Wage nuju ari | ping dwi astha
lèk candrama | Jumadi'lawal kang sasi | Kulawu ing wukunira | masa
Sadha kang lumaris ||

11. sangkalanira pinetung | kêmbat warna ngèsthi janmi [[46] windu Adi
lumaksana | ing Surakarta wêdharing | kang pustaka Walisana | wus titi
tinêdhaksungging ||

--- | ---

ISINIPUN BUKU WALISANA

1. Sinom. Purwaka. Sèch Maulana Ibrahim saking tanah 'Arab lèlana
dumugi nagari Cêmpa, lajêng kamantu dhatêng Raja Kiyan, dhaup kalihan
Rêtna Dyah Siti Asmara, pêputra jalêr kalih, nama Radèn Santri 'Ali
kalihan Radèn Rahmat, lajêng kinadagakên kalihan wayah nata nama
Radèn 'Alim Abu Hurerah, sarta sami winulang agami Islam dhatêng Sèch
Maulana Ibrahim. Kacariyos radèn têtiga sumêdya angajawi.

2. Asmaradana. Radèn têtiga lajêng bidhal nunut baita dagang, wontên
ing sagantên baitanipun kasangsaran, radèn têtiga wilujêng andharat ing
tanah Kamboja.

3. Dhandhanggula. Radèn têtiga anglajêngakên lampah alayar, kampir ing
Palembang, kapanggih kalihan Arya Damar ingkang dados pangagêng ing
Palembang, ing ngriku garwanipun Arya Damar ingkang nama Rêtna
Subanci inggih Sang Raja Putri Cina, tilas pangrêmberipun Sri Brawijaya
ing Majapait ingkang katarimakakên dhatêng Arya Damar sampun

ambêkta wawratan, pinuju ambabar putra jalêr winastan Radèn Praba, sarta lajêng pinaringan nama dening radèn têtiga, pinaraban Radèn Patah, Radèn Kasan inggih Radèn Yusuf. Kacariyos Arya Damar saha garwa sawadya-balanipun lajêng sami ngrasuk agami Islam, radèn têtiga anglajêngakên lampah alayar dhatêng tanah Jawi, sampun dumugi ing tanah Majapait, kapanggih kalihan Patih Gajahmada, lajêng kaunjukakên ing ngarsaning nata.

4. Sinom. Radèn têtiga angunjukakên atur panuwun mugè sang prabu karsa ngrasuk agami Islam, ananging sri narendra botên pinarêng ing karsa, awit taksih puguh anglêluri agamining para lèluhur, amung Sang Pramèswari Dwarawati ingkang karsa ngrasuk agami Islam, radèn têtiga lajêng pinalakramakên sami antuk putra [pu...]

--- ii ---

[...tra] èstrinipun Arya Teja ing Tuban, wusana radèn têtiga lajêng kapasrahakên dhatêng Arya Lêmbusura ing Surabaya sampun katampèn, botên antawis lami Radèn Santri 'Ali kajumênêngakên imam ing Grêsik, nama Raja Pandhita 'Ali Murtala, Radèn Rahmat kajumênêngakên imam ing Surabaya, dèdalêm ing Ngampèldênta, anama Pangeran Katib, karan Susuhunan Ngampèldênta, miwiti jumênêng wali, dene Radèn 'Alim Abu Hurerah kajumênêngakên imam ing Majagung, nama Susuhunan 'Alim ugi karan Susuhunan Majagung.

5. Pucung. Sèch Maulana Iskak, kalêrês ipenipun Sèch Maulana Ibrahim, sampun pêputra kalih sami jalêr, nama Sayid 'Es kalihan Sayid Yakub, Sayid kêkalih wau lajêng angajawi, Sayid 'Es dhatêng Majapait, dene Sayid Yakub dhatêng Balambangan, Sayid 'Es suwita ing Prabu Brawijaya, kapundhut putra kanamakakên Radèn Suta Maharaja, lajêng pamit mundur dhatêng Ngampèldênta, kapanggih kalihan Susuhunan Ngampèldênta, lajêng kajumênêngakên imam ing Dêmak, wontên ing ngriku karan nama Sang Sèch Suta Maharaja. Sayid Yakub sampun dumugi ing Balambangan, lajêng kapundhut mantu dhatêng Prabu Sadmuddha, dhaup kalihan Sang Rêtna Sabodhi, nuntên kaparingan nama Pangeran Radèn Walilanang. Botên lami lajêng tinundhung saking Balambangan, kesah dhatêng Ngampèldênta, tinanggapan dening Susuhunan Ngampèldênta, lajêng kajumênêngakên imam ing Patukangan. Sang Rêtna Sabodhi ing Balambangan ambabar putra jalêr, ingkang ibu seda konduran, jabang bayi linabuh ing sagantên, lajêng pinupu dening Ki Juragan Samboja ing Grêsik, kabêkta mantuk dhatêng ing Tandhês, sarta kanamakakên Radèn Satmata.

6. Asmaradana. Sèch Waliu'lislam, ugi putranipun Sèch Maulana Iskak, saking tanah 'Arab

--- iii ---

angajawi, anjujug ing Ngampèldênta, angsal sihipun Susuhunan Ngampèldênta, lajêng kajumênêngakên imam ing Pasuruhan, nuntên kamantu dening Adipati Pasuruhan, lajêng ngalih padalêman ing Pandhanarang, kapiyarsa Sang Prabu Brawijaya, kalulusakên lênggahipun sarta sinung nama adipati, mêngkoni ing Pandhanarang saha pinardikakakên ngimami ingkang sami kêsdu agami. Sèch Maulana Iskak kanthi putra nama Chalifah Kusèn sami angajawi anjujug ing Ngampèldênta, lajêng tinuduh ing Susuhunan Ngampèldênta, kaaturan angimamana ing Madura saurutipun, sarta amuriha Islamipun Sri Lêmbupêtêng ing Madura, Sayid kêkalih lajêng dhatêng Madura, sakalangkung rinêsepakên dening Sri Lêmbupêtêng, ngantos sami kapundhut ipe, ananging botên lami lajêng sami katundhung saking Madura, Sèch Maulana Iskak lajêng trimah rêrêm wontên tanah ing Malaka, dene Chalifah Kusèn wangsul dhatêng Ngampèldênta. Sri Lêmbupêtêng lampah namur dhatêng Ngampèldênta, sumêdya nyidra Susuhunan Ngampèldênta, nanging kasoran prabawa, wasana Sri Lêmbupêtêng lajêng karsa ngrasuk agami Islam.

7. Sinom. Sri Lêmbupêtêng lajêng kondur dhatêng Madura kadhèrèkakên Chalifah Kusèn, nanging Chalifah Kusèn lajêng lampahipun dhatêng Sumênêp kapanggih kalihan Sri Jaranpanolih, sang prabu sampun kabuka ing galih karsa ngrasuk agami Islam, Chalifah Kusèn lajêng dhatêng Balega, pangagengipun ing Balega ugi lajêng karsa ngrasuk agami Islam, Chalifah Kusèn lajêng têtêp dèdunung ing Madura. Wontên malih putranipun Sèch Maulana Iskak, nama Sèch Maulana Mahribi kalihan Sèch Maulana Garibi, Sèch kêkalih wau saking tanah 'Arab angajawi anjujug ing Ngampèldênta, lajêng sami sinungan dunung, dening Susuhunan Ngampèldênta, Sèch kêkalih sami kinèn

--- iv ---

ngimami ing Bantên, Sèch Maulana Garibi lajêng têtêp wontên ing Bantên, dene Sèch Maulana Mahribi botên kraos wontên ing Bantên nuntên pindhah dhatêng nagari Cêmpa. Sayid Zain saking tanah 'Arab angajawi anjujug ing Ngampèldênta, lajêng tinêdah angimamana ing Cirêbon, Barêbês lan Pajajaran, nuntên adhêdhêkah ing Gunung Jati, lajêng karan Susuhunan Gunung Jati. Sèch Waliu'lislam ingkang ngimami ing Samarang saurutipun (Pandhanarang) sampun pêputra jalêr tiga, nama Sèch Kalkum

kinèn ngimami ing Pakalongan, Sèch 'Abdu'llah kinèn ngimami ing Kèndhal, Sèch 'Abdu'rrahman kinèn ngimami ing Kaliwungu. Wontèn malih Sèch saking tanah 'Arab angajawi, nama Sèch Jamhur 'Alim anjujug ing Ngampèldênta, lajêng tinuduh dening Susuhunan Ngampèldênta, angimamana ing Pajarakan, Radèn Satmata ing Garêsik sampun lola, lajêng pinupu nangkoda ing Benang, nanging botèn dangu lajêng dados tiyang lola malih, nuntèn cobi-cobi alampah dagang, nanging pambekanipun rila lêgawa têmên tarima.

8. Dhandhanggula. Radèn Satmata sampun sagêd ngatingalakên mangunahipun, samangke nêdya alêlana, sadaya barang darbèkipun kadarmakakên dhatêng para rencangipun. Sèch Subabangip saking tanah 'Arab angajawi anjujug ing Ngampèldênta, lajêng kinèn angimami ing tanah Pranaraga saurutipun tanah têngahan.

9. Pangkur. Prabu Andayaningrat ing Pêngging anglurugi Sèch Waliu'lislam ingkang angimami ing Sêmarang, dados prang agêng, wêkasan Sèch Waliu'lislam seda ing paprangan, Sang Sèch Suta Maharaja mangsah pêpulih, ananging karoban lawan lajêng angoncati, dumugi ing Dêmak kasayahan têmahan seda, putrinipun Sèch Waliu'lislam nama Siti Umi Kamsum, sarta putrinipun Sèch Suta Maharaja nama Siti Jenap, sami kapalajêng ngungsi dhatêng ingkang

--- v ---

raka Susuhunan Gunung Jati.

10. Kinanthi. Radèn Patah ing Palembang sampun diwasa, saking karsanipun Arya Damar, Radèn Patah kinèn gumantos kapraboning rama wotèn ing Palembang, nanging sang radèn sangêt pamoponipun, lajêng lolos ing dalu piyambakan tanpa kanthi.

11. Dudukwuluh. Radèn Kusèn, rayinipun Radèn Patah tungguil ibu sanès rama, lajêng nututi lolos, wontèn ing paran sagêd pinanggih, Radèn Patah kalihan Radèn Kusèn lajêng nunut lampahipun Sèch Sabil saking Malaka, sumêdya angajawi badhe suwita Sang Prabu Brawijaya ing Majapait.

12. Sinom. Tiyang agêng têtiga lajêng sami lumampah, angsal parmaning Pangeran sagêd pikantuk nunutan baita nuntèn pangkat alayar, sampun dumugi pasisiripun Surabaya lajêng sami tumêdhak dhatêng Ngampèlgadhing, Radèn Patah sumêdya puruhita dhatêng Susuhunan Katib ing Ngampèldênta, dene Radèn Kusèn kalihan Sèch Sabil

anglajêngakên lampah dhatêng Majapait, Radèn Patah sampun katampèn puruhitanipun dhatêng Susuhunan Katib ing Ngampèldênta. Radèn Kusèn kalihan Sèch Sabil sampun dumugi nagari Majapait, sampun kauningan ing sri narendra.

13. Dhandhanggula. Sri narendra sampun karsa nampèni pasuwitanipun Radèn Kusèn kalihan Sèch Sabil, Radèn Kusèn ginanjar mêngku praja ing Têrung nama Adipati Pêcattandha, dene Sèch Sabil tinuduh kinèn minta prênah dhatêng Ngampèldênta, nuntèn mangkat, dumugi ing Ngampèldênta sampun kapanggih kalihan Susuhunan Katib, lajêng kajumênêngakên imam ing Ngudung, achiripun karan Susuhunan Ngudung. Radèn Patah kamantu ing Kangjêng Susuhunan Ngampèldênta, dhaup kalihan Ratu Panggung. Putranipun Susuhunan Ngampèldênta ingkang pêparab Makdum Ibrahim tinanêm

--- vi ---

ing Benang, lajêng karan Susuhunan Benang. Radèn Satmata saking Benang sumêdya dhatêng 'Arab, kandhêg wontên ing tanah Malaka, kapanggih kalihan Sèch Maulana Iskak ing dhukuh Pase, jêbul punika ingkang eyang piyambak, ingkang wayah lajêng winêjang ing ngèlmi.

14. Gambuh. Wêjanganipun Sèch Maulana Iskak dhatêng ingkang wayah Radèn Satmata, Radèn Satmata lajêng kapurih wangsul dhatêng tanah Jawi, nuntèn mangkat, sadhatêngipun ing tanah Jawi anjujug ing Tandhês, lajêng kamantu kalihan Pangeran Pinatih, sarta kajumênêngakên imam ing Tandhês, jêjuluk Pangeran Chalifah, saha lajêng abêbadra padhepokan wontên ing Giri Gajah Kadhaton.

15. Asmaradana. Pangeran Chalifah apuruhita dhatêng Susuhunan Ngampèldênta, lajêng winêjang ing ngèlmi.

16. Durma. Wêjanganipun Susuhunan Ngampèldênta dhatêng Pangeran Chalifah.

17. Pangkur. Taksih lajêngipun wêjanganipun Susuhunan Ngampèldênta dhatêng Pangeran Chalifah.

18. Sinom. Taksih lajênging wêjanganipun Susuhunan Ngampèldênta dhatêng Pangeran Chalifah lajêng kapundhut mantu dhatêng Jêng Susuhunan, nuntèn kalihan mantuk dhatêng Tandhês, sampun kapanggih

kalihan Pangeran Pinatih, lajêng kajumênêngakên ulu-uluning imam laladan Tandhês Garêsik, botên dangu lajêng kondur dhatêng Giri Gajah Kadhaton.

19. Asmaradana. Pangeran Chalifah lajêng karan Susuhunan Giri Pura. Radèn Sahit, putranipun Tumênggung Wilatikta ing Jêpara, sakalangkung mursalipun, anuju satunggiling dintên ambegal lampahipun Susuhunan Benang, nanging kasoran prabawa, lajêng martobat sarta nyuwun sumêdya puruhita, Radèn Sahit

--- vii ---

kadhawuhan nêngga cisipun Jêng Susuhunan ingkang katancêbakên, botên kalilan kesah manawi Jêng Susuhunan dèrèng rawuh malih. Radèn Patah tinuduh ing Jêng Susuhunan Ngampeldênta, kinèn angênggênana patanahan ing wana Bintara, talatah Dêmak, yèn manggih galagah ingkang angganda arum kadhawuhan andhêkahi, ing têmbe bumi Bintara dados nagari, Radèn Patah sabrayat lajêng mangkat, enggalipun sampun adhêdhêkah wontên ing tanah Galagahwangi, karajanipun sampun karta harja kados praja.

20. Dhandhanggula. Putranipun Susuhunan Ngampeldênta ingkang nama Masakên Mahmud tinuduh ing rama kinèn angimami ing talatahing wukir Muryapada, wontên ing ngriku lajêng nama Susuhunan Darajat. Susuhunan Giri Gajah sampun katingal karamatipun. Susuhunan Benang nuwèni Radèn Sahit, pinanggih sampun prasasat pêjah, lajêng winisik jatiné ngèlmi rasa-sasmita, sarta rinilan kesah saking wana Jatisari, Radèn Sahit lajêng kesah angidêri bumi sarta anglajêngakên lampah amartapa. Sri Brawijaya ing Majapait anduta Adipati Pêcattandha, kinèn animbali tiyang ingkang misuwur winastan Kusuma Sudibya Sakti ingkang dhêdhêkah ing tanah Bintara. Adipati Pêcattandha sawadya-bala bidhal, dumugi laladan Bintara kèndêl masanggrahan.

21. Sinom. Adipati Pêcattandha kintun sêrat dhatêng Radèn Patah, kalampahakên ing duta, Radèn Patah lajêng mangsuli sêrat suraos sagah sowan dhatêng Majapait, Adipati Pêcattandha sawadya-bala lajêng bidhal wangsul dhatêng Majapait.

22. Gambuh. Adipati Pêcattandha sampun unjuk atur uninga ing sri narendra, botên antawis dangu, Radèn Patah sowan dhatêng Majapait, lajêng kajumênêngakên Adipati

--- viii ---

ing Bintara, saha kalilan bidhal wangsul dhatêng Bintara.

23. Pucung. Radèn Sahit tansah pangudinipun dhatêng kanyataan, lajêng anyakabat dhatêng Susuhunan Gunung Jati, saha kapundhut ipe, dhaup kalihan Rêtna Siti Jenab, sarta sinung nama Sèch Malaya, lajêng abêbadra wontên ing dhukuh Kali Jaga.

24. Kinanthi. Susuhunan Gunung Jati amêjang ngèlmi dhatêng Sèch Malaya.

25. Mêgatruh. Lajênging wêjanganipun Susuhunan Gunung Jati dhatêng Sèch Malaya.

26. Sinom. Taksih lajênging wêjanganipun Susuhunan Gunung Jati dhatêng Sèch Malaya. Wusana Sèch Malaya lajêng nyuwun pamit badhe ngupadosi Nabi Kilir, sampun rinilan lajêng lumampah dumugi pasisir Samarang, ing ngriku Nabi Kilir tumêdhak apindha lare bajang, lajêng paring wêjangan dhatêng Sèch Malaya.

27. Pucung. Lajênging wêjanganipun Nabi Kilir dhatêng Sèch Malaya.

28. Gambuh. Taksih lajênging wêjanganipun Nabi Kilir dhatêng Sèch Malaya, sarampinging amêjang, Nabi Kilir musna, Sèch Malaya kondur dhatêng Kali Jaga, lajêng karan Susuhunan Kali Jaga, dados imam agung anrus kadibyaning ngèlmi.

29. Asmaradana. Pratelanipun para wali ing tanah Jawi. Susuhunan Giri Gajah amêjang ngèlmi dhatêng para sakabat, Sèch Sitijênar mancala warni dados cacing kalung tumut amirêngkên wêjangan.

30. Sinom. Wêjanganipun Susuhunan Giri Gajah. Sèch Sitijênar mantuk dhatêng padununganipun, lajêng angubalakên ngèlmi, dados paguroning kathah, misuwur ngantos kamirêngan saking Giri Gajah, Susuhunan Giri Gajah lajêng utusan animbali Sèch Sitijênar badhe kaajak musawaratan ngèlmi, wangsuling

--- ix ---

duta ambêkta wangsulan: Ing kene Sèch Sitijênar ora ana, sing ana mung Pangeran Sajati.

31. Kinanthi. Susuhunan Giri Gajah utusan malih animbali Pangeran Sèch Sitijênar anglêgani, lajêng sami musawaratan wontên ing Giri Gajah.

32. Asmaradana. Wêdharing musawaratanipun para wali, wêkasan Susuhunan Giri Gajah ingkang kawogan anglunas tiyang ingkang murang saraking ngèlmi, nanging taksih kasarantosakên manawi sampun dumugi masa-kalanipun, para wali lajêng pakêmpalan angrêmbag badhe ambêdhah nagari Majapait. Susuhunan Ngampèldênta seda. Susuhunan Giri Gajah kadhaton jumênêng Ratu têtungguling agama, jêjuluk Susuhunan Ratu Tunggul Chalifatu'llah.

33. Sinom. Susuhunan Benang lajêng manggihi Susuhunan Giri Gajah, pitakên sababipun têka lajêng ngakên Ratu, winangsulan yèn saking pakèning Allah, Susuhunan Benang nyuwun tandha kanyataan, Susuhunan Ratu Tunggul lajêng ngajak mangkat dhatêng Mèkah, lajêng sami mangkat numpak kèci, kandhêg wontên tanah Malaka, kapanggih kalihan Sèch Maulana Iskak, Sèch Maulana Iskak kadugi dados saksining Allah.

34. Gambuh. Sèch Maulana Iskak angidèni, Susuhunan Ratu Tunggul ing Giri kabêbahan angratoni sakathahing para mukmin, dene Susuhunan Benang kabêbahan ngratoni agami sarta ngèlmu, sakalihan lajêng kondur dhatêng tanah Jawi, Susuhunan Ratu Tunggul kondur dhatêng Giri Gajah Kadhaton, Susuhunan Benang kondur dhatêng Ngampèldênta, sadumugining Surabaya lajêng nama ratu, jêjuluk Prabu Nyakrakusuma, pêparab Ratu Wadat, Sri Narendra Majapait utusan duta lumampah dhatêng Giri, mundhut tumbal murih sirnaning

--- x ---

dahuru, Susuhunan Ratu Tunggul ing Giri kabaranang duka, wangsulanipun: Yèn Prabu Majapait prapta pribadi, ingsun ya gèlêm angsung.

35. Pangkur. Sri Narendra Majapait utusan anglurugi ing Giri, Susuhunan Ratu Tunggul anyipta kalam panyêratan dados dhuwung ngamuk piyambak, wadya-bala Majapait mundur dhatêng praja. Prabu Anom

Palembang, ingkang dados pêpatihipun Susuhunan Ratu Tunggul ing Giri, sumêdya ambalela ing Kangjêng Susuhunan.

36. Sinom. Pambalelanipun Prabu Anom Palembang, kasor prabawa dening Kangjêng Susuhunan Ratu Tunggul ing Giri, lajêng asrah patobat, achiripun Prabu Anom Palembang kondur dhatêng nagarinipun piyambak ing Palembang. Susuhunan Ratu Giri utusan ambêdhah praja Pathi, dados prang rame, wadya-bala Giri karepotan lajêng mundur. Susuhunan Ratu Giri lajêng utusan ambêdhah praja Tuban.

37. Dhandhanggula. Adipati Tuban botên lumawan pêrang, malah lajêng nungkul aris dhatêng Giri. Susuhunan Ratu Tunggul ing Giri seda, saking karsanipun Susuhunan Benang kalihan Susuhunan Gunung Jati, putra sêpuh nama Pangeran Dalêm kagêntosakên ingkang rama, Sinêbut Susuhunan Giri II. Sri Narendra Majapait utusan malih anggêpuk ing Giri, Susuhunan Giri lolos ngungsi gisiking sagantên, prawira Majapait lajêng angrisak sakathahing griya ing Giri binasmi, pasareyan kuburipun Susuhunan Ratu Giri dhinudhuk, mêdal tawonipun.

38. Durma. Tawon yutan sami ngêntupi wadya-bala Majapait têmahan kagegeran lajêng mundur dhatêng praja, tawon tansah ambujêng ngantos dumugi nagari Majapait, sri narendra sagarwa putra jêngkar mangetan dumugi tanah

--- xi ---

Wirasaba. Susuhunan Giri wangsul kondur dhatêng Giri malih, Sri Brawijaya sampun angadhaton malih. Para wali apêpakan wontên ing Bintara, angênthêlakên rêmbag ambêdhah Majapait, Susuhunan Benang pinatah dados senapatining pêrang, Adipati Bintara minangka narendra, saha lajêng angêdêgakên masjid ing Dêmak.

39. Pangkur. Sèch Malaya anjêjêgakên keblating masjid Dêmak. Susuhunan Ngudung tinêdah nglurug dhatêng Majapait, sawadya-bala sampun bidhal. Ing Majapait sampun siyaga nadhahi dhatênging mêngsah, lajêng prang rame, Susuhunan Ngudung sampun kasambut ing prang mêngsah Adipati Têrung. Sang Adipati Bintara sawadya-bala ingkang sampun kalampahan wontên ing Surabaya, lajêng bidhal dhatêng Majapait. Susuhunan Kudus minangka banjêling senapati, lajêng angêpang nagari Majapait.

40. Durma. Para prawira Majapait mapagakên pêrang, lajêng campuh kalihan para prawira Dêmak, mujijatipun para wali kabèbèrakên, têmahan para prawira Majapait kathah ingkang kasambut ing pêrang, wadya-bala Majapait larut, Sri Brawijaya sagarwa putra jêngkar saking pura lolos dhatêng Pranaraga, nagari Majapait sampun bédhah, Adipati Dêmak ambidhalakên wadya-bala kinèn ambujêng mêngsah dhatêng Pranaraga, dados pêrang malih, ananging wadya-bala Majapait kasêsêr, Sri Brawijaya lolos mangilèn pisah kalihan para garwa putra.

41. Asmaradana. Tindakipun Sri Brawijaya dumugi ardi Sawar laladanipun ardi Sèwu, wontên ing ngriku sang prabu angukud jaganipun têmahan seda, Adipati Bintara kalihan Susuhunan Benang manggih layoning sang prabu, lajêng kabêkta dhatêng Dêmak. Para wali pêpakan lan para narendra, nuntên Susuhunan

--- xii ---

Giri Pura kajumênêngakên nata, ing Dêmak dipun lih nama Nagari Ngawantipura, sarêng sampun kalampahan 40 dintên, Sang Adipati Bintara ingkang gumantos kaprabonipun, jêjuluk Sultan Syah 'Alam Akbar. Ing Majapait, Prabu Anom Atmawijaya taksih sumêdya ngêkahi karaton, kabiyanu Adipati Têrung, kapiyarsa saking Dêmak, lajêng linurugan dening Senapati Susuhunan Kudus, dados prang rame, wadya-bala Majapait karoban lawan, Adipati Pêcattandha lumèrèg pacak baris wontên ing Têrung, dene Prabu Anom Atmawijaya lolos mangilèn, lajêng adhêdhêkah ing ardi Lawu, kasêbut Ki Agêng Gugur.

42. Mijil. Susuhunan Kudus anglurugi ing Têrung, Adipati Pêcattandha lajêng nungkul aris, nuntên sami bidhal dhatêng Dêmak, sadumuginipun Dêmak sampun sami marêk ing ngarsanipun Kangjêng Sultan, Adipati Pêcattandha kalêstarèkakên têtêpipun dados Adipati ing Têrung, putrinipun Adipati Têrung kapundhut ing nata, lajêng kaganjarakên Susuhunan Kudus.

43. Sinom. Cariyosipun Ki Agêng Sela. Cariyosipun Pangeran Panggung, misuwur dados paguroning kathah, kapiyarsa saking Dêmak, lajêng katimbalan ing ngarsanipun Jêng Sultan, nuntên sami sarasehan ngèlmi.

44. Asmaradana. Pangeran Panggung amêdharakên sorahing ngèlmi wontên ngarsanipun Jêng Sultan Dêmak.

45. Mijil. Taksih lajênging sêsorahipun Pangeran Panggung, Sultan Dêmak karsa angyêktosakên tekad ingkang prêmati, Pangeran Panggung lajêng lumêbêt ing latu murub, wontên salêbêting latu murub wau lajêng lênggah kalihan nyêrat anggitanipun sêrat suluk Malangsumirang.

46. Dhandhanggula. Sêrat suluk Malangsumirang

--- xiii ---

sêkar Dhandhanggula 27 pada, ngêwrat kawruh ananing kajatên. Pangeran Panggung mêdal saking latu murub kalihan mundhi sêrat anggitanipun, pinapagakên dening Jêng Sultan sarta para Wali.

47. Sinom. Sêrat suluk sampun katur Jêng Sultan, Pangeran Panggung lajêng kesah saking nagari Dêmak, Jêng Sultan sarta para Wali sami anyuraos maksudipun sêrat suluk Malangsumirang. Pangeran Panggung lajêng dipun upadosi sampun kapanggih, nuntên kagolongakên para Wali, santun nama Susuhunan Gêsêng.

48. Asmaradana. Para Wali sami anganggit lagunipun tênggah Macapat, sarta sêrat-sêrat Jawi, kados ta: Walisana, Pawukon, Kidungan, Cariyosipun Ki Sutakara, Jaka Sumantri, punapadene nganggit namaning taun, wulan, windu, churuf, tuwin sawarnining petang-petang.

49. Gambuh. Taksih lajêngipun para Wali sami nganggit laguning tênggah Macapat, sarta sêrat-sêrat Jawi: salasilahing Karaton Pajajaran, Cariyosipun Jaka Sujanma, Himpunan Wêjanganipun Para Wali ginêlêng dados sawirid.

50. Sinom. Taksih lajêngipun Himpunan Wirid. Sultan Binatara mêmahi wêwaton nukilan saking Kuran.

51. Kinanthi. Taksih lajêngipun wêwaton nukilan saking Kuran. Gêntos anyariyosakên lênggahanipun Sêch Sitijênar, Sêch Sitijênar katimbalan dhatêng dhatêng ing Giri, dening para Wali, tinodhi mênggah ingkang dados kantêpaning tekadipun, botên ewah kados tekadipun ing ngajêng, Sêch Sitijênar lajêng kinisas sampun dumugi ing sedanipun, atilar wasita jati, para sakabatipun Sêch Sitijênar tiyang pitu sami bela pêjah.

52. Dhandhanggula. Rabinipun Sêch Sitijênar

--- xiv ---

botên narimahakên pêjahing lakinipun, lajêng dipun imur dening Susuhunan Giri dados ing panarimahipun. Susuhunan Kalijaga pindhah padalêman dhatêng ing Kadilangu. Lêlampahanipun Buyut Paningrat sarta putranipun pawèstri nama Dyah Namarwulan, sabêdhahing nagari Majapait kalunta-lunta lolosipun dumugi ing ardi Êduk.

53. Asmaradana. Buyut Paningrat kalihan putranipun pawèstri Dyah Namarwulan adhêdhukuh wontên ing Kadilangu, Sang Dyah pinulangraras dening Jalasangara, apêputra Jaka Sangara.

54. Sinom. Jaka Sangara suwita dhatêng Dêmak, pinangkat mantri nama Hèrmaya, lajêng linurugakên dhatêng Matahun angsal damêl, Hèrmaya kagêntosakên wontên ing Matahun dados Senapati, nama Tumênggung Jaya Sangara. Cariyosipun Ki Agêng Kêbokênanga ing Pêngging, kacariyos, Ki Agêng Pêngging pinuju tuwi ingkang raka tunggil paguron, nama Ki Agêng Tingkir ingkang adhêdhepok ing ardi Purwa, wontên ing Ardi Purwa Ki Agêng Pêngging nuju sare layap-layap wontên wasita kapiyarsa, ujaring wasita Ki Agêng Pêngging winêca badhe anurunakên Ratu, mêngku sapulo Jawi, sarananipun kédah palakrama angsal Rara Alit ing Gugur, Ki Agêng kêkalih lajêng tindak sumêdya dhatêng ing Gugur.

55. Pucung. Lampahipun Ki Agêng Pêngging kalihan Ki Agêng Tingkir dumugi ing dhukuh Sêkar, kapanggih kalihan Ki Agêng Butuh lan Ki Agêng Ngêrang. Ki Agêng sakawan sêsarêngan anglajêngakên lampah, dumugi wana Jatisari kapapag kalihan Ki Agêng Gugur lan sadhèrèkipun nèm pawèstri Rara Alit sarta kadang jalêr kalih, sasampunipun sarêmbag, Ki Agêng Gugur sakadang lajêng kabêkta dhatêng Butuh, wontên ing ngriku panikahipun [panikah...]

--- xv ---

[...ipun] Rara Alit angsal Ki Agêng Kêbokênanga ing Pêngging, sarampunging prêlu lajêng sami sowang-sowang kondur.

56. Dhandhanggula. Ki Agêng Pêngging awêwarah dhatêng sakabatipun nama Pak Kadim, bab kawruh napi lan isbat, mên dhêt pêpiridan saking pangandikanipun Kangjêng Nabi Muchammad dhatêng para sakabat.

57. Sinom. Taksih lajêngipun wêwarah pêpiridan saking Kadis.

58. Kinanthi. Taksih lajênging wêwarah pêpiridan saking Kadis. Titi-masa rampunging panurun ing taun Jawi angka 1842.

Perc: DJAJA: Sragen - Solo

1. lambunge. (kembali)
2. Kurang satu suku kata: wadya Dêmak sarêng miyat. (kembali)
3. prawira. (kembali)
4. pramudhita. (kembali)
5. pupoh. (kembali)
6. Kurang satu suku kata: wadyanira kasor ing ajurit. (kembali)
7. bëndhe. (kembali)
8. Lebih satu suku kata: mring dhukuh Pakèringan. (kembali)
9. jalu. (kembali)
10. nyarah. (kembali)
11. rakangatin. (kembali)
12. kukuma. (kembali)
13. pambrangusing. (kembali)
14. Lebih satu suku kata: nulya kuruf Isniniyah. (kembali)
15. Lebih satu suku kata: srat Pal nabi pamirite. (kembali)
16. Lebih satu suku kata: ing dalêm Betal ma'mur. (kembali)
17. Lebih satu suku kata: dalêm Baital muharram. (kembali)
18. Lebih satu suku kata: Betal mukaddas jronipun. (kembali)
19. Lebih satu suku kata: ing dalêm Betal makmuri. (kembali)
20. Lebih satu suku kata: ing Betal muharrami. (kembali)
21. Lebih satu suku kata: dalêm Betal mukaddasi. (kembali)
22. êrabe (dan di tempat lain). (kembali)
23. Lebih dua suku kata: êrabe Kur'an pan dadi. (kembali)
24. Lebih satu suku kata: yêkti saking Betal ma'mur. (kembali)
25. Lebih satu suku kata: lawan Betal muharram. (kembali)
26. Lebih satu suku kata: têlu Betal mukaddasi. (kembali)
27. Baca: za'. (kembali)
28. Bait ini dan seterusnya sampai dengan Pupuh Dhandhanggula bait 1-16 sama dengan Seh Sitijenar Pupuh Kinanthi (pupuh V) bait 1-37 dan Dhandhanggula bait 1-16. (kembali)
29. tan. (kembali)
30. sangsara. (kembali)
31. wikani. (kembali)
32. pênguk. (kembali)
33. lan. (kembali)
34. Baris ke-6 tidak ada: 8u. (kembali)

35. Baris ke-7 tidak ada: 7a. (kembali)
36. Baris ke-8 tidak ada: 8i. (kembali)
37. Baris ke-9 tidak ada: 12a. (kembali)
38. Teks asli: Pucung. (kembali)
39. kucing-kucing. (kembali)
40. Lebih satu suku kata: nèng Betulah sabakdane. (kembali)
41. Lebih satu suku kata: mangka nayakaningrat. (kembali)
42. Baris ke-5 tidak ada: 7i. (kembali)
43. Baris ke-6 tidak ada: 8u. (kembali)
44. Baris ke-7 tidak ada: 7a. (kembali)
45. Baris ke-8 tidak ada: 8i. (kembali)
46. § (Taun Jawi Jimakhir 1842, Masèhi 15 Mèi 1912). [Sengkalan: kêmbar warna ngèsthi janmi (Rêbo Wage, 28 Jumadilawal 1842 A.J., Rabu, 15 Mei 1912 A.D.)]. (kembali)